

MİHNETKEŞÂN

- 1 *Be-bismillâh âgâz-ı destân kunem
Be-bâyeş künûn feth-i unvân kunem*
- 2 *Şud ez-şâne-i sîn dendânehâş
Kadî şâne-i dîn der-dânehâş*
- 3 *Buved her elif serv-i tûbî-hırâm
Ki ber-vey nişîned tezerv-i kelâm*
- 4 *Ez-ân turre-i lâmhâyeş ayân
Hacil gîsu-yı hûriyân-ı cinân*
- 5 *Dü çeşm-i meh ü mihr hayran şude
Zi-hâyeş ki çeşmek-zen-i can şude*
- 6 *Heman-râ ki der-cân-ı arş enderest
Künûn ser-be-pây-ı der-i Hayderest*
- 7 *Zi-gülzârâ çünki ser gonçe zed
Be-gülzâr-ı cennât ser-pençe zed*
- 8 *Çü bi 'şnîd Âdem be-dünyâ cinân
Zi-cennât bü 'gzeşt ez-şevk-i ân*
- 9 *Be-mâhî-i nûneş nihân Yûnisest
Ez-ân nokta-i vahdeteş mûnisest*
- 10 *Buved yâ-yı û bahr-i gerdûn habâb
Ki der-vey nihânest dü âfitâb*
- 11 *Zi-hurşîd-i gerdûn münevver cihân
Münevver zi-hurşîd-i îñ cism ü cân*
- 12 *Buved halka-i mîm-i û hâtemî
Ki Ahmed ez-û yâfte hâtemî*

Der-nat-ı Bârî azze'smehu

- 13 *Be-nâm-ı enîs-i dil-i bî-kesân
Bihîn merhem-i derd-i mihnet-keşân*
- 14 *Hakîmî ki dermân-ı illet ez-üst
Kerîmî ki dermân-ı devlet ez-üst*
- 15 *Nigârende-i îñ serây-ı kühen
Ber-ârende-i âsiyâ-yı mihen*
- 16 *Tarâvet-fezây-ı nihâl-i “belâ”
Mehâbet-nümây-ı “velâ takrebâ”*
- 17 *Cinândan odur Âdem’i bezdiren
Odur Nûh'a deryâları gezdiren*
- 18 *Eder çâha üftâde siddîkını*

- Verir der-akab delv-i tevfkını
- 19 Veren Yûsuf'u hem alan kendidir
Hırîdârı kendi satan kendidir
- 20 Nihâl-i kirâsa verip terbiyet
Eder sonra kûta anı takviyet
- 21 Kılıp ebr-i nîsân ile ber-murâd
Eder kiştzârı gıdâ-yı cerâd
- 22 Verir kendi emri ile hûşe tÂk
Kimin bâde eyler kimin hall-i pâk
- 23 Kimin mest-i sahbâ-yı ikbâl eder
Kimin teşne-i âb-ı âmâl eder
- 24 Kimi çâr-bâliş-nişîn-i huzûr
Kimi diz çöküp çekmede yâ Sabûr
- 25 Ne eylerse eyler odur muktedir
Eder hikmeti hikmetin müstetir
- 26 Efendi ne isterse etmek gerek
Kuluz biz düşer mi suâl eylemek
- 27 Ne mümkün ki bilsin muhîti muhât
Degildir anın kârı akla menât
- 28 Bilinmez bilinmez murâd-ı Hudâ
Hemân eyle Lâ-yüsel'e iktifâ
- 29 *Be-yek lafz-i kün şud kitâb-ı vücûd
Be-yek rişte şîrâze bended şühûd*
- 30 *Heme bâtilânîm hak zât-ı üst
Çi kereded merâ düşmenân üst dost*
- Münâcât der-zikr-i fenâ-yı âlem**
- 31 *Cihân bârgâh-ı hezârân şehîst
Der-û tekye kerden zehî eblehîst*
- 32 *Me-cû nân ez-în sufre-i ser-nigûn
Bi-şû dest-i h'âhiş zi-enâm-ı hun*
- 33 *Çü mihmân fütâdî be-şahs-ı denî
Hemân bâyedet sûret-i reftenî*
- 34 *Felek çeşm-i dâm-ı dem-i âdemî
Be-hayvân ne-y-âyed der-û hurremî*
- 35 *Nihâlî ne-dîde der-în bûstân
Safâ-yı bahâreş zi-fikr-i hazân*
- 36 *Harâmî-i îr-râh der-mahmilest
Selâmet zi-düzd-i karîn müşkilest*

- 37 *Der-în vartageh istirâhat me-h'âh
Tu h'âhî selâmet selâmet me-h'âh*
- 38 *Firâz-ı emel bes ki tay kerdeem
Kadem ber-serem şud serem ber-kadem*
- 39 *Muhîti ki didem serâyî nümûd
Be-sahrâ devîdem ne-dânî nümûd*
- 40 *Be-fikr-i sevâd-ı hat-ı mehveşân
Der-endek zamân rîş-i men şud ketân*
- 41 *Ne-mânde der-în destgâh-ı kesel
Cüz-ez penbe-i mû be-dest-i emel*
- 42 *Bahârem be-berg-i tahammül gûzeşt
Hazânem be-terk-i tecemmül gûzeşt*
- 43 *Şitâ âmedest ü ne huşk ü ne ter
Der-în bâğ-ı fânî ne-mândem eser*
- 44 *Ne zikr-i meâd u ne fikr-i maâş
Ne dünyâ ne ukbâ ne-kerdem telâş*
- 45 *Îlâhî ecib davetü't-tâibîn
Recanâ ilâ Rabbenâ hâibîn*
- 46 *Îlâhî Îlâhî inâyet zi-tu
Der-în râh-ı vahşet selâmet zi-tu*
- 47 *Îlâhî Îlâhî Îlâhî meded
Be-hüsn-i Muhammed be-aşk-ı Ahad*
- 48 *Hemî men ne-dânem tu dâni heme
Ki men nâ-tüvânem tüvânî heme*
- Der nat-ı eşref-i kâinât aleyhi't-tahiyyât**
- 49 *Muhammed ki tâc-ı ser-i enbiyâst
Nuhustîn dür-i kulzüm-i Kibriyâst*
- 50 *Muhammed ki Îsî ez-û rûh yâft
Halâsî ez-û keştî-i Nûh yâft*
- 51 *Muhammed pes âmed pes âmed velî
Çerâğ-ı nübüvvet ez-û şud celî*
- 52 *Me-şev İzzet ez-gerd-i gam hâksâr
Cefâ-yı şeh-i enbiyâ-râ şümâr*
- 53 *Delîl-i garîbân habîb-i Hudâst
Heme derd-râ tesliyet Mustafâst*
- 54 *Be-Yesrib muhâcir şude Mustafâ
Merâ endek âyed çün-în ibtilâ*
- 55 *Habîb-i Hudâ çün cefâhâ keşîd
Cefâ sünnet âmed be-ümmet resîd*

- 56 Habîb-i Hudâ Mustafâ olmasa
Eğer bizlere muktedâ olmasa
- 57 Tutup âlemi nâr-ı zât-ı vakûd
Acırdı bize kavm-i Âd u Semûd
- 58 Odur mücrime mültecâ vü zahîr
Odur düşkün ümmetlere dest-gîr
- 59 Anın kapısıdır penâh u melâz
O derden kovulmak ne güç el-ıyâz
- 60 Beni afv ederse resûl-i güzîn
Vekîlidir anın şehinşâh-ı dîn
- 61 O da cürmümü bahş edip şâd eder
Bu dünyâ cahîminden âzâd eder
- 62 Cilâ gitmiş idi bu âyîneden
Bana lâzım oldu celâ-yı vatan
- 63 Kararmışdı kalbim cehennem gibi
Kurulmuşdu mey-hânede Cem gibi
- 64 Ana fart-ı isyânım oldu sebep
Maâsîde tugyânım oldu sebep
- 65 *İlâhî ilâhî günâhem me-pürs
Be-deryâ-yı isyân şinâhem me-pürs*
- 66 *Salâtem resân yâ İlâhe'l-enâm
Be-rûh-ı Muhammed aleyhi's-selâm*
- Der-menkabet-i çâr-yâr-ı güzîn
rızvana'llâhu aleyhim ecmaîn**
- 67 Ebû Bekr-i Sıddîk-i yâr-ı atîk
Odur “iz hümâ” lânesinde refîk
- 68 Resûlün sarâyındadır duhteri
Sipîhr-i risâletdedir ahteri
- 69 Habîb-i Hudânın habîbi ola
Habîb-i Hudâdır denilse nola
- 70 Buyurdu anın hakkına Mustafâ
Eğer olmasam hâtemü'l-enbiyâ
- 71 Ebû Bekr olurdu nebî lâ-cerem
K'odur azam-ı evliyâ-yı ümem
- 72 Hudâvend-i dîger cenâb-ı Ömer
“Le-amrük”deki nükte-i muteber
- 73 Bahâr-ı çemen-suffe-i müminîn
Anın ile oldu tamâm erbaîn
- 74 Dem-i tîgi güller açıp her taraf

- O etdi şitâ-yı gamı ber-araf
- 75 Odur hânumân-sûz-ı ehl-i nifâk
Cenâb-ı Alî ile bi'l-ittifâk
- 76 Sipîhr-i safâda üçüncü güneş
Anın nûruna mihr ü mâh olmaz eş
- 77 Kelâm-ı Hudâyı çekip rişteye
Odur benzedeni anı gül-desteye
- 78 Okurken şehîd eyledi bir leîm
Anın şâhididir kitâb-ı kerîm
- 79 Odur İbni Affân-ı sâhib-hayâ
Odur gonçe-i sûrh-i bâğ-ı vefâ
- 80 Cenâb-ı Alî çârüm-i asfiyâ
Muhammed gibi hâtem-i evliyâ
- 81 Hilâfetde gerçi nihâyetdedir
Velî kadri sadr-ı bidâyetdedir
- 82 Odur hem-ser-i duhter-i Mustafâ
Odur âl ü evlâdına pîşvâ
- 83 Odur Müctebâ vü odur Murtazâ
Odur mühtedâ vü odur muktedâ
- 84 Kilâb-ı deriyle olunsam şümâr
Yeter iki âlemde ol iftihâr
- 85 *Heme bâd ez-men salât ü selâm
Be-âl-i nebiyy ü be-sahb-ı kirâm*
- Der-midhat-i sultân-ı cihân edâma'llâhu iclâlehu**
- 86 *Duâ-yı hıdîv-i zamân lâzimest
Eğer âdilî vü eğer zâlimest*
- 87 Husûsâ ki dîndâr u âdil ola
Şehenşâh-ı asra muâdil ola
- 88 Duâsı anın farz olur âleme
Edâsı hemân karz olur âleme
- 89 Odur Hân Mahmûd-ı gîtî-sitân
Odur Kahramân-rezm ü sâhib-kırân
- 90 Mücâhid şehenşâh-ı gâzîdir ol
Mülûk-i cihân ser-firâzıdır ol
- 91 Letâfetle halk eyleyip ibtidâ
Zarâfetle perverde etmiş Hudâ
- 92 Gül-i bâğ-ı şevket ruh-ı alıdır
Melekler kıyâs etme emsâlidir
- 93 Hümâ sorgucun görse cevher-nişân

- Olur ana cân vermege per-feşân
- 94 Şerefdir sipihre eğer bassa pâ
Edîm-i hamel mesti olsa sezâ
- 95 Ser-â-pâ o şâhın zemîn bendeşi
Felek lutf u ihsânı şermendesî
- 96 Felâtûn-hired şâh-ı Ristû-pesend
Tehemten-zafer Rüstem-i dîv-bend
- 97 Muhabbet mehâbet olup yek-mizâc
O hâkân ile eylemiş imtizâc
- 98 İnâyetde bezmi Süleymân gibi
Şecâatde rezmi Nerîmân gibi
- 99 Ger eylerse kahrı ile terbiyet
Verir lutf ile der-akab tesliyet
- 100 O şâhın bu günlerde seyyâhıyım
Yine ömrüm oldukça meddâhıyım
- 101 Usûlü bozarsa eğer nâşidi
Seyâhat verir der-akab mürşidi
- 102 Tegayyür gelirse o dervîşe ger
Olur zikr ü fikri hebâ vü heder
- 103 Hudâ ömrünün bir günün bin ede
Gele bendeler nefy olup hem gide
- 104 Edip sâyebân üstüne gölgesin
Varıp seyr ede kulları ülkesin
- Âgâz-ı destân ve şikâyet ez-cihân**
- 105 Benim ile derd ortağıdır kalem
Nola ser-güzeştim ederse rakam
- 106 Galata kazâsında hâkim idim
Ne sâhib-adâlet ne zâlim idim
- 107 Edip dûdmân-ı kazâ iltihâb
Tutuşdu bizim dâmen-i intisâb
- 108 Ne hâlet ise oldu ol ber-araf
Yine kavlı-âlem olup muhtelef
- 109 Kimi der kim urma kimi der kim ur
Adûlarda hiç yok idi tur otur
- 110 Kimi der ki yüz mü düyûnu aceb
Bolay kim çekeydi o yüzden taab
- 111 Kimi der ki nefy eylemişler bugün
Kimi der götürdü çavuş anı dün

- 112 Kimi der ki dün ağzını kokladım
Bakalım ne dermiş diyü yokladım
- 113 Kimi der ki aslâ degil hâceti
Yerinde herîfin yine devleti
- 114 Mecâlisde nefyim havâdis idi
Benim kîl ü kâlim mebâhis idi
- 115 Beş ay böyle etdi zamânım mürûr
O pençe bana haylice verdi zûr
- 116 Bana şâh-ı âlem kerem eyledi
Cihânı bu illet verem eyledi
- 117 Fakat ben mi gördüm o şehden kerem
Odur kâinâta veliyyü'n-niam
- 118 Sözüm yok hased eylese şâirân
Neden hasmım oldu biraz kaltabân
- 119 Kaçıp gitdim İstavroz'a bir zamân
Yine kalmadı bildiginden cihân
- 120 Sükût eyledim kahrı var dediler
Biraz söyledim zahrı var dediler
- 121 Şaşırdım hulâsa pes ü pîşimi
Bırakdım Hudâya bütün işimi
- 122 Dedim ey hudâvend-i bî-kes-nevâz
Benim etdigime göre bunlar az
- 123 Velâkin cihâna ne tavr eyledim
Sitanbulluya ben ne cevî eyledim
- 124 Kimin hânesin eyledim târ u mâr
Neden bu belâyâ ben oldum dûçâr
- 125 Çalışdım ne münkirlerin defîne
Savaşdım niçe şerlerin refîne
- 126 Neler çekdigim Hak taâlâ bilir
Birazın dahı halk-ı dünyâ bilir
- 127 Yedim Hâlet'in nân-ı ihsânını
Çalışdım halâs etmege cânını
- 128 Kaderle meğer pençeleşmek imiş
Demir pehlevânla güleşmek imiş
- Zuhûr-ı ba'z-ı etvâr ve mukaddime-i idbâr**
- 129 Düzoglu mezâdında bî-kizb ü lâf
Sorun halka varsa bu sözde hilâf
- 130 Cevâhir çalıp göz göre sayrafi
Pür olmuşdu sîm ü zer ile kefi

- 131 Efendi o meclisde hâzır idi
Fakat âh eden gizli nâzır idi
- 132 Görüp anı merhûma verdim haber
Hudûs etdi andan niçe dürlü şer
- 133 Kabardıkça kirpi gibi dest-mâl
Atardı bana nâvek-i infiâl
- 134 İşâret edip nâzır-ı hayr-h'âh
Bir ağızdan eylerdik anınla âh
- 135 Edip Ahmed Ağa ile ittifâk
Yahûdî bizi etdi gamz u nifâk
- 136 Niçe iftirâlar edip nâzıra
Dürûg idi bi'l-cümle Hak hâzır a
- 137 Ne bühtânlar eyleyip bî-hilâf
Girip araya verdiler ihtilâf
- 138 Yahûdîye Ahmed Ağa vâsıta
Verirlerdi tezvîre hoş râbıta
- 139 Bozuşdurdular anı merhûm ile
Bir oldu Yahûdî o mezmûm ile
- 140 Alıp mâl ü emlâkini soydular
Benim gibi uryân-ten koydular
- 141 Olup surre-i şehriyâra emîn
Halâs etdi cânın o dürr-i semîn
- 142 Bu yolda telef oldu Osmân Ağa
O da düzde etmiş meğer iftirâ
- 143 O üç tug ile kendin etdi halâs
Bu bî-çâreye yokdu cây-ı menâs
- 144 Çeh-i kizbe düşdüm sadâkat ile
İki sâl geçdi bu hâlet ile
- 145 Usât-ı reâyâ edince zuhûr
Tükendi efendide akl u şuûr
- 146 Süleymân gibi geh sefer-ber olup
Gehî mûrlar ile ber-â-ber olup
- 147 Tedâbîr-i mekrûhaya başladı
Ne söylersem âteş gibi haşladı
- 148 Benim gibi âlemde var mı cesûr
Taâruzda hîç etmemişdim kusûr
- 149 Ağır geldi merhûma hakk-ı kelâm
Hemân eyledi nefyime ihtimâm

- 150 Varıp müfti-i vakte gamz eyledi
Sarâhatledir sanma remz eyledi
- 151 Bana şeyhüislâm pend eyleyip
İtâbı reh-i nutku bend eyleyip
- 152 Müdârâya mecbûr olup âkıbet
Verirdim hoş-âmed ile tesliyet
- 153 Hudâ kârını etdi anın tamâm
Nola biz de çeksek ziyân bî-kelâm
- 154 Sebeb intisâbım olup Hâlet'e
Düşürdü felek böyle bir mihnete
- 155 Yine vardır işte kibâr-ı zamân
Tükenmez ya devletde nimetle nân
- 156 Aceb kimse etmez mi ihsân ümîd
Cihânda kerem oldu mu nâ-bedîd
- 157 O dergâh-ı cûdu gelip Kabevâr
Tavâf eylemişdi ricâl ü kibâr
- 158 Fakat bana azv etdiler töhmeti
Keşân-ber-keşân çekdiler İzzet'i
- 159 Düşüp ardıma bir alay hâinân
Elimde ne degnek var idi ne nân
- 160 Zebânımla tarîze mecbûr olup
Bu kilik-i siyehkâra mağrûr olup
- 161 Degildi sözüm devlete itirâz
Edenler de varsa bula inkırâz
- 162 Yalan yanlış etdik biraz güft-gû
Adûlar da etdi verâdan gulû
- 163 Yaraşmaz degil şâire kîl ü kâl
Bu oldu hemân bâis-i hasb-i hâl
- 164 Eğer olsa devletce bir töhmetim
Gece gündüz olmaz idi râhatim
- 165 Benim şâir-i munsıf-ı had-şinâs
Velî şâirin hasmıdır cümle nâs
- 166 Ne azv eylesen şâire yaraşır
Duyan der ki ol mâhire yaraşır
- 167 Ne çâre bu kâra sülûk eyledim
Anınla senâ-yı mülûk eyledim
- 168 Cihân hasmım olsa ferâğ eylemem
Yine taba nazmı yasağ eylemem
- 169 Kim etsin hıdîv-i cihânı senâ
Bu âlemde sen var iken İzzetâ

170 Hilâfımda halk eyledi ittifâk
Bunu gösterirdi siyâk u sibâk

Zuhûr-ı emr-i âlî-şân be-memûriyyet-i Keşân

- 171 Zuhûr eyledikde bizim kıl ü kâl
Bin iki yüz otuz sekiz idi sâl
- 172 Kadeh gibi tolmuşdu mâh-ı münîr
O şeb idi nısf-ı cemâd-ı ahîr
- 173 Sitanbul'a geçmiş idim salı gün
Cihân görmesin anın emsâli gün
- 174 Eniştem efendide idi harem
Çocukları anda der idim görem
- 175 O şeb anda kalmağı cezm eyledim
Varıp togru hammâma azm eyledim
- 176 Nihâd'ım yanımda ber-â-ber idi
Refikim fakat ol hünerver idi
- 177 Şerîf-i vezîrâna oldur hafîd
Karındaşımızdır o necl-i Saîd
- 178 Pür etmişdi germ-âbeyi sohbeti
Bir iş mi yanında şeker şerbeti
- 179 Oturmuş idik sadr-ı germ-âbede
Bu nüh-kubbede kopdu bir arbede
- 180 Süleymân-ı asrın gelip hüdhüdi
Başında fakat sorgucu yog idi
- 181 Dedi emr eder pâdişâh-ı cihân
Keşân'da ikâmet ile bir zamân
- 182 İki emre birden edip imtisâl
Hemân ibtidâ eyledim igtisâl
- 183 Olunca bana bu hatar rû-nümûn
Ayân oldu fehvâ-yı "el-muhlisûn"
- 184 Bulundu iki esb-i lâgar-beden
Birine çavuş bindi birine ben
- 185 Felek hâzır etmiş meğer çıkmayı
Nasıl çıkma belkim potur sıkmayı
- 186 Hemân sürat-i imtisâl istedim
Çıkıp Topkapı'dan misâl istedim
- 187 Verip destime emr-i şâhı çavuş
Dedi az zamânda yine gel kavuş
- 188 Görünce meâl-i şerîfin hemân
Yeniden dirildim gelip cisme cân

- 189 Meğer şâh-ı âlem inâyet edip
Ne sözdür inâyet kerâmet edip
- 190 Dirîg etmemiş verdiği mansıbı
Keremkâr olur mu o hâkân gibi
- 191 Gelirse kimin başına bu kazâ
Be-her-hâl olur mansıbından cüdâ
- 192 Günâhımdan etmiş bir iki şümâr
Eğer her birin eylese âşikâr
- 193 Yetişmez ana yerde levh ü kalem
Meğer safha-i çerha ola rakam
- 194 Ben ol âsiyim kim maâsî ne-dân
Sevâbı güneş zann ederdim inan
- 195 Olup gavta-h'âr-ı muhît-i günâh
Kedû-yı mey ile ederdim şinâh
- 196 Biri kâbile sorsa mîlâd için
Mühim-sâz arardım o nev-zâd için
- 197 Edip nefse dürlü müdârâları
Kul etmiş idim ana Dârâları
- 198 Beni şâh-ı âlem halâs eyledi
Eritdi gümüş gibi hâs eyledi
- Ahvâl-i menâzil**
- 199 Olup menzirim ibtidâ Topkapu
O gün etdim İstanbul'u ârzû
- 200 Derûna düşüp nâr-ı hubb-ı vatan
Şerer akdı su yerine dîdeden
- 201 Ne yâr u diyâr u ne hod gam-güsâr
Fakat dîdebânlar ile peyke var
- 202 Oturduk çavuşla birer peykede
Bana kabr idi san o mihnetkede
- 203 Biri geldi hâlim suâl eyledi
Teselliyle def-i melâl eyledi
- 204 Bölük başıyımış o sahrâların
Degilmiş yabancıyı peygam-berin
- 205 Müselmân bir âdem imiş ehl-i hayr
Anın gibi müslim getirmez bu deyr
- 206 Çubuk kahve ısmarladı der-akab
Yetişdi uşaklar dahi bî-taab
- 207 Dedik var mı yâhû aceb bir mekân

- Bizi bu gece etmege mîhmân
- 208 Binip rahşa ol hıızr-ı ferruh-likâ
Hemân oldu bir çiftlige reh-nümâ
- 209 Nihâyet göründü bir ârâmgâh
Ola kasrı derbânı hıfz-ı İlâh
- 210 Necîb-i keremkâr imiş sâhibi
Huzûr eyledim anda hânem gibi
- 211 Anın zayasıymış meğer ol mekân
Niçe yüzden etdi beni şâdmân
- 212 Kerem eyleyip etdi ikrâm-ı tâm
Hudâ eylesin devletin ber-devâm
- 213 Çavuş başının mihterin kolladım
İki gece ruhsat için yolladım
- 214 Müsâid olup müfti-i dîn-penâh
Bihişt oldu gûyâ kim ol câygâh
- 215 Samîmîdir Allâh bilir bu duâ
Bula haşre dek mesnedinde bekâ
- 216 Beni kendine abd-i hâs eyledi
Dilinden cihânın halâs eyledi
- 217 Bu nakmet bana ayn-i nimet imiş
İşâret degilmiş beşâret imiş
- 218 Ehibbâ bu ahvâlimi gûş edip
Aceb kim hukûku ferâmûş edip
- 219 Birisi gelip bir suâl etmedi
Kimesne hukûku helâl etmedi
- 220 Der-i pâdişehden kim olursa dûr
Gelir akrabâsı ana zâr u zûr
- 221 Ne ise tedârik edip harc-ı râh
Levâzım görüldü be-lutf-i İlâh
- 222 Uşaklar gelip gıtdiler serserî
Kimisi benimle kimisi geri
- 223 İki gece bir gün karâr eyledik
Seher vakti terk-i diyâr eyledik
- 224 Olup penc-şenbe günü rû-be-râh
Dedim ey derûnum bilen pâdişâh
- 225 Bunu çokdan etmiş idim iltimâs
Kapansın demişdim erâcîf-i nâs
- 226 Şeh-i âlemin ömrü müzdâd ola
Beni gamz eden kimse dil-şâd ola

- 227 Mürüvvetli bir zât imiş düşmenim
Bilirmiş ki az idi cürmüm benim
- 228 Fakat âteş-i iftirâk-ı ıyâl
Verirdi biraz togrusu infiâl
- 229 Çekip cân u dilden bir âh-ı hazîn
Dedim ey Hudâvend-i cân-âferîn
- 230 Fuâd u Reşâd'ım emânet sana
Ki sen eyledindi inâyet bana
- 231 Be-câh-i dü-sıbt-ı nebiyy-i güzîn
Kıl ol iki tıflı kederden emîn
- 232 İki dürdür anlar yetîm eyleme
Biri birimizden dü-nîm eyleme
- 233 Aceb kimsesizdir ki mâderleri
Ne hîşânı vardır ne dâderleri
- 234 Meded eyle yâ Rab o bî-çâreye
Bağışla günâhın anın Sâre'ye
- 235 Cefâma tahammül o eyler benim
Anın hakkı ile pür oldu benim
- 236 Ber-â-ber duâ ile çıkdım yola
Der-i Hak'da kim birleşirsek nola

Merhale-i Çekmece-i Sagîr

- 237 Dür-i eşki etrâfıma ekmece
Göründü nihâyet Küçükçekmece
- 238 Küçükçekmece bir müferrih mahal
Hevâsı eyü olmamak muhtemel
- 239 Güzel câmii bir imâret de var
Dahi niçe âsâr-ı himmet de var
- 240 Küçük karye ammâ letâfetli yer
Beyaz etmegi var suyu kand-i ter
- 241 Kenârındaki göl denizden cesîm
Yapılmış o deryâyâ cîsr-i azîm
- 242 Gören bâm-ı çerha sanır bir oluk
Kenârında var tahtadan korkuluk
- 243 Oturdum nişîmende hayrân olup
Görüp anda der-bendi şâdân olup
- 244 Kuş uçmaz mahal görmedinse eğer
Varıp eyle der-bend-i şâha nazar
- 245 Eğer tezkiren yok ise dön geri
Sitanbul'a avdet edip serserî

- 246 Vezîr ol emîr ol ne olursan ol
Kapanır o demde sana sağ u sol
- 247 Bu dünyâyı versen bölük başıya
Ne mümkün öteye seni taşıya
- 248 O şeb anda gerdûneyi bekledim
Sevâd-ı dili geceye ekledim
- 249 Benim çünkü mihr-i sipihr-i hüner
Gelip çıktı gerdûne vakt-i seher
- 250 Olup âfitâb ile gerdûne-zîb
Ber-â-berce verdik şu gerdûna zîb
- 251 Haramî deresi olup rû-nümâ
Bana şöhreti oldu vahşet-fezâ
- 252 Verince o kûhî ağaçlar telâş
Hemân dehşetimden dedim dur koçaş
- 253 Bu ormanda hırsız nihân olmasın
Bana korkarım bir ziyân olmasın
- 254 Koçaş geldi gerdûnenin yanına
Pesend eyledim akl u irfânına
- 255 Dedi kim duâ et şeh-i âleme
Dedim zikr ü fikrim degil mi heme
- 256 Buna devr-i Mahmûd derler dedi
Odur pâdişâh-ı muzaffer dedi
- 257 Yüz elli sefer eylesen sol kola
Ne mümkün çıka bir harâmî yola
- 258 Edip pâdişâh-ı cihânı senâ
Kul etdi beni kendine ol gedâ
- 259 Meğer bir söz anlar müselmân imiş
Degil pırpırî ehl-i irfân imiş
- 260 Tesellî edip der idi gâh u gâh
Düşünme efendi büyükdür İlâh
- 261 Seni pâdişâhın yine yâd eder
Bugün eylemezse yarın şâd eder
- 262 Eğer varsa yanında bir çok para
Hemân râhat eyle safânı ara
- 263 Kelâmı ile def-i bîm eyledim
Anı kendime baş nedîm eyledim
- 264 Zamâne uşağı fedâkâr olur
Bir ikisi ancak emekdâr olur

- 265 Yanımda Muhammed Ömer var idi
Bana togrusu her biri yâr idi
- 266 Biri hıdmetinde kusûr etmedi
Reh-i imtinândan mürûr etmedi
- 267 Muhammed yanımda küçükden beri
Ömer dahi kalmadı andan geri
- 268 Yüzümden İlâhî be-kâm olalar
Çerâğım olup şâd-kâm olalar
- Latîfe**
- 269 Refîkim idi bir suhanver kişi
Bana mahrem olsun mu ya her kişi
- 270 Aceb şâir-i pâk-i azbü'l-beyân
Suhan-dân-ı sihr-âferîn-i zamân
- 271 Edîb ü natûk [u] vezâif-şinâs
Lebîb ü halûk u letâif-şinâs
- 272 Bu âlemde ancak hünerver odur
Nazîrim benim var ise ger odur
- 273 Müşâbih bana sûret ü sîreti
Hünerde hemân andırır İzzet'i
- 274 Uzun boylu kûsec cesîmü'l-vücûd
Cihânda adîli adîmü'l-vücûd
- 275 O bana ben ana edip ser-fürû
Bir ağızdan eyler idik güft ü gû
- 276 Ber-â-ber bakardı nigâh eylesem
Bakıp bir harâma günâh eylesem
- 277 Anı dahi nefy eylemiş pâdişâh
Meğer etmişiz ikimiz bir günâh
- 278 Ne dem ben Sitanbul'a azm ederim
Anı da ber-â-ber alır giderim
- 279 Bakıp ana mirât-ı gerdûnede
Acırdım gönülden o mecnûna da
- 280 Ederdi ben âh eylesem ol da âh
O ben ben oyum sanki bî-iştibâh
- 281 Geçerse eğer aramızdan nefes
Girip zîr-i âba çıkarmazdı ses
- 282 O tûfânı etse hevâ ber-taraf
Olurdu hemân mâh-ı burc-ı şeref
- 283 Miyâna girerse gam-ı dûd-ı âh
Hemân levn-i pâki olurdu siyâh

- 284 Her-âyîne benden degildi cüdâ
Baîd eylesin infikâkin Hudâ
- 285 Teveccüh edersem eđer sûyuna
Muhâzî ederdi beni rûyuna
- 286 Tehâtubda bir merd-i kâmil idi
Hele bana gâyet müşâkil idi
- 287 Anın mahlası dahi İzzet imiş
Heyûlâ idim ben o sûret imiş
- 288 Kalem kim gazel nazm u tahrîr eder
Hemân ol da aynıyla tanzîr eder
- 289 Bilinmez anın mı bu rengîn gazel
Yahud ben mi tarh eyledim mürtecel

Gazel

- 290 Suver bir zıll-ı zâil oldugun takrîr eder mirât
Lisân-ı hâl ile ol mebhâsı tenvîr eder mirât
- 291 Tekeddür etmez ashâb-ı safâ aks-i mezâhirden
Murâd-ı ehl-i hâli dâimâ tahrîr eder mirât
- 292 Açıp ebhâs şeyh-i Gülşenîveş sırr-ı vahdetden
Meâl-i "külli şeyun hâlik"i tefsîr eder mirât
- 293 Karîn-i pâk eder mi hilkat-i asliyyeyi tağyîr
Bu sırr-ı mübhemi erbâbına tabîr eder mirât
- 294 Hamâkatdır sipihre hüsn ü kubh-ı hulku azv etmek
Cemâl-i hûb u zîştî sanma kim tağyîr eder mirât
- 295 Eser kalmaz cihânda mîhmânın hûb u zîştinden
Misâfir-hâne-i dehri ne hoş tasvîr eder mirât
- 296 Bakıp dîvân-ı hüsne matla-ı ebrû-yı cânânı
Misâl-i tab-ı İzzet der-akab tanzîr eder mirât
- 297 Bu nazmı yazıp irticâlen kalem
Refikim dahi mislin etmiş rakam
- 298 Edip cevdet-i tab-ı şûhın pesend
Dedim kim nedir derdin ey derdmend
- 299 Bu ilm ü hünerle çıkıp gurbete
Ne buldun refâkat edip İzzet'e
- 300 Dedi mûnis ü gam-güsârımdır ol
Otuz sâli geçdi ki yârımdır ol
- 301 Anınla ber-â-berdi mîlâdımız
Maan gezdirdirdi bizi dadımız
- 302 Ne mümkün ola beynimizde firâk
Međer âyîne eyleye bir nifâk

- 303 Girerse güneş gâhice araya
Olur hâk menzil bu âvâreye
- 304 Dedim yâr olursa bu âdem ola
Olursa bunun gibi hem-dem ola
- 305 Usanmış o da bî-vefâ dostdan
Benim tek hezâr-âşinâ dostdan
- 306 Beni eyledi kendine yâr-ı gâr
O da bî-vefâ çıkdı encâm-ı kâr
- 307 Nigâhımdan âyîne oldu cüdâ
Benimle yine kaldı bâkî Hudâ
- 308 Benim gördüğüm şekl-i vahdet imiş
Meğer ol bu dîvâne İzzet imiş
- Tertîb-i mâlihûlyâ**
- 309 Verip sufre-i hûlyâya revâc
Ederdim sipihri tokuz kat gûlaç
- 310 Alıp gâhice tug olurdum vezîr
Ederdim hemân şöhretim evc-gîr
- 311 Ağaçlar ederdi bana san kıyâm
Bayağı geçerken verirdim selâm
- 312 Verip seyfime dem-be-dem iltihâb
Acemler helâk eyledim bî-hesâb
- 313 Girip hûlyâ-yı şeb-i hûn ile
Boyardım mora Mora'yı hûn ile
- 314 Edip düşmen-i dîni dûzah-karîn
Giyerdim niçe hilat-i âferîn
- 315 Olup gâhice dahi müfti'l-enâm
Nice bî-kesâmı ederdim be-kâm
- 316 Yazıp kendi ıtlâkımı ibtidâ
Alırdım şeh-i âleme çok duâ
- 317 Birine verirdim hezâr arpalık
Bu sarfa olur mu medâr arpalık
- 318 Niçe mansıb u pâyeler bahş edip
Cihâna ne ser-mâyeler bahş edip
- 319 Be-her gün verirdim niçe bin rûs
Ederdi mevâlî gelip dest-bûs
- 320 Olur mâl-i hûlyâ ile kâm-yâb
Kim eylerse dergâhıma intisâb
- 321 Kurardım bu sahrâya çok hâneler
Ne âlî binâlar ne kâşâneler

- 322 Mühendis getirdim hayâlim gibi
Cihânı verip kendi mâlim gibi
- 323 Yapıp kendime bir sarây-ı metîn
Ser-â-pâ müzeyyen zamân u zemîn
- 324 Olup tarfetü'l-ayn içinde tamâm
Hemân ferşine eyledim ihtimâm
- 325 Sinimmâr-ı endîşe bennâsıdır
Fezâ-yı cünûn semt-i mebnâsıdır
- 326 Niçe bin cevârî niçe bin hadem
Tavâşîsinin adıdır Muhterem
- 327 Harem kethudâsı koca ihtiyâr
Bakar dönme dolaba leyl ü nehâr
- 328 Gedikler düzeldi be-vefk-i merâm
Verip her biri câyına intizâm
- 329 Duhânî bizim eski Numân Ağa
Yine kahvecimiz Süleymân Ağa
- 330 Olup mâlihûlyâ emekdârımız
Bütünce verildi ona varımız
- 331 Sarâyâ anı kethudâ eyledim
O harc eyledi ben safâ eyledim
- 332 Safâyı edip kapucu hâneye
Dedik koyma ekdârı kâşâneye
- Evsâf-ı sarây-ı hûlyâ**
- 333 *Telef şud nukûdem birûn ez-kıyâs
Be-tezyîn-i kâşâne-i bi-esâs*
- 334 *Be-bâlâ-yı sakfeş çü pâyân resîd
Sinimmâr-ı endîşe şud nâ-be-dîd*
- 335 Gelip hâme bir defter aldı ele
Ne mümkün ki masraf hesâba gele
- 336 Olup mâl-i Kârûn esâsında harc
Kılınmış türâbı cevâhîrle mezc
- 337 Taşı etmiş elmâs ile ittisâf
Yine olmamışdır tabiatce sâf
- 338 Yevâkît anda aşî boyası
Ezilmiş leb-i yâr ile foyası
- 339 İçinde bulunsun diyü kara da
Sevâd iktizâ eylese arada
- 340 Hulâsa olup bûy-ı zülf-i bütân

- Anınla ederlerdi nakş-ı tavan
- 341 Sefîd-i zemîni beyâz-ı arak
Semenler var anda riyâz-ı arak
- 342 Olup reng-i sürhü mey-i lal-i nâb
Anınçün kokardı gülünden şarâb
- 343 Cidârında nakş olunan bülbülân
Eder âdetâ bülbülâsâ figân
- 344 Gül-i sürhü reşk-i hezârân bahâr
Eder gıpta şeb-bûsuna zülf-i yâr
- 345 Göbeklerdeki zer-feşân şemseler
Revâ mihr-i çerha gülerse eğer
- 346 Aceb dil-güşâ ol sarây-ı latîf
Zemîninde cârî hevâ-yı latîf
- 347 Safâ-yı derûn anda bir âyine
Mükedder ise dahi dünyâ yine
- 348 Yükün ol tutar kim dolabın açar
Hemân gözlerinden cevâhir saçar
- 349 Cebîn-i şehân anda nakş-ı hasîr
Sikender der-i hâricinde fakîr
- 350 Hezârân suffe hezârân kâh
Ne dîvân-hâne fezâ-yı ferâh
- 351 Ne âvîzeler var ki pervîn-nazîr
Bilûrîn kandîli mâh-ı münîr
- 352 Tavan arasında gezer derd-i ser
Kömürlükde mahbûs gerd-i keder
- 353 Ne mümkün o câyın adîli ola
Meğer hûlyâda mesili ola
- Netîce-i hûlyâ**
- 354 Edip anda bir kasr-ı hûb intihâb
Hemân eyledim ferş-i bâlîn-i h'âb
- 355 Ayağım cevârî ogardı müdâm
Gamı dest-i şâdî kogardı müdâm
- 356 Meğer oynamış aklım âsâ temel
Dimâğım gibi varmış anda halel
- 357 Yıkıldı konakla cihân başıma
Degil düş bu geldi inan başıma
- 358 Telef oldu bunca çekilen emek
Birini yapınca zamânlar gerek
- 359 Havass-ı serim olalar dâime

Yeniden yapar kuvve-i vâhime

360 Heder oldu emvâl ü eşyâ bütün
Buna benzemez mi bu dünyâ bütün

361 Uşağın birisi diyince uyan
Telef olan emvâli sordum hemân

362 Dedim kanda kaldı Küçükçekmece
Dediler göründü Büyükçekmece

Merhale-i Çekmece-i Kebîr

363 Büyükçekmece birden oldu ayân
Zuhûr eyledi sırr-ı tayy-ı mekân

364 O câyn ki Sultân Süleymân'ı var
Bir iş mi demek bir büyük hânı var

365 O dârânın anda ne dârâtı var
Kerâmet gibi birr ü hayrâtı var

366 Oturdum bizim ev gibi hânına
Hudâ rahmet etsin anın cânına

367 Degil hân o da başkaca bir cihân
Eder cünd-i İskenderi mihmân

368 Anın da içinde biraz hânı var
İki câmi bir bezistânı var

369 Bunu gûş edenler sanırlar dürûg
Dürûg ise dahi degil bî-fürûg

370 Mekânım olup pîşgâh-ı ribât
Zuhûr eyledi der-akab bir neşât

371 Degil çekmece bir bezistân imiş
Meğer kim o bir cevhere kân imiş

Vasf-ı duhânî-beççe der-Büyükçekmece

372 Ne gördüm amân el-amân el-amân
Amân bir perî bir bilûrîn dükân

373 Yol üstünde kalmış o elmâs-fer
Revâ çekmece sînem olsa eğer

374 Görünce beni kendin etdi nihân
Girip cism-i dükkâna mânend-i cân

375 Çıkardım anı nice efsûn ile
Fakîrane bir iki altun ile

376 Değer vaslı yüz bin zer-i rûmiyi
Ne zer genc-i İskender-i rûmiyi

377 O hüsn ile bî-çâre gâyet fakîr

- Revâ olsa Eflâk u Bogdân'a mîr
- 378 Siyeh şerveteyle o bedr-i münîr
Sehâb içre hûrşîde olmuş nazîr
- 379 Siyeh saltamarka o zülf-i siyeh
Şeb-i vasla benzer içinde o meh
- 380 Dükânında sanma duhân şîşesi
Perî habsidir pîş-endîşesi
- 381 Gezip bir perî hüsnünün deyrini
Murâd eylese hufyeten seyrini
- 382 Edip çeşmi imâl-i vefk-i füsûn
Sokar gamzesi şîşeye ser-nigûn
- 383 Terâzûsu mihr ü meh-i âsumân
Derâhim nukûd-ı dil-i âşıkân
- 384 Eđer zühre tartılsa ol mâh ile
Tolar keffenin bir gözü âh ile
- 385 O mâhın sipihri idi sandalî
İzârında gonçeydi gûyâ alı
- 386 Međer eylemiş anı da aşk-ı yâr
Benim gibi hicrân ile dil-figâr
- 387 O yaşda gören ibtilâsın şaşar
Düşündükçe çerhin cefâsın şaşar
- 388 Hemîşe derûnunda derd-i visâl
Figâr eylemiş anı fikr-i muhâl
- 389 Saçı hânumânım gibi târ u mâr
Gözü kara bahtım gibi bî-karâr
- 390 Dedikçe gam-ı yâr ile of of
Bozar aklını niçe bin feylesof
- 391 Yüzü ağlamakdan olup al al
Gül-i âla dönmüş idi dest-mâl
- 392 Bak ol hân-mân söndüren sâhire
Düşüp kendi mânendi bir kâfire
- 393 Biribirine meşk-i nâz etmede
Degil nâz belkim niyâz etmede
- 394 Deme kâfiri kâfir etmez esîr
Anın da kolayın bulur çarh-ı pîr
- 395 Tesellî verip hâtır-ı zârına
Dedim varsa fursat koma yarına
- 396 Peşîmân olursun düşüp fûrkate
Dil-i zârım âsâ çıkıp gurbete

- 397 Temâşâ edip bâğ-ı ruhsârını
Dedim Hak nasîb ede tekrârını
- Sıfat-ı hüsn-i ân perî-ruhsâr**
- 398 O sünbül gibi gîsuvân-ı siyâh
Be-hem beste çün halka-i dūd-ı âh
- 399 O şûha denir mi kemân-ebrevân
Anın kavs-i her-mûyı reşk-i kemân
- 400 Hatâ tîre teşbîh müjgânını
Alır kopmadan âdemîn cânını
- 401 Nedir dîni ol gamze-i sâhirin
Mesîhâ'ya îmânı yok kâfirin
- 402 Olaldan bu mey-hânede bâde-h'âr
Dahi etmemiş çeşmi def-i humâr
- 403 Olup çeşmi horsend-i şevk-i lebi
Degil bâde nûş eylemek meşrebi
- 404 Edip bülbülü bâğ-ı hüsnünde lâl
Ruh-ı ali eyler gül-i ale âl
- 405 Dehânı yok ammâ iki lali var
Biri şehr-i Mısır u biri Kande-hâr
- 406 Dudağında var gül-şeker lezzeti
Abes tûtî vü bülbülün sohbeti
- 407 Zekan bir çeh-i Bâbil-i pür-fünûn
Felâtûn'u eyler esîr-i cünûn
- 408 Semen gerden-i sâfinin hastesi
Cihân tügme-i nâzı dil-bestesesi
- 409 Nola bad-ez-în saçma olsa sözüm
O hâl-i muanberde kaldı gözüm
- 410 Nigâh eyledim rûyuna mû-be-mû
Hat-âver denilmez degil sâde-rû
- 411 O nûrânî ruhsâra bakdım nihân
O nûr anı elbet eder müslümân
- 412 Degil sîne gencîne-i şîm-i kâm
Yanında kalır nukre-i sâf hâm
- 413 O kaddin yanında kıyâmet nedir
Kıyâmet degil nahl-i cennet nedir
- 414 Sebak-h'ân-ı refâtı serv-i çemân
Anınçün salar başını her zamân
- 415 Tururken hırâm etmede kâmeti

- Harâm eylemiş nâz ana râhati
- 416 Hırâmı iken nâzdan bî-mecâl
Yine tevbeler etmede pâ-y-mâl
- 417 Beden bahr-i sîm-âb gird-âbı nâf
Bunu haml-i igrâk edip sanma lâf
- 418 Degil meyl-i mîl-i günâh etmege
Kimin cânı var bir nigâh etmege
- 419 Nazîrin bu çeşm-i felek görmemiş
Felek eski kördür melek görmemiş
- 420 Gümüşden dökülmüş sanem mi desem
Ne dersin gazâl-i harem mi desem
- 421 Hezârân sipâs ola Bihzâd'ına
O tasvîr-i bî-mislin üstâdına
- 422 Nigâh eyleyip şusuna busuna
Gönül düşdü çengâl-i gîsûsuna
- 423 Edip perçemi aklımı târ u mâr
Gönülde ırağ oldu dâr u diyâr
- 424 Unutdum vatanda olan yârımı
Degil yârımı evdeki karımı
- 425 Nigâh eyledikçe ruh-ı aline
Acırdım bakıp İzzet'in hâline
- 426 Alıp anı gerdûneye bî-karâr
Çavuş olmasaydı ederdim firâr
- 427 Dedim çavuşu bunda tesmîm edem
Yahod ana bahş-ı zer ü sîm edem
- 428 Bıraksın elinden girîbânımı
Şunun hicrine yakmasın cânımı
- 429 Bırağır idim olsa dünyâ işim
Keşân'da benim yok ya aslâ işim
- 430 Baîd olmak ise der-i devlete
Ne hâcet diğêr beldede mihnete
- 431 Ölince bu yerde ederdim karâr
Anın aşkına iş mi terk-i diyâr
- 432 Bu fikr-i muhâli ederdim hayâl
Kalırdım çavuş olmasa lâ-muhâl
- 433 Alıp âkıbet dişime cânımı
Vekîl eyledim çeşm-i giryânımı
- 434 Gözüm kaldı ardımda hayrân u zâr
Gönül yollara düşdü giryân u zâr

435 O kâna bırakdım bunu yâdigâr
Dükâna kalem etdi nakş-ı cidâr

Rubâî

436 Bir kıta-i elmâs Büyükçekmece'ye
Dükkânçe-i zerger gibi zînet vermiş

437 Uşşâkının âhın o duhânî-beççe
Ser-mâye edip kârına sûret vermiş

438 Çekip fûrkatiyle o şûhun bir âh
Ö hasret ile oldu dil rû-be-râh

Sıfat-ı cısr-i cesîm

439 Göründü felek gibi cısr-i cesîm
Sırâta eş ammâ bu bî-havf u bîm

440 Binâ etmiş anı Süleymân Hân
Görüp olsa hayrân nola ins ü cân

441 Gelüp cûşa etdikçe azm-i sefer
Deniz hıdmetinde kuşanmış kemer

442 Yigirmi sekiz göz felekden nişân
Gözün her biri bir yarım âsumân

443 İki tağ arasında ejder gibi
Yedi suffenin her biri ser gibi

444 Felekler kapanmış gözü üstüne
Düşüp hayretinden yüzü üstüne

445 Görüp pertevin keh-keşân-ı felek
Gelip gecelerde sürünmek gerek

446 Ruhâm-ı latîfi o rütbe sefid
Düşüp aks-i hürşid olur nâ-be-dîd

447 Sanırsın ki her sengi dürr-i Aden
Mücellâ o rütbe gelip geçmeden

448 Seçip zînet-i gerden etmiş bihâr
Hemân bir dizi lülü-i şâhvâr

449 Edip seng-i mihrâbını ârzû
Felek eylemiş hâkine ser-fürû

450 Ne rütbe firâvân imiş hasreti
Hayâl et ki togrulmadı kâmeti

451 Gözün her biri çeşm-i hûbân gibi
Be-hem-beste ebrû-yı cânân gibi

452 Ne mümkün o şâha duâ etmemek
Bakıp gözlerine bükâ etmemek

- 453 Sular çağladıkça turup ağladım
Sular turdu gitdikçe ben çağladım
- 454 Dedim yâ Rab ol şâha cizr-i sırât
Ola şâh-râh-ı makâm-ı neşât
- 455 İlâhî o hâkâna cizr-i bekâ
Ola sadr-ı tahtü'r-revân-ı safâ
- 456 Duâ mevkiinde akıp eşk-i ter
İcâbetgeh-i Hakka kıldı güzer
- 457 Olur çünki bî-müzd bî-ımtinân
Sırâtı geçenler behişte revân
- 458 Su gibi o cisri mürûr eyledim
Degil cennet ammâ huzûr eyledim
- 459 Niçe cândan ayrıldı ammâ benim
Uzadı ya bâri biraz düşmenim
- 460 Cünûd-ı hayâli der-âmed edip
Yine hûlyâyı ser-âmed edip
- 461 Kuruldum hemân mîr-i mîrân gibi
Ne dîvânlar etdim vezîrân gibi
- 462 Hüküm-rân idim taht-ı mülk-i gama
Cihân ger yıkılsaydı derdim neme
- 463 Hayâlimde bir iş mi feth-i Mora
Tutardım gavurlar teperken hora
- 464 Acemlerle etdikçe ceng ü cidâl
Salardım iki yana mecnûn-misâl
- Mübâreze-i bahr ü ber bâ-yek-dîger**
- 465 Bahârı açılmışdı sahrâların
Aceb cûşîşi vardı deryâların
- 466 Deniz yalısına düşüp şâh-râh
Fezâ mevcisinde ederdim şînâh
- 467 Yemînim ki deryâ-yı ahzar idi
Yesârım da bahre ber-â-ber idi
- 468 Döşenmiş o sahrâya reml ü hasâ
Cevâhir gibi bî-ad ü bî-hasâ
- 469 O gün işlemişdi be-gâyet lodos
Koparmışdı gûyâ kıyâmet lodos
- 470 Kuzu gibi dalga gelip fevc fevc
Gezerlerdi sahrâları mevc mevc
- 471 Boyu iki sâat aceb çağlayan
Eni bî-nihâyet aceb çağlayan

- 472 Yigirmi otuz kat hezârân mevc
Urur bir taraftan bahârân mevc
- 473 Denizdir diyip geçme sâhib-sipâh
O da kendi kendine bir pâdişâh
- 474 Bakıp karaya sanma yok kudreti
Yeter nice Iskender'e zulmeti
- 475 Biri savlesinde hizebr-i cesûr
Birisi metânetde merd-i gayûr
- 476 Çıkıp rezme ol iki şâh-ı azîm
Biribirisin etmek üzre dü-nîm
- 477 Kurup sâha-i rezme bir destgâh
Dediler bakalım ne eyler İlâh
- 478 Cezâyir gelip kara imdâdına
Deniz de verip arkasın bâdına
- 479 Müheyyâ iki cânibin askeri
Gazâ yâ şehâdet diyip her biri
- 480 Hemân ol iki şehryâr-ı mehîb
Biri kûh-ı temkîn biri nâ-şikîb
- 481 Bunu nush u pend etdiler askere
Hemân öldürün bakman ahz-ı sere
- 482 Beyâz idi bayrağı deryâların
Yeşillendi yaprağı sahrâların
- 483 Yaban öküzü esb-i sahrâ idi
Deniz aygırı rahş-ı deryâ idi
- 484 Tutuşdu mukaddemce cenge çenâr
Dahi cünd-i deryâ ederdi karâr
- 485 Kılıç balığı çekdi şemşîrini
Hemân kirpi aşk eyledi tîrini
- 486 Mübâriz idi fil ile fillenoz
Edip kuyrugun birbirine topuz
- 487 Akın eyledi sû-be-sû cûybâr
Sararmış idi korkusundan bihâr
- 488 Verâdan gelip çatdı imdâd-ı bâd
Deniz cûşa geldi olup kalbi şâd
- 489 Yaka yakaya geldi iki sipâh
Beri yakadan halk ederdi nigâh
- 490 Ara yirde kaldı türâb u rimâl
Berâyâ gibi oldular pâ-y-mâl

- 491 Sebeb oldu bunca fesâda lodos
Nola olsa menfâsı bahr-i Rados
- 492 Verip kişver-i deşte kulzüm keder
Göründü kenâr-ı karada zarar
- 493 Olup kulzümün genci de târ-mâr
Bırakdı niçe gevher-i âbdâr
- 494 Çekip leşkerin etdi deryâ gürîz
Înâdında sahrâ yine nâ-gürîz
- 495 Girip ben murahhas gibi araya
Çavuşla haber yolladım karaya
- 496 Deniz sulha yatdı kesildi lodos
Çıkıp önüne kala-i Bigados

Karye-i Bigados

- 497 O gece Bigados'da olduk mukîm
Serip sadr-ı hân-ı cedîde kilîm
- 498 Zuhûr eyledi anda âzâdelik
Nümâyân olup Keçeci-zâdelik
- 499 Küçük karye lâkin hevâsı latîf
Müferrih yerinde o hân-ı şerîf
- 500 O şeb anda bir mîr idi mîhmân
Kim onlar imiş Bosna'da hânedân
- 501 O mîr-i kelâma pedermiş meğer
Süleymân Paşa-yı cennet-makar
- 502 Olurmuş be-emr-i kibâr-ı zamân
Der-i bâr-ı devlet-karâra revân
- 503 Benimle gelip hasb-i hâl eyledi
Sitanbul'u sordu suâl eyledi
- 504 Dedim ben usûlü bileydîm eğer
Bana olmaz idi bu hânlar makar
- 505 Biraz da suâl-i kunût eyledi
Cevâb almayınca sükût eyledi
- 506 Sezâvâr imiş Hak bilir kim o mîr
Eğer olsa babası gibi vezîr
- 507 Zarîf ü müeddeb meâl-âşinâ
Ana taşralı denmedir nâ-revâ
- 508 Edip hânda anınla beytûteti
Unutdurdu lutfu bana gurbeti
- 509 Vedâ etdi gitdi o İstanbul'a
Düzüldüm seher vakti ben de yola

- 510 Ser-i rehde turmuş meğer âfitâb
Selâmımla etdim anı kâm-yâb
- 511 Benim çünki hûrşîd-i evc-i suhan
Gelir bana ahkar güneş zerreden
- 512 Felek öyle hürmet eder kim bana
Eğer etmiş olsa bugün iktizâ
- 513 Görünce lüzûmun demez kim neme
Tekerlek eder mihri gerdûneme

Merhale-i Silivri

- 514 İki sâat etmişdi ancak mürûr
Leb-i yemde etdi Silivri zuhûr
- 515 Silivri diyip sanma bir sivri yer
Çukur yerde yok nakle şâyân eser
- 516 Nedir aslı bilmem sevilmez mekân
İçip anda bir kahve olduk revân
- 517 Gel ey hâme tahdîs-i nimet edip
Çavuşdan biraz şey hikâyet edip
- 518 Olup hande-fermây-ı bezm-i enâm
Ehibbâ ola gül gibi şâd-kâm
- 519 Adûlar dahi çatlayıp gülmeden
Ede ârzû-yı celâ-yı vatan

Mübâşir ağanın ikrâmı hikâyesidir

- 520 Gerek sadr-ı azam gerek bir gedâ
Ne dem bu belâyâ ola mübtelâ
- 521 Niçe derd ü mihnet hikâyet eder
Mübâşirden elbet şikâyet eder
- 522 Benimkinde sûret diğerkûnedir
Ki her bir musîbet diğerkûnedir
- 523 Riâyetde hiç eksigi yok idi
Abes tesliyetler katı çok idi
- 524 Hamâkat eder kim zerâfet sanır
Beni görse nâz eyleyip utanır
- 525 Hulâsa eşeklikde mümtâz idi
Kulağı başından ser-efrâz idi
- 526 Gelip ikide bir hemân yanıma
Hayâlinde cânlar katar cânıma
- 527 Kemâl-i keremden eder iltifât
Verir iltifâtıyla gamdan necât

- 528 Alâ zumihi lutf ederdi bana
Bu mazmûn ile eyleyip râstâ
- 529 Hele pâdişâhın şu arslanına
Varılmaz anın korkudan yanına
- 530 Hudâya emânet civânmerd imiş
Mevâlîde yok bir eşi ferd imiş
- 531 Hele şundaki şu boya bosa bak
Serivler gibi tavr-ı mahsûsa bak
- 532 İşitdikce anı hicâb eylerim
Yalandan biraz meyl-i h'âb eylerim
- 533 Gelir gâh der kim verip tesliyet
Kudûmumda vardır benim meymenet
- 534 Kime ben mübâşir olursam eğer
Gelir az zamânda olur muteber
- 535 Düşünme efendi inâyet buyur
Ne var Hakk'a şükr istirâhat buyur
- 536 Ederdim gehî bir münâsib hitâb
Verirdim gehî unf ile bir cevâb
- 537 Dahi etmeden sözde avd u kufûl
Yine eski kapudan eyler duhûl
- 538 Gelip der efendi unutma beni
Sitanbul'a kâdî ederler seni
- 539 Bu tekdîre elbet mücâzât olur
Suçun yok diyorlar mükâfât olur
- 540 Derim ba'zı kerre olur nâdiren
Dahi eskimiz varsa da zâhiren
- 541 Alıp bu cevâbı giderken döner
Döner der ki etme efendi keder
- 542 Ömer terzilikde yamağım idi
Çavuşun uşağı çırağım idi
- 543 Bu lubetde ben derziyim ol peder
Ey Allâh'a ismarladıkdan beter
- 544 Muhâl oldu artık gazab gelmemek
Dedik yâ gazâ yâ şehâdet gerek
- 545 Uşaklar tutup geh çekerdi beri
Kişi bildiginden kalır mı geri
- 546 Bulup gâh fırsat ederdi hücûm
Efendi sakın olma derdi melûm
- 547 Uşaklar edip hâlîme merhamet

- Bu gûne ederler imiş meşveret
 548 Demişler savalım konakçı edip
 Yanınca birimiz ber-â-ber gidip
 549 Diler öldür anı diler isen as
 Yine bulmaz andan efendi halâs
 550 Ziyâde giderse dahi pâresi
 Bu derd-i nihânın budur çâresi
 551 Bu reyi edince uşaklar beyân
 Mübâşir ağayı çağırdım hemân
 552 Dedim siz konakçı gibi gitseniz
 Mukaddemce ihzâr-ı cây etseniz
 553 Dedi emr ü fermân efendimizin
 Dahi lutf u ihsân efendimizin
 554 Tutunca o türk emrimi bî-taab
 Kuruldum vezîran gibi der-akab
 555 Savup türkü başdan kolay geldi râh
 O gün oldu Türkmenli ârâmgâh

Merhale-i Türkmenli

- 556 Ne ârâmgâh ol cahîm-i cihân
 Olur orda belli naîm-i cihân
 557 Sitanbul'da ednâ fakîrin evi
 O muzlim mahallin sarây-ı nevi
 558 Mukaddem boşanmış bir iki deli
 Harâmî gibi zabt edip ol beli
 559 Uyup sonra ba'z-ı mecânîn-i nâs
 Anı karye sanıp komışlar esâs
 560 Ne mümkün o hanlarda insân yata
 Meğer gece gûl-i beyâbân yata
 561 Ne kalmış birinde sukûf u cidâr
 Hemân ortada bir takım tahta var
 562 Gece anda cinnîye vahşet gelir
 Degil cin şeyâtîne dehşet gelir
 563 Behâim dahi itibâr etmemiş
 Köpekler kediler karâr etmemiş
 564 Fakat kahvede bir uyuz tazı var
 Biraz hancının ördegi kazı var
 565 Hevâsından etmez kebûter mürûr
 Buna münhasırdır vuhûş u tuyûr

- 566 Nedendir dedim andaki lâşeler
Behâim geçerken gebermiş meğer
- 567 O aşçı dükânı ki yaksan eğer
Tahâretten anda bulunmaz eser
- 568 Gelince su geldi diyü müjdeler
Dirildi susuz cân veren mürdeler
- 569 Görülmüş degil kırlarında fidân
Meğer kim geçe bir tatâr-ı civân
- 570 Yüzü nûr-ı îmândan olmuş berî
Bu deyr-i zemînin odur kâferi
- 571 Gelip hancı bir ota etdi güşâd
Meğer dûzahîler girip ola şâd
- 572 Yıkık nerdübânı o rütbe yüce
Çıkar bâmına yek kademde cüce
- 573 Edip otasından kenîfin kıyâs
Ne çâre kılınmışdı vaz-ı pelâs
- 574 Anın her deliginde var bir yılan
Tebevül eder mi zevi'l-akl olan
- 575 Dedim hancıya bu ne alâ mahal
Ne cây-ı müferrih ne ranâ mahal
- 576 Nedir bu letâfet nedir bu hevâ
Nedir bu şetâret nedir bu safâ
- 577 Dedi hancı bunda vezîrân yatur
Bu gâra gelip niçe şîrân yatur
- 578 Konup göçdüler niçe devletliler
Ne sâhib-keremler ne himmetliler
- 579 Güneş gibi azm etdiler subh-dem
Biri etmedi neşr-i nûr-ı kerem
- 580 Öküz gibi yat da hemân kıl duâ
Yahod eyle bir yüz guruşla binâ
- 581 Alıp bu cevâbı hicâb eyledim
Hemân meyl-i bâlîn-i h'âb eyledim
- 582 Degil h'âbı görmez idi göz gözü
Eğer yansa kandîl-i mâhın yüzü
- 583 Uyumadı tâ subha dek İzzet'i
Cidârındaki kehgilin zîneti
- 584 Olup mihre pervâne pervâkvâr
Sabâhı arardım elimde fenâr
- 585 Meğer anda gâhî sabâh olmuyor
Gelenlerde çünkim felâh olmuyor

- 586 Mürûr etmeyip gâhice âfitâb
Tarîk-i diğerden edermiş zehâb
- 587 Gören anı bir dahi avd ede mi
Ayağı ile dûzaha gide mi
- 588 Binip gece gerdûneye bî-karâr
Alıp mâhı etdim hemân-dem firâr
- 589 Güneş tağın ardında bekler imiş
Beni arar anda emekler imiş
- 590 Görünce anı mâh alıp ruhsatı
Dedi mihre verdim sana İzzet'i
- 591 Benim neyyir-i âsumân-ı kemâl
Eder mihr ü meh emrime imtisâl
- 592 Dedim böyle ise eğer her diyâr
Bana eylemiş pâdişâh inkisâr
- 593 Uzakdan görünce Tekirtağı'nı
Gülistân sandım ineb bâğını

Merhale-i Tekfurtağı

- 594 Radoscuk ki deryâ kenârındadır
Herakl'in derûn-ı diyârındadır
- 595 Herakl'a Eregli idi tahtgâh
Eğer oysa meşhûr olan pâdişâh
- 596 Ana nâme yazmışdı şâh-ı rüsûl
Hudâvendgâr-ı sipâh-ı rüsûl
- 597 Resûl-i nebîye edip ihtirâm
Kemâl-i huşû ile kılmış kıyâm
- 598 Nasîb olmamış dîn o bed-bahta hayf
O dârâta ol tâc ile tahta hayf
- 599 Edip mucizeyle resûl-i İlâh
Anın mülkünü ümmete câygâh
- 600 Olup ol memâlik hidâyet-karîn
Okutdu yine hutbesin şâh-ı dîn
- 601 Bunu fikr ederdim savâmi görüp
Bunu zikr ederdim cevâmi görüp
- 602 Radoscuk küçük gerçi bender gibi
İçi rızk ile pür sanavber gibi
- 603 Pamuk ol vilâyetde nâib idi
Tekirtağı'na pek münâsib idi

- 604 Nezâket edip gönderendir zarîf
Efendimdir ol zât-ı pâk ü latîf
- 605 Mukaddem reîs-i etibbâ idi
Anatoluya revnak-efzâ idi
- 606 Hudâ var ede Mustafâ Behçet'i
Odur eden ehl-i hüner İzzet'i
- 607 Gelir bad-ez-în çok makâm-ı senâ
Yeter şimdilik bu kadarca duâ
- 608 Gel ey hâme çıkdın yolundan biraz
Keşân'a varıp sonra et türk-tâz
- 609 Tekirtağı dahi Keşân'a uzak
Bulup bu gece kendine bir konak
- 610 Çıkar bunda Türkmenli'nin zahmetin
Biraz da düşün cânının râhatin
- 611 Sen ey hâme destim gibisin benim
Seninle eder kâr u kesbi tenim
- 612 Ki sensin benim mâye-i sohbetim
Bu vahşetde hem-meclis-i ülfetim
- 613 Kalemle ederken biraz kîl ü kâl
Göründü uzakdan bizim hasb-i hâl
- 614 Konak hâzır etmiş mübâşir ağa
Uşağın bize eyledi reh-nümâ
- 615 Süleymân Ağa'nın imiş ol konak
Çekerdi karındaşı derd-i firâk
- 616 Benim gibi menfâdadır ol dahi
O da ağlar idi diyip yâ ahî
- 617 Yedik içdik anda güzel bir konak
Harem kethudâsı çıkardı yatak
- 618 Konak sanki kendi konağım idi
Yatak belki kendi yatağım idi
- 619 Soyunduk dökündük varıp râhata
O şeb sanki düşmüş idik cennete
- 620 Çalıp birde şehrin büyük sâati
Alıp sirkat etdi bütün râhati
- 621 Minâre degil vakti eyler haber
Degil kala ammâ ne toplar atar
- 622 O etdikçe sâat-be-sâat figân
Dakîka dakîka geçirdik zamân
- 623 Harâm eyledi uyhuyu dîdeme
Gözüm döndü işküfte bir çideme

- 624 Nücûm-ı sipihri ederdim hesâb
Yekûnun rakam eyledi âfitâb
- 625 Konakçı olup gitdi mihr-i münîr
Biraz anda meks eylemişdim hakîr
- 626 Açıp bir konak bana mihr-i felek
Bugün İncecik'de oturmak gerek
- 627 Benim şems-i rahşân-ı burc-ı kelâm
Felek hizmetimde eder ihtimâm
- 628 Olup zîb-i gerdûne-i zer-nigâr
Güneş gibi etdim filori nisâr
- 629 Fakîr ü kibârı edip ihtirâm
Edip cümle mihmân-nüvâzî tamâm
- 630 Bütün pâdişâh-ı cihân sâyesi
Bütün lutf u ihsânının mâyesi
- 631 Görüp bunda matrûdunun kadrini
Hayâl eyle makbûlünün sadrını
- 632 Bana İncecik'de tutup bir konak
Güneş anda çekmiş gam-ı iftirâk
- 633 İki üç gün olmuş idi bana eş
Yanar hasretimle ne yapsın güneş
- 634 Varıp makdemim ile şâd eyledim
Felek duymadan ber-murâd eyledim

Kasaba-i İncecik

- 635 Degil İncecik nakle şâyeste yer
Eni yok boyu bir çuvaldız kadar
- 636 Müferrihce âb u hevâsı latîf
Kazâsı perîşân fezâsı latîf
- 637 Kenârında var secdegâh-ı azîm
Vefâ-yı cihânveş cemâat adîm
- 638 Ahâlî nüvâzende-i mîhmân
Gelip hizmetim etdi pîr ü cüvân
- 639 Güneş anda kalmışdı ahşâma dek
O azm eyledi kişver-i şâma dek
- 640 O gece ben anda karâr eyledim
Hemân ertesi gün firâr eyledim

Karye-i Kalivra

- 641 Kalivra olup gâyet-i menzilim
Bulup bir gece anda yer mahmilim

- 642 Gelip koca başları yanıma
Reâyâ bütün düştü dâmânıma
- 643 Kimi sîb ü eyvâ getirdi biraz
Kimi hindi zebh eyledi kimi kaz
- 644 Mora kâfirine edip inkisâr
Bizi anlar etdi diyü şermsâr
- 645 Kılıp her biri âh vâh u bükâ
Ederlerdi şâh-ı cihâna duâ
- 646 İki gece kalın diyü bir papas
Öpüp pâyımı eyledi iltimâs
- 647 Dedim anlara ömrünüz çok ola
Hıyânet eden devlete yok ola
- 648 Reâyâyâ etdim niçe iltifât
Ki bunlar degil eşkiyâ-yı usât
- 649 O köye olup bir gece mîhmân
Seher vakti olduk Keşan'a revân
- 650 Şurası burası göründü Keşan
Ne ise gelindi keşân-ber-keşân
- Tahdîs-i nimet-i cenâb-ı Mennân
ve zikr-i ba'z-ı evsâf-ı şâh-ı cihân**
- 651 Hezârân hamd ü hezârân sipâs
Dahi şükr-i bî-had firâvân sipâs
- 652 Ola ferş dehlîz-i tâk-ı ezel
Anın kapısıdır der-i Lem-yezel
- 653 Büyüklükde mümkün mi vâsf-ı Hudâ
Bitirmiştir anı "lehül-kibriyâ"
- 654 Hudâdır şeh-i âdil ü bî-adîl
Fakat zâtına zâtı olmuş mesîl
- 655 Şerîk ü nazîri anın kendidir
Yine kendinin kendi mânendidir
- 656 Müsâvî katında Süleymân u mûr
Ber-â-ber cünûduna nezdîk ü dûr
- 657 Gehî peşşe için yakar bin cihân
Anınla eder peşşeye imtinân
- 658 Zuhûr eylese peşşeden bir günâh
Anınçin ne âlemler eyler tebâh
- 659 Odur sâhib-i kilik-i kahr u atâ
Odur kâtib-i safha-i "mâ-yeşâ"

- 660 Hakîm ol ki filinde yok kîl ü kâl
Olunmaz anın hikmetinden suâl
- 661 Dilerse harâb eylemek âlemi
Musallat eder niçe bin azlemi
- 662 Ederse imârın irâde eđer
Verir âleme bir şeh-i dâdger
- 663 Bunu ibtidâ eyle mengûş-ı gûş
Tut elfâzıma badehu gûş-ı hûş
- 664 Sabâvetde görmüş idim Rûmeli'n
Koçide geçerken togurdu gelin
- 665 Hirâsân idi cümle halk-ı cihân
Çocuklar düşürmüşdü pîr ü cüvân
- 666 Latîfe eder gibi ehl-i şakâ
Soyarlardı hâkimleri ez-kazâ
- 667 Ederlerdi etfâli evvel yetîm
Atarlardı sonra yakıp bir cahîm
- 668 Bu dünyâ ne zahmetlere ugradı
Sinap halkı elma gibi togradı
- 669 Emîn urdu Hasköy'de bin kârbân
Ne yapdı kıyâs eyle var hâinân
- 670 Göz açdırmayıp sîli-i rûzgâr
Tokatçıklı'dan yerdi âlem şamar
- 671 Tutuşdu kül oldu niçe hâneler
Dahi kaldı hâlî ne vîrâneler
- 672 Gelip gitmez olmuş idi rûzgâr
Açılmazdı teng-i gül-i nev-bahâr
- 673 Soyulmuşdu gülşen panayır gibi
Tağılmışdı güller cevâhir gibi
- 674 Semen penbesin eyleseydi katâr
Soyardı Kara Feyzi-i nâ-bekâr
- 675 Soyulmuş idi sayısız nâme-res
Çalınmışdı yollarda bâng-i ceres
- 676 Ahâlî degildi olan târ u mâr
Vilâyetler etmişdi terk-i diyâr
- 677 Eder miydi kimse ümîd-i necât
Sitanbul'a dek geldilerdi bugât
- 678 Hemân şâh-ı âlem cülûs eyledi
Ekâbir gelip hâk-bûs eyledi
- 679 Ne bâğında bâğîler etdi karâr

- Ne tağında tâğîler etdi karâr
- 680 Ser-i eşkıyâya kılıç atdı kim
Biri birine öyle bir katdı kim
- 681 Desen serve bâğî kabûl eylemez
Edip havf bâğa duhûl eylemez
- 682 Desen cûy-ı sahrâya tâğî eğer
Verir Gülşenî tekyesinden haber
- 683 Edip havf-ı şâhî o rütbe eser
Gelincik gören hâsekî zann eder
- 684 O yerler ki şimdi üzüm bâğıdır
Delî Kadri'nin atı oynağıdır
- 685 Geçerdim gece vakti ol belleri
Gelip yâdıma asrın İskender'i
- 686 Alıp hâme-i vasfını destime
Ederdim rûfû kalb-i işkestime
- 687 Beyân eyleyip medhini âleme
Ederdi duâ halk-ı âlem heme
- 688 Odur âlemin bâis-i râhati
Füzûnter ola gün-be-gün şevketi
- 689 Lakırdı degildir meâl-i kelâm
O şeh verdi bu kişvere intizâm
- 690 Eğer olmasa himmeti reh-nümâ
Keşan'ı ne mümkindi bulmak bana
- Münâcâtla Keşan'a duhûlümüzdür**
- 691 Oturdum civârında şehrin biraz
Edip bâb-ı Hak'dan bu gûne niyâz
- 692 Dedim ey şehensâh-ı bî-kes-enîs
Sana göre her ne dilersem hasîs
- 693 Şu râh-ı hatardan savuşdur beni
Fuâd u Reşâd'a kavuşdur beni
- 694 Uyup nefse düşdüm reh-i gurbete
Günâhım sebep oldu bu mihnete
- 695 Edip niçe isyân unuttum seni
Nihâyetde kovdu halîfen beni
- 696 Degil vâcib ıslâh-ı âlem sana
Bana eyle ihsânını reh-nümâ
- 697 Halâs et tarîk-i dalâletdeyim
Maâsî yolunda nihâyetdeyim

- 698 Salâhı ne mümkindir etmek melâz
Maâsî yanımdan kaçır el-ıyâz
- 699 Bu keştiye esdi muhâlif hevâ
Batırdı beni nefis olup nâhudâ
- 700 *İlâhî İlâhî necâtem resân*
Be-endek zamân ez-diyâr-ı Keşan
- 701 Münâcâtı tekmîl edip hazrete
Sürâğ oldu eşki yine İzzete
- 702 İmâmı olup beldenin pîşvâ
Tefeül edip eyledim iktidâ
- 703 Şerîfû'n-neseb nâmı Feyz-i ilâh
Delîl olduğu hayra bî-iştibâh
- 704 Verince hemân sûfiyâne selâm
Dedim yâ müezzîn ola yâ imâm
- 705 Aleyki alup ben de tecvîd ile
Keşan'a duhûl eylemişdik bile
- 706 Ahâlî bize bir konak verdiler
Konak sûreti bir otak verdiler
- Sıfat-ı hâne**
- 707 Ne hâne nazîri yapılmak muhâl
Murâd etse bennâ-yı vehm ü hayâl
- 708 Görüp şeklin elbet eder vesvese
Oturmaz hulâsa bilen hendese
- 709 Sütûn-ı esâsı o rütbe sakîm
Ne mümkün çıka bir hat-ı müstakîm
- 710 Alî Kuşî etse gelip ihtimâm
Ne mümkün bula bir murabba tamâm
- 711 Müselles bulunsa mümâsil degil
Tesâvî-i adlâi kâbil degil
- 712 Divarlar anın suffesine hayât
Münâsib idi ger denilse memât
- 713 Kenîfi bir iki konak hâneye
Eder kuş gibi oturan lâneye
- 714 Eğer olsa lâyık degil mi hele
Bizim hûlyâ-hâneye mezbele
- 715 Kazancı dükânı civârındadır
Sanırsın ki nakş-ı cidârındadır
- 716 Gece uyanıp elli altmış gavur
Çekiç salladıkça kalayı savur

717 Bu bahr-i gama kendimiz talmadık
Ne ise biz anı satın almadık

718 Edip anda ferş-i kilîm-i huzûr
Gönül oldu meşgûl-i ism-i Sabûr

Ámeden-i ba'z-ı züvvâr ve zikr-i ahâlî-i ân diyâr

719 Oturduk Hudâya edip çok sipâs
Ziyâret için geldiler niçe nâs

720 Mukaddemce ayân-ı lâhık gelip
Muahharca mazûlü Sâdık gelip

721 Olup her birisi müsâfir-nüvâz
Beni etdiler lutf ile ser-firâz

722 Gelip hâkimi Vehbî-i pür-hüner
Tarîkında Hakk eylesin muteber

723 Edip kadrime hürmet-i bî-keîâm
Ana ben dahi eyledim ihtirâm

724 Müderris efendi o pîr-i dü-tâ
Kemân kâmeti târi çûb-ı asâ

725 Olup kendisi istikâmetde târ
Fakat kâmetidir kemâna nazîr

726 Lebim fâhr edip dest-bûsu ile
Şeref buldu bezmim cülûsu ile

727 Degil mûy-ı esfid nûr-ı salâh
Yüzünden nümâyân çü fevz ü felâh

728 Muhammed Efendi o kâmil-lakab
Sitanbul'da yok öyle sâhib-edeb

729 Mukaddem imiş mahkeme kâtibi
Sokar imtihâna gelen nâibi

730 Keşana o ayân imiş bir zamân
Diyorlar Keşan ol zamânmış Keşan

731 Edip dil-nüvâzî kusûr etmedi
Olup hıdmetimde huzûr etmedi

732 Hüner-mâye Feyzî Efendî-i pîr
Latîf ü civân-meşreb ü hurde-gîr

733 Beli kâmeti şekl-i çevgânda
Top oynar çocuklarla meydânda

734 Birisi civânsın dese şâd olur
Hemân san ki bir tıfl-ı nev-zâd olur

735 Muhammed Efendi imâm-ı zarîf

- Keşan'a göre el verir bir herîf
- 736 Kısa aklı dahi sakalı gibi
Velî H'âce Nasr'ın misâli gibi
- 737 Edip kendine hânedânım penâh
Gelip gitmege başladı gâh u gâh
- 738 Dahi Şeyh Şâkir kim ol nâ-tüvân
Gelirdi düşüp kalkarak her zamân
- 739 Tarîk-i Rufâiyye'ye nisbeti
Kim içmiş Uzunköprü'den şerbeti
- 740 Aceb kendi hâlinde abdâldır
Zamâna göre sâhibü'l-hâldir
- 741 Biraz mûsikîye olup hıdmeti
Geçerdi kasâid ile sohbeti
- 742 Dahi bir ilâhî oku denmeden
Hezârın okurdu o bülbül-dehen
- Menkabe-i şeyh-i merkûm**
- 743 Hikâyet ederler o şeyh-i kühen
Sitanbul'a azm eylemiş pîr iken
- 744 Dü-esbe olup iki tatar ile
Binip rahşına yahşi refât ile
- 745 Tatarın birisi çekip bir sadâ
Dimiş yapılı mı aceb kim baba
- 746 İlâhî oku der sanıp hâsılı
Demiş yapılyam ogul yapılı
- 747 Hemân kamçıyı şark edince tatar
Şuûru olup yamçıveş târ u mâr
- 748 Önünde uçar gibi deşt ü cebel
Getirmiş o havf ile çeşmi sebel
- 749 Eđer kaşı batmak gelip yâdıma
Demiş tağlar acırdı feryâdıma
- 750 Nihâyet atıp kendini bir yere
Başı yara olmuş vücûdu bere
- 751 Tatarın birisi bakıp ardına
Demiş kim bu pîrin aceb derdi ne
- 752 Biraz şeyh ile hasb-i hâl eylemiş
Bu düşkünlüğünden suâl eylemiş
- 753 Demiş kudretim kalmadı ey ogul
Kesildi kanâtım gerek sağ u sol

- 754 Refîki demiş kim degildir ugur
Revâ mı ki biz gidelim sen otur
- 755 Baba bu tuyulsa rezâlet olur
Ocakda bize pek hacâlet olur
- 756 Demiş kimseye söylemem haşre dek
Dahi buradan kalkamam neşre dek
- 757 Demişler degildir bu âdet bize
Ocakda budur pek kabâhat bize
- 758 Demiş ey ogullar size fâide
Olur bad-ez-în bu da bir kâide
- 759 Kalıp anda miskîn ü âvâre şeyh
Hulâsa demiş kim o bi-çâre şeyh
- 760 Yarım sâat içre gidilen yeri
İki günde geldim dönünce geri

Dîger menkabe-i şeyh-i mezbûr

- 761 Alıp bir gün anı biraz yâdigâr
Ederler imiş kırdâ geşt ü güzâr
- 762 Düşüp rahşının pîş-i dümbâline
Gülermiş refîki anın hâline
- 763 Yatıp kalmış anda bayılmış biraz
Gelip akli sonra ayılmış biraz
- 764 Sorarmış ne yâhû bu hâlet diyü
Aceb bende var mı sekâmet diyü
- 765 Hakîkatde müstağrak âdemdir ol
Gücenmez desem dahi sersemdir ol
- 766 Enîsim bu âdemler oldu müdâm
Gelirler idi hâneme subh u şâm

Ahvâl-i ayân ve ba'z-ı istilâhât-ı îşân

- 767 Aceb derde düşdüm ki derd-i musır
Tutar sıtma gibi iki günde bir
- 768 Gehî terledir geh atar âteşe
Gehî tondurur geh katar âteşe
- 769 Bu derdi etibbâ ayân etmemiş
İpokrat-ı hikmet beyân etmemiş
- 770 Cürûhu kabûl eylemez iltiyâm
Çekilmez baş ağrısıdır ana nâm
- 771 Ne illet kim insâna benzer gözü
Görünmez sakaldan eğerçi yüzü

- 772 Savuřmaz ilâc eyledim okudum
Anın ismini renc-i ayân kodum
- 773 Degil gerçi hummâ vü zâtü'r-riye
Bu illet kabûl eylemez edviye
- 774 Teřahhus edip oturur yanıma
Alâ zumihi cân katar cânıma
- 775 Olup aklı üzre leâli-feřân
Olur mahzen-i dür diyâr-ı Keřan
- 776 Cehâletde Bû-cehl ile hem-sebak
Mezâlimde Haccâc ile yek-nesak
- 777 Levendât ocağında gezmiş biraz
Dolanmış niçe bîře hem-çün gürâz
- 778 Gezermiş delilerle dîvânevâr
Edip bunca tahrîb-i dâr u diyâr
- 779 Aceb bîřeşâr-ı hamâkat sakal
İçinde ayılar geze ihtimâl
- 780 Temevvüde mânende-i kiřtzâr
Felek sevrini otladırsa ne var
- 781 Kabûl eylemez lihyesi intizâm
Verir zumu üzre cihâna nizâm
- 782 Tutar lihyesinden ederse kasem
Sakal hakkı için diyip mültezem
- 783 Gehî kadh ü tayîb eder devleti
Gehî askerîye okur laneti
- 784 Sudûr etmese dahi benden cevâb
Ederdi bu imlâlar ile hitâb
- 785 Bu manzûmeyi kim ki tahrîr ede
Revâdır ki aynıyla tastîr ede
- 786 Nic'oldu afendî Amincik Ağa
Hara Feyzi gibi hizebr-i vegâ
- 787 Deli Hadri'ye hıydığımız âhibet
Urumda zuhûr etdi bu melanet
- 788 Levendât ocağı olunsun küřâd
O yüzden olur olsa feth-i bilâd
- 789 Vezâre olur mı muzaffer begem
Demezse eđer el-Arab ve'l-âcem
- 790 Abu'l-hubûr oldu bizim eskeri ?
Döner yayadan evvel atlu geri
- 791 İdüp uyhuyı cümle terk-i diyâr
Hılınç yimeli düşmen-i nâ-bekâr

- 792 Bizim eskeri zırtapoz olmalı
Bu toplar nedir hep hubûz olmalı
- 793 Okurdum eûzü gehî besmele
Degil besmeleyle gider kersele
- 794 Hafî der idim Hak ala cânını
Dahi cân-ı emsâl ü akrânını
- 795 Alır beldeden yılda yüz bin gurûş
Görüp anı mümkün mi olmak hamûş

Hikâye-i acîbe-i ayân ağa

- 796 Dedi bana bir gün o hayvân-ı sırf
Demezdi eğer olsa insân-ı sırf
- 797 Bizim tabyaya koymalı çok koyun
Koyunlar ile açmalı bir oyun
- 798 Uzakdan görürler anı eşkiyâ
Tutarlar kenâr-ı Maâriz' da câ
- 799 Varınca on atlı ile bendeniz
Boyanır dem-i düşmene Akdeniz
- 800 Dedi karaya bassa düşmen ayak
Safâ-yı derûndan tururdum kabak
- 801 Dedim cânım ağa inâyet buyur
Bu tedbîri terk eyle râhat buyur
- 802 Beş on atlıya eyleyip itinâ
Bizi eyleme tatlı cândan cüdâ
- 803 Ne dem afv ederse beni pâdişâh
Hemân eyle bahr-i gazâda şinâh
- 804 Sözümdem gelip dıhk-i bî-ihdiyâr
Bayıldı düşüp gülmeden ihtiyâr
- 805 Pesend eyledim hüsn-i tedbîrine
Dedim Hak cüdâ ede takdîrine
- 806 Verildi ana bir mahall-i diğér
Diyip Edrine gitdi ol der-be-der
- 807 Yerine gelip başka dürlü belâ
Halâs etdi andan da sonra Hudâ

Evsâf-ı kasaba-i Keşan

- 808 Keşan şehri tağın kenârındadır
Bütün evleri sengsârındadır
- 809 Otuzdan ziyâde degirmenleri
Yakın şehre tarla vü hirmenleri

- 810 Degirmenleri çünkü bâd-ı hevâ
Nola olsa etmekte hisb u rehâ
- 811 Dil-i âşıkâsâ yıkık hâneler
Konak adı var niçe vîrâneler
- 812 Reh-i Hak'dan etmiş gelip bî-riyâ
Büyük Câmii İbni Hersek binâ
- 813 Beş altı kadar var ufak mabedi
Yok ikisinin minber ü masadi
- 814 Ne Kadrî var anda ne hod Halvetî
Fakat tekye-i Zâtî-i Celvetî
- 815 O şehre melâz olmuş ol nîk-zât
Bulur ilticâ eyleyenler necât
- 816 Niçe çeşmeler var akar sû-be-sû
İçilmez degildir bayağınca su
- 817 Yigirmi kadar kahve dükkâmı var
İçinde iki üç fenâ hânı var
- 818 Fezâya nezâret eder evleri
Düzelse eğer evlerin şevleri
- 819 Kenârında var bir müferrihce kâh
Kalır zir-i pâyında deşt-i ferâh
- 820 Yanında büyük havz-ı nâ-pâki var
Mülevves niçe dahi evsâfi var
- 821 Ne çâre denilmezse ranâ mahal
Keşan içre yok andan alâ mahal
- 822 Ederdim gehî anda ferş-i kilîm
Verirdi bana zevk-i bâğ-ı naîm
- 823 Behişt olsa da âşinâ yok bile
Garîbü'd-diyâra göre çok bile
- 824 Degil bu rübâîye aslâ sezâ
Velî Talat etdi benimçin senâ

Talat fermâyed

- 825 *În çenberîn telâr çün kasr-ı kayserî
Çenber kuned be-gerden-i gerdûn-ı çenberî*
- 826 *Güftem zi-kîst Talat-ı âvâre ez-diyâr
Güftâ ki hest işgeh-i nîk-ahterî*
- 827 *Sadî-makâl İzzet Efendi ki mîşevd
Ez-cân kemîne bende-i eşâreş Enverî*
- 828 Civârımda var idi bir bâğçe
Annın andelîbi idi zâğçe

- 829 Giderdim ana gâhi yârân ile
Ber-â-ber idi bana zindân ile
- 830 Edip gülşen-i hân-mânım hayâl
Derûndan tutuşmuş idim gül-misâl
- 831 Gelip yâda İstavroz'un gülşeni
Yakardım o âteşle bâğ-ı teni
- 832 Tahayyül edip Göksu sahrâsını
Sirişkim şaşırmışdı mecrâsını
- 833 Anup çağlayıp gezdiği yerleri
Olurdu revân eşk-i ter serserî
- 834 Getirsem harâbâtı ger fikrime
Kalender gelirdi hemân zikrime
- 835 Elimde hemân olsa çûb-ı duhân
Çubuklu tasavvur ederdim der-ân
- 836 Edip Çamlıca zirvesin nakş-ı dil
Bakıp tağa ağlar idim muttasıl
- 837 Gehî böyle giryân gehî şâdmân
Bu sûretle imrâr ederdim zamân

Adem-i vürûd-ı mürâselât ve zuhûr-infiâlât

- 838 Felek benden aldı diğer intikâm
Kesildi vatandan selâm u peyâm
- 839 Ne yârımdam aldım ne dilden haber
Felek çeşmimi etdi gül-mîh-i der
- 840 Fuâd u Reşâd'ım Sitanbul'dadır
Anınçin dü-dîdem hemân yoldadır
- 841 Gözüm kulzüm-i hasrete talmada
İki yana müjgânım el salmada
- 842 Tamâm etdi kârım gam-ı iftirâk
Nola eylesem mâtem-i iftirâk
- 843 Şebim rûz rûzum şeb etdi felek
Bana her ne varsa hep etdi felek
- 844 Harâm eyledi hord u hâbı dahi
Bırakdırdı elden kitâbı dahi
- 845 Bakıp hâlime gâhice ıztırâb
Telâşımdan eyler idi pîç-tâb
- 846 Felek mihre vermiş meğer kim kasem
Kaçardı o mâhı suâl eylesem
- 847 Düşerdim reh-i bâğa vakt-i seher

- Sabâya sorardım gülümden haber
- 848 Sehâb-ı bahâra sorup kâkülün
Alırdım biraz nûkhet-i sünbülün
- 849 Biri elde tutsa şeker kâğıdı
Sanırdım anı lalinin kâsıdı
- 850 Kimesne eğer eylemezse mürûr
Sorardım geçerken vuhûş u tuyûr
- 851 Ederdim gehî âhımı nâme-ber
O da bî-mecâl oldu benden beter
- 852 Eđer çıkmâğa bulsa kudret nefes
Ederdim anı yârıma nâme-res
- 853 Nigâhım şihâb-ı münevver gibi
Uçardı Sitanbul'a ahter gibi
- 854 Çekip bâb-ı gamda niçe hây u hû
Ederdim kebûterligi ârzû
- 855 Degil yalnız ol meh-i hoş-likâ
Ehibbâ dahi eylemişdi fedâ
- 856 Olup bunca dem şâh-ı mülk-i elem
Niçe kerre bozdu beni cünd-i gam
- 857 Benim husrev-i mülk-i gam-perverî
Bunu görmedim şâh olaldan beri
- 858 Eđer olsa mülk-i cünûn iki şâh
Giderdim reh-i Kays'a bî-iştibâh
- Kulzüm-i merhamet maden-i inâyet kân-ı mürüvvet
Behcet Efendimizin nâmeleri teşekkürü**
- 859 Gelip Behçet'in nâme-i devleti
Yeniden çerâğ eyledi İzzet'i
- 860 Yazar nâmesinde o sadr-ı be-nâm
Bizim İzzet'e eyleyin ihtirâm
- 861 Degil nâme murg-ı saâdet idi
Ser-i iftihâra ne devlet idi
- 862 Fakîre demiş dâderimdir benim
Gerekdi dese çâkerimdir benim
- 863 Kemîne kapısında bir çâkerim
Anın âsumânında bir ahterim
- 864 Keşan makdeminden saâdet görüp
Ahâlîsi lutf u inâyet görüp
- 865 Kibârı eder iltifâtın beyân
Fakîri kılar nakd-i cûdun ayân

- 866 Aceb var mı bir lutfunu görmemiş
Meğer görmemiş varsa bir kör Memiş
- 867 Güşâde edip halka bâb-ı kerem
Degil sürgün olmuş veliyyü'n-niam
- 868 Edip cûy-ı ihsânını ârzû
Boşanmış hemân Rûmeli sû-be-sû
- 869 Demezmiş reîs-i etibbâ idim
Dahı zînet-i sadr-ı vâlâ idim
- 870 Bakıp nabzına kendisi hastenin
Yaparmış dilin niçe işkestenin
- 871 Sarıp yaraya merhem-i lutfunu
Verip üste hem dirhem-i lutfunu
- 872 İlâca keremle katıp zencebîl
İki yüzden ihyâ olurmuş alîl
- 873 Edip halka altun varakla ilâc
Gelirmiş yalandan alîlü'l-mizâc
- 874 Tükenmiş yanında nukûd u tılâ
Edip zahm-ı fakra anınla tılâ
- 875 Ahâlî senâ eyleyip zâtını
Beyân eyledikçe inâyâtını
- 876 Buyurmuş ben aslâ senâ istemem
Senâ şöyle tursun duâ istemem
- 877 Hemân farz-ı aynı edâ eyleyin
Şehenşâh-ı dehre duâ eyleyin
- 878 Odur bende-i asdak-ı pâdişâh
Odur devlet ü millete hayr-h`âh
- 879 Beni lutf u ihsân ile kıldı şâd
Ede iki âlemde Hak ber-murâd
- 880 Benim ana meşhûr olup nisbetim
Felek-rifat oldu ser-i şöhretim
- 881 Hemân mûm edip tâli-i sahtımı
Güşâd eyledi cebhe-i bahtımı
- 882 Yine iltifâta düşüp hâmeler
Pey-â-pey vürûd eyledi nâmeler
- 883 Olup lutfu tiryâk-ı derd-i firâk
O şerbetle dil etdi def-i merâk
- 884 Tabîb-i şifâ-hâne-i Lem-yezel
Anı etmesin mübtelâ-yı ilel

885 Mizâc-ı zamâna edip hıdmeti
Şu haste cihâna vere sıhhati

886 Etibbâ-yı vaktin o kim pîridir
Ümîdim anın hüsn-i tedbîridir

887 Odur bî-kesâna hemîşe muîn
Ede zâtını Hak hatâdan emîn

**Velîyyü'n-niam-ı âlî-himem Hâmid Molla Efendi'mizin
nâmeleri ve oglum Ömer Murâd'ın haber-i vilâdetidir**

888 Diğ̈er bir efendim ki Hâmid'dir ol
Ne zât-ı kesîrû'l-mehâmiddir ol

889 Binâ-yı kemâle sununca elin
Yine kilki bükmüş İmâd'ın belin

890 Olup kilki cevher-feşân-ı bilâğ̈
Hemân döndü bir kâna bu senglâğ̈

891 Çekip rişteye bir nice cevheri
Yine etdi şermende bahr u beri

892 Ne î mâlar etmiş o kân-ı hüner
Muammâ-yı Emrî gibi pür-güher

893 Nühüfte hurûfunda her bir merâm
Meâlinde buldum tesellî-i tâm

894 Hurûfâtı miftâh-ı ilm-i hurûf
Ne hâcet hisâb-ı miât u ulûf

895 Edip anı tavîz-i bâzû-yı kâm
Gönül oldu şâdân be-vefk-i merâm

896 Anın sadrı ilmü'l-yakîne mekân
N'ola olsa fahr-ı sudûr-ı cihân

897 Hüner bâğının nahl-i mümtâzıdır
Fuhûl-i kirâmın ser-efrâzıdır

898 Sabiydim olup h'âherim hem-seri
Büyüdüm elinde küçükden beri

899 Olaldan ana câriye h'âherim
O zât-ı mükerrerle fahr eylerim

900 Muammer ede Hak anı çok zamân
Beni kendi gibi göre nâ-tüvân

901 Bana tatlı geldi ney-i hâmesi
Mükerrer imiş şeker-i nâmesi

902 Yazıp makdem-i tıfl-ı nev-zâdımı
Sevindirdi bu kalb-i nâ-şâdımı

903 Şaşırdım görüp lafz-ı ferzendimi

- Hemân hüzn ü şâdî ile kendimi
- 904 Edip tesmiye nâm-ı neclim Ömer
Kerem etmiş ol zât-ı bî-kes-peder
- 905 Murâd eylemiş mahlasın mâderi
Odur kalbinin çünki nûr u ferî
- 906 Hudâ nâ-murâdı eder ber-murâd
Hudâ'dan olur hâsılı her murâd
- 907 Üç erkek veled verdi Rabb-i ahad
Eder mi ana dahi ihvân hased
- 908 Degil ya bu da Hâlet'in nimeti
Bana ol mu verdi recûliyyeti
- 909 Anın gelmedi dehre ferzendi hiç
Ederdi tebennî eğer bulsa piç
- 910 Degildir bu ihsân-ı paşa vü mîr
Verir anı ancak Hudâ-yı kadîr
- 911 Kerîm ü keremver Hudâ'dır Hudâ
Ne Hâlet verir anı ne pâdişâ
- 912 Yine lutf u ihsân ederse İlâh
Yine lutf u ihsân eder pâdişâh
- 913 Şehinşâh-ı âlem hemân var ola
Civân-bahtımın tâlii yâr ola
- 914 Görüp niçe lutfun bilâ-vâsıta
Hulûsum verir kârıma râbıta
- 915 Hemân sağ ola bir binâda temel
İmâd-ı hulûsa gelir mi kesel
- 916 Hudâ kahr ede düşmen-i devleti
Eğer ben isem dahi ol nekbetî

Vürûd-ı haber-i sadr-ı azam-şuden-i hazret-i Alî Paşa

- 917 Erişdi bana hâtifi bir haber
Melekden işitdim degildi beşer
- 918 Verip mührün etmiş hidiv-i be-nâm
Silehdâr-ı esbak kulun şâd-kâm
- 919 Odur terbiyet-kerde-i pâdişâh
Muvaffak ede mesnedinde İlâh
- 920 Alî Şîr'in elbet geçer sadrına
Riâyet eder ehl-i dil kadrine
- 921 Kişi her ne çekse mükâfât olur
İnâyât-ı Hak'la mucâzât olur
- 922 Öpüp dâmenin iftihâr eyleyem

Duâsını leyl ü nehâr eyleyem

923 O rütbe sevindi gönül muttasıl
Benim sanki hasmım imiş münfasıl

924 Budur lâyıık-ı sadr-ı câh u nigîn
Ola her umûrunda Mevlâ muîn

Âmeden-i mektûb-ı vâlî-i Edirne Sâlih Paşa

925 Tuyup nefyimi vâlî-i Edrine
Demiş ol fakîrin aceb cürmü ne

926 Yazıp nâme ol âsaf-ı nîk-zât
Bu ednâya etmiş niçe iltifât

927 Melek-şîme destûr-ı sâlihdir ol
Vezîr-i azîmü'l-mesâlihdir ol

928 Ahâlî niçe hayrını yâd eder
Cihân lutf u ihsânın îrâd eder

929 Zamânında olmuş mezâlim haffif
Denir böyle destûra zât-ı şerîf

930 Görüp iltifâtın âhâlî bana
Tutup dâmenim etdiler ilticâ

931 Olup nâmesi mûcib-i iftihâr
Gelip hurmet etdi sigâr ü kibâr

932 Mübâşirler âmed-şud etdikçe gâh
Sorardı beni âsaf-ı hayr-h'âh

933 Edip bend zencîr-i ahlâk ile
Kul etdi beni birr ü eşfâk ile

934 Olup râyet-i şöhreti ser-firâz
Sipihre ede mehçe-i tugu nâz

Âmeden-i mektûb-ı Mustafâ Paşa muhâfız-ı kılâ-ı Bahr-i Sefîd

935 Suâl eyledi hâtırım bî-riyâ
Semiyy-i resûl-i Hudâ Mustafâ

936 Muhâfız iken Bahr-i Esfîd'e ol
Ne mümkün bogaza adû bula yol

937 Mekârim-şiyem âsaf-ı hayr-h'âh
Ederdi kerem bendeye gâh gâh

938 Mukaddemce olmuş be-emr-i Hudâ
Meğer kim Keşan derdine mübtelâ

939 Tesellî edip hâtırım kolladı
Pey-â-pey kerem-nâmeler yolladı

- 940 Mukaddemce var intisâbım ana
Aceb etdi teşyîd-i hubb u vilâ
- 941 Hukûka mürâat edip ol müşîr
Beni lutfu etdi yeniden esîr
- 942 Budur bana Hak'dan hemîşe niyâz
Ede mehçe-i tugunu ser-firâz
- 943 Müşîrân-ı şâh-ı cihân ekseri
Suâl etdiler hâtır-ı kemteri
- 944 Hudâ her birin ber-devâm eylesin
Fütûhât ile şâd-kâm eylesin
- 945 Bana lutf eden kimse Rabb-ı muîn
Ede sâye-i pâdişehde emîn

**Âmeden-i mektûb-ı Hüsâm Efendi ez-Gelibolu ye
târîh-i hicviyye-i Talat be-ibrâm-ı cenâb-ı Mîr İzzet
aslehullâhu hâlehu**

- 946 Burusa'da bir muhlisim var idi
Hakîkatde yâr-ı vefâkâr idi
- 947 Bahâ'dır ana vâlid-i bî-nazîr
Dahi ceddidir cizyedâr-ı şehîr
- 948 Burusa'da çok ülfet etmiş idik
Mahabbetle ünsiyyet etmiş idik
- 949 Meğer nefy olunmuş Gelibolu'ya
Benim gibi şâhın o da kulu ya
- 950 Celâ-yı vatandan alır fer Hüsâm
Nola etmiş olsa o terk-i niyâm
- 951 Yazıp zevke dâir niçe nâmeler
Yetiştirmez olmuş idi hâmeler
- 952 Gelip gitdi niçe selâm u peyâm
Biri benden almak için intikâm
- 953 Murâd eylemiş kim beni hicv ede
Yine bir tarîk-i muhâle gide
- 954 O zât-ı mükerrerem bir Özbek bulup
Aceb zumu üzre bana denk bulup
- 955 Suhan-sâzının adı Talat imiş
Beni hicv eden Mîr İzzet imiş
- 956 Anın olmayıp nazm ile ülfeti
Yanında olanlarladır kudreti
- 957 Bana yapdırıp şi'r-i rengîn-edâ
Benimdir diyü gösterirdi bana
- 958 Müsâvî mi add etmiş ol Özbek'e

Ne çâre o da ittibâen bege

959 Bu târîhi tahrîr edip şerm ile
Bana yollamış sûret-i nerm ile

960 Hüsâm'a verip kâğıdı mîrimiz
Budur işte aksâ-yı tedbîrimiz

961 Zuhûr etdi andan bu şi'r-i acîb
Suhan togru ammâ maânî garîb

Târîh-i Talat ve ecvibe-i İzzet bâ-midâd-ı sürh

962 *Neyyir-i azam u şâh-ı encüm*
Edâmallâhu envârehu
Dâhil-i hût çi şud bâ-şevket
Câneş semek ârzû mî-koned

963 *Müjde-i pâdişeh-i gül der-dâd*
Der-heme sâl
Ki müürürest salâ-yı nevbet
Bisyâr zamânhâ mî-bâyed

964 *Kâsîd-ı bâd-ı bahârî çü resîd*
Çi mî-fermâyed
Fasl-ı dey-râ şude ârız nekbet
Ez-devr-i Adem

965 *Hemçü magzûb-ı şeh-i heft-iklîm*
Hâşâ meddallâhu zilâlu refetihi alâ
sükkâni devletihi
Sâhib-i mesned-i câh u rifat
Hay hay el-ân monlâ-yı Galata-em

966 *Âh efsûs ez-ân rifat ü baht*
Merâ esefî ne-mî-konîd
Ki şud ân Hâlet ü şud in hâlet
Kâide-i dîrîne-i devlet inest
pâdişâh-ı mâ selâmet bâşed

967 *Keş-me-keş sûy-ı Keşân âverdend*
Çavuş yekest
Tâ şevd ehl-i cihân-râ ibret
Piş ez-men ibret hezârest

968 *Güftem in kîst ki ehl-i âlem*
Çi vazîfe-i tust
Mî-firârend ez-û bâ-nefret
Rûbehâ ez-şîrân heme mî-gürîzânend

969 *Çîst târîh ü çi bâşed nâmeş*
İzzet Molla Efendi Hazretleri
Ki fütâdest çünîn der-mihnet
Be-in mihnet çend Özbek der-sufre-i men nân u nemek mî-
hored

970 *Hâtîfî güft be-ism ü târîh*
Hâtîf çünîn halt ne-mî-kerded

*Der-Keşân âmed ü nefy-i İzzet
Müverrihân medd-i elif-i âmed-râ hisâb ne-mî-kerdend.
Elifî bâyed ki tâ tamâm şeved.
Kîr-i men be-cây-ı û kâimest*

- 971 Elif idi târîhinin eksigi
Sokup dâhil etdim hesâba siki
- 972 Demiş bana magzûb-ı şâh-ı cihân
Ana lafz-ı hâşâyı koydum hemân
- 973 Cevâbın yazıp sürh her bendine
Yine kâğıdın yolladım kendine

Hikâyet-i acîbe

- 974 Hutûr eyledi hâtıra bir mesel
Gelir gerçi taba meselden kesel
- 975 Biri der ki gördüm bunu bir zamân
Binip dût-ı hammâla bir nâ-tüvân
- 976 İnerdi başı gâhice kûnuna
Dönerdi siyâkat yazı nûnuna
- 977 Hemân lerzenâk idi cân ile ten
Terahhum eder ibtilâsın gören
- 978 Tutup anı bir niçe ibnû'z-zinâ
Ederlerdi pîş ü pesinden ezâ
- 979 Hulâsa görüp şefkat etmiş idim
Halâsa anı niyyet etmiş idim
- 980 Varıp hâline eylemişdim nigâh
Tehî bir kula cevır eder mi İlâh
- 981 Meğer etmiş engüştünü halkaveş
İşâret edermiş çocuklara beş
- 982 Görüp anı hayretde kaldım hemân
Düşündüm taşındım turup bir zamân
- 983 Dedim ey Hudâvend-i hikmet-nümâ
Abes vermemişsin bu pîre belâ
- 984 Bu bahse münâsib güzel kıssadır
Görüp dikkat etse büyük hissedir
- 985 Bunu ehl-i insâfa etdim beyân
Kabâhat eder mi bakın şâirân
- 986 Bilir ehl-i dâniş sözün dâimâ
Degil söz anı söyleden nâ-sezâ
- 987 Amân müslümânlar derûn sâf edin
Kabâhat kimindir siz insâf edin

Bâz reften-i târîh-i Talat ve âmeden-i dîger cevâbeş

- 988 Varıp kâğıdı Talat'ın destine
Uyup neşe-i kıl-k-i ser-mestine
- 989 Yazar her birine birer itirâz
Ser-â-pâ yazılsa verir inkıbâz
- 990 Tarîkatçı târîhin îrâd edip
Beni sanki aklınca ber-bâd edip
- 991 Dahi lafz-ı hâşâyâ vermiş cevâb
Bu ebyâtını eyledim intihâb

Sûret-i nâme-i Talat ki ebyâteş ecvibe-i midâd-ı surhest

- 992 *Selâmî ki bîrûn zi-hadd u hisâb
Be-süy-ı efendi-i âlî-cenâb*
- 993 *Zi-Talat be-İzzet buved în peyâm
Ki ey sâhib-i mesned-i ihtişâm*
- 994 *Be-târîh-i teşrîf-i tu der-Keşan
Yekî kıta-i hûb kerdem beyân*
- 995 *Pey-i ta'n-ı ebyât ber-h'âstî
Be-tefsîr-i û hâme-ârâstî*
- 996 *Be-kıta-gazel nesr ne'bved cevâb
Delîlest ber-acz-i tu ey cenâb*
- 997 *Diger itirâz-ı tu bâtul buved
Be-nezd-i merân kes ki kâmil buved*
- 998 *Delîlest nefy-i Keşan ber-gazab
Künûn lafz-ı hâşâst terk-i edeb*
- 999 *Nazar kun be-mazmûn-ı târîh-i h'îş
Matbah-ı adne revân oldu Tarîkatçı Dede*
- 1000 *Buved matbah ez-behr-i tabbâhhâ
Ne ez-behr-i her mürşid-i pîşvâ*
- 1001 *Elif kîr-i hod-râ nümûdî şümâr
Nümûdî tu ünsiyyet-i âşikâr*
- 1002 *Menem ân ki ber-hasım-ı û gâlibem
Muhibb-i Alî ibni Bû-Tâlib'em*
- 1003 *Çi hoş güft Firdevsî-i nâmdâr
Nümâyem zi-behr-i tu men âşikâr*
- 1004 *Çü ferdâ ber-âyed bülend âfitâb
Men ü gürz ü meydân u Efrâsiyâb*
- 1005 *Künûn Talatâ kat bi'nmâ kelâm
Be-âkil işâret buved vesselâm*

Cevâb-ı nâme

- 1006 Bu kıtayla gönderdik ana cevâb
Göreydik geleydi o Efrâsiyâb

Mektûb-ı fakîr

- 1007 *Rûşenâyî kun çerâg-ı meclisem-râ talatet*
Hem-çü gül nih ber-sereş reng-i bahâr-ı sohbetet
- 1008 *Bes ki cânem ârzû dâred ki didâret zi-cân*
Tûtiyâ-yı çeşm-i dil şud hâk-i pâ-yı şöhretet
- 1009 *İtirâz-ı lafz-ı matbah âyed ez-nâ-puhtegî*
Ger nüvîsem çend harfî afv kun bâ-ruhsatet
- 1010 *Matbah-ı Monlâ bi-dânî nîst behr-i âşhâ*
Terk-i hord u hordenî kun tâ ki bâşed nimetet
- 1011 *Der-tarîkat matbah-ı Monlâ makâm-ı sâlikest*
Fehm kerdem men ki û-râ nîst sebk-i hidmetet
- 1012 *İştîyâkem ez-Hüsâmü'l-hak şinev meylî kunîd*
Hem çü Şemsü'd-dîn Mevlânâ be-sûy-ı izzetet
- 1013 Fârsîmiz hâmdır Türkî-i Özbek'den beter
Terbiyet ver mîve-i nahl-i kemâle himmet et
- 1014 Müstakîm ile Kirâmî'den biraz ahz eyledik
Sen de anlar gibi hakk-ı muhlisîde gayret et
- 1015 Nâme-i ruhsat al İbni Yazıcı'dan gül gibi
Gel şu yazı bendene reşk-i bahâr-ı cennet et
- 1016 Kıl hazer ta'n etmege hünkâr-ı ehlu'llâhdan
Çâker-i Mollâ-yı Rûm'un nâmesidir hurmet et

Mesnevî

- 1017 Yazıp yollamışdım bu nev-cevheri
Zerîn kadrin anlar yine zergeri
- 1018 Letâif bilir munsıf âdem imiş
Meğer bir vücûd-ı mükerrerem imiş
- 1019 Görüp nâmemi ihtirâm eylemiş
Cevâbında arz-ı merâm eylemiş
- 1020 Hayâli süreyyâya atmış kemend
Niçe cevheri eylemiş rişte-bend
- 1021 Verip ana ben bir gül-i şermsâr
O etdi bana gülsitân âşikâr
- 1022 Verip ana ben bir dür-i şeh-pesend
O arz eyledi bana deryâ-yı çend
- 1023 Verip ana ben bir semend-i hakîr

- O çekdi bana rahş-ı gerdûn-mesîr
 1024 Verip ana ben bir acûz-ı kühen
 O kıldı bana akd-ı bikr-i sühan
 1025 Ne yazdımsa verdi cevâbın tamâm
 Kelîm-i suhanmış o mâ-lâ-kelâm
 1026 Açıp bülbül-i kilki bâl ü peri
 Getirdi bana nâme-i dîgeri

Dîger mektûb-ı Talat Efendi ki cevâb-ı davet-nâme est

- 1027 *Huceste subh-demî k'ez-û bâl bîrûn şud*
Merâ sitâre ki şud mahv-ı seba-i seyyâr
 1028 *Der-âmed ez-der-i men kâsîd-ı huceste-kadem*
Be-leb beşâret-i vasl u be-dest nâme-i yâr
 1029 *Çi nâme k'âyed ez-û bûy-ı câme-i Yûsuf*
Çi nâme k'âmed ez-û rûşenî-i dîde-i târ
 1030 *Çi nâme ke'z-habereş dost mî-şevêd hoşnûd*
Çi nâme ke'z-esereş mest mî-şevêd hüşyâr
 1031 *Çi nâme ham-be-ham u pür-şiken çü zülfi bütân*
Çü kâr-ı hâme-i Mânî tamâm nakş-ı nigâr
 1032 *Sevâd-ı hatt-ı hoşêş çün hat-ı bütân matbû*
Beyâz-ı beyn-i sutûreş çü ârız-ı dildâr
 1033 *Kelâm-ı sihr-beyâneş heme abîr-âmîz*
Makâl-i mihr-nişâneş tamâm şekker-bâr
 1034 *Tamâm satr be-satreş ayân-ı mihr ü vefâ*
Tamâm harf be-harfeş beyân-ı lutf-şîâr
 1035 *Sabâ zi-lutf revân şev be-sûy-ı hazret-i û*
Güzer nümâ zi-kerem taraf-ı ân huceste-nigâr
 1036 *Bi-nih tu dest-i edeb-râ be-sîne der-ângeh*
Be-bûs-ı hâk-i der-i İzzet-i nigû-mikdâr
 1037 *Be-arz-ı û bi-resân arz mî-koned Talat*
Ki ey sülâle-i evtâd u zübde-i ahyâr
 1038 *Müdekkikî çü tu hoş-lehçe vü maânî-senc*
Ne-dîde dîde-i gerdûn be-âlem-i devvâr
 1039 *Sebak-rübûde be-âlem zi-derk-i Saklînûs*
Dakîk fikr-i tu der-mû-şikâfî-i eşâr
 1040 *Tuyî eyâ güher-i bahr-i marifet ki nümûd*
Arûs-ı tab-ı tu tezyîn-i hacle-i efkâr
 1041 *Kemîne bende-i nesr-i tu hazret-i Vassâf*
Kihîne çâker-i nazm-ı tu Ehlî-i sehhar

- 1042 *Kerîm-tab u girâmî-kelâm u hoş-sîmâ
Zi-râh-ı lutf nümûdend bende-râ ihzâr*
- 1043 *Velîk nîst inânem be-kef az-ân ki şudem
Mutî-i hazret-i sadru's-sudûr-ı pâk-tebâr*
- 1044 *Azîz-i Mısr-ı fazîlet cenâb-ı İzzet Beg
Merâ zi-hîç-kesî gerd enîs-i dâr u diyâr*

Şükrâne-i nâme-i Talat

- 1045 *Gönül oldu şâdân görüp nâmesin
Gözüm etdi müjgân ser-i hâmesin*
- 1046 *Zihî nâme kim pertev-i talatı
Sabâh etdi şâm-ı gam-ı gurbeti*
- 1047 *Ser-â-pâ latîf ü ser-â-pâ selîs
Ser-â-pâ zarâfet çü tab-ı nefîs*
- 1048 *Bana etmiş ol mû-şikâf-ı zamân
Esîr olduğun geh ayân geh nihân*
- 1049 *Odur mâh-ı nazmın çeh-i Nahşeb'i
Düşer ana gâhî zekî geh gabî*
- 1050 *Edip kilkimi midhati şâdmân
Bu mektûbu der-hâl etdim revân*

Sûret-i mektûb ki be-Talat firistâde bûd

- 1051 *Be-nâm-ı nigârende-i hâme-hâ
Zi-lutfeş resânende-i nâme-hâ*
- 1052 *Gül-i râstâ ez-bahâr-ı derûn
Ber-ân hâlik-i gülşen-i kâf u nûn*
- 1053 *Berîdî ber-âmed be-şehr-i Keşan
Zi-hemyân-ı dil şud cevâhir feşân*
- 1054 *Gül ü bülbülân ez-sürûr-ı peyâm
Heme raks kereded çü mest-i müdâm*
- 1055 *Resîd in haber hem-çü gonçe be-bâg
Ber-efrûht lâle zi-rengiş çerâg*
- 1056 *Zi-reşk-i bahâr-ı haber yâsemen
Be-hod kerde rengiş kumâş-ı kefen*
- 1057 *Gülistân hacil şud zi-bûy-ı peyâm
Muattar felek-râ ez-în bû meşâm*
- 1058 *Perîşânî-i sünbül-i bâg ez-üst
Dil-i lâle-râ ez-hased dâg ez-üst*
- 1059 *Zi-şîrîniyeş cûy mestî nümûd
Ki zencîr-i mevceş şikestî nümûd*
- 1060 *Çü bülbül heme gonçe vü lâlehâ
Zi-şevk-i bahâreş kuned nâlehâ*

- 1061 *Çü dîdem ki ez-meclisem şud melâl
Zi-gerdûn bedîn gûne kerdem suâl*
- 1062 *Çi bâşed ki kereded merâ hem-demî
Bedîn gûne şâdî çünîn hurremî*
- 1063 *Zi-gerdûn diger bâr kerdem suâl
Eyâ düşmen-i ehl-i dil in çî hâl*
- 1064 *Çi bâşed ki şâdem men-i hâksâr
Ki şâdî ne-bîned garibü'd-diyâr*
- 1065 *Felek güft âsâr-ı himmet resîd
Tu-râ nâmeî ki zi-Talat resîd*
- 1066 *Çi nâme nüvîd-i hezârân bahâr
Gülî mi-güşâyed der-în sengsâr*
- 1067 *Çi nâme gül-i gülsitân-ı hüner
Zi-bûyeş felekhâ dihed derd-i ser*
- 1068 *Hurûfeş ki tertîb-i mîstar kuned
Cihân-râ der-ân râh muztar kuned*
- 1069 *Çü hürşîd âmed be-vakt-i seher
Zi-hûbî nihâdîm bâlâ-yı ser*
- 1070 *Eyâ Talat ey mihr-i burc-ı suhan
Zi-şevk-i peyâmet be-der şud mihen*
- 1071 *Suhan-üstâd-ı Girâmî tuyî
Ümîdî tuyî vü Nizâmî tuyî*
- 1072 *Zi-bes şermsârem ki çendîn harf
Be-dahl-i kemâlet kalem kerde sarf*
- 1073 *Zi-bes İzzetâ hâmeem şud fuzûl
Afa'llâhu annâ vü ammâ nukûl
Temmetü'l-mektûb*
- 1074 *Gel ey hâme-i Nergisiyyü'l-beyân
Gül-i nesrin iki gözüm kıl ayân*
- 1075 *Yeter cevher-i nazm-ı deryâ-hurûş
Biraz nesr ile ol cevâhir-fürûş*
- 1076 *Verir taba bir şey çok olsa kelâl
Bulur tibr ü iksîr ise ibtizâl*
- 1077 *Ola virdin ise dahi nâ-kabûl
Faûlün faûlün faûlün faûl*
- 1078 *Nola etse sâyende bu gülsitân
İki dürlü gül bir kalemden ayân*
- 1079 *Sehâb-ı hünerden olup katre-nûş
Dür-i nesr ile bahri eyle hamûş*

- 1080 Verip sünbül-i nesr ile imtizâc
Gül-i nazma gelsin yeniden revâc
- 1081 Kalem oldu fermân-berim der-akab
Edip cevher-i nesrini müntehab
- 1082 Biri birine leff olup nazm u nesr
Verir şânına husrevin şen u kesr

Nesr

Nakş-bend-i destgâh-ı maârif ve nev-perend-i kârgâh-ı zarâif sultânım hazretleri bu defa dest-yârî-i cenâh-ı hezâr ve meded-kârî-i bâd-ı bahâr ile itâre-i çemenistân-ı muhâdenet buyurulan varak-pâre-i gül-reng bî-tevakkuf u direng encümen-i bî-berg ü çemen yanî gülşen-i hazân-dîde-i pür-mihen olan kâşâne-i Keşan'da vâsıl-ı dest-i mihnet-keşânımız oldukda demdeme-i tebâreka'llâh zenzeme-i bülbül-i fuâd ve şeb ü rûz andelîb-i zebânda evrâd kılınmıştır. Hoşâ nâme-i nâmî ve hâme-i girâmî ki dür-i deryâ-yı maânîsi gevher-i ticân-ı mülûk ve imâme-i sübha-i erbâb-ı sülûk olmağa şâyândır desem sanat-ı igrâkdan dür ve lâzime-i şâirî olan kesret-i teblîg-i mübâlağadan mehcûrdur. Hak budur ki her beyti bir kâşâne-i bî-bahâne-i husrevî ve her lafzı seng-endâz-ı hayâl-hâne-i Dihlevî'dir levhaşa'llâh şâir-i mâhir-i sihr-âferîn-i muciz-beyân ve hallâk-ı maânî-i bî-cism ü cân ki benim gibi külhanî-i mâder-zâd ve bî-mâye-i gülşen-i istidâdın hakkında hâme-gerdân-ı sahîfe-i senâ olup tedârik-i elfâz-ı medâiyih ve setr-i levâyih-i fezâyih eyleye. Buna ancak kerâmet denir. Çeşm-i bed dür ki sengistân-ı Keşan'da gül-i mül-reng ve Ayasofya şeyhinin hânesinde mül-i gül-reng bulmak gibidir. Benim bî-şerm ü hayâ ve fuzûl u bî-pervâ olduğum bundan dahi malûm-ı erbâb-ı irfân ve aks-endâz-ı mirât-ı hâtır-ı yârân olur ki öyle bir cevher-i girân-kıymet-i deryâ-yı letâfete bu hazef-pâre-i mezbele-i inşâyı adîl ve anın gibi gonçe-i nev-hîz-i bâğ-ı zarâfete bir kaç sebze-i bigâneyi mesîl eyledik. Hoş imdi kalemlerinden şermsâr ve keremlerinden ümîdvârım ki bu has-pâre-i buheyre-i mezellet vâsıl-ı sâhil-i deryâ-yı inâyetleri oldukda çüb-ı asâ-yı terbiyetleriyle kenâre-gîr ve lâne-i muhâleseti şimdilik bununla tamîr buyurdıkları der-h'âstır

- 1083 *Kemterîn zerre-i hâk-i kademet*
Keçeci-zâde Muhammed İzzet
- 1084 Bu nesri edip nazm ile pâydaş
Yine verdik ortalığa bir telâş
- 1085 Görüp ba'zı yârân çıkar sâhibi
Bizim münşeâtın olup râgıbı
- 1086 Varıp nâmemiz hâsıl-ı güft-gû
Meğer Talat etmiş bizi ârzû
- 1087 Kalıp anda tenhâ müşârunileyh
Lehü sandığın etdi Mevlâ aleyh
- 1088 Gelibolu'nun geldi bir kâsıdı
Hemân destime sundu bu kâğıdı

Kita-i Talat be-cihet-i âmeden-i h'îş ve izn-i duhûl-i meclis

- 1089 *Ey ser-efrâz zi-tu millet ü kîş*
Nîst mislet be-cihân hayr-endîş

- 1090 *Kâsır ez-nat-i tu evhâm u hayâl
Aciz ez-medh-i tu kutb-ı tefrîş*
- 1091 *Pîş-i dest-i keremet ebr-i bahâr
Ez-hacâlet figened ser-der-pîş*
- 1092 *Nîş ez-mihr-i tu mî-gerded nûş
Nûş ez-kahr-ı tu mî-gerded nîş*
- 1093 *Âkıbet vasl-ı tuem mümkün şud
Der-cihân bes ki nümûdem teftîş*
- 1094 *Şerverâ bende-nevâzâ Talat
İnek âyed be-ser-i hizmet-i h'îş*
- 1095 *Bi-reved yâ ne-reved fermân çîst
Şâd dâred dil ez-ân deryâ-rîş*
- 1096 *Ey be-dergâh-ı tu hâcib engîs
V'ey be-hargâh-ı tu lihyân bî-rîş*
- 1097 *Behr-i û cây-ı mukarrer fermâ
Ömret ez-sad be-cihân bâdâ bîş*

Teşrîf kerden-i Talat be-câygâh-ı İzzet

- 1098 Ser-i rehde bu kıtayı yazmış ol
Yine nâmını mermere kazmış ol
- 1099 Olup râha-pîrây-ı dest-i vusûl
Merâmım dü-çendân buldu husûl
- 1100 O rütbe sevindim ki tarîfî güç
Eğer çatlarsa hâme tavsîfî güç
- 1101 Edip ana irsâl müstakbilîn
Tururdum kıyâmen bu abd-i kemîn
- 1102 Nümâyân olup sikke-i Mevlevî
Zuhûr eyledi Talat'ın pertevi
- 1103 Tulû etdi mânende-i şems-i dîn
Görüp anı bu bende-i Şems-i dîn
- 1104 O servin edip pâyını cüst-cû
Tarikatca etdim hemân ser-fürû
- 1105 Degilmiş meğer Özbek Afgân imiş
Hüner tahtgâhında hâkân imiş
- 1106 Görüp ser-fürûmu o zât-ı nefîs
Bedâhetle oldu rübâî-nüvîs
- 1107 Edip çâr-pâre rübâîsini
Çalıp raksa girdim semâîsini

Rübâî-i Talat Efendi

- 1108 *Ez-mülk-i Herât Talat âmed be-vücûd*

- 1109 *İzzet zi-diyâr-ı Rûm sûret nümûd
Vaktî ki mülâkât nümûdend be-hem
İzzet be-rükû refî Talat be-sücûd*
- 1110 Muînîm olup şöhret-i kâzibem
Getirdi anı kuvve-i câzibem
- 1111 Mizâcıyla tabım edip imtizâc
Gören sandı şekerle berg-i gülâc
- 1112 Ne vâdîden etdim ise kîl u kâl
Getirdi hemân nazm ile bir misâl
- 1113 Kemâlâtı pîr-i Hocendî gibi
Tılsımâtı genc-i Merendî gibi
- 1114 Ulûm-ı diğerdan dahi behredâr
İçinde o kenzin bulunmaz ne var
- 1115 Edip hâk-i pâyı ile iftihâr
Kudûmiyye bir gevher etdim nisâr
- Kudûmiyye berây-ı âmeden-i Talat**
- 1116 *Kunem hamd-i Hallâk u Rabb-ı mecîd
Ki şud iktirân-ı dü-necm-i saîd*
- 1117 *Der-în-rûz Talat be-İzzet resîd
Dü kevkeb be-yek burc-ı devlet resîd*
- 1118 *Der-în-rûz şud menzil-i evvelîn
Dü hûrşîdrâ yek sipihr-i berîn*
- 1119 *Çi rûzîst ferhunde-sâât-i û
Çi rûzîst makbûl-tâât-i û*
- 1120 *Çi rûzîst nev-rûz pîşeş hacil
Münevver çü rûy-ı bûtân-ı Çigil*
- 1121 *Çi rûzîst reşk-âver-i rûz-ı îd
Çi rûzîst û-râ leyâlî abîd*
- 1122 *Dü şîr-i jiyân yek künâmî girift
Ki râh-ı cihân-râ harâmî girift*
- 1123 *Hem-âgûş geştîm bâ-yek-diger
Çü tevem be-yek perde bâdâm-ı ter*
- 1124 *Güşûdem zebân u resândem be-arz
Ki ey medh-i tu ber-cihânest farz*
- 1125 *Dü tîg-i suhan-râ niyâmî besest
Zebân-ı kalem-râ kelâmî besest*
- 1126 *Eyâ Talat ey mihr-i burc-ı hüner
Dilem şud zi-nûr-ı dilet çün kamer*
- 1127 *Safâ âmedî merhabâ merhabâ
Şeved cân-ı İzzet be-râhet fedâ*

- 1128 *Taâlâ taâlâ min-el-kedreti*
Fe-kün misli şemsi alâ zerreti
- 1129 *Talatum aleynâ ke-necmi'l-hüdâ*
Fe-evcebtü lî nehçike'-l ihtidâ
- 1130 Buyur şeyh efendi safâ geldiniz
Şu bed şehre hüsn ü bahâ geldiniz
- 1131 Gezip bûy-ı hulkun çemen-ber-çemen
Açıldı çemende semen-ber-semen
- 1132 Senin şevkin açdı bahâr-ı diğér
Hazânı rebî içre görmüşdüler
- 1133 Çekilmiş idi bülbülân bâğdan
Görünmezdi gülşen siyeh zâğdan
- 1134 Benim gibi etmişdi terk-i diyâr
Bırakmışdı mecrâsını cûybâr
- 1135 Hazân erdi güller güşâd olmadan
Dahi gonceler ber-murâd olmadan
- 1136 Gözü görmeden gülşeni nergisin
Sararmışdı gamdan teni nergisin
- 1137 Senin gördüğün bu bahâr-ı cedîd
Kudûmun safâsıyla oldu be-dîd
- 1138 Zemîne düşüp hâmenin sâyesi
Gülistânın oldukda ser-mâyesi
- 1139 İki nev-bahârı yetişdirdi bâğ
Bu yıl şâh-ı gül eyler anı çerâğ
- 1140 Tuyup neşe-i makdemin erguvân
Gören sandı mey-hânedir gülsitân
- 1141 Olup ferş-i bûstân yek-pâre gül
Çemen verdi cûbâra surhî-i mül
- 1142 O rütbe nemâ buldu kim gülsitân
Filiz verdi kökden tutup bâğbân
- 1143 Düşerse nazar cûybâra eğer
Olur çûb-ı müjgân hemân ney-şeker
- 1144 Degil bâğı tatîr eden bîd-i müşk
Bu yıl bîd-i müşk oldu her çûb-ı huşk
- 1145 Karanfûl çü kâkül demed-ber-demed
Gül ü lâle sünbül seped-ber-seped
- 1146 Biribirine kol atıp nârven
Fısıldıya başladı halk-ı çemen
- 1147 Kıyâmet kopardı gelip andelîb

- Nedir bu fisıldı diyü bî-şikîb
- 1148 Götürmüş meğer goncayı lâneye
Kapatmış nikâh etmeden hâneye
- 1149 Meğer ol fisıldı bu sohbet imiş
Hezârınki def-i hacâlet imiş
- 1150 Gül-i medhini seyr edip bâğda
İşit nağme-i vafını zâğda
- 1151 Siyeh zâğlar hep hezâr oldular
Bütün murglar zâr zâr oldular
- 1152 Yeşermiş degildi dahi berg-i tâk
Gülü mest edip eyledi sîne-çâk
- 1153 Husûsâ bu abd-i felâket-zede
Türâb-ı kadem yanî İzzet Dede
- 1154 O rütbe kudûmunla şâd oldu kim
Gül-i tabı öyle güşâd oldu kim
- 1155 Ruh-ı nazma kilki verip perveriş
Bu yüzden sana eyledi gösteriş
- 1156 Olup cevher-i nazmına rişte-keş
Nola etse fahriyye yok ana eş
- 1157 Herât-ı suhande ben ol nâzımım
Degil Rûm'a Afgân'a da lâzımım
- 1158 Kemâlim işitse eğer Rûdekî
Olur mekteb-i fazlımın kûdeki
- 1159 O Hâkânî'yem kim misâlim felek
Dem-i rûz-ı mahşer götürmek gerek
- 1160 Edersem leyâlîde nazm-âverî
Gelip şemdânım tutar Enverî
- 1161 Ne dem davi-i hakk-ı nazm eylesem
Eder kilkime rûh-ı Örfî kasem
- 1162 Hezâr-ı kalem açsa bahs-i güli
Gelir dersine Tâlib-i Âmülî
- 1163 Göreydi eğer Şevket-i nakş-bend
Kumâşım olurdu Buhârâ-pesend
- 1164 Göreydim eğer Mîrzâ Bî-dil'i
Ederdim ana hal niçe müşkili
- 1165 Cemâl-i kemâli olup cilve-sâz
Ederdi bana Kâşifi keşf-i râz
- 1166 Maârifde Îrâniyândan çi bâk
Suhande benim Sâibü'r-rey-i pâk

- 1167 Görüp kâşi-i fikrimi Muhteşem
Çeker ana ahsent ile zer-kalem
- 1168 Bakıp ustukussât-ı irfânıma
Ölürsem acır Unsurî cânıma
- 1169 Serîr-ı suhande benim pâdişâh
Ümîdî olur benden ümniyye-h'âh
- 1170 Edip hâmemi Şîr-i Hak ser-firâz
Alî Şîr benden eder ihtirâz
- 1171 *Nizâmî-i vaktem ne-h'âhem nizâm
Ki men dür-feşânem bedîn intizâm*
- 1172 A Talat Efendi sen insâf kıl
Dil âyînesin lutf edip sâf kıl
- 1173 Buyurmuşsunuz etmeyip pîç-tâb
Men ü gürz ü meydân u Efrâsyâb
- 1174 Beni görmeden nazmım işitmeden
Benimle suhan cengine gitmeden
- 1175 Cesâret buyurmuşsunuz ol söze
Adû sözde gerçi görünmez göze
- 1176 Benim şimdi sâhib-kırân-ı suhan
Demir pehlevân Kahramân-ı suhan
- 1177 Benim ol mübâriz ki hengâm-ı ceng
Adûnun rikâbı çalar bana çeng
- 1178 Benim ol mukâbil ki hengâm-ı rezm
Ser-i düşmeni eylerim tas-ı bezm
- 1179 Kimin cânı vardır bana söz ata
Sözüm söylenirken ana söz kata
- 1180 Benim çünkü vassâf-ı şâh-ı cihân
Gulâm-ı hudâvend-i gîtî-sitân
- 1181 Benim şimdi Firdevsî-i rûzgâr
Cihân pehlevânım şeh-i nâmdâr
- 1182 Benim pâdişâhım gibi kahramân
Dahi görmedi sandalî-i zamân
- 1183 Anın varsa Efrâsyâb'ı benim
Odur taht-ı şevketde Rûyîn-ten'im
- 1184 Benim pâdişâhım anın Zâl'i var
Anın Zâl'inin yüz bin emsâli var
- 1185 Benim Zâl'immin misli olmak muhâl
Ki derler ana sâye-i Lâ-yezâl
- 1186 Nerîmân nedir kim nazîri ola
Siyâvûş kimdir vezîri ola

- 1187 Ferîdûn'unu Gâve'dir şâh eden
Anı Hak'dır el-hak şehensâh eden
- 1188 Tabîat görüp igrenir İrec'i
Tükürmek verir ağzıma Tûrec'i
- 1189 Eğer Rüstem'i varsa sâhib-kırân
O sâhib-kırân hem de sâhib-zamân
- 1190 Eğer bâd-ı kahrı olursa vezân
Atar benzi Sâm'ın bekâda hemân
- 1191 İki Şâh Mahmûd'u var âlemin
Fakat revnakı tahtgâh-ı Cem'in
- 1192 Biri Gaznevî şâh-ı sâhib-Ayaz
Birisi o hâkân-ı çâker-nüvâz
- 1193 Olaydı cihânda eğer Gaznevî
Görüp şâh-ı âlemdeki pertevi
- 1194 Geçeydi derinde niyâzı eğer
Olurdu o şâhın Ayaz'ı diğeri
- 1195 A Talat Efendi inâyet buyur
Şunu söyleyem istirâhat buyur
- 1196 Degildir senin bildiğin pâdişâh
Görölmüş müdür öyle zıll-ı İlâh
- 1197 Benim böyle memdûh-ı tabım ola
Senin anladığın degilsem nola
- 1198 Ferâmûş eder mi o şeh bendesin
Çevir aklını başına kandesin
- 1199 Güneşden bulur terbiyet çünkü mâh
Denir mi bana hiç magzûb-ı şâh
- 1200 O tabîri aslâ kabûl eylemem
Ben ol sınıfa hâşâ duhûl eylemem
- 1201 Degil cevherim terbiyet-nâ-pezîr
Olur necm-i bahtım yine evc-gîr
- 1202 O hâkân keremli kerâmetlidir
Mürüvvetlidir hem inâyetlidir
- 1203 Biraz mazhar-ı kahr olan bendesi
Olur lutfunun sonra şermendesini
- 1204 Niçe şâh-ı Afgân gibi sâili
Derinde neşide okur hâsılı
- 1205 Husûsâ ki Monlâ'ya mensûb olam
İdâd-ı segâniyle mahsûb olam
- 1206 Der-i devletimde edip ser-fürû
Felek bana dökse nola âb-ı rû

- 1207 Be-lutf-ı cenâb-ı Hudâvendgâr
Felekden benim ictinâbım mı var
- 1208 Cihân hasmım olsa görünmez bana
Bana sundu tıgım Celâl-i Hudâ
- 1209 Bana verme gürz-i diğêrle hirâs
Bu şemşîr-i hâme degil köhne dâs
- 1210 Bu bir nebzecik oldu Şeh-nâme'den
Misâl-i seriyye o hengâmeden
- 1211 Bu gürz-i girânım sana azdır
Dahi kahramânlık ser-efrâzdır
- 1212 Alıp dûşûna sen de kûpâlini
Çıkıp rezme arz eyle pinyâlini
- 1213 Kemînin olur mu aceb nüh-kıbâb
Alındı sana gürz-i Efrâsyâb
- 1214 Bakılmaz kusûra berây-ı suhan
Nola olsa yârân fedâ-yı suhan

Evsâf-ı Talat ve sebep-i nazm-ı îh hikâyet

- 1215 Niçe pehlevânlık bana meşk edip
Ne gürz-i girânlar dahi aşk edip
- 1216 Ne davâ kim etmiş ise bir zamân
Getirdi yerine o sâhib-kırân
- 1217 Niçe şîre ben pençe vermiş idim
Ne ejderlere rence vermiş idim
- 1218 Bunun pençesi pençeme verdi zûr
Meğêr kim tabîat getirmiş gurûr
- 1219 Edelden kalem nazm ile iştigâl
Görüldü belî niçe sâhib-kemâl
- 1220 Görüp mislin işitmedi çeşm ü gûş
Nola olsa vasfında hâmem hamûş
- 1221 Kalem olsa da âlemin fâikı
Ne yazsa degil şânının lâyıkı
- 1222 Anı eyledim kendime ûstâd
Bilir rütbesin bundan ehl-i sedâd
- 1223 Nazar eyleyip tarz-ı dîvânıma
Ne alkışlar eylerdi irfânıma
- 1224 Olup âferîni ile feyzmend
Kodum nâmını ben de Talat-pesend
- 1225 Edip nâmını mâye-i iftihâr
Anınla kalem kesb eder iştihâr

- 1226 Bu manzûmenin de odur bâisi
Nola lutfunu eylese hârisî
- 1227 Düşüp ceme efkârımın himmeti
Mekâtîb-i manzûme-i Talatî
- 1228 Edip nazm ile mevrudin geh ayân
Beş on beyt ile eylemişdim beyân
- 1229 Olup her biri bir dür-i şâhvâr
Revâ görmedim kim kala tar u mâr
- 1230 Gelip şevke kilkim o ebyâtdan
Bu hûrşîdi cem etdi zerrâtdan
- 1231 Edip hamd-i Mevlâ vü nat-i nebî
Beyân eyledim badehû matlabı
- 1232 Diyâr-ı Keşan'dan verip çün nişân
Anın nâmı konmuşdu Mîhnet-keşân
- 1233 *Çünîn güft Talat eyâ gam-zede
Bi-nih nâm-ı in-râ tu gurbetkede*
- 1234 *Be-medh-i kelâmem nümûd ihtimâm
Pes ân-ki çünîn kerd bed-i kelâm*

Takrîz-i Talat Efendi

- 1235 *Zi-câm-ı suhan curâî nûş kun
Demî hâl-i ehl-i hüner gûş kun*
- 1236 *Seyâhat nümûdem zamânî medîd
Kazârâ resîdem be-Bahr-ı Sefîd*
- 1237 *Şud ârâmgâh-ı men-i pür-melâl
Gelibolu ân şehr-i gülşen-misâl*
- 1238 *Sabâhî çü şâm-ı garîbân siyâh
Bi-dîdem garîbî ki mî-güft âh*
- 1239 *Be-cism-i keşân cân nümâyân şude
Keşan reşk-i bâg-ı gülistân şude*
- 1240 *Yekî şâir-i pâk-tab u zarîf
Suhan-perver ü nükte-dân u latîf*
- 1241 *Be-emr-i şehensâh-ı Cemşîd-fer
Nümûde der-ân-câ mahall ü makar*
- 1242 *Çü bi'snîdem in müjde-i gam-eser
Tedârik nümûdem esâs-ı sefer*
- 1243 *Zi-şevk-i visâleş şudem çün revân
Der-esnâ-yı râh ez-kazâ nâ-gehân*
- 1244 *Ayân şud be-çeşmem yekî senlâg
Ne gül bâşed ân-câ ne bâg u ne râg*

- 1245 *Be-hod güftem înest şehri Keşan
Eğer îñ buved lanet-i Hak ber-ân*
- 1246 *Keşan bedter ez-bârgâh-ı Yezîd
Keşan yanî mantûk-ı "hel min mezîd"*
- 1247 *Eğerçi Keşan şehri vîrân buved
Velikin der-û genc-i pinhân buved*
- 1248 *Bi-pursîdem ez-merdüm-i ân velâ
Ki İzzet der-în-câst "kâlû belâ"*
- 1249 *Be-sad şevk dâhil be-pîşes şudem
Tesellî-dih-i kalb-i rişes şudem*
- 1250 *Gehî mûnis-i û şudem bâ-kitâb
Nümûdîm gâhî suâl ü cevâb*
- 1251 *Gehî seyr bi'nmûdem eşâr-ı û
Gehî h'ândem ebkâr-ı efkâr-ı û*
- 1252 *Ez-ân-cümle ez-behr-i nefy-i Keşan
Yekî nâme-i hûb kerde beyân*
- 1253 *Çi nâme buved bih zi-sihr-i helâl
Çi nâme buved pür zi-dürr ü leâl*
- 1254 *Muanber hurûfeş çü müşk-i Tatar
Müselsel sutûreş çü gisû-yı yâr*
- 1255 *Sebak-ber-sebak ders-i hilm ü hayâ
Varak-ber-varak hatt-ı mihr ü vefâ*
- 1256 *Müsemâmâ nümûdem be-gurbetkede
Ki bâşed der-û cem-i mihnetkede*
- 1257 *Kelâmeş buved cümle sihr-âferîn
Zi-hak bâd ber-vey hezâr âferîn*

**Teşekkür berây-ı takrîz ve ebyât-ı besmele
ki der evvel-i manzûme nüvişte bûd**

- 1258 *Pesendîde kıldı bu nev-pîşemi
Çerâğ etdi şâgird-i endişemi*
- 1259 *Zer-i nazmımı eyledi sikkevâr
Sözüm her mahâlde geçerse ne var*
- 1260 *Gezip Talat ile diyâr u diyâr
Bulursa n'ola cevherim iştiâr*
- 1261 *Verip pîr-i nazma mürîd eyledim
Tarîk-i hünerde ferîd eyledim*
- 1262 *Bu nev-nâmeyi nâmına yazdı kilk
Bu tibre anın sikkesin kazdı kilk*
- 1263 *Olup şerm ile ol Süleymân'a mûr*

- Kalem tuhfesin etdi arz-ı huzûr
- 1264 Verip gencini nakd-i tahsînine
Kalem sûdmend oldu manen yine
- 1265 Eđer tutmasa husrevân muteber
Atar lale seng-i melâmet hâcer
- 1266 Edip lutfunu üstüme sâyebân
Bu takrîz ile aybım etdi nihân
- 1267 Dahi yazdı ebyât-ı isnâ aşer
Bu şeh-nâmeye eyledi zîb-i ser
- 1268 Sözüm buldu zîb-i külâh-ı Peşeng
Takındı on iki kanat bir çeleng
- 1269 Nola nâmem etse sipihre urûc
Ana süllem oldu düvâzdeh burûc
- 1270 Kerem etdi baba-yı kilki hele
Togurdu suhan tıfl-ı bî-besmele
- 1271 Edip kilkimi terbiyet hâmesi
Bana oldu üstâd ser-nâmesi
- 1272 Önünde diyip besmele hâmemiz
O gün başladı h'âceye nâmemiz
- 1273 Fe-li'llâhi derrüh o sâhib-kerem
Bu ednâ için etdi renc-i kalem

Tarh-ı encümen-i işret ve münâvele-i câm-ı sohbet bâ-Talat

- 1274 Keşan'ı bahâr eyleyip makdemi
Mey oldu gül-i surh ile hem-demi
- 1275 Düşüp bâğa gezdik çemen-ber-çemen
Olup biz de gülşen gül-i dâğdan
- 1276 Fakat mahrem-i râz idi duht-ı rez
Gehî araya sokulurdu çerez
- 1277 Ne fikr-i cehennem ne zikr-i behişt
Ferâmûş olunmuşdu her hûb u zişt
- 1278 Okudukça hamriyyeler gâh u gâh
Ederdik hum-ı bâde içre şinâh
- 1279 Kodukça sürâhîye humdan şarâb
Ederdi bana böyle sâkî hitâb
- 1280 Hemân nûş kıl İzzetâ bâdeyi
Cehennemde yaydın ya seccâdeyi
- 1281 Ferâmûş olunmaz bu gam bâdesiz
Onulmaz bu derd ü elem bâdesiz
- 1282 Görüp iltifât-ı şarâb-âveri

Düşerdim hemân pâyına serserî

1283 Hitâb eyleyip ben de ol mehveşe
Su ister idim bu yanan âteşe

1284 Anı eyledim derdimin mahremi
Odur çünkü derd ehlinin hem-demi

1285 Verirse kasem gâhî çeşmânına
İnanmam yemîn etse îmânına

1286 Gözümden dökerdim şarâb-ı niyâz
Bu gûne ederdim hitâb-ı niyâz

Hitâb-ı sâkî-i şarâb

1287 Mey-i âli ver sâkiyâ bî-direng
Şu gam kâfirin aldayıp eyle reng

1288 Sebûyu getir düşmenân çatlasın
Ser-i zâhid-i huşke ur patlasın

1289 Yaman oldu hâlim yaman sâkiyâ
Yetişdir şarâbı amân sâkiyâ

1290 Garîbü'd-diyârım garîbü'd-diyâr
Olur mu bana bâdeden gayrı yâr

1291 Mey-i nâba var ya Keşan'da mesâğ
Ne gam kim Sitanbul'da olmuş yasağ

1292 Getirsin yerine dimâğım şarâb
Sitanbul'da beng eylemişdi harâb

1293 Benim şimdi matrûd-ı şâh-ı cihân
Bana merhamet eyle sâkî amân

1294 Ne tesbîh sâkî ne seccâdedir
Bu derdin hemân çâresi bâdedir

1295 Hicâb etme sâkî görürse kesân
Keşan'ın da görsün gözü mey-keşân

1296 Su katma a kâfir nolur sâde ver
İki şâire bir kadeh bâde ver

1297 Hüner-düşmen olma misâl-i felek
Kemâl ehli bir gün aranmak gerek

1298 Sunup İzzet'e bir dahi Talat'a
Getir hâmesin sâkiyâ gayrete

1299 Gınâ ver ki keyfiyyet-i bâdeden
Ola kilki mey-nûş-ı câm-ı suhan

1300 Yazıp nâme-i perçemin sünbüle
Hacâlet vere vasf-ı rûyun güle

1301 Yazıp nüsha-i lalini sâgara

Şifâ eylesin anı derd-i sere

1302 Seni bir de yanındaki dil-beri
Yazıp Talat'ın böyle kilik-i teri

Rubâî

1303 *Talat be-huzûr-ı İzzet ân mürşid-i râh*
Dîdem ki nîşesteend dü mihr ü dü mâh
1304 *Yek burc dü âfitâb u yek çerh dü mâh*
Lâ havle velâ kuvvete illâ bi'llâh

1305 Senin vasfını gûş edip dil-berân
Bilirler nedir Talat'ı ol zamân

1306 Ne rütbe kalem etse vasfın beyân
İnanmaz benim sözüme dil-berân

1307 Odur şâir-i mâhir-i sihr-sâz
O varken dahi istemem sûz u sâz

1308 Ber-â-ber alıp sâkiyâ Talat'ı
Refik eyleyip çâkerin İzzet'i

1309 Keşanlı şu Mercan Köy'ün vasf eder
Teferrüc tarîkiyla çokmuş gider

1310 Ferâmûş edip mihnet-i âlemi
Keşan'da bırakıp bu derd u gamı

1311 Nolur sâkiyâ eylesen azm-i kûy
Dahi sen de göstermedin serve boy

1312 Dahi gonçeler görmedi rûyunı
Dahi güllere vermedin bûyunı

1313 Henûz etmedin kadd-i şimşâda nâz
Varıp eyle sâyen gibi ser-firâz

1314 Aceb kandadır duht-ı rez kâfiri
Edermiş taleb şu iki şâiri

1315 Nikâh eyle birden iki mâhire
Sıgar vûsat-i mezheb-i şâire

1316 Biraz şehri içinde olur ihtilâf
O cevherle Mercan'da olsun zifâf

1317 Şu tertîbe himmet edip sâkiyâ
Hemân bir ayak evvel ol reh-nümâ

1318 Bunu gûş edip etdi sâkî pesend
Tedârik edip bir iki hoşca bend

1319 Hûm-ı bâde gerdûneyi etdi cây
Güneş oldu gerdûnda san rû-nümây

Mercan karyesine Talat'la azîmetimizdir

- 1320 Çıkıp tahtına husrev-i zer-külâh
Alıp Talat'ı eyledim azm-i râh
- 1321 Olup kûya gerdûne ile revân
İki mihre cây oldu dört âsumân
- 1322 Tutup dâmenimden gam-i kâinât
Ne çekdim elinden bulınca necât
- 1323 Olup mihnet-i rûz-merre refik
Dedim lutf et ey mihrbân-ı şefik
- 1324 Bir iki gün eyle Keşan'ı mekân
Yine sen benimsin benim her zamân
- 1325 Ser-i rehde gördüm ki ağlar elem
Dedim ey birâder ne var çekme gam
- 1326 İki güncegiz var Keşan'da otur
Gelir İzzet'in istirâhat buyur
- 1327 Ferâmûş mümkün midir sizleri
Hemân siz fedâ etmeyin bizleri
- 1328 Hele âdemiyyet edip derd ü gam
Elin çekdi dâmânımızdan o dem
- 1329 Keşan tağlarından ubûr eyledik
Su gibi fezâyâ mürûr eyledik
- 1330 Niçe cûybâra düşüp râhımız
Söyündü biraz âteş-i âhımız
- 1331 Birer ikişer bâde nûş eyledik
Leb-i bülbülânı hamûş eyledik
- 1332 Gazel tarh edip bir taraftan kalem
Öbür sûda mutrib ederdî negam
- 1333 Kemân çâk çâk eyledi perdesin
Ney ü mûsikâra dedi nerdesin
- 1334 Hurûş eyleyip nağmeler pîş ü pes
Şaşıp bülbülân yolda kesmişdi ses
- 1335 Gehî nûş-ı bâde gehî gûş-ı sâz
Görünmüşdü bir devha-i ser-firâz
- 1336 Edip ferş-i seccâde-i sebz-fâm
O nahl eylemişdi bize ihtirâm
- 1337 Olup sâyesi meskeni İzzet'in
Meğer cânı nân istemiş Talat'in
- 1338 Bakıp bana bir pâre nân istedi
Ten-i mürdeye sanki cân istedi

- 1339 Dedim bunda âdet degil ekl-i nân
Budur resm ü râh-ı diyâr-ı Keşan
- 1340 Bana etmedi badehû bir nigâh
Hemân devşirip deste deste giyâh
- 1341 Bu şi'ri yazıp hâmesi mürteçil
Ot otlar idi turmayıp muttasıl
- 1342 *Mî-hored Talat alef der-sebzezar*
Çün revâfız der-miyân-ı Sebzâr
- 1343 *Ender in-câ nîst âb u nân u dûg*
V'ender in-câ nîst imân u fûrûg
- 1344 *În buved berzah velî nâmeş Keşan*
An buved duzah velî der-in cihân
- 1345 *Hazret-i Monlâ-yı Rûmî gofteest*
Dürr-i in manî acâyib süfteest
- 1346 *Sebzârest in cihân-ı bî-medâr*
Mâ çü Bû-Bekrîm der-vey h'âr u zâr
- 1347 Henûz eylemişdi bu şi'ri beyân
Muhammed gelip verdi bir pâre nân
- 1348 Edip hâmesin zîb-i dest-i hüner
Muhammed için yazdı bir nev-eser
- 1349 Budur ol bihîn kıta-i hoş-edâ
Yazar var ise irticâlen salâ
- 1350 *Münevver ez-cemâlet çeşm-i âlem*
Muhammed hâdim-i İzzet Efendi
- 1351 *Gulâm-ı hüsn-i tu hûbân-ı Halluh*
Esîr-i lutf-ı tu refet Efendi
- 1352 *Be-pîş-i nutk-ı rûh-efzây-ı âgât*
Şeved çâker zi-cân neşet Efendi
- 1353 *Sitâned nesr-i û bâc ez-süreyyâ*
Harâceş mî-dihed cevdet Efendi
- 1354 *Binâ-yı şi'r ez-vey geşte muhkem*
Çü cân k'ez-hikmet-i nusret Efendi
- 1355 *Eğerçi âlimî bâşed senâ-h'ân*
Be-devr-i devlet-i Hâlet Efendi
- 1356 *Senâ-gûy-ı tu vü âgât bâşed*
Der-in câ bî-riyâ Talat Efendi
- 1357 Yiyip içdik anda oturduk biraz
Desem kim inanır ki kıldık namâz
- 1358 Yine etdi gerdûnede iktirân
İki kevkeb-i burc-ı ilm-i beyân

- 1359 Kalıp zîr-i gerdûnemizde sipihr
Geçerdik niçe belleri hem-çü mihr
- 1360 Niçe deşte Mecnûn-ı nâ-şâd idim
Hemân gördüğüm kûha Ferhâd idim
- 1361 Gehî dil-berin vâsf ederdi bana
Edip derde Talat beni âşinâ
- 1362 Ederdim gehî derdimi ben beyân
Budur derdi hâl-i heme âşıkân
- 1363 Anın nâm-ı mahbûbu Feth-i Alî
Benimki beş on beytinin evveli
- 1364 Yazıp bir rübâî anın nâmına
Yine zehr katdım biraz câmına
- Rübâî**
- 1365 *Üftâde-i râhem be-kücâyî ki tu hest*
Ey nûr-ı dil-i Talat-ı mâ Feth-i Alî
- 1366 *Men bende-i ânem ki esîr-i zülfet*
Ey râbita-i sohbet-i mâ Feth-i Alî
- 1367 Bu vâdîde sohbet edip gâh u gâh
Ederdik gehî seyr-i sun-ı İlâh
- 1368 Ayân oldu gül gibi Mercan Köyü
Degil lal ü mercan hemân cân köyü
- 1369 Çevirmiş bütün karyeyi cûybâr
Açılmışdı san şîşede nev-bahâr
- 1370 Nigîn-i zümürüd idi kûhsâr
Takınmış anı pâdişâh-ı bahâr
- 1371 Der-âgûş edip sâye-i bîdi cû
Mahabbet ederler idi sû-be-sû
- 1372 Düşüp cûlara sâye-i erguvân
O dem âb-ı yâkûtu gördük revân
- 1373 Boyunca düşüp aks-i serv-i sehî
Zümürüd olup nehr akardı gehî
- 1374 Biri ejdehâ biri gûyâ peleng
Hemân cû ile pül ederlerdi ceng
- 1375 Gelip ana taşkınca cûyun sözü
O gayretle cisrin tolardı gözü
- 1376 Sadâsı şebîh idi feryâdîma
Getirdi sular giryeyi yâdîma
- 1377 Ben ağlar idim Talat eylerdi âh
O ağlar idi İzzet eylerdi âh

- 1378 Edip anda ferş-i kilîm-i elem
Bu şî'ri okurdu nedîm-i kalem

Gazel

- 1379 Ben ağladıkca çağladı gülşende cûybâr
Oldum hevâ-yı aşka uyup ben de cûybâr
- 1380 Çeşmim gelir o nahl-i revân ile yâdıma
Görsem bahâr mevsimi her kanda cûybâr
- 1381 Olmuş revâne deşt-i cünûna benim gibi
Bir serve kendin eyleyip efgende cûybâr
- 1382 Nezzâre eyle sîne-i sûzânda eşkime
Seyr etmedinse âteş-i külhanda cûybâr
- 1383 Ben bir gül için ağlarım ol gülsitân için
Olmaz mı görse eşkimi şermende cûybâr
- 1384 Kat-ı hudûda oldu sipâhî gibi revân
Tîmâr-ı deştî gördü perâkende cûybâr
- 1385 Mecnûn-ı eşkim ile boşanmışdı bâğdan
Âhir çekildi şehre girip bende cûybâr
- 1386 Düşdü reh-i inâyetine ez-ser-i niyâz
Sultân-ı nev-bahâra olup bende cûybâr
- 1387 İzzet midâd-ı hâmenin olmazdı pey-revi
Ger pîr evini olmasa cûyende cûybâr
- 1388 Bu nazma dahi yazmadan hâme tem
Gelip meclise basdı sâkî kadem
- 1389 Koyup câm-ı sahbâya nîş-i itâb
Hemân İzzet'e böyle etdi hitâb
- Nasâyih-i sâkî**
- 1390 Dedî ey garîb-i bilâd u diyâr
Senin çâre olmaz gumûmun mu var
- 1391 Nedir bu bükâ vü nedir bu figân
Hasîrin bulunmaz yanarsa cihân
- 1392 Seyâhatle def-i kederdir murâd
Ederler mi bîhûde terk-i bilâd
- 1393 *Tu-râ hem-çü Talat şeved gam-güsâr*
Tu ger âkılî derd ü mihnet me-dâr
- 1394 Edip neşe-i nush-ı sâkî eser
Dedim ey şifâ-sâz-ı renc-i keder
- 1395 Hudâ lutfunu eylesin müstedâm
Çerâğın ola niçe mest-i müdâm
- 1396 Beni etdin irşâd şâd olasın

- Bu mey-hânedede ber-murâd olasin
- 1397 Gönül buldu nushunla şevk u sürûr
Biraz da şu zâta nasîhat buyur
- 1398 Koyup derd-i Feth-i Alî'sin biraz
Anın aşkına dinlesin söz u sâz
- 1399 Hitâbı çevirdi o dem Talat'a
Dedi gam-güsâr olsana İzzet'e
- 1400 Nedir sende ben var iken derd-i ser
Eğer gitse pîr-i meye bu haber
- 1401 Seni mey-perestâna teşhîr eder
Be-rûh-ı arak tuysa tekdîr eder
- 1402 Anın sâye-i devletinde ne var
Bu âlemde mey var iken gam me-h'âr
- 1403 Mey-i nâbdır merhem-i ehl-i derd
Enîs-i dil ü mahrem-i ehl-i derd
- 1404 Mey-i nâbdır reşk-i âb-ı hayât
Bin İskender'e katresidir necât
- 1405 Mey-i nâbdır yâdigârı Cem'in
Ola rûhu şâd ol şeh-i azamın
- 1406 Hiredmend olaydı eğer mey-fürûş
Anı satmayıp kendi eylerdi nûş
- 1407 Verip bâde-i nusha reng-i diğér
Dedi aklınız yâr olaydı eğer
- 1408 Zebûn olmayıp düşmen-i mihnete
Sabûh ile başlardınız işrete
- 1409 Safâ-yı sabâha verir fer sabûh
Dil-i mürdeye eyleyin bahş-ı rûh
- 1410 Edip nush-ı sâkîyi bezme sebak
İçildi arakdan bir iki çanak

Sûret-i meclis ve mest şuden-i sâkî

- 1411 O âteş ile kelleler germ olup
Biraz sahtî-i bahtımız nerm olup
- 1412 Unutdurdu sâkîye temkînini
Çıkartdı başından arak-çînini
- 1413 Olup gîsuvân-ı siyeh zîb-i dûş
Omuzdan atılmışdı hep akl u hûş
- 1414 Arakla lebi oldu şîr ü şeker
Yahod suya konmuşdu gül-berg-i ter
- 1415 Gelip bezme seyr eylesin andelîb

Gülün bâde-nûş oldugun bî-şikîb

- 1416 O nahl-i revân oldu keyfimce mest
Gül-i sâgarı tutmaz olmuşdu dest
- 1417 Ederdi gehî mutribe bir nigâh
Demekmiş meğer remz ile çal dü-gâh
- 1418 Meğer serve taş atması sâhte
Demekmiş usûlü ola fâhte
- 1419 Dedim versene sâkiyâ bir şarâb
O olmuş meğer benden evvel harâb
- 1420 Hemân mey yerine sunup lal-i nâb
Dedi bundan alâ olur mu şarâb
- 1421 Hemân koydu âgûşuma başını
Gönül şimdi ister nenin aşını
- 1422 Alıp destimi râhe-i destine
Tutardı gehî dîde-i mestine
- 1423 Atardı gehî kolların dûşuma
Tutup gonçe-i lalini gûşuma
- 1424 Dedi soksana destini koynuma
Benim gibi at kolların boynuma
- 1425 Neremden murâdın ise bûse al
Ne istersen anın dirîgi muhâl
- 1426 Bu tebşîri gûş etdiği dem hemân
Sanırdım tenimle vedâ etdi cân
- 1427 Düşüp anda bayılmışım niçe dem
O iksîri bahtım bana etdi sem
- 1428 Gönül görmemiş böyle bir iltifât
Edeyazdım az kaldı terk-i hayât
- 1429 Biraz geldi aklım hele başıma
Dedim böyle devlet gele başıma
- 1430 Bu lutf u nevâle sebep mey ola
Hum-ı bâdeye gark olursam nola

Resîden-i vakt-i şâm ve âmeden-i mutrib der-ân hengâm

- 1431 Bu keyfiyyet ile erip vakt-i şâm
Yine meyle olduk muattar-meşâm
- 1432 Gelip bezme mutrib edince negam
Ne ekdâr kaldı ne derd ü ne gam
- 1433 Dedim çalma mutrib acemle ırâk
Henûz eyledik şunda def-i merâk
- 1434 Dedim giyme rakkâs sen dahi mor

- Mora kâfiri fikre eyler hutûr
- 1435 Usûlün sakın darb-ı feth olmasın
Yine Talat'ın gözleri tolmasın
- 1436 Düzüp sâzını mutrib-i hoş-nevâ
Çalındı o dem gûşuma bir sadâ
- 1437 Olup nağme-senc-i makâmât-bend
Bu beyti dedi mutrib-i hûşmend
- 1438 *Tu ger âkılî ez-felek gam me-hor*
Hemîşe kuned şâdî vü gam mürûr
- 1439 Enîn-i rebâbı edip gûş hûş
Bulup tesliyet gönlüm oldu hamûş
- 1440 Dögüp sînesin sîli-i gamla def
Gönül gibi olmuşdu pür tâb u tef
- 1441 Benimçin olup dem-be-dem zâr zâr
Gülû-gîr idi giryeye-i mûsikâr
- 1442 Görüp çengde mihnet-i cân-hırâş
Gönül eylemezdi gamından telâş
- 1443 Kemân gösterip sîne-i çâk çâk
Tesellî bulurdu dil-i zahmnâk
- 1444 Diyip nezd-i hâmemde destûr ney
Verildi yine kâle-i şevke pey
- 1445 Be-sırr-ı tarîk-i Hudâvendgâr
Bana etdi râz-ı dilin âşikâr
- 1446 Hudâvendgâr'ın erip himmeti
Biraz eyledik neyle cân sohbeti
- 1447 Açıldı derûnumdaki jeng-i gam
Cehân olsa gam mı cihân-ı elem
- Mercan karyesinden avdetimizdir**
- 1448 İki üç gün anda ikâmet edip
Kederden biraz istirâhat edip
- 1449 Meserret umarken şu ekdâra bak
Dahi açmadan gül gam-ı hâra bak
- 1450 Ne gördük ki almış cihânı gumûm
Edip şehre girmezden evvel hücûm
- 1451 Giribânımı aldı dest-i keder
Pes ü pîşimi etdi zîr ü zeber
- 1452 Alıp şevkımı dâyin-i gam tamâm
Güzeşte safâ oldu ol dem harâm

1453 Yanık bağrımı yakdı tekrâr çerh
Koyup nârımın üstüne nâr çerh

1454 Bana elverip artıyorken keder
Uzadı ayağın diğer derd-i ser

Haber-i vefât-ı Şeh-zâde Sultân Ahmed

1455 Gelip meclise bir berîd-i hümûm
Dedi gûş et ey mübtelâ-yı gumûm

1456 Sana vereyim başka gamdan haber
Gam-ı kâinâta bedel bir keder

1457 O âteşle nâr-ı dili tâzele
Hemân dest-i âh ile yelpâzele

1458 Dedi ol berîd-i musîbet-nüvîd
Felek etdi bir cevheri nâ-bedîd

1459 Telef kıldı şeh-zâde-i kihteri
Düşürdü bu şeb hâke ol ahteri

1460 Edip yanî Şeh-zâde Ahmed vefât
Siyehler giyindi yine kâinât

1461 Gülû-gîr-i hayret olunca bu ses
Hemân-dem tıkanmışdı râh-ı nefes

1462 Bir iki kadeh bâde içdikdi dün
Getirdi felek burnumuzdan bugün

1463 Su başında ekl eylemişdim kebâb
Revân oldu gözden misâl-i şarâb

1464 Olup zevk-i Mercan bana mürr-i cân
Şikest ola az kaldı kim dürr-i cân

1465 Hazân erdi gül-gonçe-i kâma hayf
Erişdi şitâ gelmeden fasl-ı sayf

1466 Olup sedd-i gam bânın u zâhirim
Kapatdı felek şeş-der-i hâtırım

1467 Güşâd olmadan gonçe-i bâğ-ı kâm
Dimâğa hâlel verdi derd-i zükâm

1468 Umardım ki şâh-ı cihân şâd olur
Gönül kayd-ı mihnetden âzâd olur

1469 Edince bu aks-i kazıyye zuhûr
Dil oldu yine dîde-dûz-ı sürûr

**Vürûd-ı peyâm-ı vilâdet-i Şeh-zâde Sultân Abdülmecîd
tavvelall'âhu ömrehu**

1470 Bu şâm-ı gamın ertesi subh-dem
Be-feyz-i hudâvend-i sâhib-kerem

- 1471 Keşan'a gelip bir berîd-i cedîd
Dedi togdu Şeh-zâde Abdülmecîd
- 1472 Olup bâis-i inşirâh-ı sudûr
“Maa'l-usri” manâsı etdi zuhûr
- 1473 Telef-kerde-i dehr olan gevheri
Getirdi yine düzd-i devrân geri
- 1474 Düşürdüyse bir mîvesin rûzgâr
Ola devha-i saltanat pâydar
- 1475 Yine açdı gül-nahl-i şevket çiçek
Bi-ikbâlihi hâsîdîn kad helek
- 1476 Erip bir nüvîd-i meserret-meâl
Ayân oldu sırr-ı celâl ü cemâl
- 1477 Dilerse Hudâ mâtemi sûr eder
Murâd eylese zulmeti nûr eder
- 1478 Eder zehri tiryâk tiryâkı zehr
Eden hep odur “lâ-tesubbu'd-dehr”
- 1479 Bana sanki nush eyledi ol peyâm
Tefekkürle buldum tesellî-i tâm
- 1480 İnâyet ederse Hudâ-yı sahî
Geçer böyle ekdâr-ı dîger dahi
- 1481 Hemîşe bu âlem ki mamûr olur
Gehî mâtem ü gâhîce sûr olur
- 1482 Ne sûrunda âkil olur neşemend
Ne hod mâteminden erişir gezend
- 1483 Gelip emr-i âlî ile müjde-res
Benî kıldı ihyâ o İsí-nefes
- 1484 Ferahnâk olup hâme-i gam-enîs
Bu târîhi nazm etdi pâk ü selîs
- Târîh-i vilâdet-i Şeh-zâde
Sultân Abdülmecîd tavvela'llâhu ömrehu âmîn**
- 1485 Dîdeler rûşen ki oldu zulmet-i gam nâ-bedîd
Togdu burc-ı saltanatdan dehre bir necm-i saîd
- 1486 Şehryâr-ı nükte-dân sece riâyet eyledi
Çünkü nâm-ı necl-i vâlâ-şânıdır Abdülhamîd
- 1487 Ferkadân-ı evc-i şevket oldugun kıldı beyân
Dîgerin etdikde şimdi tesmiye Abdülmecîd
- 1488 Bâreka'llâh husrevâ tab-ı maânî-nebine
Şöyle bir şey bulmadı ömründe Hârûnü'r-Reşîd
- 1489 Sinn-i pîrîde bagal-gîr-i hümâyûnun ola

- Ol iki serv-i ser-efrâzın olup ömrü medîd
- 1490 Şehryârâ Hak senin ikbâlini efzûn ede
Müdbirim müdbir olaldan bâb-ı lutfundan baîd
- 1491 Külhanı merdûdusun şâh-ı cihânânın diyü
Bana hançer çekmede gülşende her bir berg-i bîd
- 1492 Bende-i sâdik degilsem zât-ı âlî-şânına
Rûz-ı rûstâhîzde ahvâlîme gülsün Yezîd
- 1493 Lutf u kahrı cem eden şâh-ı kerem-kirdârsın
Sâye-i Hak'sın sana şâyestedir va'd u vaîd
- 1494 Merhametden halk olunmuşdur vücûd-ı şevketin
Hâşeli'llâh kim kesem dergâh-ı lutfundan ümîd
- 1495 Kalmayam tefsîde-leb çâk-i girîbân eyleyip
Kulların bûs eyledikçe dâmenin hengâm-ı îd
- 1496 Sen Süleymân-câhdan dûr eyleyip bahtım beni
Fîle benzerken vücûdum mürveş oldu kadîd
- 1497 Girmez olmuşken figân u âhdan başka sadâ
Kûsveş çalındı gûş-ı hûşuma bir hoş nüvîd
- 1498 Birde buldum kendimi yolda münâdîler gibi
Şevk-i şâdîden olup her hâneye gitdim berîd
- 1499 Secde-i şükr eyleyip her seng-i râh üzre dedim
Gün-be-gün şâdân ola yâ Rab o hâkân-ı vahîd
- 1500 Sulb-i pâkinden gelip gâhî zükûr u geh inâs
Etsin evlâd-ı kirâmıyla Hudâ ömrün mezîd
- 1501 Bed nazardan dûr ola İzzet dedim târîhini
Oldu nûr-ı dîde-i Mahmûd Hân Abdülmecîd (= 1238)
- 1502 Görüp tamiyem düşmenân ola kûr
Ederse kalem böyle eyler kusûr
- 1503 Kalem zâr u mahzûn iken hem şikest
Yine düşmenin kadrini etdi pest
- 1504 Verip kâsîd-ı şevke etdim revân
Ederler ise arz-ı şâh-ı cihân
- 1505 Görüp arz-ı hâlîm terahhum eder
Yahod zulmet-i bahtımız güm eder
- 1506 Bu hâl üzre kıldı beş on gün mürûr
Tasavvur gibi etdi âhir zuhûr
- 1507 Olup niçeler kayd-ı gamdan berî
Güşâd-ı gül-i kâm kaldı geri
- 1508 Olup h'ân-ı Leylî ile sîr nâs
Hemân Kays idi gürsine kıl kıyâs

- 1509 Budur âdet-i Leylî-i baht-ı pest
Eder Kays-ı zârın çanağın şikest
- 1510 Gerek böyle giryân gerek şâd ede
Gerek günde bin habs u âzâd ede
- 1511 Hudâ ömr ü ikbâlin efzûn ede
Beni bin yıl isterse mahzûn ede
- 1512 O hâkâna ben bende-i sâdıkam
Degil kahrına lutfuna lâyıkam
- 1513 Bilir âlimü's-sırr olan pâdişâh
Kim oldugunu hâin ü hayr-h'âh
- 1514 Hudâ düşmeni kimse makhûr ede
Eğer nûr-ı çeşmim ise kûr ede
- 1515 Kapandı bu kufl ile bâb-ı ümîd
Ferah oldu dil-hâneden nâ-be-dîd
- 1516 Se mâhı geçip müddet-i iftirâk
Keşan oldu ser-had yine biz yamak

Azîmet-i Talat ve ba'z-ı ebyât-ı fûrkat

- 1517 Be-hem olma engüş ü hâtem kadar
Cüdâ eyler elbette dest-i kader
- 1518 Yakın olma sen nûr ile dîdeveş
Be-her şeb ana nevm olur perde-keş
- 1519 Karîn olma mânend-i âb u nihâl
Erer âba yâhod nihâle zevâl
- 1520 Mürekkeb ile hâmeveş olma hem
Girer araya gâhî mûy-ı elem
- 1521 Hele kanda varsa iki derdnâk
Olur dest-i fûrkat ile çâk çâk
- 1522 Gönül etme bîhûde arz-ı gile
Felek eski düşmendir ehl-i dile
- 1523 İki necm-i ulvî kırân etse ger
Salar âleme der-akab şûr u şer
- 1524 Ne fark eylesin ehl-i dil sohbetin
O nâ-dân bilir mi güher kıymetin
- 1525 Görürse ne dem meclis-i ülfeti
Sunar der-akab bâde-i fûrkati
- 1526 Yine câna kasd-ı cefâ eyledi
Beni Talat'imden cüdâ eyledi
- 1527 Edip Edrine şehrini ârzû

- Kabûl etmedi zahm-ı hicrân rûfû
- 1528 Müheyyâ olunca bisât-ı sefer
Gelip mâh-ı nev oldu zerrîn-kemer
- 1529 Abâ-yı sefidin görüp yâsemen
Düşüp kendine hâzır etdi kefen
- 1530 Döküp turre-i rîş-i destârını
Unutdurdu bâğa semenzârını
- 1531 Çıkıp anı teşyîe gülzâra dek
Hafî eyledim bu dil-i zâra dek
- 1532 Dedim ey gönül azm-i bâğ edelim
Alıp subh-dem Talat'ı gidelim
- 1533 Tuyursam dil-i zârıma fûrkatın
Alev-hîz edip âteş-i hasretin
- 1534 Keşan'ı degil âsumânı yakar
Bu âteşle yansa cihân kim bakar
- 1535 Felek saldı bir pençe-i hevlnâk
Girîbân gibi eyledi çâk çâk
- 1536 Atıp Talat'ı Edrine sûyuna
Bırakdı beni derd ü gam kûyuna
- 1537 Edip bu rübâicigim berg-i sebz
Dönüp bâğdan eyledim terk-i sebz

Rübâî

- 1538 Azm etdi sehergâh bu gün Talat âh
Ey çerh turaydı ne olur bir kaç mâh
- 1539 Eyvâh yetişdi buna da baht-ı siyâh
Lâ havle velâ kuvvete illâ bi'llâh
- 1540 Yazıp hâmesi irticâlen cevâb
Bununla tamâm oldu âhir hitâb

Rübâî

- 1541 *Sad dâd zi-cevr-i felek-i kîne-nihâd*
Bünyâd-ı fesâd kerd âgâz-ı inâd
- 1542 *Bi'brîd zi-kîne rişte-i sohbet-i mâ*
Tâ haşr nümâyîm zi-desteş feryâd
- 1543 Binip rahşa azm etdi ol şehryâr
Yine oldu mülk-i hüner târ u mâr
- 1544 Çıkıp resm-i teşyîine serv-i bâğ
Düşüp yollara gitdi yalın ayağ
- 1545 Yanıp âteş-i iftirâkıyla gül
Bahârın ocağı sönüp kaldı kül

- 1546 O rütbe firâkıyla kıldı bükâ
Gözün nergis etdi yolunda fedâ
- 1547 Yolup saçını başını sünbülân
Unutdu gülün derdini bülbülân
- 1548 Görüp çeşm-i giryânımı zâr dil
Firâkından oldu haberdâr dil
- 1549 Edirne diyip gitdi gönlüm hemân
Gözüm dahi ardınca oldu revân
- 1550 Dönüp bî-hod u bî-dil ü bî-nevâ
Ne sûz u güdâz u ne âh u bükâ
- 1551 Bu âvâre-murg-ı diyâr u mekân
Keşan'ı yine eyledi âşiyân

Âmeden-i mâh-ı sıyâm ve ba'z-ı vekâyi der-ân eyyâm

- 1552 İşâret edip kaş ucuyla hilâl
Kılın emr-i Hakk'a dedi imtisâl
- 1553 Erip şehir-i gufrân-ı rahmet-nüvîd
Bana mâh-ı rûze bu yıl geldi îd
- 1554 Geçip vakt-i gam neşe-i savm ile
Birazı mürûr eyledi nevm ile
- 1555 Mezemmetden olmuşdu hâlî lisân
Yok anda bizim mefsedet-pîşegân
- 1556 Cemâatle asrı ederdim edâ
Biraz dinleyip hâfız-ı hoş-sadâ
- 1557 Degirmen kırında ederdim karâr
Ne gam dönmese çerh-i mihnet-medâr
- 1558 Sımâha erişince tâ bâng-i şâm
Kenâr-ı fezâda tutardım makâm
- 1559 Verip vüsat-i rızk İlâh-ı kerîm
Keşan'ı bana etdi dâr-ı naîm
- 1560 Ne eksik ise etdi Mevlâ tamâm
Sitanbul'dan alâ pişerdi taâm
- 1561 Salıp nehr-i cârî-i lutfun Hudâ
Uzunköprü'den buz getirdi bana
- 1562 Tolu nân u nimetle gerçi Keşan
Çörek tabhını bilmiyorlar hemân
- 1563 Olup bu rübâî hamîr-i taleb
Yaratdı anı dahi Hak bî-taab

Rübâî

- 1564 Yârân-ı Keşan'a soralım şimdiden
Yağlıca çörek yoksa yutulmaz ramazân
- 1565 Elbette birinden birini ekl ederim
Bu rûze-i hicr ile tutulmaz ramazân
- 1566 Bilirmiş meğer mâyesin bir harîf
Sitanbul'da tabh olunandan latîf
- 1567 Sitanbul'a mess etmedi ihtiyâc
Gelibolu'dan geldi nâzûk gülâc
- 1568 Gelirdi kazâlardan alâ kirâs
Ederdi leb-i yâr ile iltibâs
- 1569 Be-lutf-ı Hudâ-yı amîmü'n-nevâl
Gelip İpsala beldesinden zülâl
- 1570 Kayıştağı'na çekmedik ârzû
Kalıp âbsız tökmedik âb-ı rû
- 1571 Cihân etdi ikrâmıma ihtimâm
Ola sâye-i saltanat ber-devâm

Sıfat-ı pâsbân-ı bed-manzar u bed-elhân

- 1572 Fakat geceler vardı bir pâsbân
Bed-elhân u bed-sûret ü bed-zebân
- 1573 Aceb bekçi kim pâsbân-ı felek
Sadâsın işitdikçe ürkmek gerek
- 1574 Verir nağmesi savma belkim zarar
Sezâ Ermenî zangocu olsa ger
- 1575 Nevâlar ki gûş eylese ez-kazâ
Kulağın tıkar bûm-ı dehşet-fezâ
- 1576 Gelir ehl-i taba eğer konsa hem
Yanında eşek bülbül-i hoş-negam
- 1577 Çomak kolları karnı gûyâ dühül
Alâ zumihi'l-bâtıl üstâd-ı kül
- 1578 Çıkık gögsü mânende-i dümbelek
Sadâ hirre vü kaz ile müşterek
- 1579 Katı bü'l-aceb heykeli var idi
Biraz da başında keli var idi
- 1580 Acebdir ki hem kel idi hem fodul
Olur olmaza çalmaz idi tavul
- 1581 Yarım nağmecik eksik etmek muhâl
Bütün dinlemezsın eder infîâl
- 1582 Gelip ibtidâki gece çaldı sâz
Nedir çaresi dinlemiştik biraz
- 1583 İkinci gece geldi ol bed-sadâ

- Hudâ kimseyi etmesin mübtelâ
- 1584 O şeb de ne hâl ise sabr eyledim
Tahammül edip nefse cebr eyledim
- 1585 Üçüncü gece kalmadı tâkatim
Dedim mûsikî ile yok ülfetim
- 1586 Heder olmasın nağme-i cân-güdâz
Varup başka yerde çağırsın biraz
- 1587 Koyunca uşak destine bahşişi
Hemân karnının tabla dönmüş şişi
- 1588 Olup münfail akçayı etdi red
Demiş olsa gencîne-i lâ-yuad
- 1589 Tamâm olmadan bestehâ-yı sakîl
Alıp akçeyi kendim etmem rezîl
- 1590 O şeb fi'l-hakîka edip infiâl
Demiş bir dahi gelmek emr-i muhâl
- 1591 Tarıldı bana gerçi ol küştenî
Kesildi ya bârî tenennî tenî
- 1592 Bunu gûş eden kizbe haml etmesin
Tarîk-i hilâfa çıkıp gitmesin
- 1593 Bu âlem anın bir eşin görmemiş
Anın gibi bir seg dahi ürmemiş
- 1594 Muarrâ sesi güfte vü besteden
Muhazzin idi âh-ı dil-hasteden
- 1595 Mukadder imiş dinledik üç gece
O üç geceden görmedim güç gece
- 1596 Harâm etdi zâlim bana uykuyu
Gözüm Yûsuf-ı h'âba oldu kuyu
- 1597 Girirdim dolaba hicâb etmesem
Cünûndan eğer ictinâb etmesem
- 1598 Hayâli girip h'âbıma gâhice
Taldım yem-i dehşete ol gece
- 1599 Kedi mavlasa bekçi geldi sanıp
Okurdum iki yanına uyanıp
- 1600 Bir ay çıkmadı nağmesi gûşdan
Berî etdi kâfir beni hûşdan
- Âmeden-i müftî-i ucûbe-i Ergene**
- 1601 İşitmiş idim müftî-i Ergene
Kocalıkda benzer imiş ergene

- 1602 Nasîb olmamış iltihâ sünneti
Civânlıkda kalmak imiş niyyeti
- 1603 Bölük başılar gibi başında şâl
Edermiş anın ile setr-i kemâl
- 1604 Sakalsızlığın fikr edip mû-be-mû
Cemâlin gönül eyledi ârzû
- 1605 Edip bu rübâîmizi nâme-zîb
Arardım münâsib berîd-i edîb

Rübâî

- 1606 Ey müftî-i bî-rîş-i kerâmet-endîş
Bu İzzet-i dil-rîşden ol kim âgâh
- 1607 Dîdârını gözler seni özler dâim
Oldu şu Keşan'a geleli bir kaç mâh
- 1608 Tesâdüf edip azmine Talat'in
Berîdi olup nâme-i ülfetin
- 1609 Aceb menhelü'l-azb olup hâmemiz
Erişdi Uzunköprü'ye nâmemiz
- 1610 Varıp nâmemiz şehir-i şabânda
Kudûm eyledi mâh-ı gufrânda
- 1611 Ne gördüm o ucûbe-i rûzgâr
Sarup şâlnı başına târ u mâr
- 1612 Oturdu gelüp nev-civânlar gibi
Bıyıklarla kaşlar kemânlar gibi
- 1613 Miyânında seyf-i adû-iltikâm
Verir Rüstem-i Dâstân'dan peyâm
- 1614 O sîmîn takım Arnavud piştovu
Yerinde helâk etmede Moskov'u
- 1615 Kelâmı idi şâhid-i behresi
Anı gerçi tekzîb eder çehresi
- 1616 Haberdâr-ı her fenn idi togrusu
Degil sûret ü sîretin ugrusu
- 1617 Rufâîlerin mürşidi şeyh-i kül
Tarîkinde hâdî-i hayr-ı sübül
- 1618 Fekâhet ile eylemiş imtizâc
Velî sûretâ lâubâlî-mizâc
- 1619 Olup iki üç gececik mîhmân
Uzunköprü'ye oldu âhir revân
- 1620 Görülmüş degil öyle zât u sîfât
Hakîkatde udhûke-i kâinât
- 1621 Getirmez anın bir mesîlin felek

Ne mümkün görüp şeklini gülmemek

- 1622 Anı gûş eden ehl-i irfân kişi
Eğer yoksa da Rûmeli'nde işi
- 1623 Danışmaz hemân mîr ü paşasına
Gider ol azîzin temâşâsına

Hikâye-i nefîse-i imâm-ı şânî-i Keşan

- 1624 Hikâyet eder idi Vehbî-i pîr
Yalan gerçek ol şâir-i bî-nazîr
- 1625 Olup nâib-i belde-i Magnisa
Kudûmuyla Aydın imiş rûşenâ
- 1626 Salıp def gibi şöhre-i şâirî
El üstünde tutmuşlar ol mâhiri
- 1627 Kar'osmânların pîri Hâcî Ömer
Çögür şâiri zann edermiş meğer
- 1628 Çağırılmış anı bir şeb ibrâm ile
Varınca o da izz ü ikrâm ile
- 1629 Vücûh-i vilâyet de mihmân imiş
Anın ağzına cümle hayrân imiş
- 1630 Hitâb eyleyip ana Hâcî Ömer
Demiş ey efendi-i sâhib-hüner
- 1631 Eder senden erbâb-ı meclis niyâz
Alıp destine sâzını çal biraz
- 1632 Demiş ey ağa-yı misâfir-nüvâz
Usûl-i diğerdîr bizim sûz u sâz
- 1633 Hitâb eyleyip ana tekrâr ağa
Edermiş hamâkatde ısrâr ağa
- 1634 Demiş sâzınız yok ise bizde var
Sadef-kâri tanbûra-i sîm-târ
- 1635 Sadâsın edip perde perde dırâz
Edermiş hemân bir taraftan niyâz
- 1636 Anı kizbe haml eylemişdim fakîr
Zuhûr etdi bende be-hükm-i Kadîr
- 1637 Ne bühtân edersin karındaşına
Gelir ölmeden âkıbet başına
- 1638 Keşan Câmîinde imâm-ı sagîr
Sagîr idi gerçi sığırdan kebîr
- 1639 Dedi bir iki mâh sabr eyledik
Dil-i zâra sabr ile cebr eyledik
- 1640 İşitdik ki siz şâir-i şâhsız

Maârif semâvâtına mâhsız

- 1641 Degil haddimiz gerçi çaldırma sâz
Gönül bir iki nağme eyler niyâz
- 1642 Meh-i rûzede etdi ibrâm-ı tâm
Bana turma meşk et diyü bir makâm
- 1643 Dedim bedce çıkmışdı âvâzımız
Sitanbul'da terk eyledik sâzımız
- 1644 O ebleh tamâm eyledi itikâd
Bunu gûş eden eylesin itimâd

Fıkra-i dîgereş

- 1645 Kim eylerse kendinden eksik taâm
Ana azv eder idi ekl-i sıyâm
- 1646 Demiş kim efendi oruç tutmuyor
Bizimle börek baklava yutmuyor
- 1647 Yedim bir iki gün riyâen fakîr
Ne mümkün ana olma şibh ü nazîr
- 1648 Çekip midesinden anın ıztırâb
Yanardı bana hâl-i zârın kebâb
- 1649 Elinden olup hulv-i ter lerzenâk
Ederdi dilin tefşere çâk çâk
- 1650 Leben etse izhâr-ı çîn-i cebîn
Eder aşçıya sad hezâr âferîn
- 1651 Hemân peh peh idi dilinde kelâm
Katı pek sever idi yumşak taâm
- 1652 Hudâ'nın bana verdiği nân ile
Bu minnet ederdi o îhsân ile
- 1653 Fütûr olsa bende zamân-ı futûr
Bana kendi derdi efendi buyur
- 1654 Atıp kendimi menzil-i dîgere
Firâr eyledim bir bilinmez yere

Tebdîl-i mekân ez-harâret-i Keşan

- 1655 Bizim hânenin vasfı etdi mürûr
Gelir taba tekrârı ile fütûr
- 1656 Harâret bulup gün-be-gün izdiyâd
Erişdi sipihre sadâ-yı cerâd
- 1657 Tutuşdu felek cây-ı hirmen gibi
Şerâre saçardı degirmen gibi
- 1658 Zuhûr eyledi bir niçe muziyât
Arardım Keşan içre cây-ı necât

- 1659 Tecessüs ederdim gezip her zamân
Bu murg-ı dile bir ferâh âşiyân
- 1660 Görüp Voyvodaoglu'nun hânesin
Begendim hadîkayla kâşânesin
- 1661 Keşan'da anın gibi bir hâne yok
O hüsn ü letâfetde kâşâne yok
- 1662 Hemân etdik ol menzili câygâh
Kıla anı dâr-ı meserret İlâh
- 1663 O gündü meh-i rûzenin on beşi
Söyündü dil-i zârımın âteşi
- 1664 İki havzı var dahi bir selsebîl
Velî her biri birbirinden sakîl
- 1665 Müselsel akar mâ-i cârîleri
Behişt-i Keşan'dır dinilse hari
- 1666 Ne hâl ise lutf etdi Rabb-i kerîm
Bana dûzahı kıldı bâğ-ı naîm

**Vürûd-ı mektûb-ı Mîr Vâsîf eminehu'llâhu taâlâ
ani'l-avâsîf**

- 1667 Keşan'a duhûl eyledim ibtidâ
Edip pâsbân-ı felek bir nidâ
- 1668 Dedi semt-i Top-hâne'de var harîk
Beni etdi deryâ-yı nâra garîk
- 1669 Yanıp âhımızdan sipihr-i berîn
Düşüp bir şerâre tutuşmuş zemîn
- 1670 Gelip hâtıra Vâsîf'ın hânesi
Dedim yandı ol bûlbûlün lânesi
- 1671 Ezelden yanıkdır bizim hâneler
Diğer âteş ister mi vîrâneler
- 1672 Sorup kimselerden suâl etmedim
Dili bend-i dâm-ı melâl etmedim
- 1673 Dedim ibtidâ kendi etsin rakam
Yazıp etmeyem ben de ihtâr-ı gam
- 1674 Meh-i rûzede geldi bir nâmesi
Tutuşmuş konağı gibi hâmesi
- 1675 Mezâmîn-i ihrâkı yazmış tamâm
Öperken tutuşdu leb-i ihtirâm
- 1676 Yanınca iki okkalık bir seped
Demiş yandı Top-hâne'de nîk ü bed

- 1677 Ser-i şem-i hâmem edip iltihâb
Bu beyt ile fer buldu bezm-i cevâb
- 1678 İçinde anın beyt-i âşık ola
O âteş cihânı yakarsa nola
- 1679 O mîr-i mükerrem o zât-ı şerîf
Dahi eylemiş niçe remz-i latîf
- 1680 Ferâmûş edip kendinin derdini
Yazıp âlemin germ ile serdini
- 1681 Verip tesliyet bu dil-i zârıma
İlâc eyledi kalb-i bîmârıma
- 1682 Felek olsun anın çerâğı gibi
Tutuşsun adûlar konağı gibi
- 1683 Verip fer Hudâ şem-i ikbâline
Felek reşk ede bezm-i iclâline
- 1684 Şeh-i âlemin iki vassâfiyız
Televvün-ne-dân bende-i sâfiyız
- 1685 İkimizi birden musâb etdi çerh
Duçâr-ı gam u ıztırâb etdi çerh
- 1686 Hoş imdi hıdîv-i cihân sağ ola
Tağıldıkça da böyle sağ u sola
- 1687 O hâkân bu âlemde kim var olur
Felek Mustafâ'ya yine yâr olur
- 1688 Ser-i kûy-ı gamdan güzâr eyleriz
Felekden yine ahz-ı sâr eyleriz

Mebhas-i baht-ı şâirân ve ilzâm-ı ba'z-ı sitem-i zarîfân

- 1689 Nuhûsetdedir tâli-i şâirân
Eğer olsa da pâdişâh-ı cihân
- 1690 Pesend etdi tabın Fireng ü Acem
Mey-i kâma el sunmadan gitdi Cem
- 1691 Selîm-i kadîm olmasa şî'r-gû
Tokuz yılda mevt eylemezdi gulû
- 1692 Dahı Han Süleymân-ı sâhib-kırân
Eğer olmasa şâir-i hoş-beyân
- 1693 Cünûd-ı kevâkib olup leşkeri
Olurdu felekler de fermân-beri
- 1694 Tevârîh-i eslâfa etdim nazar
Hudâ etmesin kimseyi pür-hüner
- 1695 Neler etmiş ehl-i kemâle felek
O mihri alınca zevâle felek

- 1696 Bu manâyı tenvîr eder bî-şikâk
Utâriddeki kesret-i ihtirâk
- 1697 Utârid iken zâlimin kâtibi
Eder nahsını sadının gâlibi
- 1698 Bunu bilmeyip ba'zı har-tıynetân
Eder şâire azv-ı töhmet hemân
- 1699 Salıp başını der efendim lepey
Yine kendi der kim degil mi pek ey
- 1700 Mübârek feminden töküp salyalar
Tükürdügünü yine kendi yalar
- 1701 Biraz har-zarîfân alıp yanına
Biribirinin cân katar cânına
- 1702 Konup ortaya vâkıât-ı zamân
Gelirse eğer yâda mihnet-keşân
- 1703 Olur der-miyân İzzet'in sohbeti
Ayağıyla depti diyip devleti
- 1704 Kimi acıyıp acı sözler bulur
Kimi der ki itlâk olunsa nolur
- 1705 Kimi der ki tek turmaz ol bed-zebân
Olur zumu üzre derârî-feşân
- 1706 Kimi der ki etseydi hıfz-ı lisân
Sürerdi anın devleti bir zamân
- 1707 Kimi der ki kendisi oldu sebab
Bi-lâ-mûcib insân çeker mi taab
- 1708 O tan eyleyen câhil-i bî-hired
Beni akli üzre eder gerçi red
- 1709 Felek olmasa iki gün hem-demi
Erâcîf ile toldurur âlemi
- 1710 Felek degse cüzîce ger sâzına
Eşek reşk eder ol dem âvâzına
- 1711 Felekden şikâyet eder ol zamân
Demez kim sebeb oldu sehv-i lisân
- 1712 Efendiye gadr oldu der sâiri
Ferâmûş edip töhmet-i zâhiri
- 1713 Eğer şâire erse renc ü keder
Demezler felekden erişdi zarar
- 1714 Felekdir felek şâire hasm-ı cân
Ne yaptı aceb şâirân-ı zamân
- 1715 Ki Dervîş Efendi gibi bir harı
Felek eyledi Fıtnat'ın şevheri

- 1716 Revâ mı ola Fıtnat ol pîre zen
Eder anı gerdûn denen pîre-zen
- 1717 Tenaum eder bunca har-meşrebân
Elinden alır şâirin bulsa nân
- 1718 Ne söylersem isbâtına kâdirim
Cedel fennin îcâd eder mâhirim
- 1719 Benim nefyimin haftası olmadan
Felek oldu Top-hâne'ye şule-zen
- 1720 Topuyla tutuşdurdu Top-hâne'yi
Kebâb eyledi niçe kâşaneyi
- 1721 Edip Vâsıf'ın hân-mânın harâb
Hemân söndü gönlündeki iltihâb
- 1722 Desinler bana kıl u kâl eyledi
O bî-çâre Vâsıf aceb neyledi

Vürûd-ı mektûb-ı maânî-meslûb

- 1723 Ehibbâ vatanda gelip bir yere
Demişler Bahâ-yı hüner-pervere
- 1724 Yazıp nâme şâd etmedin İzzet'i
Unutdurmadın mihnet-i gurbeti
- 1725 Bilir fenn-i inşâda sensin ferîd
Bu lutfu eder senden ancak ümîd
- 1726 Diyâr-ı fazîlet ki milkindedir
Hükûmet o yerlerde kilkindedir
- 1727 Yeri geldi arz-ı hüner etmenin
Budur vakti sarf-ı güher etmenin
- 1728 Cesâret edip kimse açmaz dehen
Senin gibi muciz-edâ var iken
- 1729 Bu âlemde ancak hünerdir garaz
Hünerden nihâyet eserdir garaz
- 1730 İki ehl-i dâniş edip kıl ü kâl
Olur sözleri münşeât-ı kemâl
- 1731 Mekâtîbini ceme kıl ihtimâm
Çalış etmege sen de ibkâ-yı nâm
- 1732 Eğer yazmasa kâtibân-ı selef
Ne bilmem ne yer câhilân-ı halef
- 1733 Getir hâme-i himmeti gayrete
Begendir biraz kendini İzzet'e
- 1734 Alıp destine kilkin etme telâş
Ne kenz oldugun âleme eyle fâş

- 1735 Gözü Rûmeli'nin hünerver göre
Serîr-i maârifde server göre
- 1736 Girip bahse makûl u menkûlde
Desinler neler var Sitanbul'da
- 1737 Alıp yanına Rüşdî-i hoş-rakam
Demiş bende var işte kâğıd kalem
- 1738 Kimi köhne Dîvân-ı Hâfız verip
Kimisi hikâyât-ı Câhiz verip
- 1739 Kimi Nergisî'den verip bir varak
Ne dikkatler etmiş o hıbr-ı edak
- 1740 Kimisi verip münşeât-ı selef
Demiş etme Mollâ Efendi telef
- 1741 Koparma sakın tarılıp kâğıdın
Çıkarma bulup arada zâîdin
- 1742 Ehibbâ koyup yanına Ahterî
Dimişler lugatdır bunun her yeri
- 1743 Kimi köhne inşâ-yı mergûblar
Kimi bir takım küflü mektûblar
- 1744 Kılıp cümle ahbâb cem-i kütüb
Demişler bunu yaz hemân “sümme tûb”
- 1745 Olup mîve-i nahl-i teklîf hâm
Şaşırmiş o nihrîr-i mâ-lâ-keîâm
- 1746 Degil mültezem sonraki kâfiye
Fakat cem olundu iki nâfiye
- 1747 Gehî destini kâğıda saldırıp
Gehî kilkini hokkaya taldırıp
- 1748 Demiş ol hüner-mend-i sâhib-rakam
Mukaddem ne ranâ açardım kalem
- 1749 Hurûfâtı gördüm yazarken peder
Anı toplamak marifetmiş meğer
- 1750 Yazardım temessük bizim nâibe
Boyun egmeyip komşumuz kâtibe
- 1751 Murassal verirdim maîşet için
Kemâh kâfiri ol musîbet için
- 1752 Demiş çekmemişdim ne oldu aceb
Anamdan togalı bu rütbe taab
- 1753 Gözüne alırmış firâr etmegi
Kurarmış bana inkisâr etmegi

- 1754 Tesellî verip Mîr Kadrî ana
Demiş gayret et ey hüner-âzmâ
- 1755 Neler çekmiş ehl-i maârif neler
Kolaylıkla olsun mu arz-ı hüner
- 1756 Görüp pîç-tâbın cenâb-ı Şeref
Demiş olmasın bârî kâğıd telef
- 1757 Tutup ol hüner-perverin destini
Komuş kâğıda kilik-i işkestini
- 1758 Dönüp hâmesi hem-çü sîh-i kebâb
Saçarmış hurûf âteş-i ıztırâb
- 1759 Dahi bulmamış nâme hüsn-i hitâm
Tükenmiş idi orta yerde kelâm
- 1760 Meğer nâme kilikinden etmiş firâr
Keşan'a gelip etdi terk-i diyâr
- 1761 Gezip murg-ı âvâreveş bî-vukûf
Tutulmuş o dâm-ı belâyâ hurûf
- 1762 Maânî uzakdan edip merhabâ
Masûn eylemiş ol belâdan Hudâ
- 1763 Mukattaları hep muvassal yazıp
Muvassalları hep mufassal yazıp
- 1764 İki râyı koymuş idi ser sere
O nihrîr tahrîr edip bir yere
- 1765 Elifler ki bennâ-yı zâtü'l-imâd
Temel atmış olsa eder itimâd
- 1766 Yazar zâdı zâ vü dahi zâli zâ
Gehî iktizâyı eder iktizâ
- 1767 Yedinde anın kişver-i marifet
Odur sâhib-i leşker-i marifet
- 1768 Hurûfâtı kalkarsa ref etmege
Kimin cânı var anı def etmege
- 1769 Maânîye emr eyleyip katl-i âm
Kılıçdan geçirmiş o merd-i be-nâm
- 1770 Edersen o fâzıl ile ger nizâ
Hurûf-ı teheccî eder ihtirâ
- 1771 Hele hûya bir nokta etmiş rakam
Görölmüş degil halk olalı kalem
- 1772 Nukat var ki eşkâl-i remle şebîh
Nuhûsetde enkîs-i bedden kerîh
- 1773 Maânîsi ol rütbe ser-keş-mizâc
Degil lafz ile kâbil-i imtizâc

- 1774 Bozulmuş hurûfâtı hemçün sipâh
Biribirine etmeden kec nigâh
- 1775 Degil âşinâ birbiriyle hurûf
Mezâmîni elfâzdan bî-vukûf
- 1776 Edip nâme-yi bir zamân zîb-i dest
Nazardan güzâr etdi bâlâ vü pest
- 1777 Meâli nedir anlaşılmak muhâl
Meğer halli için güşâd ola fâl
- 1778 Ber-â-ber eğer gelmese nâmeler
Ne mümkindi andan alınmak haber
- 1779 Düşündüm taşındım meâlin biraz
Bana etmedi hâsılı keşf-i râz
- 1780 Degil nâme bir kûdek-i bî-zebân
İşâretle eyler merâmın beyân
- 1781 Degil nâme bir Türkçe bilmez Acem
Bi-gû ez-kücâyî desen der neam
- 1782 Tekellem ahî der ise bir Arab
Çi mî-güyemet der olur beste-leb
- 1783 Zihî nâme-i Nergisiyyü'l-beyân
Zihî münşi-i vakt-i Veysî-zebân
- 1784 Zihî münşi-i nev-zuhûr-ı halef
Zihî münşi-i köhne-tarz-ı selef
- 1785 Cihânın o hıbr-ı hüner-pîşesi
Edip hâme-i âheni tîşesi
- 1786 Maârif cibâlin edip herc ü merc
Bütün cevherin eylemiş bana harc
- 1787 Hüner kenzini eylemiş târ u mâr
Nola olsa ahbâba gevher-nisâr
- 1788 Kırıp kufl-i sandûka-i dânişi
Ne var ise dökmüş yed-i h'âhişi
- 1789 Olup düzd-i gencîne-i marifet
Nola çalsa nakdîne-i marifet
- 1790 Degil herkesin kârı sirkat dahi
Hünerdir olursa o kudret dahi
- 1791 Birişte kemâlât ile mâyesi
Ki fâzıl Münîb idi hem-sâyesi
- 1792 Dahi oldı İhyâ ile hem-nişîn
Duâ eylemişdi o gufrân-karîn
- 1793 Odur reşk-i eslâf-ı ehl-i beyân
Sezâ dense Vassâf-ı âhir-zamân

- 1794 Eđer görse eylerdi mâ-lâ-keîâm
Kinâyâtını istiâre İsâm
- 1795 Olaydı efendi-i mûmâ ileyh
Okurdu kitâbın ana Sîbeveyh
- 1796 Edebde eđer görse ol fâzılı
İmâm-ı Müberred tonar hâsılı
- 1797 Düşünmeksizin eyleyip nutku sarf
Bu isrâf ile kalmamış anda harf
- 1798 Fazîletde temmet demiş hâmesi
Dahi ters idi hâtem-i nâmesi
- 1799 Yazıp zarfına münşi-i bî-bahâ
Keşaniyye'de mîlla-i Kalata
- 1800 Memâlikde sâî gezip der-be-der
Okur olmamış Rûmeli'nde međer
- 1801 Demişler Keşan'a sürüldü biri
Odur asrının şâir-i mâhiri
- 1802 Bu kâlâyı yok Rûmeli'nde tokur
Okursa o şahs-ı hünerver okur
- 1803 O takrîb ile girdi nâme ele
Meh-i rûzede vâsıl oldu hele
- Reften-i mâh-ı mağfiret ve ikrâr-ı envâ-ı masiyet**
- 1804 Gel ey hâme kıl hamd-i Rabb-i kerîm
Degil gerçi kârın o emr-i azîm
- 1805 Kemâyenbagî hamd-i Mevlâ muhâl
Ki var bizde noksân u anda kemâl
- 1806 Niyâzı budur nâkısın kâmile
Nazar etmeye dikkat-i tâm ile
- 1807 Safâ-yı derûn ile Rabb-i mecîd
Meh-i rûzeyi etdi pâyan-resîd
- 1808 Tolu câm-ı gufrân idi cirm-i mâh
Anı cûra kalınca etdik tebâh
- 1809 Geçip geceler sohbet-i savm ile
Mürûr etdi gündüzleri nevm ile
- 1810 Azâzîl şabânda tedrîs edip
Şeyâtîn insânı iblîs edip
- 1811 Kapar koyverir her birin bir yere
Uzakdan nigebân olur anlara
- 1812 Reh-i masiyetten ubûr etdirir
İbâdât-ı Hak'da kusûr etdirir

- 1813 Olur münhemik ekl ü şürbe ibâd
Gelir şehvete rûzede izdiyâd
- 1814 Garaz kesr-i şehvet iken savmdan
Hayâlât baş kaldırır nevmden
- 1815 Uyup nefis-i emmâreye âkıbet
Olurlar refik-i reh-i masiyet
- 1816 Erip bî-mesûbât hengâm-ı îd
O demde gelir fikre yevm-i vaîd
- 1817 İlâhî birisi benim anların
O insân kıyâfetli şeytânların
- 1818 Fesâd öğredüp nefis-i emmâreye
Yüzünü benim boyayan karaya
- 1819 Benim şol ki şeytâna yok hâcetim
Azâzîl'î idlâla var kudretim
- 1820 Kerîm ü keremkâr bildim seni
Çeh-i masiyetde bırakma beni
- 1821 Bu mah-ı mübârek dahi gitdi âh
Degil afv u gufrân kazandım günâh
- 1822 Edip sînemi kûs-ı rihlet dirîg
Nefrin çalıp gitdi devlet dirîg
- 1823 Hümâ-yı saâdet idi bilmedim
Uçurdum ne devlet idi bilmedim
- 1824 Döküp dâne-i eşki kayd etmedim
Anı dâm-ı tesbîhe sayd etmedim
- 1825 Edip bezm-i iftârını vakt-i keyf
Kaçırdım duhân ile ol murgu hayf
- 1826 Börek baklava sandım ol nimeti
Düğün farz olunmuşdu cemiyeti
- 1827 Verip ecrini buzlu hoş-âba hayf
Değişdim mesûbâtını h'âba hayf
- 1828 Dirîgâ dirîgâ dirîgâ dirîg
Zünûb oldu çerh-i mesûbâta mîg
- 1829 Gelip geçdi ol mâh-ı gufrân-penâh
Bu bî-çâreye etmedi bir nigâh
- 1830 Olup perde-keş zulmet-i masiyet
Bana vermedi yüz meh-i mağfiret
- 1831 Çekip hasretin tâ-be-sâl-i diğér
Nola fûrkat ile yanarsa ciğér

Ámeden-i îd-i saîd

- 1832 Felek bir gece sardı destâr-ı îd
Degil gurre çakmağın etdi be-dîd
- 1833 Atıp rûz-merre libâsın felek
O şeb giydi bir zer çiçekli yelek
- 1834 Şebin kâmeti çünkü kûtâh idi
Yelek kaddine hilat-i şâh idi
- 1835 Giyip subh-dem sâde bir anterî
Dökülmüş idi tügme-hâ-yı zeri
- 1836 Fakat mihri etmişdi zîb-i kemer
Zuhûr etdi envârı vakt-i seher
- 1837 Görüp çeşm-i giryânımı âsumân
Terahhum edip ağladı bir zamân
- 1838 Küdûret görünmüşdü vakt-i namâz
Su sepdi dil-i âteşine biraz
- 1839 Tef ü tâb-ı rûze yetip cânına
Su serper sanırlardı kaftânına
- 1840 Felekden bunu kimse etmez ümîd
Benimçin bükâ eyleye rûz-ı îd
- 1841 Bilir bendeyim husrev-i azama
Beni geçmesin der şeh-i âleme
- 1842 Edip bir kasîdeyle cürmün beyân
Edersem eğer arz-ı şâh-ı cihân
- 1843 Görünce sipihre eder infîâl
O şeh bendesin eylemez pâ-y-mâl
- 1844 Eđerçi bu günlerde matrûduyum
Hudâ'ya ayândır ki hoşnûduyum
- 1845 Unutdurdu dîdârının hasreti
Safâ-yı visâli gam-ı fûrkati
- 1846 Şafak gibi kan ağladım subh-ı îd
Gelip yâda tebrîk-i id-i saîd
- 1847 Sarây-ı hümâyûnu etdim hayâl
Gözümden revân oldu eşk-i melâl
- 1848 Kurup devletin resm-i dîvânını
Dizerdim hayâlimde erkânını
- 1849 Gelip fikrime dâmen-i pâdişâh
Girîbânımı çâk edip çekdim âh
- 1850 Düşündükçe takbîl-i emsâlimi
Bilirdi Hudâ ancak ahvâlimi
- 1851 Mübârek cemâli gelip aklıma
O şâhın kemâli gelip aklıma

- 1852 Tasavvur edip peyker-i şevketin
Gehî iltifâtın gehî heybetin
- 1853 Degil eşk âteş saçardı gözüm
Lebimden çıkarken yanardı sözüm
- 1854 Eđer çekmesem tesliyet ile sed
Ramak kaldı kim ola zâil hıred
- 1855 Bu âteş ile Kırmızı Câmie
Duhûl etdim ol mabed-i lâmie
- 1856 Namâzı o câmide kıldım edâ
Yine şâh-ı devrâna etdim duâ
- 1857 Cemîan cemâat kıyâm eyledi
Görünce beni ihtirâm eyledi
- 1858 Kıyâs etseler idi emsâlime
Köpekler gülerler idi hâlime
- 1859 Nigehbân olup sâye-i şevketi
Keşan'da yetişdi bana himmeti
- 1860 Gelip beyt-i ahzâna bade's-salât
Bükâ etmeyip gerçi etdim sebât
- 1861 Fuâd u Reşâd'ım gelip yâdıma
Felekler figân etdi feryâdıma
- 1862 Velî az idi müddet-i iftirâk
Zamân bilmiyor şiddet-i iştiyâk
- 1863 Nola gark olursa cihân ez-kazâ
Gözüm oldu gird-âb-ı bahr-i belâ
- 1864 O deryâya el vermez oldu Keşan
Ayağı Sitanbul'a oldu revân
- 1865 Edip bâb-ı Mevlâ'ya destim dırâz
Kemâl-i tazarrula etdim niyâz
- 1866 Dedim yâ Rab irgür Murâd'a beni
Karîn et Fuâd u Reşâd'a beni
- 1867 Gehî yâda geldikçe h'îş ü tebâr
Keder eyledi aklımı târ u mâr
- 1868 Gelip aklıma şevher-i h'âherim
Füzûn oldu hasretle derd-i serim
- 1869 Benim zikrim etmekdedir dem-be-dem
Sever İzzet'i ol mehâmid-şiyem
- 1870 Masûn ede zât-ı hünermendini
Bağışlaya Hak bint ü ferzendini
- 1871 Gelip yâda ahbâb-ı Beglerbegi

Düşündükçe her bir hünerver begi

- 1872 Gelip yâda Kanlıca yârânları
Düşündükçe ol marifet-dânları
- 1873 Gelip yâdîma ülfet-i Mîrgûn
Tuyulmadı gerçi getirdim cünûn
- 1874 Figânım zamâna salıp velvele
Enînim zemîne verip zelzele
- 1875 Girip birbirine zemîn ü zamân
Simâki semek eyledi mîhmân
- Zikr-i tahassür-i evliyâ-yı niam ve ba'z-ı
ehibbâ-yı âlî-himem**
- 1876 Gelip yâdîma zât-ı **Behcet-fezâ**
Ederdi tahassür ile bî-riyâ
- 1877 Gözüm ârzû dergehi hâkini
Lebim cüst-cû dâmen-i pâkini
- 1878 Verirdi keder hasret-i **dâderi**
O mâh-ı kemâlin odur ahteri
- 1879 Edip **Cafer-i** sâdîku'l-kavli yâd
Gönül nâleyi eyledi itiyâd
- 1880 Hüner-pîşe mîr-i mükerrermdir ol
Bu hasret-keşe eski hem-demdir ol
- 1881 Edip bahr-i eşkimde her dem şinâh
O iki gözüm yanî **Hayr-ı İlâh**
- 1882 Uçup bâm-ı çeşmimde leyl ü nehâr
Necîb-i keremkâr-ı ankâ-şikâr
- 1883 Şinâver idim kulzüm-i mihnete
Gehî sayd idim telle-i hayret'e
- 1884 Gelip yâda **Kadrî Beg**'in sohbeti
Harâm eyledim kendime ülfeti
- 1885 Gelip yâda bir necm-i burc-ı **Şeref**
Beni tâli-i şüm ederdî telef
- 1886 Gelip yâda envâr-ı necm-i **Saîd**
Dahî necl-i pâki **Nihâd-ı** reşîd
- 1887 İki nehr-i cârî olup gözlerim
Hemân ağlayıp anları özlerim
- 1888 Gelip yâda şevk-i **Ferîdû**'d-dehir
Felek câm-ı îşa katardı zehir
- 1889 Gelip yâda birden iki bedr-i tâm
Gözüm kendine h'âbı kıldı harâm

- 1890 Biridir anın mihr-i burc-ı celâl
Birisi meh-i âsumân-ı cemâl
- 1891 Birisi **Hüsâm-ı** niyâm-ı beyân
Birisi hünerde **Vahîdü'**z-zamân
- 1892 Görem der isen bir semâda dü mâh
Gel ol iki mahdûma eyle nigâh
- 1893 Gelip yâdıma necl-i pâk-i reşîd
Hemân aklımı eyledim nâ-bedîd
- 1894 Göreydi **Bahâ'**yı eğer Âmülî
Sunardı hünerde ana keşkûlî
- 1895 Alıp yâdına **Sadi Beg-zâde'**yi
Tutup girdi aklım reh-i câdeyi
- 1896 Gelip yâda **Hayrî** vü **Cevdet Fehîm**
Dahi **Tâlib** ü **Gâlib** ü **Müstakîm**
- 1897 Yakıp her biri âteş-i hasreti
Kebâb eyledi sîne-i İzzet'i
- 1898 Husûsâ ki üstâd-ı kül **Müstakîm**
Beni eyledi hasret ile sakîm
- 1899 Gelip akla **Rüşdî-i** Ristû-hired
Gide yazdı az kaldı yâ hû hired
- 1900 Veliyyü'n-niam-zâde mahdûm-ı kül
Odur âdemiyetde mefhûm-ı kül
- 1901 Degildim dahi tıfl-ı ebced henûz
Nedir bilmez idim eb ü ced henûz
- 1902 Elif bâ ile yok idi ülfetim
Eb ü ceddine var idi nisbetim
- 1903 Birinin adı **Esad Ahmed** idi
Birisi de **Sâlih Muhammed** idi
- 1904 İki defa olmuşdu cediti tamâm
İki şâh-ı zî-şâna müfti'l-enâm
- 1905 Olup vâlidî sonra sadru's-sudûr
Felek vermedi ana bir dem huzûr
- 1906 Cevânlıkda oldu alîlü'l-mizâc
Bulunmadı derdine âher ilâc
- 1907 Eğer anları görse İbni Melek
Der idi bizim vâlid olmak gerek
- 1908 Kerîmü'l-hasâil idi her biri
Adîmü'l-mümâsil idi her biri
- 1909 Felek görmedi öyle bir dâire
Ki melce idi bir niçe mâhire

- 1910 O bâğ-ı maârif idi gülşenim
O gülşende buldu nemâyı tenim
- 1911 Kıyâs et ki **İhyâ** gibi pür-hüner
Ola anda mektûbî-i muteber
- 1912 **Emîn**-i hünerver idi kethudâ
Efendi idi hay gidi kethudâ
- 1913 *Çünîn hânedân-râ felek kerd güm
Hudâyâ tu nevvir berâhînühüm*
- 1914 Felek etdi ol kân-ı ilmi heder
Nola saklasak anı hem-çün güher
- 1915 Gelip yâda **Ârif Beg**'in meclisi
O sâhib-zarâif begin meclisi
- 1916 Anın bezmidir ravza-i Kâsımî
Zarâifde Mustazraf'ın kâimi
- 1917 Kemâlin eğer görse pîr-i Hocend
Bu az yaşda tahsîlin eyler pesend
- 1918 Mehâdîme rüchânı var âşikâr
Degildir hüner kesbi ancak şikâr
- 1919 Maârifde meşhûr-ı âfâk ise
Hünerver denilmez bed-ahlâk ise
- 1920 Hünerver edîb ü zarîf olmalı
O mahdûmveş dil-firîb olmalı
- 1921 Murâd etse akrânı içre vekâr
Eder gıpta temkînine kûhsâr
- 1922 Eğer hıffet-i rûhun etse beyân
Olur bâğ-ı ülfetde âb-ı revân
- 1923 Nola olsa vird-i zebân sohbeti
Şekerden elezdir bana ülfeti
- 1924 Enîs ü celfsim idi dâimâ
Kitâb-ı nefsim idi gûyiyâ
- 1925 Düşündükce **Sâdık Beg**'i rûz-ı îd
Bana rûz-ı îd oldu rûz-ı vaîd
- 1926 Dedim yâ Rab eyle zamân-ı yakîn
Ehibbâ vü h'îşân ile hem-nişîn
- 1927 Yeter renc-i zahm-ı gam-ı iştiyâk
Kerem kıl bana merhem-i iftirâk
- 1928 Alıp dest-mâl-i cedîdi ele
Ederdim bukâ bak şu îde hele

Muâyede-i dil-berân-ı Keşan ve âmeden-i sâir kesân

- 1929 Meh-i rûze gencîne-i nûr imiş
Meğer kim neler anda mestûr imiş
- 1930 Güşâd eyleyince medeng-i hilâl
Göründü niçe gevher-i bî-misâl
- 1931 Giyip câme-i îdini dil-berân
Yeniden açıldı bahâr-ı Keşan
- 1932 Gül-endâmlar câme-i âl ile
Ne kanlar revân etdiler âl ile
- 1933 Giyip ba'zısı câme-i sebz-fâm
Sanırdım ki etmiş sanavber hirâm
- 1934 Kimisi giyip câme-i zerd-reng
Verip çihre-i âşika âr u neng
- 1935 Gelip her biri etdi tebrîk-i îd
Keder oldu aklım gibi nâ-bedîd
- 1936 Nihânî sunup mîve-i vasla dest
Mey-i bûseden leblerim oldu mest
- 1937 Olup mâh-rûyân hitâma resîd
Vücûh etdi tesîd-i îd-i saîd
- 1938 Gelip ibtidâ mahkeme kâtibi
Zuhûr eyledi badehû nâibi
- 1939 Görüp beldenin hâkim-i şerini
Kıyâs eyledim aslına ferini
- 1940 Edip şer-i Mevlâya ikrâm-ı tâm
Muânık olup eyledim ihtirâm
- 1941 Ahâlî temelluk edip yek-be-yek
Gelip her biri öpdüler el etek
- 1942 Eğer olmuş olsamdı müfti'l-enâm
Bu rütbe ederler idi ihtirâm
- 1943 Hudâ her birin ber-murâd eylesin
Keşan'ı emîn-i bilâd eylesin

Azîmet-i dil-berân be-bâğ u bûstân

- 1944 Olup zîr-i dâmen sebû-yı şarâb
Kabarmış idi dâmen-i şeyh ü şâb
- 1945 Meh-i rûzeyi çıkdı teşyîe nâs
Gidip bâğa mey içdiler tas tas
- 1946 Yigirmi günü geçdi hengâm-ı îd
Yeni geldi gûyâ kim eyyâm-ı îd
- 1947 Dahi kesmedi bûseyi dil-berân

- Henûz almada vermede âşıkân
- 1948 Akın etdiler âbveş sû-be-sû
Bihîşt oldu gûyâ ki her kend ü kû
- 1949 Görüp anları hûriyân-ı bihişt
Olup âdemî etdi terk-i sirişt
- 1950 Hicâbından olmuşdu pejmürde gül
Bedel oldu bezm-i gülistânda mül
- 1951 Görüp dil-berânın şeker handini
Leb-i cûya çekmiş idi kendini
- 1952 Düşüp ardına ben de dil-berlerin
Safâsın çıkarmış idim her yerin
- 1953 Keşan'da ikâmet edelden beri
Civârında gezmiş idim serserî
- 1954 Dediler ki dergâh-ı Rüstem Baba
Verir Bîjen-i kalbe gamdan rehâ
- 1955 Fakat sürmemişdim o dergâha yüz
Mesârif olur diyü bir iki yüz
- Maâriz kenârında Rüstem Baba Dergâhına
rû-mâl olduğumuzdur**
- 1956 Fütûhât ile Hak erenler beni
Gözetdi gelüp sarı mankır ganî
- 1957 Şerîat libâsın büründük o dem
Yezîdân-ı şehre göründük o dem
- 1958 Açıp münkirâna şerîat sözün
Nihân eylemişdim tarîkat yüzün
- 1959 Edip sırrı sır bâdeyi sakladık
Riyâdan da seccâdeyi sakladık
- 1960 Görüp âsumânı tehî mîgdan
Geçirdik gam-ı âlemi tîgdan
- 1961 Yüründü hemân dergeh-i Rüstem'e
Sipihre verip borumuz demdeme
- 1962 Gırâboyna bir karye-i bî-misâl
Olundu o şeb anda hatt-ı rihâl
- 1963 Bizimle ber-â-ber kalıp âfitâb
Seher bûk-ı rihlet çalıp âfitâb
- 1964 Hemân subh-dem eyledim azm-i râh
Zuhûr eyledi bir ulu bârgâh
- 1965 Degil buka yâ hû sipihr-i safâ
Aceb hızrevât içre nûrû'l-hüdâ

Dergâha vusûlümüzdür

- 1966 Olup bir ulu âsitâne ayân
Sıgar dergehinden ribât-ı cihân
- 1967 İçinden iki cân gelip dedi hû
Öpüp ellerin eyledim ser-fürû
- 1968 Varıp bâb-ı meydâna kıldık niyâz
Zuhûr eyledi mürşid-i ser-firâz
- 1969 Dedi pîşvâ-yı tarîk ibtidâ
Safâ geldin ey âşık-ı bâ-safâ
- 1970 Kelâmın anın hayr-fâl eyledim
Turup emrine imtisâl eyledim
- 1971 Dedi bizde meydândadır ihtirâm
Görölsün mukaddem o âlî makâm
- 1972 Edip celse meydânda baba ile
Bozuşdum o âlemde dünyâ ile
- 1973 Müzeyyen degil gerçi meydân velî
Eder zînet-i manevîsi delî
- 1974 Muanven degil tâk-ı şehler gibi
Sitanbul'daki hânekahlar gibi
- 1975 Ruhâmı sanırsın ki mirâtdır
Hemân resm ü nakşî musâfâtdır
- 1976 Nümâyân idi anda eşkâl-i dil
Safâ-yâb idi gördüm abdâl-ı dil
- 1977 Tarîkat yüzünden açıldı nikâb
Teveccüh edip etdi baba hitâb
- 1978 Dedi tâcınız var mı hünkârdan
Neniz var alâmât-ı ikrârdan
- 1979 Dedim var külâh-ı Hudâvendgâr
Anınla eder tâclar iftihâr
- 1980 Odur tâc-ı her husrev-i manevî
Degil yalnız kisve-i Mevlevî
- 1981 Eđer mess ederse size ihtiyâc
Çıkar her birinden anın iki tâc
- 1982 Hudavendgâr'ın bilip bendesi
Hemân nutkunun oldu şermendesî
- 1983 Tasavvufdan etdi biraz kıl ü kâl
Rüvâtı alâ zumihi lâ-yukâl
- 1984 Fem-i güft-gûy-ı hıred lâl idi

- Ne hâl ise hep sohbet-i hâl idi
- 1985 Gelip sarf-ı deb-i tarîkin yeri
Diyip pîre destûr çıkdık geri
- 1986 O mihmân-serây-ı felek-fâhire
Semâvâtveş dâire dâire
- 1987 Hemân açdılar hucre-i dil-nişîn
Fakîr oldum ol cennet içre mekîn
- 1988 O tâk-ı muallâ ne vâlâ idi
Sipîhr-i yekümden dü-bâlâ idi
- 1989 Olup gâh hem-dem ehîbbâ ile
Ber-â-ber idik gâhi baba ile
- 1990 Erip zevk ile şevk ile vakt-i şâm
Dedi bir kalender müheyyâ taâm
- 1991 Güşâd etdiler sufre-i Hayder'i
Gümüşden münevver idi ol deri
- 1992 Görüp nukre-i nânın etdi hicâb
Gurûb eyledi şerm ile âfitâb
- 1993 Kebâbın görüp âsumânda hamel
Demiş kâşkim ben olaydım bedel
- 1994 Leb-i dil-berâsâ o helvâ-yı ter
Yanında anın zehre benzer şeker
- 1995 Pilavı cesîm idi kühsârdan
Letâfetde san mevc-i bahr-i leben
- 1996 Bu gitdi ganîsin vere Hak diyü
Erenler demine çekildikde hû
- 1997 Tenâvülden etdikde her kes ferâğ
Işıklar uyandırdı ol dem çerâğ

Sıfat-ı şeb-i bü'l-aceb

- 1998 Felek dahi şemin uyardı o şeb
Seçildi cihânda ne var ise heb
- 1999 O şeb gibi bir şeb olur mu aceb
Şeb-i kadre ola meğer hem-neseb
- 2000 O şeb vahdet-i sırf olup âşikâr
Sanırdım ki mezc oldu leyl ü nehâr
- 2001 O şeb bir siyeh-çerde hatun idi
Emîr-i Habeş ana meftûn idi
- 2002 Ne şeb bir müzeyyen arûs-ı Arab
Ser-â-pâ hulî vü ser-â-pâ zeheb

- 2003 Ne şeb gıpta-i perçem-i dil-berân
Gam-ı gısu-yı pür-ham-ı hûriyân
- 2004 Ne şeb Leyli-i âsumân-ihtişâm
Bünâgûşunun kurtası bedr-i tâm
- 2005 Gelip yâdıma dil-berim ağladım
O gece sipihre sözü sağladım
- 2006 Dedim yok mudur hâtır-ı âşıkân
Eser eylemez mi sanırsın figân
- 2007 Bu tavr-ı sitem-perverî tâ be-key
Sana ateş-i âhım açmaz mı key
- 2008 Alırsın hemân koynuna mâhı sen
Düşünmez misin çekdiğim âhı sen
- 2009 Nedir sende bu sarf-ı cevri ü sitem
Tükenmez mi gencîne-i derd ü gam
- 2010 Ne buldun telef eyleyip Vâmık'ı
Degil miydi Azrâ'sının lâyıkı
- 2011 Olaydı eğer Kays'a Leylî karîn
Hased mi eder zühre-i nâzenîn
- 2012 Nolur olsa Ferhâd-ı bî-meskenin
Baban yurdu mu Kasr-ı Şîrîn senin
- 2013 Yeter bülbülün âh u zârı yeter
Senin gülşenin sanma olmaz heder
- 2014 Edip şemin efsürde pervânenin
Çerâğın yakarsın keşiş-hânenin
- 2015 Elin çek girîbânımızdan elin
Yanar âteş-i cânımızdan elin
- 2016 Yeter gayrı artık bana cevri ise
Bu rütbe olur nâ-be-câ cevri ise
- 2017 Sipihri-i cehûle verip âb-ı dest
Biraz eyledim ol gece Hak-perest
- 2018 Sayar iltifât etdiği âlemi
Beni zâr ederdi o vaktin gamı
- 2019 Tolular ki verdi bütün boş idi
Ben âgâh idim kendi ser-hoş idi
- 2020 Merâmımca verdim sipihre kasem
O şeb eyledim tevbe kâr-ı sitem
- 2021 Tolup câm-ı çerha şarâb-ı siyâh
Derûnunda yah-pâre olmuşdu mâh
- 2022 Olup mest-i sahbâ-yı hayret cihân

- Nümâyân degildi zemîn ü zamân
- 2023 Sunup ben de câm-ı şarâba dü dest
Olup mest ammâ ki keyfimce mest
- 2024 Edip çâk sînem sökünce şafak
Çağdırdım çü murg-ı şeb-âvîz Hak
- 2025 Okudukça gâhî gazel geh nuût
Felek eyledi ahdi üzre sükût
- 2026 Verirdi kalenderlere kûh ses
Gazel-h'ânları yolladıkca nefes
- 2027 Aceb meclis-i şevk u bezm-i neşât
Kadehkâr idi neşe gâh inbisât
- 2028 Göründü keder sormağa hâlimi
Teberle iki biçdiler zâlimi
- 2029 Verip mihnete tuhfedir diyü beng
Aceb etdiler berg-i sebz ile reng
- 2030 Açıp göz ayılmazdı esrârdan
Bulup söz sayılmazdı hüşyârdan
- 2031 Mülâkât edip savmasam dün sabâh
Bulunmazdı gam kâfirinden felâh
- 2032 Gurûb etmege başladı kurs-ı mâh
Yem-i bâdede biz ederdik şinâh
- 2033 Toyup çeşm-i dil bâde-i nâbdan
Gözüm tok idi nimet-i h'âbdan
- Resîden-i vakt-i sabâh**
- 2034 Firâşı atıp terk-i kesret edip
O şeb gûşe-i dilde vahdet edip
- 2035 Hum-ı meyde varken bakıyye şarâb
Zuhûr eyledi şihne-i âfitâb
- 2036 Düşündüm o dem cürm ü isyânımı
Revân eyledim eşk-i çeşmânımı
- 2037 Der-i Hâcî Bektaş'a etdim niyâz
Dedim ey ser-efrâz-ı her ser-firâz
- 2038 Bu şeb bilmedik kıymet-i nânını
Dirîg eyleme h'ân-ı ihsânını
- 2039 Himem madenisin kerem kânısın
Değil cisme cân cânların cânısın
- 2040 Bu güstâhına sütrem kıl dâmenin
Benimdir kabâhat inâyet senin
- 2041 Geçer hazret-i Mevlevî'ye sözün

- Mugâyir degildir özüyle özün
- 2042 Niyâz eyleyip ağladım hazrete
Dedi bir kalender gelip İzzet'e
- 2043 Erenler buyur aşk meydânına
Şu âşıkların bezm-i efgânına
- 2044 Nefes haklayıp baş kesip hû diyip
Vuzû ile sevb-i tahâret giyip
- 2045 Hemân azm-i meydân-ı aşk eyledim
Açıp başım ilân-ı aşk eyledim
- 2046 Beni eyledi geceki masiyet
Fürû-bürde-i Bürde-i mazeret
- 2047 Hezâr-ı zebânı hamûş eyledik
Tarîkınca bir kahve nûş eyledik
- 2048 Ziyâret olundu bu âlî makâm
Dedim türbe-i pîre etsek hırâm

Türbe-i pîri ziyâretimizdir

- 2049 Olup mîhmândârımız reh-nümâ
Götürdü bizi ol delîl-i hüdüâ
- 2050 Güşâd eyledi türbe-i enveri
Göründü azîzin mübârek seri
- 2051 O şîr-i velâyet o rütbe mehîb
Duhûl olmadı dergehinden nasîb
- 2052 O vâdîde hal oldu naleyn-i ten
Müsûl etdi tenhâ Kelîm-i suhan
- 2053 Edip âcizâne nisâr-ı senâ
Biraz kendi hakkımda etdim duâ
- 2054 Erenler ederse niyâzım kabûl
Bulur kâm-ı dil lutf-ı Hak'la husûl
- 2055 Tamâm oldu evrâd u ezkârımız
Teveccüh edip mîhmândârımız
- 2056 Dedi hazrete yapsana yâdigâr
Ola hâmene mâye-i iftihâr
- 2057 Edip kilkimi himmeti feyz-yâb
Tulû etdi bu kıta çün âfitâb

Kıta

- 2058 Şîr-i kühsâr-ı velâyet jende-pîl-i evliyâ
Hazret-i sâhib-kırân-ı manevî Rüstem Baba

2059 Keşti-i inkâr ile kimse muâriz olamaz
Sû-be-sû kesmiş Maâriz bahrin ol merd-i Hudâ

2060 Getirdi ışık der-akab bir kalem
Kemâl-i hacâletle etdim rakam

2061 O kenzin degil bu suhan cevheri
Girîbân-ı azâra çekdim seri

Tercüme-i ahvâl-i azîz-i müşârunileyh

2062 Sekiz yüz hudûdunda Rüstem Baba
Kudûm eylemiş Rûm'a behr-i gazâ

2063 Horâsân ilinden çihil yâr ile
Gelip niyyet-i kahr-ı küffâr ile

2064 Süleymân Paşa ile azm edip
Berâber o sultân ile rezm edip

2065 Olup her biri mazhar-ı feth-i Hak
Görüp anları hak erenler ehak

2066 Edip Rûmeli ülkesin câygâh
Binâ eylemişler birer hanekâh

2067 Dimetoka'da Şâh Sultân Alî
Kızıl-iştihâr ol veliyy-i celî

2068 Olup sâye-güster velâyet ile
Makâm eylemişler kerâmet ile

2069 Uyarmış dahi her biri tekyegâh
Arâzî kerem eylemiş pâdişâh

2070 Bu Rüstem Alî seyyid-i muhterem
Magâzî-şiyem şâh-ı sâhib-hıdem

2071 Maâriz kenârında tutmuş makâm
Edip bîşezâr-ı azîmi künâm

2072 O günlerde ömr-i sinîn ü zemen
Sekiz yüz yigirmi ile dört iken

2073 Amân vermeyip kahramân-ı ilel
Salıp pençe sâhib-kırân-ı ecel

2074 Zebûn eylemişler o şîr-i neri
Fedâ etmiş Allâh'a cân u seri

2075 Edip zulmet-i küfr ile rezm ü ceng
Zebûn olmamışken misâl-i peleng

2076 Düşüp pençe-i merge ol nerre-şîr
Ayân oldu kim olduğu küşt-gîr

2077 Eder bir gün elbet ecel der-kemend
Olursan da Tehmûres-i dîv-bend

- 2078 Nic'oldu aceb Rüstem-i nâmdâr
Peşeng ü Ferâmürz ü İsfendiyâr
- 2079 Tehemten ol istersen Efrâsyâb
Bulur bir kolayın ecel yab yab
- 2080 Niçe pehlevânlar yıkar çerh-i dîv
Kanı Zâl u Sâm u Minûçehr ü Gîv
- 2081 Budur dehre gelmekden ancak merâm
Gide kendisi ede ibkâ-yı nâm
- 2082 Salup dâstânı ile iştiâr
Bu Rüstem dahi olmamış pâydâr

Zikr-i ba'z-ı kerâmât-ı ân hazret

- 2083 Maârız kenârın edince mekân
Ana bir beg olmuş taâruz-künân
- 2084 İmârât-ı şeyhi harâbât edip
Arâzisini gasb u gârât edip
- 2085 Ekip ol mezârîde tohm-ı fesâd
Yemiş hâsıl-ı ömr-i şûmun cerâd
- 2086 Nigâh etmeyip bi't-terâzisine
Göz atmış bütünce arâzisine
- 2087 Gelip tekyeye asrının hâkimi
Çağırmişlar ol meclise zâlimi
- 2088 Terâfu edip mîri baba ile
Müsâvî tutup şer-i Mevlâ ile
- 2089 Arâzîye şâhid olunmuş taleb
Şühûda erenler çeker mi taab
- 2090 Demiş kûhsâra olun şâhidim
Ne mikdâr ise mezra-ı zâidim
- 2091 Biribirine eyleyip hayltâş
Fezâyâ revân eylemiş hayli taş
- 2092 Olup seng ü sahre hudûda revân
Sınırın cemâdât kılmış beyân
- 2093 Çekip ol arâzîye taşlarla had
Kerâmât ayân eylemiş lâ-yuad
- 2094 O bed-baht olup mazhar-ı inkisâr
Hudâ yurdunu eylemiş hâksâr

Kerâmet-i dîger

- 2095 O devletli gâyet büyük zât imiş
Hakîkatde sâhib-kerâmât imiş

- 2096 İnâyâtı sârî o eknâfda
Kerâmâtı cârî o etrâfda
- 2097 Asâsıyla icrâ edip âb-ı nâb
Felek gibi devr etmiş üç âsiyâb
- 2098 Ser-i âsiyâda çevirmiş kebâb
Hemân eylemiş sîhi vaz-ı türâb
- 2099 Be-emr-i Hudâ sîh olup bir çenâr
Ser-i fahrî olmuş sipihr-iftihâr
- 2100 Bün-i nahli dersem yigirmi zirâ
Taaccüb eder eyleyen istimâ
- 2101 O nahlin olup muhterik sînesi
Görünmüş idi kalb-i bî-kînesi
- 2102 Degildir rivâyet bunu gördü göz
Yatardı içinde iki çift öküz
- 2103 Kerâmât-ı hakdır degil bu oyun
Yatar sâyesinde iki bin koyun
- 2104 Oturmuş idim âsiyâda fakîr
Degirmenci zimmî yogurdu hamîr
- 2105 Hemân külde tabh eyledi bir çörek
Degil öyle lezzetli yağlı börek
- 2106 Dedim âsiyâbîye ey gebr-i pîr
Şekerden mi yapdın nedir bu hamîr
- 2107 Niçin bilmiyorsun a İzzet dedi
Erenler verir ana lezzet dedi
- 2108 Dedim bu degirmende bitmez mi su
Akar mı hemân yaz u kış böyle bu
- 2109 Dedi bitmez aslâ erenler suyu
Degildir bu çeşme degildir kuyu
- 2110 Tükendi dedim dâne-i âsiyâb
Tüketmez dedi pîr-i âlî-cenâb
- 2111 Oturdu o gebr-i acîb-itikâd
Dedi var ise bitmedik bir murâd
- 2112 Sarıl dâmen-i pîre hâsıl olur
Recâ dergeh-i Hakk'a vâsıl olur
- 2113 İşitdim o gebrin bu güftârını
Pesend eyledim hüsn-i ikrârını
- 2114 Gavurlar olur evliyâyı mukır
Yine münkir inkâr eder bu ne sır

- 2115 Kerâmât-ı hakdır erenler ehak
Bu derse verir gebr ü tersâ sebak
- 2116 Sakın etme inkâr âkil isen
Sözüm yok sana gebr-i câhil isen
- 2117 Terâzû-yı akla sakın koyma hâ
Hulûs ile sencîdedir evliyâ

Matbah-ı dergâhı ziyâretimizdir

- 2118 Yine mîhmândâr olup pîşvâ
Dedi matbah-ı pîre kıl ilticâ
- 2119 Ocağa varıp ser-fürû eyledim
Kelâmım o dem ism-i Hû eyledim
- 2120 Degil matbah ol cây-ı kenz-i niam
Ne kenz-i niam düdmân-ı himem
- 2121 Kazan var ki mahsûd-ı dîg-i felek
Yetişmez olursa denizler nemek
- 2122 Gelip kefçe olsa o matbahda mâh
Derûnunda kalmazdı gerd-i siyâh
- 2123 Nezâfet zemîninde ferş-i latîf
Letâfet harîminde arş-ı nazîf
- 2124 Görünse bu âlemde dârü'n-naîm
Budur der idim ol makâm-ı azîm
- 2125 Görüp sufre-i enverin âfitâb
Eder sufret-i çihresinden hicâb
- 2126 Pür olmuş iken anda kand ü nemek
Ne mümkün gire bî-tahâret sinek
- 2127 O çirk-âb için kazılan meblaa
Münâfik gözü gibi pür-şaa
- 2128 Semender görüp sûz-ı huddâmını
Bulur yanmada kendinin hâmını
- 2129 Gam-ı kâinâtı yakıp âteşe
Safâsın çıkardım bakıp âteşe
- 2130 Ramak kaldı kim ferş edip anda post
Diyem terk ü tecrîd ile dost dost
- 2131 Hudâvendgâr'ın erip heybeti
Çıkardı derûnumdan ol niyyeti
- 2132 O matbah ki dil-sîr-i ihsânıyız
Ezelden ki perverde-i nânıyız
- 2133 Bu matbah anın bir gözü olamaz
Bütün âteşi bir közü olamaz

- 2134 Beni etmesin dūr o dergâhdan
Niyâzım budur ancak Allâh'dan
- 2135 Ocağa niyâz ile çıkdım geri
Gezip matbah etrâfını serserî
- 2136 Niyâz eyledim bir dahi bâbına
Dedim yâ hû aşk olsun erbâbına
- 2137 Dedi mîzbânım Muhammed Dede
Eyâ şâir-i mâhir-i gam-zede
- 2138 Yazıp bir gazel yâdigârın ola
Kalenderlere ber-güzârın ola
- 2139 Meâli olup nat-ı pâk-i Alî
Ola cânlar anın ile müncelî
- 2140 Nefes haklayıp hâme etdi rakam
Kabûl ede bâbında şâh-ı kerem

Gazel der-nat-ı Şâh-ı velâyet

- 2141 Dense Halîl-i sâni-i Hak'dır sezâ Alî
Zîrâ kim etdi necl-i azîmin fedâ Alî
- 2142 Hakk'a iki demiş olur inkâr eden anı
Birdir dedi cenâb-ı nebî Mustafâ Alî
- 2143 İmân getirdi cümleden akdem Muhammed'e
Evvel dedi hitâb-ı eleste "belâ" Alî
- 2144 Matrûd-ı hanedân-ı nübüvvet degil midir
Bâbından etse her kimi redd ü cüdâ Alî
- 2145 Haddim degil şefâatini eylemek taleb
Kanber kulun yeter bana ukbâda yâ Alî
- 2146 İzzet Hudâ kıla nefes-i vâ-pesînimi
Yâ Mustafâ Muhammed ü yâ Murtazâ Alî
- 2147 Ziyâret kılındı makâmât hep
Şühûda erişdi kerâmât hep
- 2148 Görüp mürşid-i tekye-i himmeti
Dedik lutf edin ruhsat-ı avdeti
- 2149 Olursa eğer ruhsat-ı âşıkîn
Azîmetle kılsak amel bad-ez-în
- 2150 Dedi pîşvâ-yı tarîk-i hüdâ
Bu şeb dahi mihmân olup kıl safâ
- 2151 Bu dîger cihânı temâşâ kılın
İki güncegiz terk-i dünyâ kılın
- 2152 Dedim lutf u ihsânımız var ola

- Dem-i tîgınız hûn-ı inkâr ola
- 2153 İki üç gün oldu Keşan'dan hurûc
Kazâ içre gezmek degil gerçi suç
- 2154 Biri ez-kazâ eyler andan mürûr
Tahaddüs eder sohbet-i nev-zuhûr
- 2155 Telâş etme Allâh hâfız dedi
Erenler olurlar muhâfız dedi
- 2156 Diyip böyle ol mürşid-i ehl-i hâl
Kabûl eyledik nutku bî-kîl ü kâl
- 2157 Ehibbâ ile seyr-i deryâ edip
Maârız kenârın temâşâ edip
- 2158 Mizâcın olup bahr ile ülfeti
Uzatdık leb-i mevc ile sohbeti
- 2159 Erişmiş meğer kâsıd-ı vakt-i şâm
Elinde idi nâme-i bedr-i tâm
- 2160 Olup ol fezâ bahr-i nûr-ı siyâh
Kılınmışdı gerdûne ile şinâh
- 2161 O şeb dahi anda olup mîhmân
Benim oldı sankim sarây-ı cihân
- 2162 Şeb-i dîgerin aynı idi o şeb
Ne şeb nice şebden şeb-i müntehab
- 2163 Esince hevâ-yı mey-i hoş-güvâr
Verilmişdi bâda gam-ı rûzgâr
- 2164 Yalandır cihânın safâsı yalan
Tulû eyledi subh-ı sâdık hemân
- 2165 Togup gün gibi mürşid-i hânekâh
Sipîhr-i safâ oldu san tekyegâh
- 2166 Açıldıkda meydân çü subh-ı ümîd
Dedim pîre ey mihr-i burc-ı saîd
- 2167 Kerem eyle lutf u inâyet buyur
Bu güstâhına izn ü ruhsat buyur
- 2168 Edip tevsen-i azme şedd-i hırâm
Bugün edelim kasd-ı savb-ı merâm
- 2169 Dedi reh-ber-i reh-revân-ı fenâ
Delîlin ola himmet-i evliyâ
- 2170 Bu nutk-ı şerîfi edip râh-ber
Zemîn-i niyâza edip vaz-ı ser
- 2171 Nigâh etmeyip hırtıma pırtıma
Urup tekyeden postumu sırtıma

- 2172 Baba âsiyâbında etdim karâr
Kenârında idi muharrer çenâr
- 2173 Çenâr-ı kebîre olup tekye-zen
Açıp vasfına hânekâhın dehen
- 2174 Biraz eylemişdi eğerçi kalem
Güzâriş-pezir-i sutûr-ı rakam
- 2175 Verip nutkuna hâme hüsn-i hitâm
Bu ebyât ile vasfin etdi tamâm

Sıfat-ı hânekâh-ı mezbûr

- 2176 Kenâr-ı Maârızda ol hânekâh
Taâruzdan olmuş masûn-ı İlâh
- 2177 Anın cânib-i şarkı bir kûhsâr
Dolanmış derûnun niçe cûybâr
- 2178 Öbür cânibi bir fezâ-yı cesîm
Verir nazrasından safâ-yı azîm
- 2179 Miyâna girip tekyegâh-ı latîf
İki cânibe kendin etmiş redîf
- 2180 Zihî bârgâh-ı adîmü'l-misâl
Zihî hânekâh-ı azîmü'n-nevâl
- 2181 Güşâde dil-i ehl-i himmet gibi
Açık baht-ı erbâb-ı devlet gibi
- 2182 O dergâha bîhûde mısra u bâb
Kesilmez şeb ü rûz iyâb u zehâb
- 2183 Derûnu dil-i ehl-i zâhir gibi
Misâfir kesilmez havâtır gibi
- 2184 Gelip konsa her gece bir kârbân
Bilâ-müzd ü minnet bulur âb u nân
- 2185 Ne verdiyse rûzî-resân-ı enâm
Kibâr u fakîre müsâvî taâm
- 2186 Bu himmet gelir âdemin hoşuna
Gezer yok ışıklarda boş boşuna
- 2187 Edip her biri sevr-i eflâki râm
Gider çifte tek turmayıp subh u şâm
- 2188 Erip kenz-i Hakk'a kanâat ile
Taayyüş ederler zirâat ile
- 2189 Getirmiş erenler aceb gayrete
Gider her birisi birer hıdmete
- 2190 Kimi otladır mîşe vü gûsfend
Kimisi sağar sûtlerin hem-çü kand

- 2191 Kimisi yetiřdirmiş anda kürûm
Geçer nazrasından humâr-ı gumûm
- 2192 Deęer bâĝ-ı gerdûnu bir gûşesi
Güler ıkd-ı pervîne her hûşesi
- 2193 Nola etseler hıdmet-i evliyâ
Nigehbânları çünki Kanber Baba
- 2194 Semiyî-i kenîz-i Alî'dir Alî
Revâdır denirse velîdir velî
- 2195 Başında bütün tekyenin hıdmeti
Harâm eylemiş kendiye râhatı
- 2196 Ne hâsıl olursa hubûbâtdan
Dahi surrehâ-yı mesûbâtdan
- 2197 Anı sarf edip her yıl ol pîr-i pâk
Kalırmış yine kendisi pîr ü pâk
- 2198 Hudâ anı postunda dâim ede
Niçe böyle hıdmetde kâim ede
- 2199 Bu günlerde yapmış bir enbâr-ı nev
Yetişmez kevâkib ana olsa cev
- 2200 Zemînin se pâ üzre etmiş binâ
Olur cilveđer her taraftan hevâ
- 2201 Derûnunda terk etseler on sene
Çıkar kondugu gibi hinta yine
- 2202 Sitanbul'da olsa o âlî eser
Beş on bin gurûş harc-ı ücret gider
- 2203 Fakîrâne himmet ile bir dede
Binâ eyleye böyle nimetkede
- 2204 Gelip görse akrân u emsâlimiz
Nümâyân olurdu bizim hâlimiz
- 2205 Benim destime geçse bir hânekâh
Degil sakfi vakfi olurdu tebâh
- 2206 Ne mescidleri hâksâr eyledik
Ne evkâflar târ u mâr eyledik
- 2207 Bizim kârımız halkı tefsîkdir
Deriz bak şu Bektâşî zındîkdir
- 2208 Kişi kendi aybın göreydi eđer
Yetişmez iki göz berây-ı nazar
- 2209 Degil âkile hod-pesendî revâ
Meâyibde hod-bîn olursan sezâ
- 2210 İki gün o dergehde abdâl idim

Tecerrüd deminde ne hoş-hâl idim

- 2211 Ne derse desin bir takım küştenî
Erenlerden ayırmasın Hak beni
- 2212 Ümîd ol ki olmaz cehennem yerim
Erenler ocağında hâkisterim
- 2213 Erenler olursa bana sâyebân
Felek kalmasın bildiginden hemân

**Baba degirmeninde seccâde-nişîn-i
çemen-suffe-i istirâhat oldugumuzdur**

- 2214 Edip tekyenin vasf-ı pâkin edâ
Kalem eyledi istirâhat recâ
- 2215 O gün vermemiş idi çerh-i denî
Bu murga kifâyet eder hordenî
- 2216 Ser-i âsiyâ gerçi ranâ mahal
Mahal dil-ber âb u hevâ bî-bedel
- 2217 İki cânibi kûhsâr-ı latîf
Akar ortadan cûybâr-ı nazîf
- 2218 Gelirdi cinân fikre ırmakdan
O eşcâr-ı mülteffetü's-sâkdan
- 2219 Cinân gerçi anda bulunmaz horây
Bulunmuş kurâyâ uzakça o cây
- 2220 Tükenmişdi nân sanki bu h'ânçeden
Fezâlar tehî dâne vü dâñçeden
- 2221 Bulunsaydı sahrâda bîd ü giyâ
Ederdik hemân derd-i cûa devâ
- 2222 Bulunmuşdu ol gün tehî bârdân
Fezâdan geçen reh-revân-ı cihân
- 2223 Felekdi o gün h'ân-sâlârimız
Olup ol denî mîhmândârimız
- 2224 Bizi tağ başında bırakmışdı ac
Tenâvül ederdik bulunsaydı câc
- 2225 Alev-hîz-i cû olsa kânûn-ı ten
Ümîd etme âb ol siyeh-kâsedan
- 2226 Sakın mess ederse dahi ihtiyâc
Anın bâb-ı inâmına varma ac
- 2227 Eğer bulsa kendi yer ol meyte-h'âr
Yanında anın kendini etme h'âr
- 2228 Edip şerbet-i hânekâhı şereng
Bu âl ile etdi felek bana reng

- 2229 Gelip yâda rûzî-resân-ı felek
Dedim kendinin ola nân-ı felek
- 2230 O bâba revâ âb-ı rûy-ı taleb
Ki ihsân ede nimetin bî-taab
- 2231 Olup dergehinden fakat nân-h'âh
Kebâb etdi ihsân cenâb-ı İlâh
- 2232 Fedâ kıldı rûzî-resân-ı kerîm
Bu abd-i tebeh-kâra zebh-i azîm
- 2233 Fezâdan geçip bir reme gûsfend
Birin âteş-i cûa kıldık sipend
- 2234 Çevirdik leb-i cûda dil-cû kebâb
Şulanırdı ağzı göreydi şarâb
- 2235 Degirmenci bulmuşdu nân u nemek
Dedim tuymasaydı bu zevki felek
- 2236 Denî vermeyip kendi bir pâre nân
Verir nânına dîgerânın ziyân
- 2237 Olup zîb-i h'ânçe sogan sarmısak
Fakîrâne icrâ olundu mezâk
- 2238 Tamâm olmadan sufremizden horây
Uzatmış idim pister-i h'âba pây
- 2239 Edip gözlerim meyl-i şehd-âb-ı h'âb
Düşüp eyledim düşde nûş-ı hoş-âb
- 2240 Vücûdum harâretle yanmış idi
Çemenzâra pâyım uzanmış idi
- 2241 Derûna edip bir bürûdet eser
O şerbet bana h'âbı kıldı şeker
- 2242 Uyandım meğer kim leb-i cûybâr
Ayağım öpermiş olup h'âstâr
- 2243 Akıtdı zemîne sirîşk-i emel
Derûnî recâ eyledi bir gazel
- 2244 Zerâfet edip kilik-i bülbül-nevâ
Anı kendi vâsfında kıldı edâ
- Gazel**
- 2245 Dil verip benden beter bir serv-i hoş-reftâra cû
Bîd-i mecnûndan olur derd-i cünûna çâre-cû
- 2246 Ağlayıp geh dâğ gâhî şerhalar eyler ayân
Sîne-i âşık gibi seyr eyle açmış yara cû
- 2247 Heyzüm-i kânûn-ı meştâ oldu gül-nahl-i emel
Gülsitân-ı kâmı sen var ara ey âvâre cû

- 2248 Sâf-dillerden firâz-ı kâma çıkmış var mıdır
Kendi aklınca dolaşır çıkmağa kühsâra cû
- 2249 Çekdiler zencîre aklın eylemiş zâyi diyü
Servi gördükçe girîbânın edip sad-pâre cû
- 2250 Dest-i mevc-i eşk ile sîlî-zen-i tedîb idim
Leb-güşâd olmuş geçende giryemi inkâra cû
- 2251 Sağ esen varmaz bu yıl âh u sirişkimden benim
Gülşene bâd-ı sabâ fırsat bulup gülzâra cû
- 2252 Tâ olunca dâmen-i gül-nahl-i nâza dest-res
Bin temelluklar eder gülbünde İzzet hâra cû
- 2253 Arz-ı hâl etdim Keşan'dan Konya'nın hâkânına
Hûn-ı eşkim oldu bâb-ı hazret-i Hünkâra cû
- 2254 Yazıp aynını kilik-i muciz-beyân
Hemân nehre tesvîdin etdim revân
- 2255 Kabûl eyledi tuhfemi cûybâr
Ederdi sirişk-i teşekkür nisâr
- Baba degirmeninden hareket ve
Mercan karyesinde beytûtetimizdir**
- 2256 Hitâma resîde olup hord u h'âb
Vedâ etdi eşkim ile âsiyâb
- 2257 Gözüm ile göz âşinâsıdır ol
Felâketde hem-mâ-cerâsıdır ol
- 2258 Olup azmimiz mevsim-i germgâh
Muhît-i arakda ederdim şinâh
- 2259 Felek etmeden murg-ı cânı kebâb
Hemân kûy-ı Mercan'a etdim şitâb
- Sıfat-ı germâ**
- 2260 Ne gördüm ki çekmiş ayak cûybâr
Tehî kalmış ol cîsr-i gerdûn-medâr
- 2261 Getirmiş gözü ağlamakdan fütûr
Boşalmışdı mânende-i çeşm-i kûr
- 2262 Harâb olmuş ol karye-i dil-nişîn
Diğer-gûn olup unsur-ı âb u tîn
- 2263 Perîşân edip ustukussun fenâ
Mübeddel idi anda nâra hevâ
- 2264 Degil gördüğüm kûy-ı Mercan dirîg
Tayanmaz bakıp hâline cân dirîg
- 2265 Ümîd etme zîrâ felekde kemâl
Kemâl olsa mihrinde olmaz zevâl

- 2266 O enhârdan kalmamış çağlar
Ne bir bîd-i mecnûnu var ağlar
- 2267 Tutuşmuşdu gül mevsim-i nev-bahâr
Bu âteş küln eylemiş hâksâr
- 2268 Kenârında kalmış idi gülşenin
Dili bir karış taşrada sûsenin
- 2269 Yaturdı çemen gösterip rûy-ı zerd
Sanırsın ki pisterde ashâb-ı derd
- 2270 Harâret edip gülsitânı harâb
Felek bülbülün bağrın etmiş kebâb
- 2271 Güneş dahi olmuş idi germ-hîz
Gurûb eylemek hûlyâsıyla tîz
- 2272 Dahi geceden çeşme-i hâverî
Hafî sirkat eylerdi şeb-nemleri
- 2273 Felek halka-i zıkr ü tevhîd idi
Harâretde her zerre hûrşîd idi
- 2274 Makâmında bülbüllerin zâğlar
Siyeh-reng-i mâtem idi bâğlar
- 2275 Çıkarmış gözün nergisin gerd-i gam
Edip gülşene pâsdâr-ı harem
- 2276 Derûnunda mâhîler olmuş kebâb
Arar anı söndürmege cûlar âb
- 2277 Cehennem fezâlarda mihmân idi
O da sanki nîrânda sûzân idi
- 2278 Hudâ'ya emânet behîşt-i berîn
Eğer gelmiş olsa Keşan'a yakın
- 2279 Edip âb-ı tesnîm eşkin nihân
Olurdu bu sûzişle âteş be-cân
- 2280 Demez deşne-i mergden kimse hayf
Cihân oldu leb-teşne-i âb-ı seyf
- 2281 Cihân birbirin etse cândan cüdâ
Fakat bir içim su idi hûn-bahâ
- 2282 Cihânı kurutdu Yezîd-i felek
Mekânı anın dûzah olmak gerek
- 2283 Şerâre gibi bu dil-i nâ-tüvân
O âteşle Mercan'dan atmışdı cân
- Mercan'dan Keşan'a vürûdumuzdur**
- 2284 Keşan dahi bedter idi el-ıyâz

- O âteşden âteş arardı melâz
- 2285 Dahi etmeden dest-i etfâli terk
Hevâdan tutuşmuş idi bâd-berk
- 2286 Edermiş kıyâmetde dûzah hücûm
Verirdi o peygâmı bâd-ı semûm
- 2287 Ahâlî yemişlerdi bi'l-ittifâk
Tümenler ile sirke vü sarmısak
- 2288 Sipihri edip bûy-ı bed telh-kâm
Aralıkda burnu olurdu zükâm
- 2289 Verip ol rutûbet sipihre elem
Tekâtur eder idi âb-ı sekam
- 2290 Anı nâs ederlerdi rahmet kıyâs
Açarlardı Hakk'a dehân-ı sipâs
- 2291 Yanardı o âb ile hâk-i Keşan
Kireç kayığından verirdi nişân
- 2292 Olup bir zamân ol dahi münkatı
Hemân taş okurlardı lâ-yenkati
- 2293 Çuvalı alıp destine rukye-h'ân
Arardı fezâlarda âb-ı revân
- 2294 Eder mi çuvalın anın âb-çîn
Suyu kendi bulsa içerdi zemîn
- 2295 Diyorlar kim olmaz Keşan'da harîk
Keşan içre ancak cihânda harîk
- 2296 Dediler ki câm açmayın geceler
Bu şehrin hevâsı verir derd-i ser
- 2297 Dedim eylerim sakf-ı beyti güşâd
Eğer bir taraftan vezân olsa bâd
- 2298 Dediler ki bir illet îrâs eder
Dedim bundan efzûn ne ihdâs eder
- 2299 Sitanbul'daki hummeyât-ı meûf
Degildir bu sûz-ı ciğerden mahûf
- 2300 Olup bâğçe pister-i râhatım
Ilandan da var idi emniyyetim
- 2301 Kimin destine girse hâk-i megâk
Çıkıp bu harâretle olmaz helâk
- 2302 Gece h'âba mahrem degildi gözüm
Gözüm sizde buyrun yalansa sözüm
- 2303 Cehennem iken bana seb-i tıbâk
Yakıp bir taraftan da nâr-ı firâk

- 2304 Serim dūr idi zevk-i bâlînden
Gözüm toymadı h'âb-ı nûşînden
- 2305 Tekâzâ eder dil ki yârı göre
Uyunmaz ki rüyâda bârî göre
- 2306 Gönül bir taraftan verir ıztırâb
Ciğer der yeter oldum artık kebâb
- 2307 Felek eyleyip subh-ı ümmîdi şâm
Tesellîler oldu nihayet tamâm
- 2308 Ederken bu mihnet ile rûz u şeb
Gehî şekve-i gam gehî şükr-i Rab
- 2309 Söyündü biraz dildeki iltihâb
Sitanbul'dan geldi bir pâre âb

**Behcet Efendi'mizin müsellese
neşe-bahşây-ı riyâset-i etibbâ oldukları müjdesidir**

- 2310 Bizim Ahmed olmuş Keşan'a revân
Alıp destine bir berât-ı emân
- 2311 Sununca gelip nâmeyi destime
Rûfû eyledim kalb-i işkestime
- 2312 Anı her gören nâme etdi kıyâs
Velî nâme tarzında gerçi libâs
- 2313 Degil nâme bir kâse-i inbisât
Derûnunda sirkencübîn-i neşât
- 2314 Muharrer kenârında âyât-ı nûr
Verir nûşu rencûra h'âb-ı huzûr
- 2315 Degil nâme inci süfûfu imiş
Cevâhir içinde hurûfu imiş
- 2316 Degil nâme terkîb-i iksîr imiş
Gam-ı derd-i hicrâna tedbîr imiş
- 2317 Midâdıyla çeşmim edip iktihâl
Nazardan mürûr etdi bir bir meâl
- 2318 Gelüp sevre-i iltihâba hâlel
Nuzuc buldu zahm-ı dil-i pür-ilel
- 2319 Hekîmbaşı etmiş yeniden meğer
Aristo'sun İskender-i dâdger
- 2320 Olunca benim oldu dünyâ yine
Efendim reîsü'l-etibbâ yine
- 2321 Mükedder idik azli ile dü-bâr
Bu nasb-ı müsellese gitdi humâr
- 2322 Edip destini Hak yed-i meymenet
Vere nabz-ı şâhâneye âfiyet

- 2323 İlâc eyleye şîr ü şekker ile
Ola hidmeti kurs u anber ile
- 2324 Verip hokkaya zîb-i yâkût u dür
Meâcîn-i cevher ile ola pür
- 2325 Verip gâhî yazlarda sirkencübîn
Safâ-yâb ola husrev-i nâzenîn
- 2326 Hudâ etmesin anı şâha tabîb
Musâhib ola ol nedîm-i edîb
- 2327 Sezâ öyle hâkâna böyle nedîm
Ki hem sadr-ı vakti ola hem hekîm
- 2328 Fekâhetde zâtı Şüreyh-i zamân
Siyâsetde tedbîri emn-i cihân
- 2329 Edip hikmet-i nakl u akl imtizâc
O nihrîre olmuş tabîi mizâc
- 2330 Deme asrının İbni Sînâ'sıdır
İpokrât tilmîz-i ednâsıdır
- 2331 Uzak sohbeti ile beyn-i Şifâ
Bunun her sözü nâsa ayn-ı şifâ
- 2332 Kıyâs etme allâme-i Tûs ile
Felâtûn yâhod Felâtûs ile
- 2333 Felâtûn'a aklen olur mu mesîl
Bu her fende allâme-i bî-adîl
- 2334 Alıp fenn-i hikmetde Câmâseb'i
Yanında eder kûdek-i mektebi
- 2335 Güneş gelmese ders-i işrâkına
Verir mi ziyâ çerhın âfâkına
- 2336 Anın misli mantûk u mefhûmda
Dahi gelmedi vakt-i malûmda
- 2337 Muhibb-i efâzıl mevâlî-nüvâz
Melâz-ı kavâbil ahâlî-nüvâz
- 2338 Mürebbî-i dânişverân-ı zamân
Müzekkî-i nefis-i hüner-perverân
- 2339 Sudûr-ı kirâmın kerem-güsteri
Kirâm-ı sudûrun himem-perveri
- 2340 Odur dest-gîr-i felâket-keşân
Bilir noldugun çünkü derd-i Keşan
- 2341 Bu târîh ile eyledim arz-ı hâl
Eder hâlîme merhamet lâ-muhâl

**Târîh-i nasb-ı ser-etibbâ-i sultânî
Mustafâ Behcet Efendi Hazretleri**

- 2342 Nasb olup İzmir ü Mısr u sadr-ı Anadolu'ya
Fıkh ile etmişdi icrâ-yı şerîat Mustafâ
- 2343 İki kerre evvel olmuşdu bi-hamdi'llâh yine
Akl ile oldu reîs-i ehl-i hikmet Mustafâ
- 2344 Her umûrunda muvaffak ede Allâh u resûl
Eyleyip Mevlâ'sı ihsân hem inâyet Mustafâ
- 2345 Kıl şefâat İzzet-i mücrim dahîlidir senin
Ey semiyî-i hazret-i sâhib-şefâat Mustafâ
- 2346 Hâteminden cevherî târîhin etdim iktibâs
Hâdimü'l-ilmeyndir üç defa Behcet Mustafâ (= 1238)
- 2347 Alıp arz-ı hâlim kebûter gibi
Revân oldu dil şevk ana per gibi
- 2348 Görüp arz-ı hâlim o müşkil-pesend
Gelir yâdına İzzet-i derdmend
- 2349 Bilip hâl-i zârım teessüf eder
Benim sûzişimle telehhüf eder
- 2350 Bilir cürmümün rütbesi azdır
Bu bir şîve-i baht-ı nâ-sâzdır
- 2351 Kadîmî anın âşinâsındanım
Bilir devletin asdikâsındanım
- 2352 Yeri gelse etmez kelâmın dirîg
Felek anladırda merâmın dirîg
- 2353 Olur lutf ederse cenâb-ı Kadîr
Benim gibi bin âcize dest-gîr
- 2354 Hudâ ömr ü ikbâlin efzûn ede
Adûsun kemâliyle dil-hûn ede
- 2355 Bu peygâmdan gönlüm oldu güşâd
Açıldı bana sanki râh-ı murâd
- 2356 Bu şerbetle dil etdi def-i ataş
Bizim evde yatsın dilerse güneş
- 2357 Gönül bu meserretle reyyân idi
Harâret Keşan'da ke-mâ-kân idi
- 2358 Ne hâl ise ol şerbet-i hoş-güvâr
Biraz oldu def-i merâka medâr
- 2359 Gelip yâda evsâf-ı şâh-ı cihân
Dedim yazayım bir kasîde hemân
- 2360 Hazef-pâre olduysa da cevherim
Turur mu bu kilik-i hüner-perverim

- 2361 Dedi çeksene târ-ı nazma güher
Gelir beyine bir gün elbette yer
- 2362 Hemîşe mekân-ı güher riştedir
Müheyyâlığı beye ser-riştedir
- 2363 Dedi eyle sen cevher-i nazmı bend
Alır pâdişâh-ı maârif-pesend
- 2364 Bu sûk-ı cihândır ne bâzâr olur
Yine şâh-ı âlem hırîdâr olur
- 2365 Gelip şevke bu tab-ı sihr-âferîn
Dedi kilk-i zâra hezâr âferîn
- 2366 Açıp hokka-i dür-feşânı hemân
Kasîdeyle kıldı kemâlin beyân
- 2367 Bulup vasf-ı hâkâna tibr-i nefis
Bu manzûmeye oldu tugrâ-nüvîs
- 2368 Bu tugrâ-yı garrâ ile bu misâl
Olur dürretü't-tâc-ı resü'l-kemâl
- 2369 Be-yümn-i kerâmât-ı şâh-ı cihân
Ola bu kasîdem berât-ı emân
- Kasîde der-menkabet-i melâzü'l-müslimîn
Sultân Mahmûd Hân medda'llâhu ömrehu**
- 2370 Âlemin denmek hatâdır husrev-i zî-şânı var
Ol şehin Husrev gibi bin bende-i fermânı var
- 2371 Pîşdâdîler fakat bir dâd ile meşhûrdur
Âl-i Osmân'ın cihânda dâdı hem ihsânı var
- 2372 Bir midir ankâ-yı kâf-ı madeletle mâgiyân
Anadolu'da Keyânîler gibi dihkânı var
- 2373 Ağlasın Eşkâniyân kim devletin anlar gibi
Niçe amâ sâile ihsân-ı bî-pâyânı var
- 2374 Gelseler Sâsâniyân devletde sâis olamaz
Anlara etbâ-ı mîr-âhûrunun rüchâmı var
- 2375 Nahl-i bâğ-ı madeletle hiç bir mi çûb-ı huşk
Çölde Abbâsîlerin ancak kuru unvânı var
- 2376 Ben Beşiktaş'ın değişmem bir ruhâm-ı sâfına
Gerçi çok âyîne-i İskender'in hayrânı var
- 2377 Meclis-i âlemde yok Cemşîd'i bir yâd eyleyen
Der-be-der mülk-i harâbâtın biraz mestânı var
- 2378 Hamdüli'llâh nûr-ı irfân ile biz fark eyeriz
Çünkü insânın gözü var hem gözün insânı var

- 2379 Olsa olsa lâyıık-ı teşbîh şâh-ı âleme
Şunda eslâf-ı kirâmın bir Süleymân Hân'ı var
- 2380 Bir nigâh ile levendât eşkıyâsın mahv eder
Bir de bir sâhib-kerâmet vâlid-i zî-şânı var
- 2381 Her birisi kutb-ı vakti gavs-ı asrıdır velî
Dâver-i sâhib-kerâmâtın yine rüchânı var
- 2382 Pehlevânsız var mı bir sâhib-kırân Şeh-nâme'de
Yanlarında Kahramân ya Rüstem-i Destân'ı var
- 2383 Kesdi başlı başına Mahmûd Hân bin dîv u gül
Heft-hân-ı kahrının ne hadd ü ne pâyânı var
- 2384 Erlik etdi niçe Ercâsebleri makhûr edip
Dahi niçe feth ü nasra ahdinin meydânı var
- 2385 Cümle-i âsârım ol İsfendiyâr'ın vasfıdır
Bende gel seyr eyle anın defter ü dîvânı var
- 2386 Rüstem'i vasf eylemem bî-çâre Firdevsî gibi
Hamdüli'llâh hâmemin memdûh-ı şevket-şânı var
- 2387 Dûr isem de hânçe-i ihsândan dil-sîriyim
Ol veliyyü'n-nimetin bende tükenmez nânı var
- 2388 Tard olunsa dahi bâbından muhakkar bir kulu
Sâyesinde gezdiği yerlerde izz ü şânı var
- 2389 Lutf ederse kendi eyler kahr ederse kendisi
Bir meges etsin beni rencîde hâtır-cânı var
- 2390 Farkı yok râhatda İstanbul'dan merdûdunun
Âh u zâr ile fakat bir dîde-i giryânı var
- 2391 Şübhe etmem kim eder elbette afv u merhamet
Ol hudâvendin tükenmez lutfu var ihsânı var
- 2392 Çerh-i nâ-dân hasm-ı erbâb-ı hünerdir eskiden
Fehm eder ol şehryâr-ı azamın irfânı var
- 2393 Reşk edip ihsânına hâk-i derinden etdi dûr
Gördü kim ol husrevin inâm-ı bî-pâyânı var
- 2394 Kîse-i iflâsıma çok gördü nakd-i lutfunu
Zâlimin yıldız kadar nakdîne-i tâbânı var
- 2395 Âkıbet dergâh-ı lutfundan beni tebîd edip
Raksa girdi şevk u şâdîden sanırsın cânı var
- 2396 Şehryârâ merhametkârâ terâfu kıl beni
Mücrimim gerçi biraz ol zâlimin bühtânı var
- 2397 Sâye-i Hak'sın sana amden isâet eylemez
Her kimin kim hazret-i peygam-bere îmânı var

- 2398 Hasımımı derk eylerim gerçi felekdir neyleyem
Dest-i zabtımda girîbânı ne hod dâmânı var
- 2399 Hakkımı hakk etmege emr et ki senden havf eder
Eski hâindir velî bir pârecik izânı var
- 2400 Der-akab eyler temelluk bilse ednâ vech ile
İzzet'in sâhib çıkar dâd-âver-i devrânı var
- 2401 Müşterî âsârım ol günlerde inkâr etse der
Senden anın ilm ü dânişde neden noxsânı var
- 2402 İsterim leb-beste-i şekvâsı olmak zâlimin
Hâmemi zabt etmenin olaydı ger imkânı var
- 2403 Şekve-i çerh-i sitem-perver yeter İzzet yeter
Bir hatâ-yı dîger etme hâmenin tугyânı var
- 2404 Vasf-ı şâh-ı dehre zeyl eyle duâ-yı devletin
Muntazır kalbim gibi bir niçe âmîn-h'ânı var
- 2405 Pâdişâh-ı âlemi Mevlâ hemân var eylesin
Her gamın bir sûru her bir illetin dermânı var
- 2406 Haşre dek yâ Rab desinler şevket ü iclâl ile
Âlemin Mahmûd Hân nâmında bir sultânı var
- 2407 Kasîdem bulup zîb-i hüsn-i hitâm
Dedi kîlk-i dil-haste temme'l-kelâm
- 2408 Dedim bir zamân sen de var uzlet et
Devâtı ferah-gûşe-i râhat et
- 2409 Kalemle hukûkum sabâvetdedir
Yanımda şeb ü rûz sohbetdedir
- 2410 Enîsimdir ancak ferîd ü vahîd
Kemâlin ede Hak taâlâ mezîd
- 2411 Odur bana enbâz-ı hüsn-i beyân
Nola medh edersem anı her zamân
- 2412 Benimle bu derde olup mübtelâ
Güzer kıldı beş mâhı vakt-i celâ
- 2413 Enîs ü celîsim olup subh u şâm
O da eyleyip hord u h'âbı harâm
- 2414 Ser ü cân ile hıdmet etdi bana
Bu medhiyyeyi kıldım inşâd ana

Sıfat-ı hâme ve ba'z-ı medâyih-i û

- 2415 Kalem kâf u nûna olup vâsita
Zuhûr etdi eşyâda bu râbîta
- 2416 Tehî âyetinde eder mi kasem
Tırâzende-i hâme-i "ve'l-kalem"

- 2417 Kalem olmasa nokta-bahşâ-yı nûn
Bilinmezdi sırr-ı “ve-mâ-yesturûn”
- 2418 O zulmetde pinhândır âb-ı hayât
Midâdında cûşândır âb-ı hayât
- 2419 Degildir o âb-ı bekâ lezzeti
Olur olmaz İskender'in kısmeti
- 2420 Cemâli eğerçi siyeh-gündür
Kemâli güneş gibi efzündür
- 2421 Cihân-gerd gîtî-sitândır kalem
Gezer dehri bir dâstândır kalem
- 2422 Olur zîb-i bezm-i şehân-ı cihân
Bilir her lisân istemez tercemân
- 2423 Gezer mülk-i gayrı o mahsûd-ı Cem
Velî pâ-yı tahtı diyâr-ı Acem
- 2424 Odur hâkim-i hasim-i her diyâr
Mevâlî anınla eder iftihâr
- 2425 Odur manevî bir veliyyü'n-niam
Dü şakk-ı zebânında lâ vü neam
- 2426 Dehânın güşâd eylemez nâ-kese
Meğer kim bir ehl-i maârif kese
- 2427 Eğer ez-kazâ alsa nâ-dân ele
Verir raşesi safhaya zelzele
- 2428 Reh-i marifetde verir gerçi baş
Eder dest-i câhilden ancak telâş
- 2429 Mizâcında vardır televvün biraz
Eder bahsi geh kasr u gâhî dirâz
- 2430 Geçip zulmet-i vasf-ı gîsûydan
Olur gâh rencîde bir mûydan
- 2431 Kemâlâtına hiç açılmaz dehen
Bakar ağzına anın ehl-i suhan
- 2432 Bütün fâzılâna muâsırdır ol
Cemî-i mebâhisde hâzırdır ol
- 2433 Zebân nâ-resâ vasf-ı telîfine
Ukûl ermez adâd-ı tasnîfine
- 2434 Bu rütbe kemâlâtı meşhûr iken
Cihân âb-ı lutfuyla mamûr iken
- 2435 Kurur çeşmesâr-ı midâd-ı siyâh
Olur katre-i âba muhtâc gâh

- 2436 Kalır tâ edince biraz nûş-ı âb
Midâd içre pâ-der-gil-i pîç-tâb
- 2437 O bî-çâre ancak çeker zahmeti
Alır safha ağzındaki nimeti
- 2438 Dehânında kalırsa bir pâre âb
Leb-i kâtib andan olur hisse-yâb
- 2439 Birazın dahi nûş eder dest-mâl
Budur işte rûzî-i ehl-i kemâl
- 2440 *Fe-li'llâhi derrüh çi hoş güfteest
Ki Sadî der-în mani dür süfte est*
- 2441 *Be-şehr în mesel şöhre-i âlemest
Ki herkes hüner-bîş rûzî kemest*
- Teşekkür-i hâme berây-ı medîha-i hod
ve tavsîf kerdn-i û fâzılân-ı cihân-râ**
- 2442 Demezdîm ki gelsin bu tavsîfe had
Hurûf-ı teheccî ile hem-aded
- 2443 Kerâmet degil bende kilkimdedir
Şu var kim benim dest-i silkimdedir
- 2444 Görüp vasfını kilki-i muciz-nümâ
Kemâl-i teşekkürden etdi bükâ
- 2445 Dedi dâimâ lutfunuz var ola
Hüner-düşmenân-ı zamân h'âr ola
- 2446 Ne hâsıl bizim gibi bir çûbdan
Nedir farkımız çüb-ı cârûbdan
- 2447 Eđer etmese terbiyet kâbilân
Ne kâbildi olmak güşâde-zebân
- 2448 Neyistânda kalsakdı zâr u zebûn
Olur muydu dil vâkıf-ı her-fünûn
- 2449 Neyim ben ki hâşâ ola kudretim
Benân-ı efâzıldadır kuvvetim
- 2450 Benim şöhretim anların nutkudur
Cihân-gîr o hâkânların nutkudur
- 2451 Benî nevimizden nice derdmend
Zenânın olur târ-ı cevrinde bend
- 2452 Sebeb eyledi Hak taâlâ sizi
Halâs etdiniz ol cefâdan bizi
- 2453 Midâd-ı fuhûle edip ser-fürû
O âb-ı kerâmetle etdik vuzû
- 2454 Olup cebhemiz lâyıık-ı secdegâh
Perestişde kıldı muvaffak İlâh

- 2455 Vuzûya fuhûl olmasa reh-nümâ
Ne mümkindi mess-i kelâm-ı Hudâ
- 2456 Hüner-perverâna edip intisâb
Dahi olmadık heyzüm-i her-kebâb
- 2457 Olup cismimiz müstaid-i leheb
Yakardı bizi câhilân bî-taab
- 2458 Neyistânda var mıydı âb-ı hayât
Niçin bulmadık teşnelikden necât
- 2459 Dahi tıfl-ı nev-sâle iken henûz
Yakardı dil ü cânı tâb-ı temûz
- 2460 Çayır çayır etmiş idik iltihâb
Gelip vermedi kimse bir katre âb
- 2461 Fuhûle nola eylesek ser fedâ
Bize oldular Hızr-ı âb-ı bekâ
- 2462 Eğer etmesek intisâb-ı kibâr
Binerdi bize kûdek-i ney-süvâr
- 2463 Olur ba'zımız Mevlevî'ye nefîr
Mevâlîye bendiz sagîr ü kebîr
- 2464 Bize ehl-i dil mahrem-i râzdır
Görenler sanırlar ki bir sâzdır
- 2465 Bizi terbiyet kıldı ehl-i kemâl
Edip mahrem-i meclis-i hâl ü kâl
- 2466 Hudâ anları ber-devâm eyleye
Bizi câhilâna harâm eyleye
- 2467 Kerem eyleyip dem-be-dem ehl-i hâl
Bizimle ederler hafî kıl ü kâl
- 2468 Kalırdık eğer olmasa âlimân
Bu murgân-ı bî-nân u bî-âşiyân
- 2469 Devâtı ederler melâz u meâb
Bulur anda etfâlimiz hord u h'âb
- 2470 Neyiz biz ola bizde lâ vü neam
Yine âlimândır veliyyü'n-niam
- Devletlü Hâmid Efendi'nin pâye-i sadâret-i Anadoluya
şeref-efzâ olduklarıdır**
- 2471 Bu şükrâneyi hâme kıldı tamâm
Sitanbul'dan geldi bir hoş peyâm
- 2472 Vatanda tebârım olup şâdmân
Bana hisse-i gâib erdi hemân

- 2473 Veliyyü'n-niam Hâmid-i lutf-ı Hak
Sudûr ile olmuş meğer yek-nesak
- 2474 Verip pâye-i Anadolu'ya şân
Komuş kasr-ı ikbâle bir nerdübân
- 2475 Vere mesned-i Anadolu'ya zîb
Gele sadr-ı Rûm'a dahi an-karîb
- 2476 Murâd etse Hak etmegi şâd-kâm
Kulun dâr-ı gurbetde eyler be-kâm
- 2477 Olup ol haberden gönül mübtehic
Kederle ferah oldular mümtezic
- 2478 Gam-ı gurbet ile sürûr-ı vatan
Bana oldu gûyâ ferah-der-mihen
- 2479 Cihân kıldı tebrîk-i sadru'-s-sudûr
Felek tehniyetden beni etdi dûr
- 2480 Gehî ağladım geh olup şâdmân
Yarım cennet oldu cahîm-i Keşan
- 2481 Olup cismimin nısfı cennet-nişîn
Diğer cânibi kaldı dûzah-güzîn
- 2482 Olup kalbimin nısfı gamdan berî
Mükedder idi nîme-i âheri
- 2483 Giderse derûndan husûf-ı celâ
Bulur nısf-ı dîger dahi incilâ
- 2484 Bu abdin olup nısfı âzâd-ı gam
Dahi geçmedi hissesinden elem
- 2485 Vere şâh-ı devrâna Hak âfiyet
Gelir bana da nevbet-i âtîfet
- 2486 Hudâ lutf u ihsân edip şevk-i tâm
Varıp dâmenin eyleyem iltisâm
- 2487 Görüp anı gerdûne-zîb-i haşem
Ferah hâne-i kalbe bassın kadem
- 2488 Görüp vâlidim mesnedinde mukîm
Zebânım ede hamd-i Rabb-i kerîm
- 2489 Duâ eyledikçe leb-i hâmidim
Dirildi kıyâs eyleyem vâlidim
- 2490 Olup melce-i hânedân-ı kühen
Bizi lutfu etsin masûn-ı mihen
- 2491 Muammer edip anı Rabb-i mecîd
Ede câh u ikbâlini ber-mezîd

**Fazîletlü inâyetlü Cafer Beg Efendi Hazretlerinin
kâzî-i Dârü'l-hilâfe olduklarıdır**

- 2492 Diğer bir berîd-i meserret-nüvîd
Gelip rûzumu etdi hengâm-ı îd
- 2493 O peygâmdan buldu gönlüm sürûr
Alıp tezkire eyledi gam mürûr
- 2494 Dedi kıldı Cafer Beg'i pâdişâh
Sitanbul'a kâzî-i şer-i İlâh
- 2495 Geçen sâl etmiş idi itizâr
Bu yılmış meğer hükm-i Perverdgâr
- 2496 Nümâyân olup men ü itâ-yı Hak
Bilen aldı ilm-i ledünden sebak
- 2497 Nihâyet mi var men ü itâsına
Karışmaz anın kimse dünyâsına
- 2498 O filinde hâşâ ki câhil midir
Karışmak ana kâr-ı âkil midir
- 2499 Boyun egmeyen dest-i takdîrine
Girer âkıbet kahrı zencîrine
- 2500 Gehî eylemez akça yüz bin taleb
Olursa murâdı verir bî-taab
- 2501 Tesellî verip kalbime bu peyâm
Hemân buldu zahm-ı derûn iltiyâm
- 2502 Degil sûr ıtlâk ile hem-safâ
Sitanbul benim oldu dersem sezâ
- 2503 Kerem-pîşe mîr-i mûkerremdir ol
Mekârim-şiyem zât-ı ekremdir ol
- 2504 Edip şekve benden sipihr-i denî
Sitanbul'a ihzâr edeydi beni
- 2505 Edip şer-i Ahmed'le ihkâk-ı hak
O tezvîrkâra çalardı tayak
- 2506 Odur vaktinin hâkim ü hâsimi
Bilir kimdir ol âdil ü zâlimi
- 2507 Komaz yanına âh u feryâdımı
Felekden alır hükm edip dâdımı
- 2508 Bula anı dâim rızâsında şâh
Muvaffak ede mesnedinde İlâh

Takarrüb-i îd-i adhâ ve zuhûr-ı b'az ibtilâ

- 2509 Olup dem-be-dem îd-i adhâ karîb
Ederdi figân kebş-i dil bî-şikîb

- 2510 Fedâ olmak ister reh-i yârda
Gözü bismilâsâ der-i dârda
- 2511 Yazıp bir niçe sâhib-i merhamet
Beş on gün diyü verdiler tesliyet
- 2512 Beş on gün beş on gün getirdim cünûn
Sitanbul'da var bir tükenmez beş on
- 2513 Beş on gün degil oldu beş ay tamâm
On aydan masûn ede Rabb-ı enâm
- 2514 Nedir baksam âyâ lugatde beş on
Beni eyledi böyle zâr u zebûn
- 2515 Lugatde beş on mu aceb âm-ı fil
Aceb zabt olunmuş mu sâl-i alîl
- 2516 Sinînin bu yıl pek zaîfî imiş
Ya gâyet nahîf ü zarîfî imiş
- 2517 Dem-i rûz-ı mâzîsi gûyâ ki hâl
Temeşşide müstakbeli bî-mecâl
- 2518 Mürûr etdi gerçi zamân-ı medî
Şu beş on günün mevsimi gelmedi
- 2519 Pes-i perdesinde sipihrin meğer
Müheyâ imiş bir belâ-yı diğere

**Hikâyet-i aşk-bâzî-i zen-i tersâ
ve heyecân-ı ıztırâb-ı în mübtelâ**

- 2520 Aceb bir belâ kim belâdan belâ
Hirâsân idi ol kazâdan kazâ
- 2521 Civârımda bir duht-i tersâ-beçe
Edip râzını âleme püçpüçe
- 2522 Şeb ü rûz ederdî enîn ü figân
Tayanmazdı olsa eğer bende cân
- 2523 Kabûl etmeyip merhem-i tesliyet
Komuş ortaya derdini âkıbet
- 2524 Çıkıp râzı îmân gibi zâhire
Acırdı müselmânlar ol kâfire
- 2525 Lisânı idi çünkü Rûmî-beyân
Fakat fark olurdu sadâ-yı amân
- 2526 Sorup bâis-i âhını şevheri
Demiş sevdi dil bir müselmân perî
- 2527 Ederse demiş terk-i dîn iktizâ
Kenîsa o mihrâb-ı çâra fedâ

- 2528 Çelîpâ nedir kim ede derde kâr
Gerekdir bana sâid-i sîm-i yâr
- 2529 Ne kâr ede nush-ı berehmen bana
Verir mi şifâ âb-ı behmen bana
- 2530 Nedir çâre sad hayf bu ser-nüvişt
Beni etdi mahrûm-ı deyr ü künişt
- 2531 Cüdâyım cüdâ âr u nâmûsdan
Ses almaz kulak bâng-i nâkûsdan
- 2532 Demiş mübtelâdır gönül mübtelâ
Mesîhâ'dan etmez ümîd-i şifâ
- 2533 Bunun çâresi terk-i dîn etmedir
Yahud böyle âh u enîn etmedir
- 2534 Döküp derdini zülfi veş mû-be-mû
Beyân eylemiş şûyuna rû-be-rû
- 2535 Hayâ etmeye şevherinden ki zen
Nedir var düşün âteş-i aşkı sen
- 2536 Düşüp şûy-ı bed-ahteri âteşe
Şerârı tokundu bu mihnet-keşe
- 2537 Şebim şeb degildi sabâhım sabâh
Ararken dil-i zâra gamdan felâh
- 2538 Belâyı görün kim belâ üstüne
Urur dâğı dâğ-ı cefâ üstüne
- 2539 Bilâd-ı diğerden imiş ol civân
Zen-i mübtelâ olsa da müslümân
- 2540 Müsâid degil kârına baht-ı bed
Diğەر duhter ol ahtere nâm-zed
- 2541 O şûhun dahi vardı bir âşıkı
O Âzrâ-izârın imiş Vâmîk'ı
- 2542 Rekâbet edip zen o mihnet-keşe
Yakardı anı bulsa ger âteşe
- 2543 Zen ü şevher ü âşık u nev-civân
Bir ağızdan eylerdi âh u figân
- 2544 Olup çâr-mevc-i yem-i ıztırâb
Verirdi biri birine pîç-tâb
- 2545 Penâh eylese zen der-i dil-beri
Bırakmazdı pîş u pesin şevheri
- 2546 Civânın gelip yâdına nâm-zed
O bed-bahtı bâbından eylerdi red
- 2547 Ederdi bu mısrâla âh u bükâ

Amân yandı cânım Muhammed Ağa

2548 Felekde bu iş mümkün olsa o gün
Bu mâtem içinde ederdim düğün

2549 Gözü âşıkın kan gibi kırmızı
Helâk eylerim der o kâfir kıızı

2550 Olup her biri âşık-ı nâ-şikîb
Biribirine her birisi rakîb

2551 Bu bir gûş olunmuş hikâyet degil
Filân festekizden rivâyet degil

2552 Görülmüş musîbet degil hâsılı
Yazılmış rivâyet degil hâsılı

2553 Bunu görmesem ben inanmaz idim
Bu âteş ile kâş yanmaz idim

**Nevmîd şuden-i ân giriftâr ve
tesmîm kerden-i h'îş ez-gam-ı yâr**

2554 Tecessüs edip hâlini yârının
Devâsın ararken dil-i zârının

2555 İşitmiş ki var yârına nâm-zed
Yavuklu imiş zühreye ol esed

2556 Olup baht-ı nâ-sâzdan nâ-ümîd
Demiş oldu kârd üstüh'âna resîd

2557 Şifâ âşıkın derdine semdedir
Dem-i sıhhati başka âlemedir

2558 Alıp bir iki pârelik semm-i fâr
Demiş eyleyim cânıma cân nisâr

2559 Gelip râh-ı dildâra etdi niyâz
Çekip sîneden âh-ı tâkat-güdâz

2560 Dedi sağ ol ey nahl-i bâğ-ı merâm
Benimçin Hudâ almasın intikâm

2561 Fedâ sana ben gibi yüz bin kenîz
Helâl ola kanım dem-i rustehîz

2562 Mübârek ola duhter-i nâm-zed
Beni eyleme rûz-ı mahşerde red

2563 Kodun hançer-i hicrini cânıma
Şehâdet edip bârî îmânıma

2564 Bekâda olam vaslına dest-res
Budur bana îmandan mültemes

2565 Atıp ağzına semmi ol cân-sipâr
Tükendi zebânındaki âh u zâr

Ol âşık-ı nâlâna semmin tesîr etmedigidir

- 2566 Kazâ vü belâ tolsa sağ u sola
Eder mi ziyân merg ecelsiz kula
- 2567 Etibbâ mukayyî verip der-akab
Ciğerden kesildi o sûz u leheb
- 2568 Dehânından oldu revân hûn-ı âl
Karışdı sirişkiyle Ceyhûn-misâl
- 2569 Düşerdi gehî pâre pâre ciğer
Etibbâ anı kan sanırmış meğer
- 2570 Anı etmedi semm-i kâtil helâk
Getirdi fakat ol helâhilden âk
- 2571 İnanmaz ana kimse öldü disem
Ne kâr eylesin kulzüm-i semme sem
- 2572 Biraz çıkdı safrâ ile nush u pend
Ne gamlar yutarmış meğer derdmend
- 2573 Etibbâ degildir haberdâr-ı aşk
Bilir anı merd-i ciğerdâr-ı aşk
- 2574 Kızın bağı düşdü yere laht laht
Sevindi felekde görüp kara baht
- 2575 Hele zehresin zehr edip çâk çâk
Halâs oldu dehşetden ol havfnâk
- 2576 Demez gebr ü tersâ Hakîm-i rahîm
Şifâ verdi der-hâl Rabb-i kerîm
- 2577 Edip ana cüzîce tesîr sem
Fakat kaldı bağında eski vesam
- 2578 Edip cândan izhâr-ı ıyy u fütûr
Yine âh u efgânda yokdu kusûr
- 2579 Ururdu başın âh edip taşlara
Dedim vermesin Hak bunu başlara
- 2580 Tolup bâng-i yâ aşk ile âsumân
Bu şî'ri okurdu zemîn ü zamân

Gazel

- 2581 Meyl eder mi köhne sevbe kâmet-i bâlâ-yı aşk
Nev-be-nev eyler teceddüd âteşin dîbâ-yı aşk
- 2582 Târ u pûd-ı hâr u hasdan sütire olmaz şuleye
Perde-i nâmûsa sıgmaz şöret-i rüsvâ-yı aşk
- 2583 Çeşm-i süzenden eder gâhîce Hindistân'ı seyr
Kûr olur gâhî vatanda dîde-i bînây-ı aşk

- 2584 Dûdmânın âkıbet tenhâ-serây-ı bûm eder
Yanılp tâ kim basa bir hân-mâna pây-ı aşk
- 2585 Bir şerer gâhıce yüz bin hân-mân sûzân eder
Bana birdir rütbede alâ-yı aşk ednâ-yı aşk
- 2586 Bir bilir ben görmedim âlemde bilmem ben dahi
Zann eder zumunca herkes kendini dânyâ-yı aşk
- 2587 Târ u mâr etdi sevâd-ı azam-ı tedbîrimi
Sevdet-i bahtım süveydâ-yı dilim sevda-yı aşk
- 2588 Dûzahında müslim ü tersâyı bir sûzân eder
Var mı İzzet mebhas-i “illâ”-yı istisnâ-yı aşk
- 2589 Tâlib-i Hakk'ı haberdâr-ı hakikat eyledi
Gösterip ders-i mecâzı hazret-i Monlâ-yı aşk
- 2590 Bu şî'rin eğer bilse manâsını
Ederdi ferâmûş davâsını
- 2591 Sanır kim o bî-çâre ancak benim
Benim yandı bu nâra ancak benim
- 2592 Bilir mi ne olur harâb etdiğin
Bu aşkın ne cânlar kebâb etdiğin
- 2593 Zebûn oldu aşka nice taş dögen
Tahammül getirmez idi Kûh-ken
- 2594 Degildir zen-i bî-kesin kârı bu
Degil erkegin kârı hey karı bu
- 2595 Bu tezvîri gerdûn yeni etdi meşk
Edip aşkı hüsn eyledi hüsnü aşk
- 2596 Çıkardı yeni bir oyun hîle-bâz
Niyâzı edip nâz nâzı niyâz
- 2597 Edip cârı cânân cânânı cân
Değişirdi esmâyı şeyh-i zamân
- 2598 Bu esrârı bilmez o aklı kısa
Firîbende-i çerh olup nâkîsa
- 2599 Olup aklı zülfü gibi târ u mâr
Gezerdi sokaklarda leyl ü nehâr
- 2600 Üşüp başına cümle nisvân-ı şehri
Şaşırdı cüvânân u pîrân-ı şehri
- 2601 Yanınca o bî-çârenin şevheri
Yanardı ber-â-ber gezip serserî
- 2602 Üşüp başına mâtem-i kâinât
Anımla gezerdi gam-ı kâinât
- 2603 Bu rütbe siyâh olmasın ahteri
Ola düşmenânım bu gamdan berî

- 2604 Ne pervende benzer ne kerdengile
Hemân ugradı bir gam-ı müşkile
- 2605 Eđer sevmiş olsaydı zen-pâresin
Bulurdu felek niçe bin çâresin
- 2606 O kâfir kızı düşmen-i dîn iken
Olunca bu âteş ile nâle-zen
- 2607 Bana etdi h'âb-ı huzûru harâm
O ağlar ben ağlar idim subh u şâm
- 2608 Ararken rûfû kalb-i sad-pâreme
Avuçla tuz ekdi felek yâreme
- 2609 Teheyyüc edip dilde gerd-i firâk
Derûnu yine sardı derd-i merâk
- 2610 Bu tîr-i kazâ düşdü tâ yanıma
Ucu girsin az kaldı kim cânıma
- 2611 Civârımda etdi bu âteş zuhûr
Beni eyledi geceler bî-huzûr
- 2612 Bu bâd-ı kazâ aldı hâkisterin
Kodu açığa sînenin ahkerin
- 2613 Tahammül olunmazdı feryâdına
Bulunmaz idi çâre imdâdına
- 2614 Tutup dergeh-i Hakk'a rûy-ı niyâz
Dedim yâ Rab ol derdime çâre-sâz
- 2615 Ki sensin nigârende-i hüsn-i pâk
Eden çihre-i âşıkı zerdnâk
- 2616 Şu gam-hâneden ol zeni eyle dûr
Bu nezdîk-i gamdan beni eyle dûr
- 2617 Gidip semtimizden İlâhî o zen
Dil-i zârıma olmasın şule-zen
- 2618 Yanıktır yanıktır yanıktır gönül
Gam-ı aşkdan usanıktır gönül
- 2619 İlâhî benim var mıdır kuvvetim
Dil-i zârımın bârına kudretim
- 2620 İlâhî kerîm ü keremkârsın
Ki sen vâkıf-ı her dil-i zârsın
- 2621 Benim bu gama iktidârım mı var
Bu rütbe hazâna bahârım mı var
- 2622 Sitanbul'da gelse başa bu belâ
Olur bir tesellî veren mübtelâ

- 2623 İlâhî zahîr ü mededkârım ol
Tesellî-dih-i kalb-i bîmârım ol
- 2624 Garîbü'd-diyâra bu gam çokçadır
Diğer gam ile karnımız tokçadır
- 2625 Pes ü pîşimi aldı derd ü keder
Ne yapsın iki hasma bir dâne ser
- 2626 Bu gamdan beni eyle yâ Rab halâs
Düşenler kapından bulur hep halâs
- Kabûl-i münâcât ve ol belâ-yı
nâ-geh-zuhûrdan necâtımızdır**
- 2627 Duâmı edip hazret-i Hak kabûl
Merâmımca buldu murâdım husûl
- 2628 Sükûnet gelip nâle-i duhtere
Alıp gîtdiler menzil-i dîgere
- 2629 Biraz pister-i râhata yatdı cân
Kesildi kulakdan enîn ü figân
- 2630 Fakat âh u zârı gelip hâtıra
Acırdım yine turmayıp kâfire
- 2631 O meh-rûya maşûk olan âfitâb
Bana gam-güsâr idi vakt-i şebâb
- 2632 Ödüm kopdu kim meyl ede ol söze
Hemân kesdire bu belâyı göze
- 2633 Meded bir kemend idi kim ol kemend
Olur ana her şîr-i ner kendi bend
- 2634 Felek kurmamış olsa dîger düzen
Ramak kaldı kim eyleye meyl-i zen
- 2635 Eğer etmese nâm-zedden hicâb
Benimçin verir miydi katî cevâb
- 2636 Hudâ rahm edip kalb-i mihnet-keşe
Benim cânımı yakmadı âteşe
- 2637 Benimçin muhâl anı etmek fedâ
Meğer kim ere cebr-i hükm-i kazâ
- 2638 Bir iki uşak var idi gitdiler
Der-i gurbeti bana berkitdiler
- 2639 O çıkdı vefâ-kâr u sâhib-kadem
Anınla geçerde bu eyyâm-ı gam
- 2640 Eğer yansa idi bu nâra o da
Atardım ten-i zârı ben de oda
- 2641 İki duhteri var kızın bir eri

- Gezerdik bu dört cân ile serserî
- 2642 Bana on sene oldu kim yâr idi
Fedâ etmiş olsam katı âr idi
- 2643 O bed-kîşe vermiş olaydı dili
Olurdu işim müşkilin müşkili
- 2644 Götürsem Sitanbul'a anı belâ
Keşan'da bıraksam büyük ibtilâ
- 2645 Basıp bağına seng-i sabr u şikîb
Benim hâtırım basmadı ol edîb
- 2646 Tahammül edip aşka ketm eyledi
Hemân mushaf-ı hüsnü hatm eyledi
- 2647 Bu gamdan bana kendi verdi haber
Ne kim vâki oldu ise hayr u şer
- 2648 Dedi hüsn-i tedbîr edip çâre bul
Nedir var düşün çâresin ara bul
- 2649 Dedim tard u ibâda kıl ihtimâm
Verip dil beni etme rüsvâ-yı âm
- 2650 Katıp eski derdi yeni yâreye
Beni etme muhtâc iki çâreye
- 2651 Eğer var ise meyl-i dil sende de
Zuhûr eyler elbet eser bende de
- 2652 Olup arza-i fâş esrârımız
Olur halka suhriyye etvârımız
- 2653 Edip dest-i tedbîr ile gûş-mâl
Biraz ağlayıp eyledik hasb-i hâl
- 2654 Kılıp nush u pendim eser cânına
Kasem eyledi dîn ü îmânına
- 2655 Dedi olmadım duhtere mübtelâ
Zuhûr etdi andan bu derd ibtidâ
- 2656 Fakat yâda geldikçe mihnet-keşim
Füzûnter olur bir zamân âteşim
- 2657 Seni derd-i aşka fedâ etmedim
Ferâmûş-ı nân semtine gitmedim
- 2658 O Leylâ'ya Mecnûn degildir gönül
Hudâ hakkı meftûn degildir gönül
- 2659 Dedim var ol ey yâr-ı gurbet-keşim
Enîs ü celîs ü felâket-keşim
- 2660 Bu günlerde ikbâlden düşkünüm
Olursa seninçin ola bir günüm

2661 Basıp yâremiz üzre zehr ü nemek
Dedik görelim kim ne eyler felek

**Bu hikâyet-i garîbeyi muktezâ-yı ilm-i remle
Şeyh Talat'in mukaddemâ istihrâc ve ihbâr eyledigidir**

2662 Bizim Talat üstâd remmâl idi
Ana âtiye gûyiyâ hâl idi

2663 Döküp bir gece kevkebâsâ nukat
Haber verdi bu sûreti bî-galat

2664 Dedi bir zen-i kâlüm-i bî-hayâ
Verir bu civâna gönül ez-kazâ

2665 Çözüp vuslatın bendini kendisi
Âna arz eder kendini kendisi

2666 Giriftâr olur bir alay mihnete
Verir mihneti renc ü gam İzzet'e

2667 Niçe güft-gûlar olur arada
Hücûm u gulûlar olur arada

2668 Dedim ol zen-i mübtelâ câfdır
Bu şekl-i müzevvir aceb lâfdır

2669 Gülüşmüş idik şeyh-i mâhir ile
Edip anı tekzîb zâhir ile

2670 Dedi biri iki ay mürûr eylemez
Ne söyler ki Talat zuhûr eylemez

2671 Degil akla bu ukleden rû-nümâ
Bunu gösterir perdedâr-ı kazâ

2672 Dahi bir iki ay mürûr etmeden
Bu tarh-ı acîb oldu hayret-figen

2673 Kemâlât-ı Hakk'a nihâyet mi var
Înâyâtına hadd ü gâyet mi var

2674 Bunu vermez enkîs ü lihyân haber
Odur o nümâyende-i hayr u şer

**Bu âteş-i ciğer-sûz ile dūcâr-ı nîrân-ı ıztırâb olup
itfâ-yı nâire-i aşk için Karlık köyüneazîmetimizdir**

2675 Müheyyâ idi sînede hâr u has
Kodu bir şerâre o âteş-nefes

2676 Olup ol şerer külhan-ı râyegân
O külhan dahi oldu dûzah-nişân

2677 Tutuşdu derûnum misâl-i çenâr
Reh-i gülşen-i aşka oldum fenâr

- 2678 Unutdu uşak fûrkat-i duheri
Be-kâm oldu vuslat ile şevheri
- 2679 Ne olduysa oldu dil-i zârıma
Tokundu bu mızrâb-ı gam târıma
- 2680 Düşündükçe gönlüm gam-ı yârını
Bugünden fenâ olmada yarını
- 2681 Tabîb-i hîred oldu hikmet-nümâ
Dedi Karlı köydür bu nâra şîfâ
- 2682 Delîlim olup gam reh-i mihnete
Yine düşdü gurbetde dil gurbete
- 2683 Gelirken bana mihnet-i nev-zuhûr
O yollardan etmiş meğer kim mürûr
- 2684 Tuyulmuş fezâlarda bu ser-güzeşt
Sararmışdı benzim gibi rûy-ı deşt
- 2685 Geçerken bu murg-ı harâb-âşiyân
Acırdı görüp bâğda bülbülân
- 2686 Görüp âteşim dâmen-i kûhsâr
Reh-i âhıma çekdi sed cûybâr
- 2687 Görüp hârhâr-ı gamım hârzâr
Neyistân gibi oldular zâr zâr
- 2688 Görüp köprüler çeşmimin yaşını
Suâl etdiler ol suyun başını
- 2689 Dedim menbaı kûh-ı fûrkatdedir
Ayağı diyâr-ı felâketdedir
- 2690 Refikim idi kâfirin mihneti
Cehennem ederdî bana cenneti
- 2691 Olurdu reh-i gamda ol bahtı kem
Hayâlimde hevdec-nişîn-i elem
- 2692 Bizimle ber-â-berce çıkdı keder
Yine bu gidişle ber-â-ber gider
- 2693 Konakçı gibi gitdi feryâdımız
Keder tehyie eyledi zâdımız
- 2694 Duhûl eyledik karyeye vakt-i şâm
Uzakdı o şâma sabâh-ı merâm
- 2695 Çekip Karlı köyünde bir âh-ı serd
Yürekde yine tâzelendi o derd
- 2696 Yanıp âh-ı dilden tilâl ü cibâl
O cennet bana oldu dûzah-misâl
- 2697 Bu âteş ile girse dil cennete
Bihîştî sokar dûzah-ı mihnete

- 2698 O gece olup karyeye pâsbân
Sabâha kadar etdim âh u figân
- 2699 Eğer olsa her zerre bir âfitâb
Şeb-i hâtırım olamaz şevk-yâb
- 2700 Togup mihr-i rûşen açıldı sabâh
Gönül bulmadı mîg-i gamdan felâh
- 2701 Bihişt olsa câyın verir derd-i ser
Ber-â-ber degil mi o renc ü keder
- 2702 Olursa karîn-i leb-i âteşîn
Döner şuleye mevc-i sirkencübîn
- 2703 Gönülde ola nâr-ı dûzah-misâl
Verir mi safâ seyr-i âb-ı zülâl
- 2704 Gönülde ola hâr-hâr-ı cefâ
Verir mi ana seyr-i gülşen safâ
- 2705 Gönülde ola zahm-ı zehr-i elem
Gelir âlemin ana iksîri sem
- 2706 Degil Karlı köy olsa yah-pâre çerh
Kosa kendini dildeki nâra çerh
- 2707 Kuru çeşme-i âteş-efşân-misâl
Olur bâda hâkisteri perr ü bâl
- 2708 İki üç gün anda çekildi taab
Sükûn bulmadı zerre denlü leheb
- 2709 Nihâyet refik-i felâket-keşim
Dedi berter oldu dahi âteşim
- 2710 Zebûn eyledi âkıbet derd-i aşk
Kafâyı yere urdu ol merd-i aşk
- 2711 Alıp anı oldum Keşan'a revân
Tayansın bu derd ü gama cism ü cân
- 2712 Tabîb-i kazâ câna kasd eyledi
Sokup neşter-i cevri fasd eyledi
- 2713 Edip ana aklımca ba'zı ilâc
Etibbâya mess etmedi ihtiyâc
- 2714 Keşan'ın kalırsa etibbâsına
Sürer âdemin derdi ukbâsına
- Sıfat-ı tabîb**
- 2715 Getirdi biri bir hekîm-i leîm
Ebû-cehl- hikmet utüll ü zenîm
- 2716 Tabâbetde zumunca Sokrât'a denk

Ne Talyan ne Latin ne Rûm u Firenk

- 2717 İpokrât-ı illet-ne-dân-ı zamân
Ber-ârende-i menzil-i pest-i cân
- 2718 Felâtûn-ı bî-deryet ü bî-hired
Aristo'yu aklınca etmekte red
- 2719 Eđer verse rencûra râvend-i Çîn
Olur inkıbâz-ı mizâca muîn
- 2720 İlâcında tesîr olaydı eđer
Keşan'da tükenmişdi nev-i beşer
- 2721 Dahi gelmeden hastenin yanına
Olup nişter-keş girer kanına
- 2722 Degil tasma bir kaç karış rîsmân
Bogar hastesin gelse almağa kan
- 2723 İki parmağı arasında ecel
Verir sıklet-i desti nabza halel
- 2724 Eđer bulsa merzâda hummâ-yı dık
Eder anda tedbîrini iki şık
- 2725 Verir gâhi iksîr-i âteş-mizâc
Gehî âb-ı selc ile eyler ilâc
- 2726 Şerâyîn ü emâda olsa ilel
Verir başa sađlık tılâ-yı asel
- 2727 İlâcından eylerse perhîz eđer
Bulur haste derd-i derûna zafer
- 2728 O enbâz-ı tâûn o sayyâd-ı cân
Kefen-dûza olmuş şerîk-i inân
- 2729 Verir ücretin vâris-i “men helek”
Mahalle imâmı ile müşterek
- 2730 O kalpak ki bir lâne-i mûş idi
Hum-ı cîfeye sanki ser-puş idi
- 2731 Cihân-pehlevânân-ı seblet-dırâz
Bürûtundan eyler görüp ihtirâz
- 2732 Mukayyîye hâcet degil çehresi
Gören hastenin çâk olur zehresi
- 2733 Tahalyun girîbânının pâresi
Tayansun ana hastenin yâresi
- 2734 O sıkletle çökdü gelip mindere
Marîzi batırdı hemân kan dere
- 2735 Görüp anı illet firâz eyledi
Savuşdu diyü iftihâr eyledi

- 2736 Biz etdik ne hâl ise def-i telâş
Zen-i âşık oldu esîr-i firâş
- 2737 Olup haste çeşmi gibi âkıbet
Dehânı gibi yok idi tesliyet
- 2738 Niçe dâğ açıp üstüne yârenin
Diğer-gûn idi hâli bî-çârenin
- 2739 Miyânı gibi cismi olmuş nizâr
Dahi akli zülfü gibi târ-mâr
- 2740 İşitdikçe hâlin men ü nev-civân
Yine aldı verdi enîn ü figân
- 2741 Felek ol zeni küşt-gîr eyledi
İki merdi birden esîr eyledi
- 2742 Gelip âkıbet korkdugum başıma
Denizler acırdı bakıp yaşıma
- 2743 Düşüp âteş-i ıztırâba yine
Vedâ eyledik hord u h'âba yine
- 2744 Gehî sûz-ı şefkat gehî nâr-ı aşk
Siyâvûş'a döndük iki yâr-ı aşk
- 2745 Nasîhat ederdim gehî ben ana
Tesellî verirdi gehî ol bana
- 2746 Degil çünkü mümkün husûl-i merâm
Tesellî vü nush oldu âhir tamâm
- 2747 Bulup bîh-i gam dilde neşv ü nemâ
Fidân kâmeti oldu nahl-i belâ
- 2748 Şikest eyledi şîşe-i ahdi yâr
Döküldü mey-i dîde-i eşk-bâr
- 2749 Alıp refte refte şerâr-ı derûn
Dil-i her şerâr oldu külhan-nümûn
- 2750 Tutuşdu o âteş ile dâmenim
Şerer hırmeni oldu pîrâmenim
- 2751 Başımda olan derdi tayîb güç
Husûl-i merâm ile tatyîb güç
- 2752 Yazıp şâh-ı aşka gönül arz-ı hâl
Bu şî'ri okurdu lisân-ı makâl

Tahmîs-i mısra-ı meşhûr

I

Mâni-i vuslat olup gonçeme ben hâr oldum
Yâr iken bunca zamân dâhil-i ağıyâr oldum
O sitem-kârıma ben hayf sitem-kâr oldum
Cânıma şu çıkası cânım ile bâr oldum
Sabrı güç çâresi güç derde giriftâr oldum

II

Cân u dilden ne kadar ister isem râhatını
 Fûrkat etdi bana baht-ı siyehim vuslatını
 Gerçi bildirdi felek âşıkının kıymetini
 Neyleyim gönlüme çekdirdi yine mihnetini
 Sabrı güç çâresi güç derde giriftâr oldum

III

Beni baht-ı siyehim kâfire etdi muhtâc
 Oldu kandîl-i dilim deyr-i nasârâya sirâc
 Dest-i gam şevkim alıp kıldı derûnum târâc
 Dil-i bîmârıma âlemde benim var mı ilâc
 Sabrı güç çâresi güç derde giriftâr oldum

IV

Destine etmiş idim bu dil-i zârı teslîm
 Âşıkâ işte budur eyleme varı teslîm
 Edemem göz göre ben ellere yârı teslîm
 Görmeden eyleyeyim rûhumu bârî teslîm
 Sabrı güç çâresi güç derde giriftâr oldum

V

Hokka-i çerhde bu yâreye yokdur merhem
 Gördük anı dahi kâr eylemiyor âşıkâ sem
 Gelmiyor hâtır-ı mecrûhuma bir diğeri em
 Kurtulurdum bu gam-ı yâr ile bârî ölsem
 Sabrı güç çâresi güç derde giriftâr oldum

VI

Çekeyim neyse şerîk eyle beni mihnetine
 Yanmayam tâ ki senin nâr-ı gam-ı fûrkatine
 Gerçi kurbân olayım ol zen için gayretine
 Ne olur âh biraz da acısan İzzet'ine
 Sabrı güç çâresi güç derde giriftâr oldum

- 2753 Görüp arz-ı hâlim şeh-i hışmnâk
 Gazabla hemân eylemiş çâk çâk
- 2754 Demiş cân ile minnet olmaz bana
 Belâ-keşlige eylesin itinâ
- 2755 Gelip husrev-i aşkdan bu peyâm
 Hatâmı bilip eyledim sabr-ı tâm
- 2756 Metânet ederdi bu merd-i gayûr
 Turur mu diğeri âşık-ı nâ-sabûr
- 2757 O rencûr-ı aşka gelip derd-i ser
 Verirdi gehî hastesinden haber
- 2758 İki kan çanağı idi gözleri
 Yakardı beni âteşin sözleri
- 2759 Salardı haber gâhîce ana yâr
 Miyâncı idi arada âh u zâr
- 2760 Gehî bana eyler idi arz-ı hâl

- Gelip yanıma haste vü bî-mecâl
- 2761 Koyup taşa başın olur nâle-zen
Terahhum ederdi gören merd ü zen
- 2762 Bulup âteşi gün-be-gün izdiyâd
Çenâr oldu ol serv-i tûbî-nihâd
- 2763 Olup kâmeti nev-cüvânlıkda ham
Bahârın hazâna erişdirdi gam
- 2764 İşit kim belâdan belâ söylerim
İki başlı bir ejdehâ söylerim
- 2765 O şûhun görüp hâlini çeşm-i zâr
Gönül olmak isterdi deryâ-nisâr
- 2766 Belâ bunda kim etsem âh u enîn
Olurdu refikim helâke karîn
- 2767 Ederdi bir âh eylesem bin figân
Eğer ağlasam bahr olurdu revân
- 2768 Revân olsa nakd-i dil-i giryenâk
Hemân kordu ser-mâye-i iştirâk
- 2769 Bunu görmesin çeşm-i mahlûk kim
Bilinmezdi âşıkla maşûk kim
- 2770 O benden ben andan beter derdnâk
Girîbân u dâmânlar çâk çâk
- 2771 Eğer olsa mümkün anın vuslatı
Olur gönlümün mûcib-i fûrkatı
- 2772 Bu deşt-i gama kimseler düşmedi
Bu murg-ı belâ Kays'a da üşmedi
- 2773 Felek atdı kim bana bir seng-i gam
Degil rîzesi Bî-sütûn-ı elem
- 2774 Anın vuslatı bana fûrkat idi
Benim fûrkatim ana vuslat idi
- 2775 Hikâyât-ı Leylî vü Mecnûn degil
Bu gam bildigin şi'r-i mevzûn degil
- 2776 Rivâyât-ı Azrâ vü Vâmık degil
Birisî bu derde muvâfik degil
- 2777 Yeni açdı bu teng-i derdi kazâ
Kumâş-ı diğlerle degil hem-bahâ
- 2778 Yeni verdi bu mîveyi nahl-i gam
Dahi tatmadan bâğbân-ı elem
- 2779 Yeni biçdi bu câme-i mihneti
Felek bana giydirdi ol hilati

**Şevher-i fakîrû'l-hâlin nevâle-i sıhhatden dûr
ve kâr u kesb ü sanatdan mehcûr olup
zen-i dil-haste ile ser-dâde-i bâlîn-i mihnet oldugudur**

- 2780 Gam-ı fakr ile mezc olup derd-i aşk
Harâb oldu birden zen ü merd-i aşk
- 2781 Katı mess edip anları ihtiyâc
Çocuklar yatarlar idi evde ac
- 2782 Olup şevherin sanati kûzeğەر
Sebû gibi koydu o da hâke ser
- 2783 Ferâmûş edip kesbini kârını
Bitirdi iki günde hep varını
- 2784 Kırıp kûze-i hâtırın rûzgâr
Çanak çömleğin etdi gerd ü gubâr
- 2785 Telef etdi ser-mâyesin renc-i gam
Fakat kaldı hum nâmına bir şikem
- 2786 Sebûveş koyup böğrüne destini
Sunardı dil-i zâr-ı işkestini
- 2787 Gam-ı meresi oldu heyzüm-keşi
Ocağın tutuşdurdu aşk âteşi
- 2788 Bükünce bu fakr u felâket belin
Siyeh-kâse-i çerha tutdu elin
- 2789 Yiyip içdiği ıztırâbı idi
Gözü yaşı bağı kebâbı idi
- 2790 Zeniyle koyup başını bir yere
Devâ fikr ederdi bu derd-i sere
- 2791 Düşündükçe ol iki dil-hasteyi
Tüketdik yine nesteyi besteyi

**Zen-i bî-çârenin hark-ı cilbâb-ı nâmûs ile
şevherinden çâre-cûy-ı muvâsalat-ı cânân oldugudur**

- 2792 Demiş zen ki ey şevher-i mihrbân
Bitirdi beni hasret-i nev-civân
- 2793 Tüketdik senin ile hem-serligi
Bugün eyle icrâ bana erligi
- 2794 Getir kim görüp bir nefes yârımı
Alıp gideyim bu dil-i zârımı
- 2795 Yetişsin bana bu dem-i vâ-pesîn
Meded kalmasın haşre âh u enîn
- 2796 Gülünden alıp şemme-i vâhide
Benim kalmadı kudretim zâide

- 2797 Bu derdli başı koysa zânûsuna
Nasîb olsa cân tîg-i ebrûsuna
- 2798 Görüp gamzesin ağlasam bir zamân
Ana eylesem bâri teslîm-i cân
- 2799 Verip bir içim su zülâl-i lebi
Bıraksam bu âlemde tâb u tebi
- 2800 Getir bana bir lahza cânânımı
Geleydi Hudâ almadan cânımı
- 2801 Nasîbi olup düşmedim payına
Nisâr eyleyem cânımı pâyına
- 2802 Koyup hançer-i gamzesin koynuma
Kemend eyleyem perçemin boynuma
- 2803 Bana gösterin yârımı bir nefes
Olam kârbân-ı bekâyâ ceres
- 2804 Emânet verip bu dil-i zârımı
Verip cânımı terk edem varımı
- 2805 Hazân bulmadan nergis-i gülşenim
Görünsün gelip bana şûh-ı şenim
- 2806 Bu hâletle görsün getir ol gülü
Anınçin perişân olan sünbülü
- 2807 Görüp çâk çâk-i leb-i âlimi
Düşündükce âh eylesin hâlimi
- 2808 Görüp kâmetim sâyeveş pây-mâl
Ede hakk-ı rûz-ı kıyâmı helâl
- 2809 Yasılmış görüp yâ gibi kaşımı
Benim diksin ol pehlevân taşımı
- 2810 Kosun bir nefes sîneme destini
Görem ölmeden dîde-i mestini
- 2811 Selâm eyle bu hastenin yârına
Çıkar sanmasın âşıkın yarına
- 2812 Yetişsin dem-i vâ-peşnim gibi
Beni etmesin terk dînim gibi
- 2813 Gelir gün ki çevre peşimân olur
Bu ahvâle yıllarca nâlân olur
- 2814 Gelir gün ki aklın alıp başına
Urur başını kabrimin taşına
- 2815 Haber ver haber bu dil-i zârdan
Kolay mı bu ayrılmadır yârdan

- 2816 Degil rencişim cânımın acısı
Helâk etdi cânânımın acısı
- 2817 Degil maksadım leblerinden devâ
İki katre nîrâna olmaz şifâ
- 2818 Derim kim gelip yâdına fûrkatım
Anı yakmasın âteş-i hasretim
- 2819 Ne olduysa oldu bu bî-çâreye
Şerîk etmeyem anı bu yareye
- 2820 Kavuşdursun anı bana Yaradan
Çıka cân gibi fûrkati aradan
- 2821 Varıp eyle cânânıma keşf-i hâl
Sana âhîret hakkın etmem helâl
- 2822 Bu ahvâli gûş eyleyip şevheri
Tutuşmuş ocağı gibi her yeri

**Kûzeğ̃er-i şikeste-serin sebû-yı ârı zemîn-i
niyâza urup rîzende-i âb-ı rû ve pâ-der-gil-i
ıztırâb olarak zen-i tefsîde-deheniyçin zülâl-i
muvâsalat-ı rakîbinden katre-cû olduğudur**

- 2823 Bu hâle olup şevheri tercümân
Gelip eyledi bana bir bir beyân
- 2824 Getirdi bu peygâmı ol hasteden
Rûfû istedi kalb-i işkestden
- 2825 İki nehr idi bâğ-ı derde gözü
Tüketmiş benim gibi ol da sözü
- 2826 Gelip pâyıma düşdü bî-akl u hûş
Diğ̃er ibtilâya gönül oldu dûş
- 2827 Dedi ey efendi-i derd-âşinâ
Bana eyle tedbîr edip bir devâ
- 2828 Kabul eylemez gerçi merhem bu zahm
Bana eyle Allâh için lutf u rahm
- 2829 Muhammed Ağa'yı katın yanıma
Ne hâl ise taş basayım cânıma
- 2830 Rakîbim elimle alıp gideyim
O dil-hasteye tesliyet edeyim
- 2831 Hayâl eyle bu baht-ı menhûsumu
Kodu ortaya âr u nâmûsumu
- 2832 Onulmaz bu rütbe gamın yaresi
Bu derdin hemân ölmedir çâresi
- 2833 İki defa menzûl edip renc-i gam

- Yine etmedi yarama mergi em
- 2834 Felek eyledi âşiyânım harâb
Bu murg-ı teni kâş edeydi kebâb
- 2835 Gören ser-nüviştım acır hâlime
Rezîl oldum akrân u emsâlime
- 2836 Yanında zenin hürmetim kalmadı
O günden beri hâneye almadı
- 2837 Düşüp el ayak âhir oldum alîl
Kalıp künc-i vîrânelerde sefil
- 2838 Bana lutf u ihsân edip çâre bul
Ya bir defaten öldürür yare bul
- 2839 Bana acımazsan acı ol zene
Bir avuç su ver şu yanan külhana
- 2840 Bitirdim bu endûh ile varımı
Elimle helâk etmeyem karımı
- 2841 O zehr içdi âhir ben oldum helâk
O çâk oldu ammâ gönül çâk çâk
- 2842 Ben içmiş olaydım o dârûyu kâş
Bulurdum şifâ sırrım olmazdı fâş
- 2843 Şifâsı o dil-hastenin sendedir
Gülü ol hezârın bu gülşendedir
- 2844 Uyandır o pervânenin şemini
Söyündürme gam-hânemin şemini
- 2845 Degil başka yerde o derde ilâc
Eğer varsa vardır bu derde ilâc
- 2846 Bana lutf o rencûra kıl merhamet
Dirîg eyleme dârû-yı tesliyet
- 2847 Döküp hâk-i pâ-yı niyâza sirişk
Arardı o rencûr-ı aşka bicişk

**Bu derd-i nâ-geh-zuhûra hokka-i imkânda devâ ve
bizim elimizde dârû-yı şifâ olmadığın beyân ve
hasbina'llâhi ve nime'l-vekîl
manâsını âverde-i zebân etdigimizdir**

- 2848 Dedim ey garîk-i yem-i ıztırâb
Harâbım beni etme bir kat harâb
- 2849 Ekip yarama zehri bir kat dahi
Beni âteşe yakma ey duzehî
- 2850 Gam-ı aşka bir var mı bulmuş devâ
Ki ben olayım çâre-cûy-ı belâ
- 2851 Tabîb-i gam-ı aşk işitdin mi hiç

- O bî-çâreye kim dedi zehri iç
- 2852 Olur mu devâ aç a bir yare aşk
Bulursa bulur zahmına çâre aşk
- 2853 Tabîb-i maraz aşkdır hâsılı
Hemân olsun ol zen anın vâsılı
- 2854 Şifâsı bu derdin yine aşkdır
Eğer varsa em ol zene aşkdır
- 2855 Anın gibi yüz bin zen olsa helâk
Yanık kalbini kim eder şulenâk
- 2856 Benim kendi derdim yeterken bana
Revâ mı edem cânı tenden cüdâ
- 2857 Elimle atıp yârımı âteşe
Komam kendim ol düzeh-i ser-keşe
- 2858 Telef eylemem yârımı bir zene
Harâb etmem âteş urup gülşene
- 2859 Benim el verir âteşim kendime
Yeter kısmeti kalb-i horsendime
- 2860 Eğer olsa dîger gama kudretim
Sana dahi olmaz idi minnetim
- 2861 Görürdüm anın ibtidâ çâresin
Bu hasretle açmaz idim yarasın
- 2862 Elimle edip nesc târ-ı gamı
Revâ mı biçem câme-i mâtemi
- 2863 Rızâm ile kendim helâk edemem
Yerim zir-i hâk-i megâk edemem
- 2864 Revâ mı edip aklımı târ u mâr
Gezem sonra ben de diyâr u diyâr
- 2865 Bilâ-emr-i âlî firâr eyleyem
Revâ mı bu terk-i diyâr eyleyem
- 2866 Edip devlet ü itibârım şikest
Bana lev m ede sonra bâlâ vü pest
- 2867 Bu kâra müsâid olursa zamân
Yıkar bir karı sonra bir hânedân
- 2868 Elimle telef eyleyem yârımı
Benim kimler egler dil-i zârımı
- 2869 Benimçin degildir rızâ muhtemel
Bilinmez velî kâr-ı hükm-i ezel
- 2870 Bu derdi ana eylerim ben beyân
Meğer kendi meyl ede ol nev-civân

**Âşık-ı maşûk-nümâyâ beyân-ı mâ-vakaa-i hâl
ve dil-haste-i aşkı tarafından h'âh u nâ-h'âh
taleb-i yek-şemme-i visâl etdigimizdir**

- 2871 Gelip ol civân bezm-i derd-i gama
Dedim Hakk'a yâ sâhibe'l-merhame
- 2872 Bilirsin gam-ı hâtır-ı zârımı
Çıkarma elimden benim yârımı
- 2873 Anınçin ne mihnetler etdi güzâr
Neler çekdi bu âşık-ı dil-figâr
- 2874 Benim âteşimle yanarken henûz
Meded yakmasın bu gam-ı sîne-sûz
- 2875 Henûz anı kurtardım ağyârdan
Hat-ı anber-efşân ile hârdan
- 2876 Edip bir alay düşmenândan halâs
Eğer edemezsem Keşan'dan halâs
- 2877 Olur çekdigim derd ü mihnet telef
Degil derd ü mihnet bu İzzet telef
- 2878 Muhâtab edip hâsılı dil-berim
Dedim ey devâ-sâz-ı derd-i serim
- 2879 Ne der dinle bu İzzet-i müstmend
Kıyâs eyleme nutkunu nush u pend
- 2880 Zenin hâlini işte gûş eyledin
Çanaklarla ol zehri nûş eyledin
- 2881 Murâdın ise ol zenin vuslatı
Söyündür varıp âteş-i hasreti
- 2882 Halâs eyle var ol esîr-i gamı
Yetişdi bana kâfirin mâtemi
- 2883 Varıp âteş-i aşka ol âb-zen
Şu oldu bu oldu deme sonradan
- 2884 Rezâletse de ihtiyâr eylerim
Gam-ı aşk ile iftihâr eylerim
- 2885 Ne derse desin bilmeyen bî-hired
Gelir başa hep yazılan nîk ü bed
- 2886 Eğer olsa da dâmenim levsnâk
Garîk-i yem-i aşka dilden çi bâk
- 2887 Hicâb etme benden düşünme beni
Fedâ eylerim ben bu cân u teni
- 2888 Bu âlemde sen ol da tek kâm-yâb
Yıkık gönlüm olsun yeniden harâb

- 2889 Varıp kâm-bahş ol zen-i âşık
Selâm et o Azrâ gibi Vâmık'a
- 2890 Ederse eğer hân-mânım harâb
Yarın rûz-ı mahşerde versin cevâb
- 2891 Ederse seni nâr-ı aşka kebâb
Yaka anı bu sûziş-i ıztırâb
- 2892 Ederse seni târ-ı zülfüyle bend
Ana halka-i âhım olsun kemend
- 2893 Tutarsa seni âh-ı dil-dûzuna
Devâ bulmasın dildeki sûzuna
- 2894 Lebinden olursa eğer bûse-h'âh
Susuz koysun anı cenâb-ı İlâh
- 2895 Atarsa eğer dûşuna kolların
Hudâ bağlasın her taraf yolların
- 2896 Olursa der-âgûşuna h'âstâr
Miyânın gibi cânı olsun nizâr
- 2897 Kanâat edip sâde nezzâreye
Uzakdan urun merhemi yareye
- 2898 Bu sözden senin sıhhatindir garaz
Geçer sana havfım budur ol maraz
- 2899 Yanarsa bu tâb-ı ciğerden ciğer
Kıyâmetde benden alırsın haber
- 2900 Ne mâni sen ol kâm-yâb-ı emel
Girîbânımı birde alsın ecel
- 2901 Bu âteşle sûzân olan ben miyem
Bu nâra fakat ben mi külhan mıyam
- 2902 Ne başlar bu tîgin olup küştesi
Anınla yapıldı felek püştesi
- 2903 Hemân var ol ey nahl-i bâğ-ı vefâ
Benim gibi bin âşık olsun fedâ
- 2904 Budur işte ey nûr-ı çeşmim sözüm
Beni yola bakdırma iki gözüm
- Âşık-ı maşûk-rengin âteş-i hasret-i cânâna
cân-dâde-i tahammül ve gûşe-güzîn-i
beytû'l-hazen-i sabr u tevekkül olup
bir zen için bu merd-i aşkı fedâ ve
şehristân-ı muhabbetde kendini rüsvâ etmedigidir**
- 2905 Bu güftârımı bir bir etdikde gûş
Gehî ağladı gâhî oldu hamûş

- 2906 Olup her ser-i mûyu gûyâ diken
O gül-gonçeyi kıldı gam nesteren
- 2907 Yem-i hayrete düşdü ol derdmend
Ne yapsın iki âteşe bir sipend
- 2908 Yetişsin mi bir gül iki bülbüle
Kopar âkıbet böyle bir gulgule
- 2909 İki tîre karşı ola bir hedef
Birinden biri âhir eyler telef
- 2910 Çekip cân u dilden bir âh-ı hazîn
Dedi Rabb'im olsun bu kâra muîn
- 2911 Nihâyet olur bu dil-i derdnâk
Şu iki belânın birinden helâk
- 2912 Ne mümkün olam bu belâdan halâs
İki başlı bir ejdehâdan halâs
- 2913 Dedi olmasın bârî ırzım şikest
Senin kadrini etmeyem halka pest
- 2914 Elimle edip hâneni münhedim
Revâ mı kala dehre nâm-ı bedim
- 2915 Gulâm-ı vefâkâr idim on sene
Revâ mı değışmek seni bir zene
- 2916 Seninçin ölüm atladım bir zamân
Ser ü cânâ kâsd eyledi düşmenân
- 2917 Seninçin fedâ eyledim niçe mâl
Seni etmedim düşmene pây-mâl
- 2918 Bana zühresin arz ederse felek
Ne mümkün ferâmûş-ı nân u nemek
- 2919 Bu merdânelikden degil mi cüdâ
Edem bir zene merd-i aşkı fedâ
- 2920 Helâk etse dahi bu mihnet beni
Fedâ eylemem havf-ı cândan seni
- 2921 Husûsâ bu mihnetle gurbetdesin
Felek küskünüsün felâketdesin
- 2922 Tahammül edip dûzeh-i fûrkate
Seni yakmazam külhan-ı hasrete
- 2923 Edip hod-be-hod minneti cânıma
Geçer ya sözüm bir avuç kanıma
- 2924 Bu gam bahrini var mı etmiş güzer
Kedû olsa yanında şems ü kamer
- 2925 Nihâyet olursa vücûdum telef

- Beni Kays ile yâd eder yâ halef
- 2926 Eder mi belâ-keş ölümden hirâs
Bilir zevk-i mergi mahabbet-şinâs
- 2927 Reh-i yâra îsâr olunmazsa cân
Ölümden beterdir hayât-ı cihân
- 2928 Hüner cânı cânâna sarf etmedir
Yerine gam u derd alıp gitmedir
- 2929 Belâ bunda kim geçmiyor nakd-i cân
Helâk oldu mu gör zen-i nâ-tüvân
- 2930 Budur gam olursam esîr-i firâş
Seni eylerim gark-ı bahr-i telâş
- 2931 Zenin derdine olayım ben şifâ
Sana künc-i gamda kim eyler devâ
- 2932 Karışdırma kim bu yanan külhanı
Yakar hem zeni hem seni hem beni
- 2933 Devâsı zen-i hastenin mergdir
Bana çâre ol âfeti terkdir
- 2934 Degildir vefâsızlığımdan nişân
Bana seng-i ta'n atamaz âşıkân
- 2935 Hemân bana cân vermek ile o zen
Ferâmûş olunsun mu derd-i kühen
- 2936 Fedâ eylemem müyun ey merd-i aşk
Mübârek ola ol zene derd-i aşk

**Kûzeğeri şikeste-bâl bu cevâb-ı şâfi ile
haste-hâl olup zen-i bîmârına bâde-i yesini işrâb ve ez-ser-i
nev medhûş-ı peymâne-i ıztırâb etdigidir**

- 2937 Aceb serd düşdü bu şâfi cevâb
Bana verdi teb-lerze-i ıztırâb
- 2938 Gelip cûşa bahr-i keder çağladı
O şûh ağladı kûzeğeri ağladı
- 2939 Bu mâtemle kan ağladı dîdeler
Ne kan belki cân ağladı dîdeler
- 2940 Bu âteşle cânlar müzâb oldular
Akıp bezm-i gamda şarâb oldular
- 2941 Bu derd-i gamı kâseler almadı
Buna âh u zâr etmedik kalmadı
- 2942 Tolup derd ile hum gibi kûzeğeri
Yuvarlandı meydâna bî-pâ vü ser
- 2943 Dedi bu peyâmı götürmek zene
Alev tuhfe etmek olur külhana

- 2944 O bî-çâre benden taleb kıldı âb
Revâ mı verem sûziş ü iltihâb
- 2945 Revân eyledi eşkini cû gibi
Yöneldi sebûger yola su gibi
- 2946 Bu kara haber ana etmiş eser
Perîşân olup hastesinden beter
- 2947 Düşüp yolda kalmış zamân-ı medîd
Görenler kıyâs eylemişler kadîd
- 2948 Edip etlerin pâre pâre kilâb
Kavurmuş anı âteş-i ıztırâb
- 2949 Bu hâl ile azm eyleyip hâneye
Duhûl eylemiş zâğveş lâneye
- 2950 Görüp anı rencûr-ı dâü'l-udâl
Demiş var mı yanında âb-ı zülâl
- 2951 Eli boş mu geldin bu dil-besteye
Esîr-i gam-ı yâr olan hasteye
- 2952 Getirdinse cânânım al cânımı
Suâl etmesin Hak sana kanımı
- 2953 Benim çeşmim ile görüp rûyunu
Getirdin mi gül-gonçemin bûyunu
- 2954 Dehânından aldın mı var yok kelâm
Getirdin mi lal-i lebinden peyâm
- 2955 Bu dil-hastesinden suâl etdi mi
Sana rahm edip hasb-i hâl etdi mi
- 2956 Biraz yokladın mı o lal-i teri
Bu derde ne sađlık verir lebleri
- 2957 Edeydin leb-i hançerinden suâl
Ne dem cân verir bu dil-i bî-mecâl
- 2958 Tabîbim suâl etdi mi hastesin
Bu bî-çâre yâr-ı dil-işkestesin
- 2959 Demiş şevheri ey zen-i derdmend
Der-i vaslı etmiş felek sana bend
- 2960 Bu derde ümîd-i devâ eyleme
Abes cânâ kâsd-ı cefâ eyleme
- 2961 Niyâz et ki Hakk'a ala cânını
Vere merg ile derde dermânını
- 2962 Elinde degil yârının ihtiyâr
Esîr eylemiş anı da başka yâr

- 2963 Bu bir karışık dolaşık derd imiş
Dem ü rîm ile bulaşık derd imiş
- 2964 Şifâsında dermânde dermânlar
Bu derd ile dil-haste Lokmânlar
- 2965 Felâtunların bildigi şey degil
Hum-ı akl u fikre sığar mey degil
- 2966 Senin gonçenin var diğer bülbülü
Senin nârına yakmıyor ol gülü
- 2967 O şemin dedi eski pervânesi
Benim ana âşık bu zen yâ nesi
- 2968 Fedâ etmiyor âşıkın ol civân
Senin gibi bin zen dahi verse cân
- 2969 O Şîrîn'e Husrev olan mübtelâ
Edip niçe Ferhâd'ı cândan cüdâ
- 2970 Yemekde gam-ı aşkı yek başına
Şerik etmiyor kimseyi aşına
- 2971 Eđerçi degiller sana acımaz
Bu rütbe gama var mı yâ acımaz
- 2972 Sana âşıkın varsa da şefkati
Mahabbet kabûl etmiyor şirketi
- 2973 Eđer olsa derler kelin merhemi
Sürer kendinin başına ol emi
- 2974 Bu kâra tahammül o cânlarda yok
Senin derdine çâre anlarda yok
- 2975 Tel-i zülfünü eyle târ-ı kefen
Kolayın ara ölmenin şimdiden
- 2976 Edip şevherinden bu peygâmı gûş
Zenin derdi deryâveş etmiş hurûş
- Leylâ-yı Mecnûn-ibtilânın bu peyâm-ı fûrkat-encâmı
desîse-i şevherine haml edip o bed-bahtı duhterleriyle
tesmîme mübaşeret ve gül-dâmen-i muvâsalatı
alâ-zumihâ hâr-ı ağıyârdan tathîre mübâderet etdigidir**
- 2977 Bu manâyı tezvîre haml eylemiş
Yine sem-fürûşu varıp peylemiş
- 2978 Sanıp şevherin mâni-i izdivâc
Anın defîne aramış bir ilâc
- 2979 İki gonçesi var idi ol gülün
Velî çeşmine hâr idi ol gülün
- 2980 Dikip çeşmini anların defîne
Sebeb zann edip yârının menine
- 2981 Komuş kûze-i âba bir pâre sem

- Sanırmış anı yâre-i aşka em
- 2982 Şifâdır diyip derd-i aşka şereng
O üç câna kasd eylemiş bî-direng
- 2983 Ne murdâr şeydir gam-ı aşk-ı pâk
Görün etdirir nûr-ı çeşmin helâk
- 2984 Görün şâh-ı aşkın bu bî-dâdını
Fedâ etdirir halka evlâdını
- 2985 O hâkâna kim eylese intisâb
Eliyle eder hân-mânın harâb
- 2986 Hemîşe Hudâ'dan niyâzım benim
O bahr-i gama düşmesin düşmenim
- 2987 Bu mâtem için karalar bağlarım
Müselmân degil kâfire ağlarım
- 2988 Bu kâfir degil mi benim düşmenim
Görün yandı aşkıyla cân u tenim
- 2989 Edip sînede sûzişim iltihâb
Bu âteş ile aşka etdim hitâb
- Hazret-i aşka ba'z-ı hitâbâtımızdır**
- 2990 Nedir derdin ey aşk-ı tâkat-güdâz
Tükenmez mi sende bu nâz u niyâz
- 2991 Nedir derdin ey aşk-ı deryâ-fürûz
Tükenmez mi sende bu serdî vü sûz
- 2992 Nedir kasdın ey husrev-i bî-amân
Yıkılsın mı dersin sarây-ı cihân
- 2993 Harâb etmedik âşiyân koymadın
Kebâb etmedik murg-ı cân koymadın
- 2994 Ne şehler esîr eyledin toymadın
Ne begler fakîr eyledin toymadın
- 2995 Yıkıp bunca halkın imârâtını
Düzeltdin mi dehrin harâbâtını
- 2996 Ne girdi aceb dest-i bî-dâdına
Getirmez misin mahşeri yâdına
- 2997 Sorulmaz mı senden bu vîrâneler
A zâlim yakıp yıkdığın hâneler
- 2998 Musallat edip böyle bin kâfiri
Telef eyledin bir niçe mâhiri
- 2999 Asâyı bu gurbetde dikdin bana
Sana rahm u insâf versin Hudâ

- 3000 Benim eski derdim yeterken bana
Ne olsun a zâlim bu tâze belâ
- 3001 Yetip artıyor yârimin mihneti
Ne hâcet bana dîgerin sıkleti
- 3002 İki derde bir serde yer var mıdır
Bu endûha tavk-ı beşer var mıdır
- 3003 Bu günlerde gerdûna enbâz olup
Sen andan ziyâde dağal-bâz olup
- 3004 Salıp bûk-ı efsûn ile demdeme
Çıkardın dîger bir oyun âleme
- 3005 Olup kura-endâz-ı şekl-i garîb
Zuhûr etdi âhir bu tarz-ı acîb
- 3006 Getirme bunu kimsenin başına
Bağışla benim çeşmimin yaşına
- 3007 Ben oldum bu derd-i neve mübtelâ
Dîger kimseyi ana görme revâ
- 3008 Benim yandı cânım dîger yanmasın
Bu hûn-ı dile düşmenim kanmasın
- 3009 Sana cevri talîm edelden felek
Bırakdın bu günlerde insâfî pek
- 3010 Sana cân u îmânın etdi fedâ
Zenin vermedin derdine bir devâ
- 3011 Felekdir bu cevri sana öğreden
Degil sendeki eski derd ü mihen
- 3012 Murâdım cefâdan şikâyet degil
Edip terk-i gam istirâhat degil
- 3013 Benim medhalim var mı bu yarada
Benim cürmüm âyâ nedir arada
- 3014 Suâlim cenâbından ancak budur
Mezâlim bu rütbe olur hak budur
- 3015 Tenim oldu vîrân düşüp dest ü pây
Bana âhir etdin harâbâtı cây
- 3016 Suçum var mı düşsem süciye müdâm
O yemde şinâh eylesem subh u şâm
- 3017 Kıyâs etme kim gayrı bir şeyledir
Humâr-ı gamın çâresi meyledir
- 3018 Düşüp pâyına sâkî-i hoş-demin
Nola arasam çâresin bu gamın
- 3019 Gamından şikâyet degildir revâ
Meğer eyleyem sâkiye iştikâ

Hitâb-ı sâkî

- 3020 Getir sâkiyâ bâde-i lâle-reng
Gül-i zahmım etdi gûşâde şereng
- 3021 Hum-ı derdini etsin işkest aşk
Ne var ise döksün bu ser-mest-i aşk
- 3022 Getir sâkiyâ bâde-i köhnedden
Gam-ı tâzedden olayım nare-zen
- 3023 İşitdin mi sâkî bu derd-i gamı
Ki sensin belâ ehlinin hem-demi
- 3024 Bana aşkın etdiklerin gûş kıl
Benimle bu zehr-i gamı nûş kıl
- 3025 Getir sâkiyâ bâde-i Dergam'ı
Kim işit bekâyâ-yı derd ü gamı

Kudûm-ı îd-i udhiyye

- 3026 Ez-ân cümle kim îd-i adhâ gelip
O eyyâmı tebrîke dünyâ gelip
- 3027 Gam-ı aşka kurbân idim ben fakîr
Gelenden gidenden degildim habîr
- 3028 Görüp kebşimin hûn-ı âlin revân
Sanırdım ki çeşmimden akdı o kan
- 3029 Elinde görüp herkesin bir ciğer
Olurdu derûnum cerâhat-eser
- 3030 Dimâğa gelip gâhi bûy-ı kebâb
Verirdi yanık gönlüme ıztırâb
- 3031 Yanıp tâbe-i gamda cân u ciğer
Dil-i zârıma yok idi su seper
- 3032 O îdin ki gönlün ola bismili
Degil mi bu müşkillerin müşkili
- 3033 Degil kaydı katâ dil-i zârımın
Fedâ olsa koç başına yârımın
- 3034 Belâ bunda kim nîm-bismil kalıp
İki yana hasret nigâhın salıp
- 3035 Nasîb olmadı tîg-i dildâra hayf
Ne öldü ne kurtuldu bî-çare hayf
- 3036 Belîg'in gelip matlaı yâdıma
Redîf eyledim anı feryâdıma
- 3037 Çeşm-i alîli hasret ile pür-nem eyledim
El îd-i ekber eyledi ben mâtem eyledim
- 3038 İşitdin mi sâkî benim hâlîmi

Ne hâle kodu gör felek zâlimi

- 3039 Getir sâkiyâ bâde-i bî-gaşı
İşit nâlemi “bi'l-gıdâ ve'l-aşî”
3040 Reh-i gamda ol kim bana dest-gîr
Seni eyleyem hâl-i zenden habîr
3041 İşit heyzüm-i kîlk-i sûzândan
Bakiyye ne kaldı o nîrândan

**Azrâ-yı Vâmık-izârın ciğer-pârelerini tesmîme cüreti
berehmenân milleti indinde mûcib-i töhmeti olup
o âşık-ı cihân-efrûzu ihtilât-ı nâsdan
men ile aforoz etdikleridir**

- 3042 Şerengi görüp kûzede şevheri
Kaçırılmış hemân ol iki duhteri
3043 Berehmenlere iştikâ eylemiş
Dahi bir niçe iftirâ eylemiş
3044 Haberdâr-ı aşk olmayan milleti
O bed-bahta azv eylemiş töhmeti
3045 Ne bilsin berehmen nedir derd-i aşk
Bilir anı merdân-ı rû-zerd-i aşk
3046 Elinde olaydı zenin ihtiyâr
Gül-i bûstânın sanır mıydı hâr
3047 Bu fetvâyı ger vermese aşk-ı pâk
Eder mi kişi nûr-ı çeşmin helâk
3048 Eden dînini arza-i aşk-ı yâr
Bütün kırsa dünyâyı eyler mi âr
3049 Felâtûnlara salmasın pençe aşk
Alıp akl u fikrin verir rence aşk
3050 Ne yapsın bu derde zen-i bî-hired
Aristo ararken bu gamdan meded
3051 Asâkîf olup vâkıf-ı hâl-i zen
Hurûc etme kâsd etdigin dînden
3052 Tutuşmuş o âteşle dâmenleri
Yeni kâfir olmuş berehmenleri
3053 Edip vaka-i semmi der-pîş-i kâr
O bî-çâreden etdiler ahz-ı sâr
3054 Ne bilsin safâda olan mihneti
Yananlar bilir âteş-i mihneti
3055 Ana dînlerince edip aforoz
O Leylî-cemâle leyâl oldu rûz
3056 Harâm etdiler sihr ile uykuyu
Gözü oldu Hârût-ı derde kuyu

- 3057 Edip nâs âmed-şudun munkatı
Cefâ etdiler ana lâ-yenkatı
- 3058 Olup menzil-i gamda tenhâ-nişîn
Refîki idi ancak âh u enîn
- 3059 Ana vermeyip hâinân âb u nân
Yer içerdî laht-ı ciğer ile kan
- 3060 Urup üstüne kufl-i gam-hânesin
Yeniden harâb etdiler lânesin
- 3061 Suâl eyledim hâtır-ı zârını
Dilerdim dahi yollamak yârını
- 3062 Giden âdemim geldi âh eyledi
Teşekkî-i baht-ı siyâh eyledi
- 3063 Dedi vakti geçmiş o bî-çarenin
Îlâcî mürûr etmiş ol yârenin
- 3064 Kulağı asam çeşmi olmuş darîr
Gelenden gidenden degilmiş habîr
- 3065 İş işden geçip hâli olmuş tebâh
Fakat var imiş lebde yârâ-yı âh

**Hasret-keş-i dârû-yı merg olan haste-i nâ-tüvânı
igfâl ve İnoz kasabasında mâder-i mihrbânına
irsâl etdikleridir**

- 3066 Tuyup iltifât etdigim milleti
Güşâd etdiler hâne-i mihneti
- 3067 Koyup anı gerdûne-i fûrkate
Revân eylediler reh-i hasrete
- 3068 İnoz'da zenin var imiş mâderi
Götürdü anın yanına şevheri
- 3069 Görüp duhterin mâder-i mihrbân
Yıkılmış hemân başına âsumân
- 3070 Suâl eylemiş bâis-i yaresin
Görüp pâre pâre ciğer-pâresin
- 3071 Demiş noldu ey ömrümün hâsılı
Kimin hastesinin kimin mâili
- 3072 Gam-ı aşka benzer be-her-hâl bu
Kabûl etmemiş bak ne em ne rûfû
- 3073 Seni kangı zâlim esîr eyledi
Ne müjgânlar âmâc-ı tîr eyledi
- 3074 Kimin hastesidir bu nergislerin
Neden oldu tefsîde lal-i terin

- 3075 Neden soldu böyle ruhun gülleri
Kim etdi perîşân bu sünbülleri
- 3076 Aceb kangı gamze girip kanına
Ne hûnî idi kasd eden cânına
- 3077 Kim etdi bu gül-penbe cismin siyâh
Senin hâlini görse etmez mi âh
- 3078 Kimin mübtelâsısın ey nâzenîn
Kimin yâdigârı bu âh u enîn
- 3079 Benim gonçemi kim harâb eyledi
Yakıp bağrımı kim kebâb eyledi
- 3080 Bu efsûn ne câdûnun efsûnudur
Gözün kangı sayyâdın urgunudur
- 3081 Sana sayd iken âhuvân-ı cihân
Nedir nâf-ı âhû-yı çeşminde kan
- 3082 Füsûnunla teshîr ederken perî
Kimin dâm-ı zülfüne koydun seri
- 3083 Ne Rüstem'dir ol merd-i Zâl-iştihâr
Senin gibi câdûyu etmiş şikâr
- 3084 Salıp pençe vâz geçmiş ol nerre-şîr
Tutup yavrumu bârî etse esîr
- 3085 Saçından tutup kul edeydi seni
Bu mihnetden âzâd ederdi beni

**Duhter-i bed-ahterin sad hezâr âh ve bâng-i vâ emetâh ile
ser-güzeştin beyân ve mâder-i şefkat-perverinden
taleb-i azîmet-i Keşan etdigidir**

- 3086 Edip mâderi arz-ı sûz u güdâz
Terahhum görüp eylemiş keşf-i râz
- 3087 Demiş sorma ahvâlîm ey mâderim
Seni yakmasın sûz-ı derd-i serim
- 3088 Yatıp mâderin pîş-i zânûsuna
Komuş destini taraf-ı ebrûsuna
- 3089 Tutup anası ağrıyan başını
Revân eylemiş çeşminin yaşını
- 3090 Demiş işte seyr eyledin hâlîmi
Kıyâs eyle var sâir ahvâlîmi
- 3091 Eğer eylesem mâ-cerâyı beyân
Eder zehreni kan yerine revân
- 3092 Tesellî verem sanma bu yareye

- Uzak halk olunmuş bu gam çâreye
- 3093 Eđerçi şifâdır ilâc-ı acûz
Degil bildigin derde benzer bu sûz
- 3094 Degil başka şey bu gam-ı yâdır
Felâtunların aczi der-kâdır
- 3095 Husûsâ ki bu ser-nüvişt-i cedîd
Görölmüş degildir zamân-ı medîd
- 3096 Degil başa gelmiş belâlar gibi
Selefde geçen ibtilâlar gibi
- 3097 Bana var ise rahmın ey mihrbân
Olursun benimle Keşan'a revân
- 3098 Keşan ârzûsu dil ü câdadır
Bu derde devâ var ise andadır
- 3099 Eđer kıta-i cennet olsa İnoz
Söyünmez anın kevseriyle bu sûz
- 3100 Eđer olsa her nahli tûbâ-misâl
Çıkar mı derûnumdan ol nev-nihâl
- 3101 Yetişdir bu dil-mürdeyi yârına
Bu günden tezi yok koma yarına
- 3102 Kabûl eylemezse dahi ol civân
Keşan'da edem bârî teslîm-i cân
- 3103 Gidip aradan iftirâk-ı diyâr
Olam basdığı yerlere hâksâr
- 3104 Keşan hâkine çehre-sâ olayım
Varıp anda cândan cüdâ olayım

Zen-i nâle-zen âteş-i tebâüd-i yâr u diyâr ile bir kat dahi târ u mâr olup mâderiyle İnoz'dan avd u kufûl ve civârımızda bir hâneye hufyeten duhûl etdikleridir

- 3105 Edip mâderi sözlerin istimâ
Lehîb-i dili eylemiş iltimâ
- 3106 Koyup anı gerdûneye nîm-cân
Getirmiş Keşan'a keşân-ber-keşân
- 3107 Civârımda bir ev tutup şevheri
Komuş penbe-i câna ol ahkeri
- 3108 Tutunca o menzilde karı karâr
Hemân eylemiş koca kâfir firâr
- 3109 Çocuklar kalıp evde muhtâc u ac
Ö derde bulaşdık yine lâ-ilâc

- 3110 Kuruldu dil ü câna bâzâr-ı aşk
Ziyân verdi sevdâmıza kâr-ı aşk
- 3111 Alışdı yine âteş-i âh u zâr
Bizim gülsitânda tutuşdu çenâr
- 3112 Zen etdikce âğâz-ı âh u enîn
Değişirdi tavrı bizim nâzenîn
- 3113 Olup çeşmi bârân-nisâr-ı elem
Yine tâzelendi bahâr-ı elem
- 3114 Çocuklar eder bir taraftan figân
Enîn etmede âşık-ı nâ-tüvân
- 3115 Birâz iftirâk eylemişdi hamûş
Yine eyledi bahr-i sevdâ hurûş
- 3116 Boşandı figâna dil-i nâ-sabûr
Yine geceler terk olundu huzûr
- 3117 Zimâmın bıraktırdı feryâd-ı yâr
Degildi benim tevsen-i ihtiyâr
- 3118 Tesellî verirdim gehî yârıma
Gehî yârıma geh dil-i zârıma
- 3119 O vâdîleri etdi mihnet güzer
Boyumdan aşıp geldi mevc-i keder
- 3120 O rütbe karâr etdi kim ıztırâb
Tesellî dahi etdi bizden hicâb
- 3121 Lebiden yanıp âh-ı âlem-fürûz
Dahi görmedim der idi böyle sûz
- 3122 Usanmışdı bizden enîn ü figân
Kaçardı görüp âh-ı âteş-feşân
- 3123 Eritdi dil ü cânı sûz u güdâz
Berehmenlere düşdü âhir niyâz
- Âşık-ı hân-mân-harâbın civârımızdan
hurûcu için berehmenân milletinden istişfâ
ve bir mekân-ı dîger tedârikine gayretlerini
ricâ etdigimizdir**
- 3124 Bitirdi bizi kâfirin mihneti
Çağırdım hemân askaf-ı milleti
- 3125 Dedim bakma câhillerin levmine
Kabul etdir ol avreti kavmine
- 3126 Tedârik edip ana beytül-hazen
Uzasın yanımdan şu derd ü mihen
- 3127 Terahhum edip bu dil-i zârıma
Bana acımazsan acı yârıma

3128 Duâsın alıp şu iki müslimin
Günâhın çıkar ol zen-i mücrimin

3129 Sebûger nihâyet firâr eyledi
Belâ başımızda karâr eyledi

**Berehmenân-millet "kâfir ağlar bizim ahvâl-i perîşânımıza"
meselince hâlimize merhamet eyleyip
âteş-zen-i hirmen-i ârâmımız olan zeni gam-hânemiz
civârından alıp gittikleridir**

3130 Gel ey hâme-i mâtemiyyü'l-beyân
Kederden edip ihtilâs-ı zamân

3131 Gam-ı aşkı kıldın hikâyet biraz
Felekden de eyle şikâyet biraz

3132 Yeterken dil ü câna renc-i azîm
Verir bir taraftan azâb-ı elîm

3133 Verir derd içinde aceb derdler
Enîne eder nâleyi nevhager

3134 Cefâgerler içre odur hurdekâr
Eder derd ü âlâmı nakş u nigâr

3135 Eder nakş-ı gam câme-i mâteme
Verir zîb-i mâtem libâs-ı gama

3136 Murâd eyledi ol zenin defini
Yanımda yanan âteşin refini

3137 Dedim artık insâfa geldi felek
Girîbânım elden bırakmak gerek

3138 Görüp bana kâfirlerin şefkatin
Ferâmûş kıldı dedim mihnetin

3139 Bakıp lutfuna çok sipâs eyledim
Ben İslâm'a geldi kıyâs eyledim

3140 Meğer hâzır etmiş belâ-yı diğeri
Cefâya verip zînet ol hîleğeri

3141 Berehmenler etmiş tutup bir mahal
Dil-i nâ-ümîdi karîn-i emel

3142 Sitem ferş edip sadr-ı kâşâneye
Kuşlar biraz zâd-ı gam hâneye

3143 Perestâr olup âh-ı gayret-şîâr
Harîminde feryâd imiş pâsdâr

3144 Demişler ki lâzım degildir çerâğ
Yeter âşika şule-i şevk-i dâğ

3145 Zen-i bî-kese etdiler iltifât
Sanırdım ki buldum o gamdan necât

- 3146 Oturmuş idim bâğçede vakt-i şâm
Refikim idi nahl-i bâğ-ı merâm
- 3147 Çıkardık gönülden gam-ı gurbeti
Şitanbûl'dan açmış idik sohbeti
- 3148 Olup neşemend-i hayâl-i vatan
Ferâmûş olunmuşdu gûyâ mihen
- 3149 Açılmışdı gönlüm gülistân gibi
Terennüm ederken neyistân gibi
- 3150 Girip gûşa gerdûne âvâzesi
Dil-i zârımın ürkü cemmâzesi
- 3151 Felek açdı dervâze-i mihneti
Getirdi o âvâze-i fûrkati
- 3152 Uzakdan görünce berehmenleri
Gönül suya indirdi yelkenleri
- 3153 Dedim cûş eder şimdi deryâ-yı aşk
Yüzer mevc-i hûn içre sahrâ-yı aşk
- 3154 Dedim etdiğin şimdi bulmak gerek
Tayansın sihâm-ı kazâya felek
- 3155 Gelip bir iki zen o dil-besteye
Esîr-i gam-ı yâr olan hasteye
- 3156 Tesellî gibi geldiler yanına
Avuc ile zehr ekdiler cânına
- 3157 Edip h'âh u nâ-h'âh evden hurûc
Şuâ idi etdi alevden hurûc
- 3158 Uzakdan görüp aldı hayret beni
Kebâb eyledi nâr-ı gayret beni
- 3159 O bîmâra gerdûne tâbût olup
Görenler anı lâl ü mebhût olup
- 3160 Tutup çerhi bâng-i Muhammed Ağa
Dedi zühre gerdûnda vâ-veyletâ
- 3161 Felek eyledi gerdişinden ferâğ
Kulaklardan Allâh etsin ırağ
- 3162 Yürekler yakıp nare-i el-firâk
Neler eyledi ol gam-ı lâ-yutâk
- 3163 Çekilmiş iki kolları ardına
Görenler sorar bu kızın derdi ne
- 3164 Büzülmüş ayaklar misâl-i kemân
Kütük gibi olmuş o tâze fidân

- 3165 Perîşân idi hâli sünbül gibi
Güşâde yine dâğlar gül gibi
- 3166 Vücûdu sararmış çü berg-i hazân
Yerinde gül-i sürh-i dâğ-ı civân
- 3167 Güşâd eylemiş ol ten-i dâğdâr
Şitâ mevsiminde gül-i nev-bahâr
- 3168 Edip çille-i aşk kaddin kemân
Kemân kaşını yasdı Zâl-i zamân
- 3169 Alıp nakd-i dâğı o bahtı siyâh
Basıp sîneye eyledi harc-ı râh
- 3170 Gelip rûh-ı Kays oldu bi'l-ittifâk
Hudî-senc-i cemmâze-i iftirâk
- 3171 Ser-i rehde Leylâ-yı hevdec-nişîn
Ederdi o bîmâra âh u enîn
- 3172 Olup rûh-ı Şîrîn ü Azrâ refik
O dil-hasteye oldular hem-tarîk
- 3173 Pes ü pîşini aldı âh u figân
Sirişki gibi oldu âhir revân
- 3174 Yakıp şemdân gibi dest-i kazâ
Getirdi anı semt-i gamdan yana
- 3175 Bitirdi bizim hâneyi ol harîk
Ümîdin kesip etdi azm-i tarîk

**Maşûk-ı âşık-ıztırâb bu âteş-i iftirâk ile
kebâb olup ez-ser-i nev sîh-i sitemde âh u zâr
ve âkîbetü'l-emr nühüfte-i sandûka-i cân olan
derd-i aşkı âşikâr eyledigidir**

- 3176 İki kol olup âteş-i iftirâk
Yine etdi gam-hânemiz ihtirâk
- 3177 Görüp âşıkın sûz u derdin civân
Dedi yandı cânım amân el-amân
- 3178 Çekip sûz-ı fûrkatle bir âh-ı serd
Aceb imtizâc eyledi harr u berd
- 3179 Tonup kaldım anda gelip incimâd
Tutuşdu o gül-nahl-i âteş-nihâd
- 3180 Olup her şerer cânımın külhanı
Anı yakmadı çerh yakdı beni
- 3181 Ne dem kim ederdi o feryâd u zâr
Degildi tenim cânâ cây-ı karâr
- 3182 Gözünden revân oldu bir hûn-ı al
Uruldu dedim âkîbet ol gazâl

- 3183 Girîbânını eyledi çâk çâk
Kefen kıldı anı dil-i derdnâk
- 3184 Uzakdan gelirdi zenin nâlesi
Girîbâna döndü gönül kâlesi
- 3185 Figânlar ki etdi o şâm-ı firâk
Sipihir ağladı tâ gelince fûvâk
- 3186 Görüp rahşîş-i çeşmini âsumân
Degil rad kıldı enîn ü figân
- 3187 O mâh ağladı âsumân ağladı
Bu derde zemîn ü zamân ağladı
- 3188 Edip âteş-i âhdan ictinâb
Dökerdi felek üstüne turma âb
- 3189 Tutup âlemi bâng-i "rûhî fidâk"
İnan oldu cism-i zemîn lerzenâk
- 3190 Zuhûr etdi havf etdigim âkıbet
Kabûl etmez artık gönül tesliyet
- 3191 Bitirdi zenin kârını derd-i aşk
Tayansın gama bad-ez-în merd-i aşk
- 3192 Ne merd ise Leylî yine karıdır
Tahammül gam-ı aşka er kârıdır
- 3193 O hançer ne lâyıq miyân-ı zene
Sezâvârdır merd-i hasm-efgene
- 3194 Yaraşmaz idi ol zene kâr-ı merd
Yüzük taşı gibi yerin buldu derd
- 3195 Ser-i Kays'a ağır gelen migferi
Tahammül eder mi zenânın seri
- 3196 Bu meydâna taşdan katı ser gerek
Bu derd-i seri çekmege er gerek
- 3197 Degil Bî-sütûn kazma Şîrîn'e kâr
Gerek ana bir taş dögen tîşedâr
- 3198 Zenin hâli ol merde geçdi tamâm
Verildi o şeb mülk-i aşka nizâm
- 3199 Der-i aşkdan tard olundu zenân
Ayân oldu maşuk u âşık hemân

**Âşık-ı nev-niyâz gitdikce kâmet-i âhı dirâz eyleyip
merkad-i mukaddes-i hazret-i Zâtî kuddise sırrehu
cenâblarından cûyende-i reşha-i âb-ı şifâ ve rehîn-i
bürrü's-sâa-i devâ olduğumuzdur**

- 3200 O gece ne hâl ise etdik sabâh
Dedim var mı âyâ bu gamdan felâh
- 3201 Edip derdime cüst-cûy-ı ilâc
Dedim kimlere arz edem ihtiyâc
- 3202 Kimi mahrem etdimse esrârıma
Benimle bakıp ağladı yârıma
- 3203 Kimi eyledimse bu gamdan habîr
Hemân eyledi âhını evc-gîr
- 3204 Kim olduysa ahvâline muttali
O da yandı yakıldı lâ-yenkati
- 3205 Suâl eyledimse kime çâresin
Açıp gösterirdi bana yaresin
- 3206 İki evli bir köye varsan hemân
Bulursun beş on âşık-ı nâ-tüvân
- 3207 Desen var mı bu derde âyâ ilâc
Güler hâline bir alay lâ-ilâc
- 3208 O derdin bu âlemde bîmârı çok
Velî bir tabîb-i devâ-sâzı yok
- 3209 Açıldı gülâsâ leb-i zahm-ı yâr
Eder oldu bülbül gibi âh u zâr
- 3210 Ferâmûş edip ahd ü mîsâkını
Değiştirdi kirdâr u ahlâkını
- 3211 Dikiş kaldı kim çâk olup sevb-i âr
Ola hem-seri ol zen-i nâ-be-kâr
- 3212 Ramak kaldı kim gönlümi kesr ede
Alıp başını bir diyâra gide
- 3213 Ne etdiyse evvelce zenden zuhûr
Birer birer etdi başından mürûr
- 3214 Tahayyürde iken bu emre şuûr
Dedi "festaînû min-ehli'l-kubûr"
- 3215 Erenlerdedir çâre-i derd-i aşk
Bilirler nedir yâre-i merd-i aşk
- 3216 Götürdüm anı tekye-i Zâti'ye
Zuhûr eyledi sûret-i âtiye
- 3217 Penâh etdirip meşhedi taşını
Ayağı ucuna kodum başını
- 3218 Kılıp türbede iki rekat namâz
Biraz oldu tenhâ-nişîn-i niyâz
- 3219 Perîşân iken berg-i sünbül gibi
Açıldı çıkıp türbeden gül gibi

- 3220 Yazıp defter-i bendeye ismini
Gümüş gibi sâf eylemiş cismini
- 3221 Bu dâü'l-udâla be-hamd-i Hudâ
Erenler kapısında bulduk devâ
- 3222 Süleymân Zâtî-i sâhib-himem
Bu bî-keslere kıldı lûtf u kerem
- 3223 Bırakdık enîn-i gam-ı halveti
Zuhûr eyledi pertev-i Celvetî
- 3224 Erenler hatîâtı urmaz yüze
Eğer baksalar olur olmaz söze
- 3225 Köpekler gülerdi benim hâlime
Dahi hâl-i akrân u emsâlime
- 3226 Zuhûr eyleyince o yüzden bu sır
Ziyâret ederdim iki günde bir
- 3227 Olup bâbı cism-i cesîme penâh
Rübâiyle oldu kalem özr-h'âh

Rübâî

- 3228 Afv eyle ki ey Şeyh Süleymân Zâtî
Dergâhına verdikçe vücûdum sıklet
- 3229 Bu cüsse ile kangı kapıya düşeyim
Dîvân-ı Süleymân'a gelîr fil elbet

Rüyâ-yı garîbe

- 3230 Görür kim uşak âlem-i h'âbda
Bu bî-kes turup bir büyük bâbda
- 3231 İşâret edermiş nihânî gözüm
Ki vardır diyü sana mahfî sözüm
- 3232 Demiş kim gerekmez bana gayri bâb
Der-i Zâtî'ye eyledim intisâb
- 3233 Erenler günâhıyla etmiş kabûl
Nola etmese bâb-ı gayra müsûl

Ba'z mesnevî der-menkabet-i pâdişâh-ı manevî

- 3234 Delîl olmasa evliyâ-yı İlâh
Bulunsun mu dergâh-ı Mevlâ'ya râh
- 3235 O dergâhı aklınla bulsan dahi
Gelîr fikre gelmez niçe berzahı
- 3236 Bulunmaz o yol olmayınca sürâğ
Sarây-ı yakîne düşersin ırağ
- 3237 Gerekdir haber vermege bir berîd
Karîb olsa da hem-çü "hablül-verîd"

- 3238 Danış kim kapıda turan zâbite
Girilmez der-i şâha bî-vâsıta
- 3239 Ne kâbil edip hod-be-hod ilticâ
Vara dergeh-i Hakk'a peyk-i recâ
- 3240 Husûsâ bu ser-defter-i mücrimîn
Ne yüzle ola bâb-ı Hakk'a yakın
- 3241 Meğer kim olam lutfunu müktesib
Der-i evliyâya olup müntesib
- 3242 Der-i evliyâdır penâgâhımız
Ayırmasın anlardan Allâh'ımız
- 3243 Hulûs üzre her kim ede ilticâ
Ne mümkün ki reddoluna bir recâ
- 3244 Hulûs üzre sürdükde rûy-ı niyâz
Şu câhil uşak etdi def-i güdâz
- 3245 Hulûs istiyorlar erenler hulûs
Olursan dahi şeyh-i sâhib-Füsûs
- 3246 Erenler efendi kemâl istemez
Müderris degil kıl u kâl istemez
- 3247 Erenler bulunmaz hayâlât ile
Bilinmez o firka kemâlât ile
- 3248 Kazâyâsı dîger kıyâsı dîger
Muhît olamaz anı akl-ı beşer
- 3249 Erenler ulûmu degil nahv u sarf
Bilinmez mebânî-i bî-lafz u harf
- 3250 O fennin adı ilm-i mirâcdır
Sakın sanma kim vakte muhtâcdır
- 3251 Urur sözleri târ-ı akla düğüm
"Fe-kul kaddesa'llâhu esrâruhüm"

**Ol iki mest-i medhûş birbirini ferâmûş ve
andelîb-i zebânların hâmûş etmişken
"pîrâne serem aşk-ı cüvânî be-ser üftâd" müfâdınca
güm-kerde-i mürûr-ı zamân olan âteş-i sîne bu sarsar-ı
nâ-geh-zuhûr ile püf-konende-i süt-re-i remâd ve yeni başdan
alev-hîz-i kânûn-ı iştidâd olduğudur**

- 3252 Uşak eyledi def-i harr-ı elem
Başımda benim kışladı selc-i gam
- 3253 Zenin hânesi gerçi oldu harâb
Ne cânlar ciğerler de etdi kebâb
- 3254 Uyutmuş idim tıfl-ı âhı henûz
Dil-i zâra kundak bıraktı o sûz

- 3255 Bu âteş dil ü cânımı haşladı
Ciğer kokusu gelmege başladı
- 3256 Çerâğ eyledi bendesin şâh-ı aşk
Tulû eyledi nâ-be-câ mâh-ı aşk
- 3257 Girip fikr-i gîsû ile lâleye
Yine Kays-ı dil başladı nâleye
- 3258 Gam-ı aşkdan eylemişdim ferâğ
Yine yakdı tâ sînem üzre çerâğ
- 3259 Düşürdü yine çâha fikr-i zekan
Ne bir kârbân var ne delv ü resen
- 3260 Yine fikr-i ebrûya düşdü gönül
Çekip câna hançer bozuşdu gönül
- 3261 Deşildi yine sînemin yaresi
Güceldi dil-i zârımın çâresi
- 3262 Gönül şîr-i sahrâ iken bî-mehâr
Yine oldu âhû-yı çeşme şikâr
- 3263 Hezâr âferîn çeşm-i câdûsuna
Şikâr eyledi şîri âhûsuna
- 3264 Gönülden çıkıp ârzû-yı bahâr
Hazân eylemişken dil-i dâğdâr
- 3265 Yine yandı nâr-ı ruh-ı âle hayf
Yine açdı bâğ-ı derûn lâle hayf
- 3266 Lehimden gidip zevk-ı sahbâ-yı nâb
Bogazdan degil bâde geçmezdi âb
- 3267 Yine bâde-i lale düşdü gönül
Meges gibi ol şehde üşdü gönül
- 3268 Miyânı gelip gâhice hâtıra
Hayâlât derdim yahod hâtıra
- 3269 Yine sardı fikr-i kad-i yârı dil
Mukaddem saraydı anı bârî dil
- 3270 Ferâgat edip bâğ u bostândan
Kesilmiş idim sünbülistândan
- 3271 Yine düşdü fikr-i hat-ı yâre dil
Arar derde tiryâk ile çâre dil
- 3272 Gelip yâdıma âteş-i rustahîz
Ederdim görüp nahl-i kaddin gürîz
- 3273 Karârım alıp kâmet-i bî-karâr
Kıyâmet kopardı yine âh u zâr
- 3274 Getirdim kurup serde zülfü otağ
O sevdâ ile ihtilâl-i dimâğ

- 3275 Gelip zevkime zehr-i bezm-i mihen
Ferâmûş olundu safâ-yı vatan
- 3276 Gelip yâda gâhî Fuâd u Reşâd
Olurdum gam-ı iftirâk ile şâd
- 3277 Güler zann ederdim biri ağlasa
Safâ-yâb olurdum gözüm çağlasa
- 3278 Sitanbul kıyâs etme zikrim idi
Dil-i zârımın derdi fikrim idi
- 3279 Mey-i nâ-ümîdî ile mest idim
Sebû idim ammâ ki işkest idim
- 3280 Düzüp sâz-ı efgânımın perdesin
Gam-ı dehre derdim ki gel nerdesin
- 3281 Vücûdum hamîr oldu ekdâr ile
Pişirdim işi mihnet-i yâr ile
- 3282 Toyunca yemek mümkün olmazdı nân
Hemân gam yiyip çekmedim imtinân
- 3283 Nedîm eyledim mihneti kendime
Naîm eyledim gurbeti kendime
- 3284 Kederle su sızmaz idi aradan
Meğer kim cerâhat aka yaradan
- 3285 Gam-ı yâr ile itilâf eyledim
Felekle dili sîne-sâf eyledim
- 3286 Şifâ-yâb olup içdigim zehrden
Kodum iştikâyı gam-ı dehrden
- 3287 Kederle safâ-yâb idim ol kadar
Keder olmasa ben arardım keder
- 3288 Gehî ol zenin hâlini fikr edip
Gehî fûrkat-i âşıkı zikr edip
- 3289 Gül-i dâğıma gönlüm oldu hezâr
Tutup lâne-i sînemi âh u zâr
- 3290 Ferâmûş olunmuşdu mâl u menâl
Zuhûr eyledi dilde bir başka hâl
- 3291 Gam-ı aşk ile öyle üns eyledim
İşit kim o âteş ile neyledim
- 3292 Edip câmeden cism-i zârı berî
Gezerdim mecânîn gibi serserî
- 3293 Gehî Kays olup deşte oldum revân
Gehî Kûh-ken'likle geçdi zamân
- 3294 Girîbân mı kalmışdı çâk olmadık
Dil ü cân mı vardı helâk olmadık

3295 Ser-â-pây cismim olup lâlezâr
Sulardım sirişkimle leyl ü nehâr

**Kudûm-i sâl-i cedîd ve ser-nâme-i menkabet-i
Hasaneyn-i şehîd raziya'llâhu anhumâ rabbü'l-mecîd**

3296 Sirişkim telef oldu ahd-i medîd
Belâ bunda kim geldi sâl-i cedîd

3297 Yetişmezse ger mâteme eşk-i ter
Olur kan revân etdigim hep heder

3298 Gözüm akmaya behr-i âl-i resûl
Akıtsa bana kevser etmem kabûl

3299 Be-her katresi olsa âb-ı bekâ
Yine andan etmem ümîd-i şifâ

3300 Gam-ı âl-i Ahmed içindir sirişk
Hüseyn-i Muhammed içindir sirişk

3301 Sefâhat edip dîde-i nâ-halef
Telef eyledi nakd-i eşki telef

3302 Edip eşkini sarf-ı aşk-ı mecâz
Heder oldu bîhûde sûz u güdâz

3303 Olup bî-bizâat leâlî-fürûş
Revâ mı bu günlerde olmak hamûş

3304 Olup bî-reviyyet cevâhir-nisâr
Aceb şimdi neyler dil-i şermsâr

3305 Aceb kandadır eşk-i deryâ-hurûş
Bu mevsim ne mevsimdir etmez mi gûş

3306 Kanı âh-ı âteş-feşân nerededir
Anın varsa imdâdı bu derdedir

3307 Kanı nâle-i dem-be-dem kandadır
Gönül başka bir derde efgendedir

3308 Kanı kanlı yaşım kanı âh-ı serd
Turur mı bu günlerde ashâb-ı derd

3309 Kanı nerde çâk-i girîbân aceb
Kanı lerziş-i cism-i uryân aceb

3310 Kanı dâğ-ı dilden akan hûn-ı al
Bu dem akmalı behr-i evlâd u âl

3311 Edip istiânet dil-i zârdan
Haber al dedim çeşm-i hûn-bârdan

3312 Yazarsam bu mâtemde ger bir eser
Îânet eder mi dedim çeşm-i ter

- 3313 O dem çekdi bir âh kalb-i hazîn
Dedi var mı olmaz bu kâra muîn
- 3314 Müheyyâ katımda enîn ü figân
Görüp anı olmaz mı çeşmin revân
- 3315 Alıp hâmeni kıl murâdın beyân
Hemân eyle mâ-fi'l-fuâdın beyân
- 3316 Suhan hâmeden benden âh u figân
Hemân eyle derd-i derûnun ayân
- 3317 Görünce dil-i zârımın meylini
Revân etdi çeşmim dahi seylini
- 3318 Görüp çeşmimin imtisâlin kalem
Dem-i al ile kıldı vaz-ı rakam
- 3319 Bu nat-ı Hüseyin'e verip hüsn-i zîb
Bana nısf-ı îş oldu zikrû'l-habîb
- Mersiye-i Haseneynü'l-ahseneyn
raziya'llâhu anhumâ ve an şühedâi'llâh**
- 3320 Ey hâme kanlar ağla yazıp şâm-ı mihneti
Hûn-ı ciğerle tâzele subh-ı musîbeti
- 3321 Ey hâme bakma rûz u şebe ağla dem-be-dem
Yâd eyle mihr ü mâh-ı sipihr-i risâleti
- 3322 Ey hâme hakk-ı âhireti eylemem helâl
Feryâd ile koparmaz isen ger kıyâmeti
- 3323 Ey hâme kıl derîde girîbân-ı sabrı kim
Sad pâre etdi dest-i elem sevb-i tâkati
- 3324 Yuf gülşen-i cihâna ki bir ejdehâ-nefes
Tefsîde etdi gonçe-i bâğ-ı nübüvveti
- 3325 Bir nâ-halef o gonçeyi kıldı telef dirîğ
Açdı yerine gül gibi dâğ-ı cerâhati
- 3326 Gül-berg-i terden ahsen olan hazret-i Hasan
İçsin sülâf-ı semm ile câm-ı şehâdeti
- 3327 Hayret verir zebânıma bu mebhas-ı amîk
Ger var ise emîr-i zamânın cerâeti
- 3328 Ey hâme eyle sözde bu rütbeyle iktifâ
Geçmiş anın Resûl-i güzîn ile sohbeti
- 3329 Oglu sefilhe her ne kadar eylesen şetûm
İmânı olan eylemez aslâ sahâbeti
- 3330 Kâfirdi gerçi sûret-i müslimde neyleyem
Şermende etdi pîş-i risâletde ümmeti
- 3331 Müslim degil Yehûd u Nasârâ'da misli yok

- Bî-rahm u bî-mürüvvet ü insâf idi katı
- 3332 Âhir mekânı sadr-ı bihişt-i berîn olur
İblîse müjde yoksa o hîzin kabâhati
- 3333 Şeytân yanında tıfl-ı sebak-h'ân-ı mefsedet
Varken cehâletinde Ebû-cehl'e nisbeti
- 3334 İblîsi bahs-i fitnede şermende eyledi
Bir şûr saldı kim bu cihâna o nekbetî
- 3335 Ref eyledi miyâne-i İslâmiyândan
Şemşîr-i ihtilâf ile tavr-ı meveddeti
- 3336 İdlâl kıldı bir niçe ashâb-zâdeyi
Kim etdi müminîne bu rütbe hiyâneti
- 3337 Sevdâ-yı mâl u câha düşüp niçe küştenî
Terk etdiler inâyet-i sâhib-şefâati
- 3338 Sûd-ı fenâyâ bir takım îmân müflisi
Sarf etdi Kerbelâ'da künûz-ı diyâneti
- 3339 Bir katre suya cenneti nîrâna verdiler
Vardır bu gabn-ı fâhişin âhir nedâmeti
- 3340 Nehy etdiler tecerru-ı nehr-i Fırat'dan
Lalîn-dehân-ı gonçe-i bâğ-ı siyâdeti
- 3341 Bir katre âb etmeyiz işrâb dediler
Tasdîk olunmadıkca Yezîd'in hilâfeti
- 3342 Ol kim ede mutâbaat-i seyyidü'l-enâm
Mümkün midir Yezîd-i pelîd ile bîati
- 3343 Terk eyledi muhâsama-i dünyeviyyeyi
Malûm iken cenâb-ı Hüseyin'in şecâati
- 3344 Kâfirlerin husûmetine gelmedi sükûn
Dârü's-sekîne semtine isterdi avdeti
- 3345 Etfâl-i Mustafâ'ya bir içim su isteyip
Va'd eylemişdi anlara âb-ı şefâati
- 3346 Gül-gonçehâ-yı bâğ-ı risâlet hücûm edip
Kasd eyledikçe âb ile def-i harâreti
- 3347 Ol seg-menişler eyledi dendân-ı hırs ile
Sad pâre âhuvân-ı harîm-i risâleti
- 3348 Bî-âb u tâb kaldı kimi âl-i beytten
Nûş eyledi kimisi zülâl-i şehâdeti
- 3349 Şimr-i laîn nâmına bir dûzehî-nijâd
Ser-dâde etdi hâke o gül-nahl-i cenneti
- 3350 Îmâna geldi Hamza'yı katl eyleyen kişi
Bu kâfir oldu görsene hubs-ı cibilleti

- 3351 Peyveste etdi perde-i çerha muhadderât
Vâ-hasretâ nidâsı ile âh-ı fûrkati
- 3352 Güller lisân-ı hâl ile feryâda başladı
Hâmuş görüp o bülbül-i bâğ-ı belâgati
- 3353 Gîsû-yı pâkini görüp âlûde-i gubâr
Sünbüller etdi çâk girîbân-ı tâkati
- 3354 Pür-hûn görünce lâle semenzâr-ı sînesin
Kıldı çerâğ o gülşene dâğ-ı musîbeti
- 3355 Ol seyyidin zebân-ı şerîfin görünce lâl
Sûsenler etdi bâz dehân-ı şikayeti
- 3356 Dünyâyı tutdu gulgule-i bâng-ı yâ Hüseyin
Oldukca andelîb recez-h'ân-ı hasreti
- 3357 Ey hâme murg-ı bâğ-ı musîbet degil misin
Aç sen de sebb ü lane zebân-ı adâveti
- 3358 Bildir Yezîd'e kendini ihvân u âlini
Yâd eyle bir bir etdiği küfrân-ı nimeti
- 3359 Kim bîat eyler idi o kâfirden alçağa
Göstemeseydi âleme cüzî diyâneti
- 3360 Etmîş olaydı küfrünü evvelce der-miyân
Geçmezdi destine dahi Şâm'ın imâreti
- 3361 Kasd etme var mı dîn-i Muhammed'de âline
Kangı nebîye eyledi bu gadri ümmeti
- 3362 Tekfûr olaydı Rûm'a gelip Ermenî gibi
Câiz olur mu sandı Yehûdun hilâfeti
- 3363 Kâni olaydı nimet-i rûzî-resânına
Olmazdı böyle nakmete mazhar ol nekbetî
- 3364 Lanet-be-lanet etdiği zulm ü sitem kadar
Gelmez hisâba çünkü o hîzin kabâhati
- 3365 Nîrânda ola bâd-zen-i nâr-ı izdiyâd
İbnü'z-ziyâd'a verdiği menşûr-ı ruhsatı
- 3366 Yetmez mi ana verdiği ruhsat o kâfirin
Kasd-ı Hüseyin'e yoksa Yezîd'in cesâreti
- 3367 Her kim tesâhüb eylemek isterse Şîiyân
İlzâm eder bu meselede ehl-i sünneti
- 3368 Sizden idi Yezîd diyip vermeli cevâb
Kâfir suâl ederse halâs için ümmeti
- 3369 Ey hâme etme kâfiri âverde-i zebân
Eşkinle ver dehânına âb-ı tahâreti

- 3370 Tûfân-ı Nûh'u nevha ile şermsâr kıl
Yâd eyledikçe nûr-ı dü-çeşm-i risâleti
- 3371 H'âhişger-i zülâl-i şefâat degil misin
İsâr-ı hâk-i pâyı kıl âb-ı tahıyyeti
- 3372 Aç dâmen-i niyâzını zer-pâş-ı lutfuna
Meşhûrdur felekde o mihrin sehâveti
- 3373 Sun arz-ı hâlini o şehenşâh-ı ekreme
Mebzûldür gedâlara nakd-i inâyeti
- 3374 Ey nûr-ı çeşm-i Fâtıma-i Mustafâ Hüseyin
Mesrûr kıl nigâh-ı şefâatle İzzet'i
- 3375 Mısrâsın medîne-i ilmin kapısına
Etdim o bâba dînimi Tanrı emâneti
- 3376 Allâh için bu abd-i tebehkâra sâhib ol
Ol gün ki kimse kimseye etmez sahâbeti
- 3377 Maşerde pâre pâre edip seg gibi etim
Zâhir olunca hırs-ı zünûbun nedâmeti
- 3378 Kıtmîrimiz de kehf-i amâna alıp beni
Tâ görmeyem rezâlet-i yevm-i kıyâmeti
- 3379 Kandır zülâl-i lutfâ seninçin yananları
Yâd eyleyip harâret-i rûz-ı hasareti
- 3380 İzzet tazarru et ki budur mevsim-i niyâz
Dergâh-ı kibriyâya açıp dest-i daveti
- 3381 Eyler duânı kurta-i gûşı kerûbiyân
Vasf eyledin cevâhir-i kenz-i kerâmeti
- 3382 *Bi'l-Mustafâ ve asretuhu ve ibni ammihi*
Yâ Rabbi necci min feterâti 'l-meniyyeti
- 3383 *Yâ Rabbi bi'l-Hüseyini ve evlâdihî 'l-kirâm*
İstir zünûbe abdike v'agfir hatîati
Temmetü'l-mersiye
- 3384 Bulup nat-i pâk-i Hüseyin ihtitâm
O hüzn ile oldu muharrem tamâm
- 3385 Yedi mâhı geçdi zamân-ı celâ
Yine bulmadı necm-i bahtım cilâ
- 3386 Şitâ etmede refte refte kudûm
Kararmakda gerdûn gibi baht-ı şûm
- 3387 Tükendi satıp savmadan mâ-lezim
Dahi parmağa saracak bir bezim
- 3388 Bugünlerde afv eylese pâdişâh
Vatan azmine kalmadı harc-ı râh
- 3389 Suhandan da gelmişdi artık kelâl
Tüketdi sözü iftirâk-ı ıyâl

- 3390 Tesellî dahi yazmaz oldu kibâr
Yazanlar dahi oldular şermsâr
- 3391 Giriftâr olup ukdeye mihr-i kâm
Nümâyân idi inkisâf-ı tamâm
- 3392 Ne menkûblar afv u itlâk olup
Rehâ-kerde-i birr ü eşfâk olup
- 3393 Varıp sundular h'ân-ı Leylâ'ya dest
Fakat Kays'ın oldu çanağı şikest
- 3394 Sunup her biri cûy-ı Şîrîn'e leb
Bu bî-çâre Ferhâd çekdi taab
- 3395 Eđer olsa saddâk-ı devlet ayân
Beni afv eder pâdişâh-ı cihân
- 3396 Degilsem eđer devlete hayr-h'âh
Olam mazhar-ı hışm-ı kahr-ı İlâh
- 3397 Ne gam kim gam-ı çerha olsam zebûn
Hatarda olur dâimâ muhlisûn
- 3398 Bu sözden degildir şikâyet garaz
Gam-ı gurbeti bir hikâyet garaz
- 3399 Olup bey-i nakdîne-i “men-yezîd”
Telef-kerde oldı tarîf ü telfîd
- 3400 Bu nimetle toysun da çeşm-i hasûd
Gözümde degil gitse bûd u ne-bûd
- 3401 Hemân pâdişâh-ı cihân sağ ola
Bana bâğ olmaz ise tağ ola
- Ser-asker-i sâbık Muhammed Paşa
hazretlerinin Keşan'dan mürûrudur**
- 3402 Gelip hâneme bir berîd-i edîb
Hemân sundu bir nâme-i dil-firîb
- 3403 Ne nâme riyâz-ı bahâr-ı şeref
Sevâdı hat-ı yâre hayrû'l-halef
- 3404 Ne nâme perend-i diyâr-ı kerem
Döşenmiş zemîninde târ-ı kerem
- 3405 Gelibolu'ya azm ederken međer
Anı yollamış âsaf-ı dâdger
- 3406 Ne âsaf semiyî-i resûl-i güzîn
Hizebr-i Alî-heybet ü pâk-dîn
- 3407 Ne âsaf peleng-i künâm-ı vegâ
Ne âsaf sehâb-ı sipihr-i gazâ

- 3408 Bitirmiş felek cümleten varını
Ziyâna yetirmiş anın kârını
- 3409 Ferâmûş edip kendi ekdârını
Suâl eylemiş İzzet-i zârını
- 3410 Keşan'a kudûm eyledi subh-dem
O hûrşîd-i burc-ı sipihr-i kerem
- 3411 Görüşmek için eyledim itizâr
Kabûl eyledi özrüm ol nâmdâr
- 3412 Mübâşir ağa kîl u kâl etmese
Bu kimdir diyü ger suâl etmese
- 3413 Görüşmek eğer olmayaydı muzır
Olurdum öpüp dâmenin müftehir
- 3414 Sehergeh Gelibolu'ya etdi azm
Olup nîze-ber-kef o hûrşîd-i rezm
- 3415 Selâmıyla bir âdem irsâl edip
Beni lutf u ihsânı hoş-hâl edip
- 3416 Demiş Hak taâlâ zamân-ı karîb
Eder ise itlâkını ger nasîb
- 3417 Gelibolu'dan eylesin avdeti
Nasıl şahs imiş görelim İzzet'i
- 3418 Dedim Hak taâlâ zamân-ı karîb
Ana sadr-ı alâyı etsin nasîb
- 3419 Edip intisâbı ile iftihâr
Adûlar ola reşk ile dâğdâr
- 3420 Aceb merd imiş etdi ol nerre-şîr
Beni pençe-i lutfu ile esîr
- 3421 O destûra etdim o rûtbe duâ
Kabûl eyledi iki ayda Hudâ
- 3422 Verip mâl ü emlâkını pâdişâh
Yeniden çerâğ etdi zıll-i İlâh
- Muhammed'i İstanbul'a irsâl etdigimizdir**
- 3423 Muhammed revân oldu İstanbul'a
Ne var ise satmak için bir pula
- 3424 Kalıp iki âdemle tenhâ-nişîn
Yine başladı dilde âh u enîn
- 3425 Bilirler ne hâl oldugun ehl-i hâl
Verir taba tafsîli gerd-i melâl

**Vürûd-ı haber-i şeyhü'l-islâm şuden-i Âsım Efendi
sellemehu'llâhu**

3426 Olup bâb-ı ümmîdgâha müsûl
Sitanbul'a etmiş Muhammed duhul

3427 Bana nâme tahrîr edip der-akab
Dimiş çekme artık efendi taab

3428 Efendin yine oldu müfti'l-enâm
Bulur sâyesinde bu mihnet hitâm

3429 Senin hasm-ı cânın biraz kavm idi
O demler ki “lâ-âsıme'l-yevm” idi

3430 Olup şimdi tûfân-ı gam ber-taraf
Sana feth-i bâb etdi Hak her taraf

3431 Alıp nâmeyi hırz-ı cân eyledim
Hemân dest-i gamdan nihân eyledim

3432 Eğer tuysa gerdûn ol nâmeyi
Çıkarır başa başka hengâmeyi

3433 Olup bu tesellî ile şâdmân
Bihîşt oldu gûyâ cahîm-i Keşan

3434 Kalem arz-ı hâle edip ibtidâr
Bu târîh ile oldu cevher-nisâr

Târîh-i meşîhat

3435 Cenâb-ı Mustafâ Âsım Efendi sadr-ı iftâyı
Yine teşrîf edince eyledi şâdân dünyâyı

3436 Tesâdüf etdiği sâl-i cedîde fâl-i hayr oldu
Kudûmu eyledi dil-şâd şâh-ı kişver-ârâyı

3437 Dimâğ-ı ehl-i irfâna mükerrer oldu şeker-bahş
Nola tahdîs edersek nimet-i Bârî taâlâyı

3438 Der-i iclâline mensûb olanlar sonradan sad hayf
Ederler hâk-i pây-ı devletinde çihre-fersâyı

3439 O devletden felek abd-i kadîmin eyledi mahrûm
Sekiz mâh oldu ammâ şimdi tuydum hüzn-i menfâyı

3440 Murâdım intisâb-ı köhnemi isbâtdır lâkin
“Li-emrin mâ” dahi tacîz edersem yok mudur câyı

3441 Sabâvetden berîdir intisâbım ihtiyâr oldum
Düşer mi bana tacîz etme artık pîr ü bernâyı

3442 Benim ancak merâmım mazhar-ı ihsânı olmaktadır
Celâdan incilâyâ hak bu kim etmem bu şekvâyı

3443 Güvâhım mazhar-ı ilhâm olan mirât-ı kalbîdir
Füsûn-ı sûret-i tezvîr ile etmem bu davâyı

3444 Melâzâ melceâ sensin veliyü'n-nimet-i dîrîn
Ferâmûş eyleme vakt-i inâyettir bu ednâyı

- 3445 Gelip erbâb-ı heyet bana sorsun kaç bucaktır yol
Dil-i zârım mühendisler kadar öğrendi dünyâyı
- 3446 Sudûr içre senin devletde şimdi bendegânın var
Çerâğ etme bir iş mi ben gibi bî-çâre mollâyı
- 3447 Hemân Bârî taâlâ zâtını etsin kederden hıfz
Ede fetvân ile teyîd hükm-i câh-ı takvâyı
- 3448 Yazıldıkca fetâvâdan kitâbu'llâhın ahkâmı
Debîr-i âsumân koysun senin nâmınla imzâyı
- 3449 Mücevher yazdı İzzet bendesi târîh-i ilbâsın
Yine Mekkî Efendi-zâde giydi sevb-i fetvâyı (= 1239)
- 3450 Görüp nazm-ı târîhim etmiş pesend
O kândan yine olmadık hissemend
- 3451 Nevâl-i inâyâtı mebzûl iken
Keremle semâhatle mecbûl iken
- 3452 Gelince bana bahr iken berr olur
Murâdı eğer hayr ise şerr olur
- 3453 İki defadır oldu müfti'l-enâm
Ecânib olur sâyesinde be-kâm
- 3454 Beni baht-ı vârûn baîd eyledi
Derinden dahi nâ-ümîd eyledi
- 3455 Degil kendi baht-ı siyehdir sebep
Bana tâliim etdi netdiyse hep
- 3456 Kerem görmedim hem senâsındayım
Bilâ-lutf u ihsân duâsındayım
- 3457 Nevâziş dahi bir kerem sayılır
Zamâna göre ol himem sayılır
- 3458 Beni görmesin lutfunun lâyıkı
Yine ben derim pâdişeh sâdıkı
- 3459 Bekâ-h`âh-ı sultân-ı âlemdir ol
Sadâkatde zât-ı müsellemdir ol
- 3460 Yerip yıksa da dâimâ İzzet'i
Müşeyyed ola hâne-i devleti
- 3461 Meğer başka yüzden imiş lutf-ı Hak
Bu âyîne gösterdi dîger sebak
- Muhammed'in Keşan'a avdetidir**
- 3462 Muhammed olup nâ-murâd-ı emel
Gelip verdi bezm-i ümîde kesel
- 3463 Dedi lutf-ı Mevlâ'ya kaldı işin
Ne mîr ü ne paşaya kaldı işin

- 3464 Kapanmış sana şeş-der-i intisâb
Hudâ başka yüzden ede feth-i bâb
- 3465 Ümîd etdiğin bâbı sarmış alev
Güşâd eyleye Hak sana bâb-ı nev
- 3466 Sitanbul'da yok bir bilir nâmını
Okur kalmamış nâme-i kâmını
- 3467 Suâl etmedi kimseler hâtırın
Nedir hâli der yokdu ol mâhirin
- 3468 Fakat bir Necîb-i himem-kâr var
Ümîd etme andan diğér yâr var
- 3469 O da azm-i iklîm-i Mısr eyledi
Düşün sana baht-ı siyeh neyledi
- 3470 Beş on tesliyet-nâme verdi ele
Dedim bir zamân ola hayrı gele
- 3471 Getirdi hulâsâ beş on bin gurûş
Leb-i şekve-i çerhi etdik hamûş
- 3472 Kudûm eylemiş idi fasl-ı harîf
Bürûdetle oldu hevâlar latîf
- 3473 Felek bâğı reşk-i bahâr eyledi
Hazânı bana lâlezâr eyledi
- 3474 Mekânın dahi olsa “semmü'l-hıyât”
Gelir vüsat-i rızık ile inbisât
- 3475 Çıkardım derûndan gam-ı gurbeti
Dedim Hak müeyyed ede devleti
- 3476 Gelir İzzet'in bir bilen kadrini
Siphrin tecessüs eder gadrini

Reşîd Muhammed Paşa Hazretleriyle mülâkâtımızdır

- 3477 Sehergeh zuhûr etdi bir velvele
Zemîn ü zamân oldu pür-zelzele
- 3478 Keşan'a tolup leşker-i bî-şümâr
Dil-i katrede oldu bahr âşikâr
- 3479 Sadâ-yı rikâb ile heft-âsumân
Ayaklı kemân meclisinden nişân
- 3480 O ses verdi sevr-i semâvâta bâk
Nola olsa gâv-ı zemîn lerzenâk
- 3481 Süm-i rahş-ı gül-gûn olup nakş-ı tîn
Çiçek bozmuşa döndü rûy-ı zemîn
- 3482 Gelirmiş meğer kim müşîr-i dilîr
Mora cânibinden çü şîr-i dilîr

- 3483 Zehîn-i müşîrân vezîr-i fatîn
Reşîd-i vezîrân müşîr-i zehîn
- 3484 Ser-i tugu kıldı sipihri hacil
Dedi mehçesi âfitâba çekil
- 3485 Varıp ben de tenhâca bir hâneye
Nigâh etdim ol tavr-ı şâhâneye
- 3486 Ne gördüm ki ol şîr-i ejder-süvâr
Yanında Peşen bir seg-i her-süvâr
- 3487 İki cânibe eyledikce nigâh
İki cânibe açılır idi râh
- 3488 Vakûr u müeddeb hizebr-i dilîr
Şehenşâh-ı devrâna lâyık vezîr
- 3489 Mehâbetde ger misli var ise az
Şecâatde tugu gibi ser-firâz
- 3490 O bârâni-i sürhe etdim nigâh
Akardı dem-i düşmen-i pâdişâh
- 3491 Girîbânının şemse-i cevheri
Sipihri-i celâlin iki ahteri
- 3492 Miyânındaki hançer-i tâbdâr
Hilâli eder bedrveş dâğdâr
- 3493 Togup bir felekde beş on bin güneş
Ana zergeri eylemiş tîr-keş
- 3494 Bu ferr ü şükûh ile teşrîf edip
Nigâhıyla etrâfi taltîf edip
- 3495 Kazardı süm-i rahşî adâya çâh
Pesinden gelen piş olurdu tebâh
- 3496 Zemîne nigâh eyledi tevseni
Bekâda helâk etdi Rûyîn-ten'i
- 3497 Eğer tutsa bâlâya bir yanını
Emânet verirdi felek cânını
- 3498 Keşan'a müsâfir olup iki şeb
O destûr-ı sâhib-vakâr u edeb
- 3499 Çağırdı beni bezm-i iclâline
Nevâziş eder gibi emsâline
- 3500 Vakâr içre eyler idi iltifât
Gülerdi olup âşinâ-yı nikât
- 3501 Bu mecnûnu âkil kıyâs eyledi
Umûrında rey iltimâs eyledi

- 3502 Aceb âsaf-ı munsıf-ı hak-şinâs
Tutar kendini hem-çü âhâd-ı nâs
- 3503 Şeh-i âleme eyleyip çok duâ
İki gün iki gece etdik bükâ
- 3504 Mezemmet edip ba'z-ı akrânını
Dedi Hak ala anların cânını
- 3505 Müselmân idi Hak bilir kim özü
Aceb Hakk'a tâbi idi her sözü
- 3506 Keşan'da Hudâ şâd-kâm eyledi
Vidin mansıbıyla be-kâm eyledi
- 3507 Vedâ eyledik ağlaya ağlaya
Dedim Hak reh-i düşmenin bağlaya
- 3508 Binip rahşına hem-çü İsfendiyâr
Vidin semtine etdi atf-ı mehâr
- 3509 Olursa dedim böyle olsun vezîr
Melek sûretinde aceb nerre-şîr
- 3510 Bedenden olur gibi cânım cüdâ
O bir yana gitdi gönül bir yana

Bir mâh kadar Yenice Köyü'nde ikâmetimizdir

- 3511 Çıkıp deşte geşt ü güzâr eyledim
Keşanlı sanırdı firâr eyledim
- 3512 Yenice köyün eyledim ihtiyâr
Gam-ı köhneden sanki etdim firâr
- 3513 Çekip câm-ı yesi felekden müdâm
Mey-i şekveyi bezme etdim harâm
- 3514 Mey-i nâ-ümîdî aceb mey imiş
Meyin keyfi yanında lâ-şey imiş
- 3515 Tecerrüd şarâbı gibi bir şarâb
Çıkarmaz bu mey-hâne-i nüh-kıbâb
- 3516 Uşaklar ederlerdi sayd u şikâr
Benim şâhbâzım idi çeşm-i yâr
- 3517 Ederdim gehî yârımı ben de râm
Felekden alıp vasl ile intikâm
- 3518 Enîs ü celîsim idi bu kitâb
Kafâdârım olmuşdu câm-ı şarâb
- 3519 Mezâmîni etse nola halkı mest
Ne sâgarlar üstünde oldu şikest
- 3520 Sipihrin içip rağmına bâdeler
Mükedder idi verdigine keder

- 3521 Ferâgat ne mümkün mey-i nâbdan
Meğer kim kesâfet gele h'âbdan
- 3522 Verip hükm-i mey-hâne-i âlemi
Fedâ etmedim bâdesiz bir demi
- 3523 Çekip câm-ı estağfiru'llâhı gâh
Harâb-ı mey-i afv olurdu günâh
- 3524 Bilâ-minnet-i sâkî vü rıtl u câm
O sahbâ ile mest olurdu müdâm
- 3525 Penâh eyleyip gâhi seccâdeyi
Dökerdi gözüm içdiği bâdeyi
- 3526 Gehî reh-güzerden geçerdî tatar
Demezdîm Sitanbul'da âyâ ne var
- 3527 Yazarken hicâb etmiyor hâmeler
Gelirdi gehî tesliyet-nâmeler
- 3528 Benâna verip renciş-i fekk-i mühr
Açıp vermedim hâtıra şekk-i mühr
- 3529 Birikdikce sûzân edip âteşe
Keder vermedim kalb-i hasret-keşe
- 3530 Felek gösterip çihre-i intikâm
Gelip şihne-i dey şikest oldu câm
- 3531 Uzatdı ayağın ser-i bâmdan
Hücûm eyledi leşkeri câmdan

Yenice köyünden Keşan'a avdetimizdir

- 3532 Şitâ verdi bezm-i harîfe kesel
Ayağ-ı meyi tutmaz olmuşdu el
- 3533 Tonup kaldı her kanda var cûybâr
Akardı fakat çeşm-i deryâ-nisâr
- 3534 Tükenmişdi kânûn-ı gülşende nâr
Fakat sönmeyen bir benim bir çenâr
- 3535 Alıp subh-dem bir bora bir tipi
Düşüldü yola seyl-i bârân gibi
- 3536 Nedir çâre çün hirre-i na-tüvân
Ocak başını eyledik âşiyân
- 3537 Konup husrev-i hâme meştâsına
Düzüldü şitâiyye inşâsına

Sıfat-ı sermâ

- 3538 Karardı felek zülf-i bahtım gibi
Girih-bend olup kâr-ı sahtım gibi
- 3539 Müsâvî idi mihre rûz u şebi

- Düşünde görürdü felek kevkebi
- 3540 Felek görmedi iki aydır mehi
Muharrem sanırdı rebîî gehî
- 3541 Siyeh-rûz edip mâtem-i âfitâb
Felek kara giydi degildi sehâb
- 3542 Kararmışdı fikrimde reng-i sefid
Hele kar yağıp oldu levni be-dîd
- 3543 Siyeh câm içinde şarâb-ı beyâz
Aceb meydîr ol neşesi inkıbâz
- 3544 Tolu eyledi câm-ı çerhi şikest
Verir rahne gâhice bâlâya pest
- 3545 Tonup kaldı Sadî gibi cûybâr
Açardı gelip mürşid-i nev-bahâr
- 3546 Hum-ı bâde yâkût ile oldu pür
Sebû-yı arak gûyiyâ genc-i dür
- 3547 Açılmazsa ger incimâd-ı şarâb
Olur lal ile bir mezâd-ı şarâb
- 3548 Tonup kaldı yah-beste râh-ı nefes
Çıkarken düşerdi bün-i femde ses
- 3549 Zemîne nola etse gerdûn hased
Ki her gûşesi oldu burc-ı esed
- 3550 Yapıldı pamukdan niçe arslan
Aceb benzedi bîşezâra cihân
- 3551 Şihâb-ı felek etse azm-i zemîn
Olurdu tonup sebze-i âhenîn
- 3552 Düşerdi sogukdan başa mîh-i bâm
Ciğergâha işler idi sîh-i bâm
- 3553 Kar içre gören Keçeci-zâde'yi
Demez mi şaşırılmış felek âdeyi
- 3554 Galatkârî-i çerh-i gaddâr ile
Bu yıl sardılar keçeyi kar ile
- 3555 Şerer sıçrasa külhan-ı nârdan
Tonardı akîde gibi kardan
- 3556 Güneş açsa berkin dahi dahmesin
Felek gûş ederdi legen nağmesin
- 3557 Olup tamlalıklar tütün tablası
Sikilmişdi çerhin dahi ablası (?)
- 3558 Gehî hâtırimdan çıkardı kader
Sögerdim sipihre sabâha kadar

- 3559 Hurûc etmedim otadan iki ay
Uzatmış olaydım tonar idi pây
3560 Degil ota işkenbeden bir fenâr
Kılınmışdı kâğıd ile istitâr
- 3561 Keşan halkını eyleyip bezme cem
Yanardım derûnunda mânend-i şem

Sadâret-i Muhammed Saîd Gâlib Paşa

- 3562 Sehergeh sımâha erip bir peyâm
Dil-i zârı gördüm o dem şâd-kâm
- 3563 Felekler ile raksa girdi gönül
Sanırdı başı göge erdi gönül
- 3564 Bulup pâdişeh sâni-i Râgıb'ı
Meğer kim vezîr eylemiş Gâlib'i
- 3565 Dedim ey dil-i zâr-ı mihnet-keşim
Refik-i gamım yâr-ı gurbet-keşim
- 3566 Vezîre senin intisâbın mı var
Kapusunda bir başka bâbın mı var
- 3567 Mukaddem bilir mi senin nâmını
Ki bilsin bu günlerde encâmını
- 3568 Senin müntesib olduğun hânedân
Anın hasm-ı cânı idi bir zamân
- 3569 Hudâ şimdi yazdı ana fursatı
Bozar görse dîvârda İzzet'i
- 3570 Ümîd-i şifâ eyleme zehrden
Sürerdi o bulsa seni şehrden
- 3571 Ümîd etme neşe bu peygâmdan
Çıkar mı arak mîve-i hâmdan
- 3572 İki ceybi pür olsa iksîr ile
Koyan koltugu nakd-i tedbîr ile
- 3573 Sana zerre sarf etmek emr-i muhâl
Dahi bir uzak sürmesi ihtimâl
- 3574 Dedim şimdiden taş basıp bağrına
Devâ başka yüzden düşün ağrına
3575 Kelâmım dil-i zâr edip istimâ
Yine şevk u şâdîden etdi semâ
- 3576 Dedim gitdi akli dil-i zârımın
Perîşân görüp zülfünü yârımın
- 3577 Dedim kim aceb kara sevdâ mıdır
Hat-ı yârı görmüşdü rüyâ mıdır

- 3578 Eder vasl-ı yâr ile fikr-i muhâl
Dimâğında olsa nola ihtilâl
- 3579 Aceb derdi taşra alâmâtı mı
Garîbü'd-diyârın mübâhâtı mı
- 3580 Aceb beng ile var mıdır ülfeti
Ederdi nigeş hâl-i yâra katı
- 3581 Perîlerle etmekdedir itilâf
Sakın olmasın cin kelâmı bu lâf
- 3582 Dedi dil edip bu makâlâtı gûş
Felâtun musun ey hum-ı akli boş
- 3583 Ananı Aristo mu düzdü senin
Hiredle ber-â-ber mi togdu tenin
- 3584 Niçin gelmemezlik edip âleme
Îlâc etmedin derd-i dâr-ı gama
- 3585 Ne buldun edip akla pey-revligi
Bırak akli kıl nakle pey-revligi
- 3586 Eđer akl ile dönse kâr-ı cihân
Aristosuz etmezdi devr âsuman
- 3587 İpokrat kanda Aristo kanı
Niçin öldüler bir alay küştenî
- 3588 Çürük akla Sokrat edip itinâ
Niçin bulmadı sağlığa bir devâ
- 3589 Şifâ etmedi İbni Sînâ'ya kâr
Écel bozdu Kânûn'unu şervâr
- 3590 Kosan bir gemiye hezârân hakîm
Otand u suturlâblar müstakîm
- 3591 Hudâ kim murâd etse bir pus ile
Görülmez harîta şaşar pusula
- 3592 Çıkarsa geminin önüne kara
Ne bok yer aceb fenn-i cogrâfiya
- 3593 Muvâfık hevâ esmese zevraka
Kumanya bitip sonra yerler kaka
- 3594 Mezârı degil âkilânın diğér
Felâtun u Kays'ı felek bir gömer
- 3595 Hakîm-i dilin nushun etdikde gûş
Fem-i itirâz oldu ol dem hamûş
- 3596 Dedim hak yedinde dil-i zârımın
Sözün tutmayam nefsi-i bed-kârımın
- 3597 Hudâ gamla gâhîce şâdân eder
Ümîd olmayan yerden ihsân eder

3598 Hudâ teng-i kâlâ-yı lutfun açâ
Demezler bunu kimden aldın kaçâ

3599 Hudâ vüsat-i rızkî etse murâd
Muhâfız olur kıştzâra cerâd

3600 Dedim ben bilir mi idim Hâlet'i
Nasîb oldu bunca bana nimeti

3601 Olunca gelip devlete kethudâ
Adın bilmez idim bilir kim Hudâ

3602 Gelüp nass-ı "hayrun leküm" yâdıma
Hemân emr edip kilik-i nâ-şâdıma

3603 Yazıldı şitâiyye bu arz-ı hâl
Kalem eyledi emrime imtisâl

Kasîde der-medh-i Sadr-ı azam Gâlib Muhammed Paşa

3604 Sunup cihâna felek su yerine kâse-i şîr
Gam-ı hasedle karardı zemîne ebr-i matîr

3605 Bürûdet öyle ki eyler zükâm inbîki
Aracla şule-i bârûtu eylesen taktîr

3606 Bürûdet öyle ki yah-beste oldu şîşe-i çerh
Şikeste olmağa az kaldı hem-çü sâgar-ı şîr

3607 Bürûdet öyle ki peykândaki şerâre için
Görüp hadengi urur kendi kendini nahcîr

3608 Döküldü penbe-i nâhîd destgâhından
Olunmamış seped-i âsumân meğer tamîr

3609 Zamâne eyledi ilbâs ferve-i kâkum
Hurûc-ı şâh-ı bahârı zemîn edip tebşîr

3610 Tiril tiril titirer serv ü bîdi kühsârın
Bu rûzgârda yeksândır civân ile pîr

3611 Bu yıl bahârı kim irvâ eder ki berf gibi
Döküldü yer yüzine pâre pâre ebr-i matîr

3612 Sokuldu havf-ı bürûdetle bîşezâra gazâl
Nigâhın etdi fetîl-i çerâğ dîde-i şîr

3613 Füsürde etdi şitâ âteş-i cünûnu dahi
Akîde şekkerine döndü halka-i zencîr

3614 Zemîni fasl-ı hazân eyleyip siyâh-kilîm
Şitâ sevâbına bahş etdi bir beyâz hasîr

3615 Sığındı kül kedisi gibi mâh-ı kânûna
Gazâl-i mihri ararsa nola felekdeki şîr

3616 İki kat oldu mecânîne gadri sermânın

- Tonup hevâda be-hem beste nâle-i zencîr
- 3617 Füsürde oldu hurûfât vasf-ı sermâdan
Meğer ki matla-ı dîgerle eyleyem tabîr
- 3618 Ne mümkün eyleme kilkim bürûdeti tahrîr
Midâdı münceîd eyler hevâda bâng-i sarîr
- 3619 Taraf taraf boşanıp bâm-ı külbe-i ahzân
Müşâbih oldu ser-i selsebîle mevc-i hasîr
- 3620 Dönünce gûy-i felek tûp-ı berf-i sıbyâna
Başımda eyledi tıfl-ı zamâne hurd u hamîr
- 3621 Şitâ bırakmadı efsürde olmadık âteş
Fakat bu sîne-i sûzâna etmedi tesîr
- 3622 O rütbe zulmet-i şeb kim cemî-i dâne-i berf
Nücûm olursa muhâl etme âlemi tenvîr
- 3623 Gumûmum oldu leyâl-i tavîleden efzûn
Bana görünmeyeli vech-i mihr-i âlem-gîr
- 3624 Felek ocağımı söndürdü bâd-ı hasret ile
Tüter gözümde der-i husrev-i sipih-r-serîr
- 3625 Ale'l-husûs ki ol dâver-i Süleymân-câh
Cenâb-ı Gâlib-i Âsaf-nazîri kıldı vezîr
- 3626 Hemân o âsaf-ı deryâ-nevâle gönderdim
Bu arz-ı hâlîmi eşkimle eyleyip tahrîr
- 3627 Sipihre gâlib-i mutlakdır emr ü nehyi ile
Ederse ger o eder necm-i bahtımı tenvîr
- 3628 Eyâ vezîr-i Aristo-nazîr-i râz-şinâs
Degil cenâbına mahfî sūrâdikât-ı zamîr
- 3629 Nuût-ı Mustafavî söyledim kitâb kitâb
Cerîde-i dehene kimse etmedi tastîr
- 3630 Zuhûr edince hemân hefve-i kümeýt-i kalem
O rahş-ı dil-keşi bir suçla etdiler teşhîr
- 3631 Medâyih-i şeh-i devrâna itinâen idi
Eğerçi olsa da tугyân-ı hame-i tahrîr
- 3632 Amân bulur o günehkâr kim olursa eğer
Melâzı gûşe-i dâmân-ı "tübtü min-taksîr"
- 3633 Günâh-kerde vü nâ-kerdeye degil ısrâr
Günâha kalmadı kudret be-hakk-ı Rabb-i kadîr
- 3634 Tonar kalır işiden serdî-i dil-i zârı
Nefesden olmasa efsürde ger leb-i takrîr
- 3635 Talar çıkar bat-ı âbî gibi nîgeh hayrân
Bu saydgâhda çeşmânım oldu iki gadîr

- 3636 Çözülmedi girih-i müşkil-i gam-ı hâtır
Şöküldü fart-ı bürûdetle nâhun-ı tedbîr
- 3637 Zalâm-ı bahtıma nisbetle leyle-i zalmâ
Verir dimâğ-ı sipihre safâ-yı kâse-i şîr
- 3638 Olur hevâda ayân kara kar yağar misli
Sevâd-ı bahtım ile mezc olursa ebr-i matîr
- 3639 Çerâğ-ı dîde-i gûl oldu râh-ı gamda dilin
Fenâr-ı âhım alıp gitdi nâle-i şeb-gîr
- 3640 İânet-i has u hâşâk-i gamla menfâda
Kütük ocağı gibi yanmada bu abd-i fakîr
- 3641 Bu vaz-ı bârid-i gerdûna kalmadı kudret
Götür de meclisine kendin et beni tekdîr
- 3642 İnâyet et acımazsan bana acı felege
Tutuşmadan şerer-i âhım ile çerh-i esîr
- 3643 Halâs eder beni ednâ işâret-i destin
Degil ki hakkıma dâmân-ı himmeti teşmîr
- 3644 Mehebb-i lutf u keremden eserse bâd-ı himem
Olur mu mevceye hâşâk-i bahr dâmen-gîr
- 3645 Hudâ bu hayr-i azîme seni muvaffak ede
Sebîl-i Hak'da ribât-ı derûnum et tamîr
- 3646 Elinde kâse-i deryûze âfitâb-ı felek
Ümîd-i zerre-i lutfun ile olur şeb-gîr
- 3647 Nola ederse gönül tûtiyâ-yi çeşm-i ümîd
Nigâh-ı lutfun eder sürme dîde-i iksîr
- 3648 Sen ol yegâne dür-i bahr-i âtîfetsin kim
Bu gün için seni saklardı hâzin-i takdîr
- 3649 Sen ol vezîr-i mekârim-semîrsin kim eder
Gürisne çeşm-i zamânı nevâl-i cûdun sîr
- 3650 Senin gibi hîred ü hem sadâkati câmi
Ne müsteşâr gelir dîn ü devlete ne müşîr
- 3651 Senin gibi ukalâdan vezîr-i zî-şânı
Ne gûne medh edebilsin girifte-i zencîr
- 3652 Medâyih-i diğerin ey semâ-yı mihr-i kerem
Bu matla ile debîr-i felek eder tahrîr
- 3653 Küşâde dergehidir mültecâ-yı bay u fakîr
Meğer ki dâne-i altun ile çeke zencîr
- 3654 Dü çeşm-i Hâtem-i Tâyî ki iki halkasıdır
Cebîn-i Cafer-i Bermek o derde nakş-ı hasîr

- 3655 Açar dil-i zuefâyı nesîm-i merhameti
Eder merâmın edâ ana gonca-i tasvîr
- 3656 Suhanda çihre-nümâ olmadan netîce dahi
Olur zamîr-i secencel-nazîri aks-pezîr
- 3657 Olur derûnuna vâsıl bihâr-ı manânın
Telâtum eylemeden mevce-i leb-i takrîr
- 3658 Ciğer-şikâf-ı adû eyledikce hâmesini
Midâd-ı surhu olur gıpta-i dem-i şemşîr
- 3659 Amûd-ı subh gibi hâme-i zer-efşânı
Eder dil-i fuzalâ-yı zamâneyi tenvîr
- 3660 Beyâz-ı mıstar-ı hattı safâ-yı sîne-i hûr
Sevâd-ı noktasıdır hâl-i dil-ber-i Keşmîr
- 3661 Çerâğ-ı hâsı olan perteve nazîr olamaz
Felek utârıdi etmiş bulundu hayf debîr
- 3662 Ricâl-i saltanatın ekserisi bendesidir
Cihânı etse revâ hüsn-i hulku ile esîr
- 3663 Olursa nakş-ı nigîn-i şerîfî şâyeste
Muîn-i devlet ü dîn merd-i sâhibü't-tedbîr
- 3664 Yazılsa böyle revâ tâk-ı bâb-ı âlîye
Güzîde-i vüzerâ sadr-ı vâcibü't-tevkîr
- 3665 Safâ-yı menkabetiyle nihâl-i hâme nola
Şitâda gül gibi eyleyse bir gazel tahrîr
- 3666 Soguk nevâ ile bitmez nazîreye âgâz
Meğer ki âmedi-i pür-hüner ede tanzîr
- 3667 Yapıldı safha-i timsâle berfden nice şîr
Sakır sakır titirer görse âhû-yı tasvîr
- 3668 Bürûdet eyledi âgûş-zîbim ol mâhı
Bu rütbe âteş-i âhımda görmedim tesîr
- 3669 Güşâde gonce görülmüş degil zemistânda
Sanır o şûhu yanımda gören gül-i tasvîr
- 3670 Bu alkış ile çıkar yaza bülbül-i dil-i zâr
Bahâra eyledi goncam visâlini tehîr
- 3671 Nola o meh hazer etmezse dûd-ı âhımdan
Kışın buhârdan olmaz hirâs-ı bedr-i münîr
- 3672 Soguk bakar o perîveş tutuşsa âşık-ı zâr
Buhûr-ı âhını efsûn sanıp olur dil-gîr
- 3673 O sîm-gerdene meşşâta reng ü bû vermiş
Beyâz-ı berfî edip yâsemen ile tahmîr
- 3674 Gazel zamânı degil etme İzzetâ tacîz
Umûr-ı devlete meşgûldür cenâb-ı müşîr

- 3675 Dü dest-i daveti ref eyle bâb-1 Mevlâ'ya
Hemîşe ola yed-i kudreti zahîr ü nasîr
- 3676 Cihânda tâ ki bürûdet gehî harâret olup
Mizâc-1 unsur-1 âfâka eyleye tesîr
- 3677 Adûların ola bâd-1 hazân-1 kahrı ile
Bahâr u sayfları vakt-i zemherîre nazîr
- 3678 Mizâc-1 devletine Çâr-bâğ-1 râhat ede
Şitâ vü sayf u hazân u bahârı Rabb-i kadîr
- 3679 Muhakkar ola adû âsaf-1 zamân gâlib
Sezâ bu mısraı cevherle etseler tahrîr (= 1239)
- 3680 Görüp arz-1 hâlim o sadr-1 be-nâm
Açılmış dili hem-çü bedr-i tamâm
- 3681 Gül-i hâtırın eşkim etmiş küşâd
Dedim çeşmime çok yaşa gör murâd
- 3682 Mezâmîn-i şettâ-yı vakt-i şitâ
Isındırmış ol sadr-1 asrı bana
- 3683 Degil berf gerdûn düşüp çâreme
Meğer penbe arz eylemiş yâreme
- 3684 Degil berf macûn-1 âb-1 bekâ
Nice derdime buldum andan devâ
- 3685 Degil berf esfid-i subh-1 ümîd
Sevâd-1 gamı eyledi nâ-be-dîd
- 3686 Degil berf ruhsat misâli imiş
Beyâz üstüne emr-i âlî imiş
- 3687 Murâd eyleyince cenâb-1 Hudâ
Verir serdi-i hicre buzla şifâ

Afv u merhamet-i pâdişâh-ı cihân

- 3688 Edip afvımı sadr-1 azam recâ
Şehenşâh-1 devrâna almış duâ
- 3689 Buyurmuş ki olsun sebîli küşâd
Derûnum gibi feth ola her bilâd
- 3690 İşâret edip şeyhü'l-islâm-1 asr
Înâyât-1 Mevlâ'ya yok hasr u kasr
- 3691 Verip kethudâ beg haber hâneme
Bırakmış temel lutfu vîrâneme
- 3692 Odur sâdık-1 devlet-i pâdişâh
Ede ömr ü ikbâlin efzûn İlâh
- 3693 Edip ertesi emr-i âlî zuhûr
Devâcîn-i beyt eylemişler huzûr

3694 Alıp emr-i şâhenşehi bir uşak
Hemân eylemiş azm-i râh-ı meşâk

Vürûd-ı emr-i âlî-şân

3695 Sehergeh biri geldi gam-hâneme
Cevâhir nisâr etdi virâneme

3696 Dedi ey garîk-i yem-i ibtilâ
Uzatdı Hudâ dest-i lutfun sana

3697 Yeter renciş-i dest ü pâ-yı taleb
Göründü kenâr-ı inâyât-ı Rab

3698 Verip müjde ol Hızır-ı ferruh-likâ
Zuhûr etdi ardınca peyk-i safâ

3699 Uşak emr-i âliyi almış ele
Öpüp anı aldım maa'l-besmele

3700 Çıkınca o nakd-i safâ kîseden
Yeni iştirâ eyledi cânı ten

3701 Degil emr-i âlî berât-ı emân
Safâ-yı derûn kâğıdında nişân

3702 Nigâh eyleyen âşık-ı bî-nevâ
Şikencin sanır cebhe-i dil-rübâ

3703 Olup resm-i hûsında hayrân gözüm
Hemân lafzatu'llâh idi her sözüm

3704 Bakıp şâhımın resm-i tuğrâsına
Nazar eyledim sanki sîmâsına

3705 Olup çeşm-i giryân o dem dür-feşân
Cevâhirlle tarsî olundu nişân

3706 Su gibi revân oldu gözden keder
Ne âlâm kaldı ne hod derd-i ser

3707 Dedim yâ Rab olsun şehenşâh-ı dîn
Benim gibi havf etdiginden emîn

3708 Cihânda keder görmesin ben görem
Çekip ben gumûmun anı şen görem

3709 Hudâvendgâr-ı keremkârdır
Süleymân gibi bir cihândârdır

3710 Ne dersem o şâha degildir riyâ
Bilir anı dânen-de-i her-hafâ

3711 Vücûd-ı hümâyûnudur mültemes
Ben ansız hayât istemem bir nefes

3712 Lüzûmu anın dîne der-kârdır
Benim gibi yüz bin dahi vardır

3713 Füzûnter ola gün-be-gün şevketi
Ede âfitâbı hacil şöhreti

Sohbet-i halvâ ve hareket ez-menfâ

3714 Duâ-yı şehenşâhı etdim tamâm
Hemân eyledim hânekâha hirâm

3715 Olup tekye-i Zâti'ye mîhmân
Sitanbul'a eşyâyı etdim revân

3716 Ne kalmış ise zâd-ı mevcûddan
Bekâyâ-yı ihsân-ı Mabûddan

3717 Ahâlîyi ol gece davet edip
Ne var ise bezl-i ziyâfet edip

3718 Gelip her biri etdi hakkın helâl
O şeb tekye olmuşdu mahşer-misâl

3719 Müheyyâ idi tekyede şeyh ü şâb
Tulû etmemişdi dahi âfitâb

3720 Sürüp kabr-i kutb-ı Keşan'a yüzüm
O iksîri kuhl eylemişdi gözüm

3721 Bir iki meşâyihden âdem ile
Dil-i zâr ile çeşm-i pür-nem ile

3722 Kapandım hemân merkad-i pâkine
Su verdim sirişkim ile hâkine

3723 Bulup anda neşv ü nemâ nahl-i kâm
Yiyip mîvesin lezzet almışdı kâm

3724 Diyip şeyh-i dergâh el-fâtiha
Cihân okudu açıp el fâtiha

3725 Ahâlî bükâ eyleyip sû-be-sû
Zemîn-i niyâza döküp âb-ı rû

3726 Çıkıp resm-i teşyîime cû gibi
Uzunköprü'ye akdılar su gibi

3727 Yanaşdırdı gerdûnesin âsumân
Ber-â-berce mihr ile oldum revân

3728 Edip sâye-i şehde bezl-i kerem
Yerin buldu şân-ı veliyyü'n-niam

3729 Şehenşâh-ı asrın bu ednâ kulu
Gözetdikce lutfuyla sağ u solu

3730 Ne bînâlar olmuşdu giryeyle kûr
Niçe kûrlar açdı çeşm-i sürûr

3731 Teşekkür edip evvel Allâh'ıma

- Duâ eyledim şâh-ı Cem-câhıma
 3732 Dedim tahtgâh-ı kadîmi görem
 Kühen-cây-ı ecdâdına yüz sürem
 3733 Yazıp kand-i âsâr-ı ecdâdını
 Verem Edrine şehrinin dadını
 3734 Devâsıyla nazmım olup müşk-i nâb
 Anınla hitâma ere bu kitâb
 3735 Edip hokkamı reşk-i zarf-ı laûk
 Ola mısraım misk-i evsâfa sûk
 3736 Kuzu göbengin nâf-ı âhû edem
 Abîr ile sâbûnu hem-bû edem
 3737 Yazar gerçi Nefi-i muciz-beyân
 Edip vasfını reşk-i bâğ-ı cinân
 3738 Dedim eyleyem ber-sebîl-i murâd
 Biraz cûy-ı evsâfını ben de yâd

Merhale-i Cisir-i Ergene

- 3739 Azîmet edip niyyet üzre hemân
 Göründü Uzunköprü çün ebruvân
 3740 Atâ Beg imiş beldenin nâibi
 Bana karşıcı yollamış kâtibi
 3741 Mekânım idi ol gece mahkeme
 Penâgâhım olsun şerîat heme
 3742 O mîr-i mükerrerem edip ihtirâm
 Seher vakti köprüye etdik hırâm
 3743 O pül eylemiş iki kühsârı bend
 Dü şîre atılmış gibi bir kemend
 3744 Hezârân göz çeşm-i âşık gibi
 Bükâ etmede Kays u Vâmık gibi
 3745 Basıp bağına taş o nehr-i azîm
 Gözünde degil lutf-ı çerh-i leîm
 3746 Degil pül gelip sevr-i hâke girân
 Görünmüş miyânındaki üstühân
 3747 Ne lâyık demek ana gerdûn-nişân
 Sıgar her gözüne birer âsumân
 3748 Denilmez o köprüye gerdûn-misâl
 Anın altı semdir bununki zülâl
 3749 Geçermiş bu yoldan ederken sefer
 İkinci Murâd ol şeh-i dâdger
 3750 Binâ etmiş anı o cennet-mekân

Ola râm ana nehr-i sÿy-ı cinân

- 3751 Geçip anı gerdûne ile seher
Sanırdım ki etdim sipihri güzer
- 3752 Benim çünkü mihr-i maârif-eser
Benimle felekler ber-â-ber gezer
- 3753 Hemân bir iki sâat oldum revân
Meriç oldu nehr-i cinânveş ayân
- 3754 Kenârında gâhî olup kahve-nûş
Olurdu yem-i neşe deryâ-hurûş

Dârü'l-meymene-i Edirne'ye duhûlümüzdür

- 3755 Edip her taraf sîr sun-ı Hakîm
Göründü Edirne o şehri azîm
- 3756 Sitanbul'u gördüm kıyâs eyledim
Cenâb-ı Hudâ'ya sipâs eyledim
- 3757 Ne gördüm ki bir fırka bostâniyân
Turur reh-güzârımda çün gülsitân
- 3758 Gelip dedi bir bülbül-i hoş-nevâ
Selâm etdi bostancıbaşı sana
- 3759 Müsellimdir ol zâde-i şeh-süvâr
Müsellemdir ana bu şehri ü diyâr
- 3760 Mekânıdır anın serây-ı vezîr
Taâma sizi bekler anda o mîr
- 3761 Pes ü pîşimi aldı bostâniyân
Göreymiş şu ikbâlimi düşmenân
- 3762 Duhûl eyledim şehre alay ile
Aceb tarz u tavr-ı dil-ârây ile
- 3763 Serây-ı vezîre varınca yakın
Zuhûr etdi bir niçe müstakbilîn
- 3764 Bırakdım binip rahşa gerdûneyi
Ederdim murâd eylesem her neyi
- 3765 Olup çeşme Paşakapısı ayân
Sitanbul'daki bâbı sandım hemân
- 3766 Müsellim gelip nerdübân başına
Kapı halkı indi binek taşına
- 3767 Edip hürmet ol mîr-i dervîş-hû
Bilip kadrime eyledi ser-fürû
- 3768 Oturduk o gün anda ahşama dek
Uzatmış idik sohbeti şâma dek

- 3769 Edip badehû istirâhat taleb
Dedi vâkıâ çekdiniz çok taab
- 3770 Gediklilerinden birin istedi
Serây-ı hümâyûna azm et dedi
- 3771 Açıp bir ota eyleyin ihtimâm
Ola tâ ki bu zâta ikrâm-ı tâm
- 3772 Dedi taht-ı nazma bu sultândır
Sarây-ı hümâyûna mihmândır
- 3773 Misâfir ki vassâf-ı hâkân ola
Sezâdır sarâyında mihmân ola
- 3774 Katıp yanıma bir iki bendesin
Çıkıp etdi teşyî şermendesin
- 3775 Sarây-ı hümâyûna oldum revân
Bana oldu dünyâda cennet ayân
- 3776 Nola bendesi etse ol câyı cây
Efendim sarâyı idi ol sarây
- Evsâf-ı Sarây-ı Edirne**
- 3777 Edirne sarâyı diğér bir cihân
Cihânla eder Tunca kat-ı miyân
- 3778 Gören cedvel-i sîm ile der hemân
Yeşil safhada nüsha-i Gülsitân
- 3779 Binâsı Sarây-ı hümâyûn gibi
Biribirine beyt-i merhûn gibi
- 3780 O bâğın da Gülhâne Meydânı var
Hezârân gülü var gülistânı var
- 3781 Ne varsa Sitanbul'dan alâsı var
Bu dünyâda bir başka dünyâsı var
- 3782 O eşcâr-ı mülteffetü's-sâklar
Niçe erguvânlar ne leylâklar
- 3783 Hezârân tâkı felek-iştibâh
Görenler harâb oldugun eyler âh
- 3784 Cihân-bîni var kim felekden bülend
Eder turreşi zühreye rîş-hand
- 3785 Kusûr-ı metîni o rûtbe metîn
Yıkılmaz yıkıldıkda belkim zemîn
- 3786 Soyup üsrübün düzdveş rûzgâr
Kıbâbın fakat etmemiş târ u mâr
- 3787 O gülzârı Tunca edip çâk çâk
Yaka yakaya gelmiş âb ile hâk

- 3788 Yapılmış muallâ niçe dâire
Gelir âsumân hâtır-ı zâire
- 3789 Niçe havz-ı sâf u niçe selsebîl
Mizâcıyla memzûcdur zencebîl
- 3790 O hammâmlar kim cihân gülşeni
Sezâ bülbül olsa gelip külhanî
- 3791 Şehenşâh-ı devrâna lâyıık sarây
Eğer bassa şevketle bir kerre pây
- 3792 Cihân gibi mamûr eder anı da
Benim gibi mesrûr eder anı da
- 3793 Misâfir olup anda beş gün tamâm
Edirne sarâyın gezerdim müdâm
- 3794 Çıkardım gehî şehri seyrân için
Ederdim nevâ ol gülistân için
- Sıfat-ı şehir-i Edirne**
- 3795 O şehrin felekveş iki kutbu var
Nola rifati olsa gerdûn-medâr
- 3796 Birisi Enîs-i dil-i âşıkân
Birisi Sezâyî-i muciz-beyân
- 3797 Ziyâret edip ibtidâ anları
Sevindim görüp tekyede cânları
- 3798 Cenâb-ı Enîs'in alıp himmetin
İşitdim Sezâyî ile sohbetin
- 3799 Cihânın gamından bulup râhati
Ederlerdi kabr içre cân sohbeti
- 3800 Gam-ı âlemi terk edip bizlere
Komuşlar sözü ikisi bir yere
- 3801 Alıp neşesin âlem-i vahdetin
İçerlerdi câmin dem-i vahdetin
- 3802 Dedim bana bir câm Allâh için
Derûnumdaki âteşin âh için
- 3803 Dediler bu mey-hânenin bâdesi
Zarardır içilmez susuz sâdesi
- 3804 Sırışk olmayınca içilmez o mey
Katılmaz o sahbâyâ bir başka şey
- 3805 Alıp bu peyâmı hemân ağladım
Bakıp hâlîme karalar bağladım
- 3806 Dedim bir gün olsun zahîrim olun
Dem-i vâ-pesîn dest-gîrim olun

- 3807 Dediler kim ikrârına kıl sebât
Erenler verir sana âhir necât
- 3808 Dedim Hak taâlâ muhakkak ede
Kapınızda abd-i muvaffak ede
- 3809 Aceb zâtlar pîr-i dergehleri
Gedâ sûretinde idi şehleri
- 3810 Edip her biri ile aşk u niyâz
Duâ etdiler ol iki ser-firâz
- 3811 Kabûl eyledim lutf u himmetlerin
Penâh eyledim bâb-ı devletlerin
- 3812 Ziyâret edip bunları ibtidâ
Selîmiyye'de zuhru etdim edâ

Sıfat-ı Câmi-i Selîmiyye

- 3813 Selîmiyye ol câmi-i dil-güşâ
Tamâm eylemiş beldeyi rûşenâ
- 3814 Ne câmi ki cem olsa mecmû-ı hayr
Yanında döner hîçe âsâr-ı gayr
- 3815 Nola eylese çerhi dehşet-zede
Yıkılmış yapıldıkda bin bütke
- 3816 Şuâ-ı alem sanma pertev-feşân
Ser-i çerha mimârı dikmiş sinân
- 3817 Ne kubbe habâb-ı yem-i mağfîret
Olur çeşm-i mîzân dem-i mağfîret
- 3818 Ne kubbe zemînde diğêr âsumân
Mesâbîh-i rahşânı kevkeb-nişân
- 3819 Ne ebvâb bâb-ı bihişt-i berîn
İki halkası dîde-i hûr-ı în
- 3820 Ne mihrâb ebrû-yı ehl-i hüdü
Fürûzende-i şemi nûr-ı Hudâ
- 3821 Ne minber bükülmüş kadi nâzdan
Geçince sipihr-i ser-efrâzdan
- 3822 Ne kürsî sipihr-i sevâbit gibi
Gerek vâizi İbni Sâbit gibi
- 3823 Ne kürsî o peş-tahta-i âbnûş
Olur vâiz andan cevâhir-fürûş
- 3824 Ne mahfil müezzîn olursa sezâ
Koyup gülbünün bülbül-i hoş-nevâ
- 3825 Ne mahfil o kasr-ı bihişt-i berîn
Akar idi tahtında mâ-i maîn

- 3826 Gelir hâtıra revzeninden tamâm
Aleyhi's-salât üzre elfü's-selâm
- 3827 Alaldan beri bülbül-i dîn nefes
Yapılmış degil öyle zîbâ kafes
- 3828 Minârât-ı çârı mezâhib gibi
Tarîk-i hüdüda merâtib gibi
- 3829 Birinin yolu şerfesi gibi üç
Gelir gerçi bennâ-yı akla bu güç
- 3830 Turuk olsa da sûretâ zâide
Çıkar her biri matlab-ı vâhide
- 3831 Hezâran da olsa reh-i ictihâd
Hudâ'dır Hudâ'dır Hudâ'dır murâd
- 3832 Düşünsen bu remzi eder bî-gümân
İmâmeyn ile İbni Sâbit beyân
- 3833 O firdevsi yapmış Selîm-i halîm
Ola ana cennetde kasr-ı azîm
- 3834 Olup vâkîf-ı müjde-i "men benâ"
Cinân içre ol tâkî kılmış binâ
- 3835 Görülmüş degil zîr-i nüh-kubbede
Arar mislini pîr-i nüh-kubbe de
- 3836 Anın olsa vasfında sanman yeter
Ser-â-pâ bu manzûme-i muhtasar
- 3837 Tolaşdı zebâna sözüm halkaveş
Kapısında kaldı gözüm halkaveş
- 3838 Temâşâsını terk emr-i muhâl
Ne mümkün ki gelsin nigâha kelâl
- 3839 Düşürdüm dili dûzeh-i fûrkate
Vedâ eylemiş yog iken cennete
- 3840 Düşüp sûka dîvâneveş serserî
Temâşâ ederdim gezip her yeri
- 3841 Bedestân gibiymiş o şehri cesîm
Derûnunda var niçe sûk-ı azîm
- 3842 O şehrin niçe cây-ı mamûru var
Ez-ân-cümle bir sûk-ı meşhûrî var
- Sıfat-ı Çâr-sûy-ı Alî Paşa**
- 3843 Alî-nâm paşa binâ eylemiş
Kıbâbın felek-itolâ eylemiş
- 3844 Olur iki gerdûne geçse revân
Biri olsa gerdûne-i âsmân
- 3845 Ser-â-pâ dükân-ı cevâhir-fürûş

- Güher tabım âsâ ederdi hurûş
- 3846 Cinân görse dükkân-ı attârını
Ferâmûş eder bûy-ı gülzârını
- 3847 Açılmış be-her gûşede teng teng
Gülistân gibi kâle-i sürh-reng
- 3848 Tuhefcilerin öyle kim zîneti
Sanırsın ki İngiltere devleti
- 3849 Mücellidleri bir kitâb etse zeyn
Ederler mehi şemse-i deffeteyn
- 3850 Müzehhibleri etse tahrîr-i şeb
Kevâkib için mihrî eyler zeheb
- 3851 Musavvirleri etse tasvîr-i rûz
Eder mihr ile meh ber-â-ber bürûz
- 3852 İçinde var envâ-ı ehl-i hıref
Bedestân gibi bir degil her taraf
- 3853 Bulursun ne kim arasan bî-bahâ
Bulunmaz fakat dil-berinde vefâ
- 3854 Kimi müslümân kimi kâfir-beçe
Oturmuşdu bir niçe tâcir-beçe
- 3855 Alıp hîçe âşıkların cânını
Satarlardı kırmızı diyü kanını
- 3856 Gelip cûşa şerbet-fürûşân-ı sûk
Kapağı atardı hasedden laûk
- 3857 İkindiye dek anda ârâm edip
Safâ-yı derûn ile ahşam edip
- 3858 Edip asrı Üçşerfeli'de edâ
Varıp Eskicâmi'de etdim duâ
- 3859 Görüldü dahi niçe âlî eser
Sitanbul'dan belki efzûnter
- 3860 Gönül uysa ger nefsin ibrâmına
Soyunmuşdu Oglanlı Hammâmı'na
- 3861 Yayan seyr olunmuşdu her cânibi
Görenler sanırdı ayak nâibi
- 3862 O rütbe zukaklarda oldum devân
Mahallâtda sandılar pâsbân
- 3863 Vücûh-ı vilâyet ziyâfet edip
Bu ednâya alâsı hürmet edip
- 3864 Husûsâ Reşâd-ı hüner-perverân
Anın ile fahr eylesin h'âcegân

- 3865 Beni bir gece mihmân eyledi
Riâyet edip şâdmân eyledi
- 3866 Yine avdet etdim sarâya o şeb
Anın hintovuyla gelip bî-taab
- 3867 Seher vakti bostâncıbaşı ağa
Tulû etdi mânend-i mihr-i safâ
- 3868 Sarây oldu müstevdiîn ile pür
Tuyulmuş meğer oldugum pey-sipür
- 3869 Tedârik olunmuş münâsib devâb
Uşaklar o dem oldular râh-yâb
- 3870 Bulunmaz iken bende her bâr esb
Hudâ verdi gerdûne-i çâr-esb
- 3871 Müsellim beg etdi vedâî tamâm
O Paşakapısı'na etdi hırâm
- 3872 Teveccüh edip ben de İstanbul'a
Hayâl-i vatan ile düşdüm yola

Merhale-i Havsa

- 3873 Duhûl eyledim öyleyin Havsa'ya
Sürüldüm kıyâs eyledim Mavsa'ya
- 3874 O câyn çok evsâf-ı menhûsesi
Sezâ dense Rûmeli Magosa'sı
- 3875 Aceb yer zamân u zemîni sakîl
Hulâsa mekân u mekîni sakîl
- 3876 Müferrihce bir iki üç hânı var
Velâkin karâra kimin cânı var
- 3877 Uyurdu dahi mihr-i gerdûn-medâr
Sabâh olmadan eylemişdim firâr

Merhale-i Babaeskisi

- 3878 Göründü yol üstünde bir hânekâh
Babaeskisi'ymiş o ârâmgâh
- 3879 Müferrihce bir yer hevâsı latîf
Gubâr-ı kederden fezâsı latîf
- 3880 O baba kim ise büyük zât imiş
Bilâ-şübhe sâhib-kerâmât imiş
- 3881 Makâmı olup zirve-i kûhsâr
Nümâyân idi ol alemde kenâr
- 3882 Olundu o şeb anda hatt-ı rihâl
Beni seyre geldi inâs u ricâl
- 3883 Tutup Rûmeli ülkesin şöhretim

Bilirlerdi meşhûr olan İzzet'im

Merhale-i Burgaz

- 3884 Sürüp ertesi Lüleburgazı'na
Yolun bakmadım çoğuna azına
- 3885 O gün Lüleburgazı oldukda cây
Uzanmışdı çûb-ı duhân gibi pây
- 3886 Gezip ol diyâr-ı neşât-âveri
Ne gördüm ki bir lûleci dil-beri
- 3887 Dedi kim efendi dükâna buyur
Cevâhir dilersen bu kâna buyur
- 3888 Dedim hüsnünü Hak ziyâd eylesin
Niçe âşıkı ber-murâd eylesin
- 3889 Oturdum dükânında ahşama dek
Anı dahi çok gördü çeşm-i felek
- 3890 Olup mihr-i ruhsârı gözden nihân
Şeb-i fûrkat erdi kapandı dükân
- 3891 Edip hâna üftân u hîzân hırâm
Yine uyhuyu çeşme etdim harâm
- 3892 Reh-i mihnete düşmesin ez-kazâ
Gönül kanda varsa bulur bir belâ
- 3893 Halâs eyledim güç belâ cânımı
Edip pâre pâre girîbânımı
- 3894 Düşüp Çorlu'nun kırlarına yayan
Ne gerdüne kaldı ne nâm u nişân
- 3895 Diğêr Kays'ı yokmuş o deştin meğêr
Bana münhasır oldu gerd-i keder
- 3896 Gönül bilmeyip anda yorgunlugun
Safâsın çıkarmışdı mecnûnlugun

Merhale-i Çorlu

- 3897 Meğêr girmişim Çorlu meydânına
Oturdum hemân yan gelip hânına
- 3898 Görürdüm ahâlî geçip fevc fevc
Ururlardı su gibi meydânda mevc
- 3899 Dedim ben de seyr eyleyem su gibi
Katıp anlara kendimi cû gibi
- 3900 Edip çâr-sûsunda geşt ü güzâr
Göründü o dem çeşme bir çeşmesâr
- 3901 Meğêr şâh-ı âlem binâ eylemiş
Bu kemter kulu da senâ eylemiş

Sıfat-ı çeşmesâr-ı şâh-ı cihân

- 3902 Degil çeşme bir şâir-i hoş-beyân
Suyu nutk-ı İzzet gibi râyegân
- 3903 Degil çeşme bir tıfl-ı şîrîn-dehen
Gümüşden dökülmüş ser-â-pâ dehen
- 3904 Ne çeşme açar sâgar-ı mihre dâğ
Elin çeşmesârı yanında ayag
- 3905 Ne çeşme amûd-ı sabâh-ı emel
Verir çeşm-i hûrşîde reşki sebel
- 3906 Birisi gelip çeşmenin başına
Nigâh etdi târîhimin taşına
- 3907 Dedi kim bu İzzet aceb kim ola
Bana anı tavsîf edersen n'ola
- 3908 Dedim şâir-i şâh-ı âlemdir ol
Aceb bana benzer bir âdemdir ol
- 3909 Dedi kim Keşan'da biri var imiş
Esîr-i sitem bend-i ekdâr imiş
- 3910 İşitdik anındır diyü bu sözü
Sözüne aceb kim uyar mı özü
- 3911 Dedim hem sözü hem özü pâkdir
Suhan-perver-i sâhib-idrâkdir
- 3912 Dedi kim sakın olmayın siz o zât
Bu günlerde bulmuş diyorlar necât
- 3913 Dedim kim o bî-çâre İzzet budur
O matrûd-ı dergâh-ı devlet budur
- 3914 Ahâlîye vermiş haber der-akab
Vücûhu benim seyrime geldi hep
- 3915 Kimi destim öpdü kimi pâyıımı
Değişdirdiler hândaki câyıımı
- 3916 Kimi süd getirdi kimi mestebâ
Yine şâh-ı devrâna etdim duâ
- 3917 Eğer olmasa şâh-ı sâhib-eser
Kemâlimden almazdı dünyâ haber
- 3918 Memâlikde âsârı pür-iştihâr
Nola eylesem ben dahî iftihâr
- 3919 O hâkân ne kim eylediyse binâ
Anın vafını kıldı fermân bana
- 3920 Nola söylenirsem o sultân ile
Anılmaz mı nemle Süleymân ile

3921 Hulâsa edip Çorlu'yu h'âbgâh
Seher vakti çıkdık be-lutf-ı İlâh

Merhale-i Silivri

3922 Silivri'ye sevk-i metâyâ edip
Temâşâ-yı feyfâ vü sahrâ edip

3923 O şeb anda kaldık edip tayy-ı râh
Çıkıp tahtına şâh-ı encüm-sipâh

3924 Revân oldu mihr-i sipihr-i hüner
Sürâğ eyleyip âfitâbı seher

3925 Büyükçekmece kânı kıldı zuhûr
Duhânî kim etmişdi vasfı mürûr

3926 O kâfir yakıp bir niçe hân-mân
Satarmış yine âhımızdan duhân

3927 Olup hattı bahtımdan efzûn siyâh
Bakıp rûyuna eyledim âh u vâh

3928 Gül-i bâğını hârlar kaplıyor
Yine âşika tîrler saplıyor

3929 Hatı gülşen-i hüsnün etmiş harâb
Yine bülbülün eylemekde kebâb

3930 Götürsem dedim anı İstanbul'a
Yine çıkma lâzım gelir bu yola

3931 Hased eylemez olmaz ol mehveşe
Yakarlar yeniden beni âteşe

3932 Alıp der-akab aklımı başıma
Kanâat edip yâr-ı pâdaşıma

3933 Çözüldüm o zülf-i siyeh-tâbdan
Ayıldım uyanmış gibi h'âbdan

3934 Degildim o mehle eden ben vedâ
Ederlerdi cânım ile ten vedâ

Merhale-i Küçükçekmece

3935 Küçükçekmece câyım oldu o şeb
Hitâma erişdi tarîk-i taab

3936 Olup ârzû-yı vatan reh-berim
Sanırdım ki var idi bâl ü perim

3937 Sitanbul'a azm eyledim çın seher
Yenikapı Dergâhın etdim makar

3938 O dergehdir eski penâhım benim
Odur gâyet-i resm ü râhım benim

3939 Murâdım kerem kıldı Rabb-i sahî

Ziyâret ile türbe vü matbahı

- 3940 Edip şeyh efendiye aşk u niyâz
Duâ etdi ol mürşid-i ser-firâz
- 3941 Öpüp destini azm-i râh eyledim
Der-i pâdişâhı penâh eyledim
- 3942 Bin iki yüz otuz tokuz idi sâl
Resîd oldu encâma bu hasb-i hal
- 3943 Sitanbul'a geldikde abd-i fakîr
Tamâm oldu nisf-ı cumâd-ı ahîr

Âsitâne-i aliyeye duhûlümüzdür

- 3944 Yenikapı'dan şehre etdim duhûl
Yine bâb-ı ihsâna oldum müsûl
- 3945 Görüp şehir-i İstanbul'u pür-safâ
Şehenşâh-ı devrâna etdim duâ
- 3946 Olup felke-i iştiyâka süvâr
Zuhûr etdi bu cevher-i âbdâr

Kasîde

- 3947 Şehr-i İstanbul mu bu yâ başka bir dünyâ mıdır
Yohsa evvel gördüğüm bir korkulu rüyâ mıdır
- 3948 Mahşer-i feryâd-ı rustâhîz-şîven her günü
Şübhe eylerdik cihân dünyâ mıdır ukbâ mıdır
- 3949 Pây-mâl olmuş idik ser-gerdegân-ı fitneye
Kimse bilmezdi müderris mi ya bu mollâ mıdır
- 3950 Fevc fevc esvâk-ı şehri geşt edip yağmâgerân
Biribirinden sorarlardı bu gün yağmâ mıdır
- 3951 Akla yelken eyleyip derdim o bahr-i fitnede
Yâ firâr etmek ya hod nefy olmamın eyyâmıdır
- 3952 Nefy olup bir yıl kadar geldim yine İstanbul'a
Bana bu baht-ı siyâhın bir büyük ikrâmıdır
- 3953 Şübhe îrâs eyledi sürhî-i seng-i reh-güzâr
Mevce-i yâkût mu yohsa dem-i adâ mıdır
- 3954 Kârbân-ı neşe mi geçmiş Sitanbul'dan aceb
Yâ ki her bir çeşmesârından akan sahbâ mıdır
- 3955 Bilmedim hâk-i vatan mı cevher-i cân mı nedir
Tûde-i müşk-i Hoten mi anber-i sârâ mıdır
- 3956 Anber olmuş mevcesi leb-rîz-i gevher lüccesi
Bilmedim ben Türkçesi kim bildigim deryâ mıdır
- 3957 Nimet-i leb-rîz ile Bogaziçi dil-sîr-i şevk

- Tolmabâğçe fark olunmaz sufre mi sahbâ mıdır
- 3958 Feyz-i cennet bulmuş ol gülzâr kim şekk eyledim
Kâkülün havrâ mı dökmüş sünbül-i bûyâ mıdır
- 3959 Al basmış gülşeni ser-sufre-i işret gibi
Gel de seyr et câm-ı gül-gûn mu gül-i zîbâ mıdır
- 3960 Bülbül-i hüşyâr yok kim eyleyem andan suâl
Sâgar-ı sahbâ mı bunlar gonçe-i ranâ mıdır
- 3961 Geh çemenzârın gehî enhârını seyr eyleyip
İştibâh etdim ki resm-i gülşen-i mevâ mıdır
- 3962 Geh açardım ayn-ı dikkat nergis-i şehlâsına
Geh yumardım çeşmimi derdim yine rüyâ mıdır
- 3963 Ugradım bir müzdehimgâha kenâr-ı bâğda
Söylemez bir kimse kim mahşer midir sahrâ mıdır
- 3964 Anda bir Kasr-ı safâ gördüm Bayıldım nâmına
Benzemez dünyâya bilmem cennet-i ala mıdır
- 3965 Sâye-i rûzî-resânı gördüm iftâriyyede
Rûzedâr-ı hicrinin bugün büyük bayramıdır
- 3966 Ser-be-ser âfâka neşr etmiş fûrûg-ı şevketin
Fark olunmazdı güneş mi ol melek-sîmâ mıdır
- 3967 Hazret-i Mahmûd Hân kim dergeh-i vâlâsına
Ser-fürû-yı âsmân bir rûtbe-i ulyâ mıdır
- 3968 Bendeler var kim o şehde çerhi istihdâm eder
Pâyesi andan müneccimbaşının ednâ mıdır
- 3969 Mihr-i evc-ârây-ı kudret kim felek fark edemez
Tîgi mi ol kahramânın gurre-i garrâ mıdır
- 3970 Öyle tathîr eylemiş kim âb-ı tîgi mülkünü
Kim gören der cennet-i firdevs yâ mevâ mıdır
- 3971 Eşkîyâyı öyle nâ-bûd eylemiş şemşîri kim
Fitne bilmez kendini peydâ vü nâ-peydâ mıdır
- 3972 Tevsen-i tebdîline istermiş olmak gâşiye
Tur bakalım atlas-ı gerdûn ana ahrâ mıdır
- 3973 Bir sıtablındır ikisi fark olunmaz bindigi
Ablak-ı gerdûn mudur rahş-ı felek-peymâ mıdır
- 3974 Husrev-i Sıddîk-ihsân kim nihânî lutfunu
Desti tuymaz kân mıdır bezl etdigi deryâ mıdır
- 3975 Lutfunu deryâyâ teşbîh eyleyen eyler hatâ
Ol hidîv-ı kâm-bahşın cûdu ahyânâ mıdır
- 3976 Kân nedir kim ol hudâvendin ola gencînesi
Cevheri bî-müzd ü minnet âleme yağmâ mıdır

- 3977 Pür-hüner hâkân-ı dânişver ki mihr-i âsmân
Çekdiği tıgrâya şâyân beyza-i tıgrâ mıdır
- 3978 Öyle tıgrâdır o kim fermân-revâ-yı kâinât
Ana pervîn-i felek şâyeste bir imzâ mıdır
- 3979 Öyle kim hatt-ı celisinde metânet noktasın
Her gören der kûhsâr-ı âlem-i manâ mıdır
- 3980 Hurdesinde gizli nûnu görse ger Behzâd der
Nokta-i mevhûme mi yâ hod fem-i havrâ mıdır
- 3981 Hak taâlâ cismini halk etmiş istidâddan
Sorma kim her bir hünerde kudreti bâlâ mıdır
- 3982 Husrevâ bu keyf ile Nefî geçeydi destime
Bildirirdim ana meydân-ı hüner tenhâ mıdır
- 3983 Gösterirdi âsmân ol müddeî-i gâfile
Şi'r-i İzzet mi felekde kevkeb-i şirâ mıdır
- 3984 İddiâ-yı şâiriyyet pek kolaydır lâf ile
Bilmedikden sonra maksad söz müdür manâ mıdır
- 3985 Hâmesi gâhî asâ geh ejdehâlık etse de
Kim ki Musâ'yım diye sâhib-yed-i beyzâ mıdır
- 3986 Şâhid-i bâzârdır etfâl-i kilki sâirin
Zâde-i tabım gibi mahdûm-ı müstesnâ mıdır
- 3987 Kadr-i memdûhumdan istidlâl ederler kadrimi
Yani her şâhım diyen şâh-ı cihân-ârâ mıdır
- 3988 Şâir-i muciz-beyânım istemez lâf u güzâf
İddiâ-yı hikmet eylersem deme davâ mıdır
- 3989 Destimi kıldım güşâde eyleyip hatm-i kelâm
Kim duâ-yı şâh-ı âlem her sözün encâmıdır
- 3990 Böyle şâha kudsîyân âmîn-h'ân-ı şevk olur
Her duâ da müstecâb-ı âlem-i bâlâ mıdır
- 3991 Husrev-i gerdûn-serîri kıl İlâhî ber-devâm
Tâ denildikce sipihre böyle pâ-ber-câ mıdır
- 3992 Hâmenin igrâkına haml eyleyen eyler hatâ
Bu duâ hâşâ baîd-i kudret-i Mevlâ mıdır
- 3993 Kasîdem dahi bulmamışdı hitâm
Göründü duâ gibi savb-ı merâm
- 3994 Fuâd'ım gelip iskele başına
Reşâd'ım sürüp başını taşına
- 3995 Erişdi semâvâta efgânımız
Görüp avdet etdi giden cânımız
- 3996 Görüp merdümün çeşmim oldu karîr

- Kim olmuş idi ağlamakdan darîr
- 3997 Bizim akla ev bulmak olmuş muhâl
Sürâgım idi eşk-i çeşm-i ıyâl
- 3998 Düşüp reh-güzâra önümce Fuâd
Yetişmez idi ardımızdan Reşâd
- 3999 Müselles idik vefk-i devlet gibi
Yol olmuşdu bâzû-yı himmet gibi
- 4000 Göründükde Fıstıklı'da hânemiz
Dedim cem ola tağılan dânemiz
- 4001 Kapısı girîbân gibi çâk olup
Sarîri veleh-bahş-ı idrâk olup
- 4002 Alev gibi çıkdı figân u enîn
Olur âşıkâ böyle müstakbilîn
- 4003 Olup şâh-ı âlem Mesîh-i zamân
Nice mürdeye eyledi bahş-ı cân
- 4004 Devâcîn-i beytim olup şâd-kâm
Gül-i kâmımız açdı nahl-i merâm
- 4005 Murâd'ı verip dâye âgûşuma
Vedâ edem az kaldı kim hûşuma
- 4006 Basıp bağrıma tıfl-ı nev-zâdımı
Figân eyledim hânede zâdımı
- 4007 Dedim ey Hudâvend-i ibret-nümâ
Cemî-i tasarrufda hikmet-nümâ
- 4008 Bu şâdî olur muydu gam olmasa
İlel halk olunmazdı em olmasa
- 4009 Ne kim cânibinden ederse zuhûr
Teşekkür ederdik olaydı şuûr
- 4010 Bu gam-hânedir derd ü dermân senin
Halâyık senin emr ü fermân senin
- 4011 Benim yok iken nakd-i cemiyyetim
Sitanbul'da oturmağa kudretim
- 4012 Etim kavrulup kendi yağı ile
Gezerken dilenci çanağı ile
- 4013 Çıkıp gurbete kalmadım bir gün ac
Gehî yufka lutf eyledin geh gülâc
- 4014 Ne kim bâb-ı lutfundan etdim recâ
Kerem etdin anı bilâ-mültecâ
- 4015 Hezârân hezârân kalıp çâresiz
Gezerken Sitanbul'da bir pâresiz

- 4016 Hased eyledi bana dehr-i denî
Kerem madeninin kerem madeni
- 4017 Küçükçekmece olsa menfâm eğer
Param yok idi almağa bir eğer
- 4018 Büyüksün ilâhî büyüksün büyük
Senin kudretin ile kalkdı bu yük

Ehibbâ ve h'îşân ile mülâkâtımızdır

- 4019 Ehibbâ birikmiş idi hânede
Eniştem idi sadr-ı kâşânede
- 4020 Öpüp dâmenin eyledim iftihâr
Degil ben eder fahr anınla kibâr
- 4021 Görüp şâd u handân h'îşânımı
Cinân gibi buldum gülistânımı
- 4022 Açıp bâl ü perrin bizim bacanağ
Uçup geldi ol murg-ı bâğ-ı salâh
- 4023 Edip tâkı burc-ı müşeyyed gibi
Tulû eyledi necm-i esad gibi
- 4024 Cebîninden öpdüm o verd-i teri
Mehâdîmin oldur hüner-perveri
- 4025 Ehibbâ olup makdemimden habîr
Gelip gitdi bi'l-cümle bay u fakîr
- 4026 Bana etdi ekser sudûr-ı kirâm
Birer âdem irsâl edip ihtirâm
- 4027 Reîs-i etibbâ-yı şâh-ı cihân
Edip dâru-yı lutfunu râyegân
- 4028 Şifâ-sâz oldu bu dil-hasteye
Rûfû etdi lutfun bu işkesteye
- 4029 Husûsâ nakîb-i şeref-menkabet
Edip bezl-i nakdîne-i mekremet
- 4030 Suâl eyledi hâtır-ı zârımı
Cinândan vasî eyledi dârımı
- 4031 Hudâ her birin müstedâm eylesin
Menâsıbdâ şâd u be-kâm eylesin
- 4032 Edip dîgerânı dahi şâd-kâm
Înâyet kılıp etdiler ihtirâm
- 4033 Füzûn eyleyip ömr-i devletlerin
Bana göstere Hak inâyetlerin
- 4034 Ricâl-i şehensâh-ı âlem dahi
Beni bilmeyenler mukaddem dahi

4035 Kusûrum dahi var ise afv edip
Reh-i pâk-i "ve'l-kâzımîn"e gidip

4036 Nevâziş edip kıldılar iltifât
Bula her biri korkdugundan necât

Atebe-i ekâbir-i devlet-i aliyyeye rû-mâl olduğumuzdur

4037 Sitanbul'a oldum yalıdan revân
Ziyâret kılındı kibâr-ı zamân

4038 Görüp her biri iltifâta sezâ
Kimisi sevincinden etdi bükâ

4039 Sitanbul'u geşt etdim ahşama dek
Girip her kapıya öpüp el etek

4040 Olundukda bu farz-ı zimmet edâ
Ne kapılar açmışdı lutf-ı Hudâ

4041 Ümîdim kesip düşmen ü dostdan
Dilerdim merâmım "heme üst"dan

4042 Çekip hânedede hırkaya başımı
Maâşım ile uydurup aşımı

4043 Bu kıtayla Mevlâ'ya etdim niyâz
N'ola eylesem baht-ı vâruña nâz

Kıta

4044 Nakl edip gördüğümüz zilleti İzzet Beg'den
Ba'zı ihvân dediler nimete etdi küfrân

4045 Eyledim Hâlet Efendi'ye duâ nefyinde
Gayret-i nimeti terk et dedi ebnâ-yı zamân

4046 Medh ü zemm eylemeden kurtulayım kullarını
Bana bî-vâsita kıl rızkımı yâ Rab ihsân

Zuhûr-ı inâyet-i ilâhiyye

4047 Gönül bu niyâza edip itinâ
Döküp âb-ı rû etmedi ilticâ

4048 Duâ-yı şehensâha meşgûl idim
Ne merdûd-ı âlem ne makbûl idim

4049 Olup şâh-ı devrâna ilhâm-ı Hak
Yine bendesin lutfu gördü ehak

4050 Demişdim ki ben bende-i sâdıkım
Degil kahrına lutfuna lâyıkıım

4051 Degildi o davâ berây-ı suhan
Zuhûr etdi bir yıl geçip geçmeden

**Kahramân-ı İskender-tüvân efendimizin
yek-süvâr menziline nasb-ı nişân buyurdıklarıdır**

- 4052 Alıp şâh-ı devrân kemânın ele
Yine verdi meydâna bir velvele
- 4053 Siperlik edip tabla-i âsmân
Yed-i iktidârında gördü cihân
- 4054 Edip mihri zih-gîr zâl-i felek
Bu takrîb ile destin öpmek gerek
- 4055 Olup hayt-ı ebyaz kemânında zih
Arab kerd tahsîn Acem güft zih
- 4056 Edip gamze-i zühreyi pîş-rev
Dil-i mâha açdı yine dâğ-ı nev
- 4057 Turup yek-süvâra o Haydar-tüvân
Hevâcı idi Rüstem-i Dâstân
- 4058 Bekâda Yalân'a düşüp havf-ı cân
Nerîmân firâr etdi dersem inan
- 4059 Kemânın çekip gûşunu gûşuna
Ziyân verdi İskender'in hûşuna
- 4060 Edip gûş âvâze-i yâ Hak'ı
Getirmişdi îmân hezârân şakî
- 4061 Murâd etdiği menzile kondu tîr
Fezâda tükendigi yerde mesîr
- 4062 Siphri murâd eylese aşırır
Bulan tîrini aklını şaşırır
- 4063 O şâhın bu menzilde kesb-i yedi
Hisâb oldu bin seksen ile yedi
- 4064 Atıp sehm-i fermân o Zâl-i zamân
Ser-i tâk-ı eflâke dikdi nişân
- 4065 Bana emr olundu bu târîh-i tâm
Tamâm oldu Mihnet-keşân ve's-selâm

Târîh

- 4066 Bu menzilgâh kim İsfendiyâr-ı husrevân dikdi
Kıyâs etme adflin âleme bir pehlevân dikdi
- 4067 Degil seng-i nişân ol nahl-bend-i gülşen-i himmet
Fezâ-yı kâm-rânîde aceb serv-i revân dikdi
- 4068 Hirâsân öyle kim tîr-i kazâ-tesîri havfından
Degildir mihr ü meh çeşmin fezâyâ âsmân dikdi
- 4069 Bozunca yek-süvâr-ı kihteri bir tîr-i hâkiyle
Verâ-yı Kâf'a derlerse inan ol şeh nişân dikdi

- 4070 O mihr-i burc-ı şevket eyleyip tayîn-i menzilgâh
Amûd-ı subhunu cây-ı nişâna hâverân dikdi
- 4071 Düşün bu menzili bir kerre bin seksen yedi gezdir
Ne Tûrânîlerin makdûru ne İrâniyân dikdi
- 4072 Demiş var ise cânı imtihân olsun hadengimle
Sözü Efrâsyâb'a hazret-i sâhib-kırân dikdi
- 4073 Girîbân-ı şehenşâhân-ı eslâf oldu dâmânı
O dem kim sevb-i şevket ana hayyât-ı zamân dikdi
- 4074 Şehenşâh-ı zamâna kaldı ol peymâne-i leb-rîz
Cihânda câm-ı adli sanma kim Nûşirevân dikdi
- 4075 Duâ-yı nusretiyle ol hidîvin sâilânâsâ
İcâbet-hâne-i Hakk'a asâyı kudsiyân dikdi
- 4076 Şikâr olsun adûlar ol hizebr-i kûh-ı temkîne
Desinler kuyrugun semt-i cahîme düşmenân dikdi
- 4077 Nola İzzet güherle vezn olunsa seng-i târîhi
Nişânı yek-süvâra kahramân Mahmûd Hân dikdi
(= 1240)
- 4078 Bu günlerde geçseydi Talat ele
Ana kendimi bildirirdim hele
- 4079 Demiş idi magdûb-ı şâh-ı cihân
Ana lafz-ı hâşâyı yazdım hemân
- 4080 Bilirdim ki ol şâh-ı sâhib-atâ
Beni bir günâh ile etmez fedâ
- 4081 Eğer bilmeseydim o şâhı kerîm
Sitanbul'a gelmezdim Allâh alîm
- 4082 Düşerdim alıp başımı tağlara
Nigâh etmeyip bağçe vü bâğlara
- 4083 Görüp vech-i pâkin olan sonra dûr
Görür mü bu âlemde rûy-ı sürûr
- 4084 Cihânda diğeri var mı bir mültemes
O şehsiz hayât istemem bir nefes
- 4085 Hudâ sıyt-ı ikbâlin etsin füzûn
Pür oldukca bu kubbe-i nîl-gûn
- 4086 Zamîme ola ömrüne ömr-i Nûh
Ola nâmı bu arsada bü'l-fütûh
- 4087 Ne rütbe senâ eylesem azdır
Ne gûne duâ eylesem azdır
- 4088 Benim gönlümü etdiği gibi şâd
Ede mülkûn âbâd Rabb-i ibâd

- 4089 Bu macûn-ı cevher bulup ihtitâm
Ana vasf-ı şâh oldu “miskû'l-hitâm”
- 4090 Budur berg-i sebz-i diyâr-ı Keşan
Nola olsa makbûl-i mihnet-keşân
- 4091 Degildir Kazıkcı hikâyâtı bu
Degildir Suyolcu rivâyâtı bu
- 4092 Degildir Zenân-nâme'si Fâzıl'ın
Degil kârı zen-pâre-i câhilin
- 4093 Bu dûşîzenin fethine er gerek
O er de benim gibi server gerek
- 4094 Bu manzûme Şeh-nâme'ye pûrdur
Kalem Rüstem'im derse mazûrdur
- 4095 Bunu eyleme hamselerle kıyâs
Benim pençem anlardan etmez hirâs
- 4096 Degil yalnız bu bahâr u hazân
Degil yalnız vasf-ı şeh-i Keşan
- 4097 Yazıldı niçe fıkra-i la-yuad
Degil sâir âsârveş yek-saded
- 4098 Ne vâdîden açsan eder kıl ü kâl
Olur herkesin derdine hasb-i hâl
- 4099 Bizim mefsedet-pîşegân-ı zamân
Ararlar içinde merâm-ı nihân
- 4100 Düşerler reh-i dîgere serserî
Hikâyât-ı manzûme kalır geri
- 4101 Çogalır görür ise kör gözleri
Aceb bunda hikmet nedir sözleri
- 4102 Ne derse desin bir alay har-nijâd
Be-hakk-ı Hudâ budur ancak murâd
- 4103 Beyân eyledim sadme-i devleti
Garîbin bu mikdâr olur hıdmeti
- 4104 Nice jâj-hâyânı terhîb eder
Rızâ-yı hümâyûna tergîb eder
- 4105 Görürler içinde olan mihneti
Tefekkür ederler gam-ı gurbeti
- 4106 Bilenler yeniden teeddüb eder
Dahi görmeyenler taaccüb eder
- 4107 Sakın gelmesin terbiyemden aceb
Edebsizden öğrenmelidir edeb

Özr-h'âhî-i günâh ve münâcât ez-dergâh-ı İlâh

- 4108 İlâhî bu ser-mest-i câm-ı günâh
Bilir bilmez evkâtın etdi tebâh
- 4109 Gehî ibtilâ-yı cüvânân ile
Gehî iştikâ-yı rakîbân ile
- 4110 Hat-âver olup sevdiğim dil-berân
Hatâ etdigim âhir oldu ayân
- 4111 Harâb oldu âbâd zann etdigim
Tarîk-i dalâlet imiş gitdigim
- 4112 Olup bâd-berk-i hevâ vü günâh
Dilim oldu tıflân elinde tebâh
- 4113 Edip dâne-i hâl-i anber-nümûn
Beni dâm-i zülf-i siyâha zebûn
- 4114 Şaşırdım üşüp dil-berân başıma
Düşüp zulmet-i gîsuvân başıma
- 4115 İlâhî bu mahrûm-i bezm-i sevâb
Ne meclislere eyledi intisâb
- 4116 Hoş-âmedler etdi bilip bilmeyip
Ne tahsînler kıldı irkilmeyip
- 4117 Olup ber-taraf cümle mânend-i h'âb
Hayâli fakat vermede ıztırâb
- 4118 Edip dîgerâna münâcâtımı
Telef eyledim böyle evkâtımı
- 4119 Değişdim senin bâbını dîgere
Hacâletle girsem revâdır yere
- 4120 Edip dest-i kahrın o ebvâbı sed
Dönüp bâbına eyledim anı red
- 4121 Yine bakmadın rûy-ı isyânıma
Garîm etmedin nimetin cânıma
- 4122 Tehî bilmedik Rabb-i ekrem seni
Ben olsam kabûl eylemezdim beni
- 4123 Yed-i kudretinle edip gûş-mâl
Zuhûr etdi reng-i celâl ü cemâl
- 4124 Celâlinle düşdüm reh-i gurbete
Cemâlinle erdim nice nimete
- 4125 Ez-ân-cümle bu rişte-i pür-güher
Verip ikd-ı pervîne hıkd u keder
- 4126 Bulup dest-i ihsânın ile nizâm
Kerem eyledin ana hüsn-i hitâm

- 4127 İlâhî bu mahbûbe-i nâzenîn
Ola nâbe-kârân elinden emîn
- 4128 Benim bikr-i fikrimdir ol verd-i ter
Anı etme nâ-ehl elinde heder
- 4129 Olursa eğer bir maârif eri
Anı kıl bu mestûrenin şevheri
- 4130 Geçerse eğer dest-i innîne ol
Bulunmaz anın halline sonra yol
- 4131 Maânîsinin olmayıp vâsılı
Bozar hâmesiyle anı hâsılı
- 4132 İlâhî bu nev-bâf-ı mâkû-yı kıl
Bula bahye-i ehl ile hüsn-i silk
- 4133 Ümîd ol ki dânişverân-ı zamân
Yazıp nüshasın edeler râyegân
- 4134 İlâhî masûn et o insândan
K'anın olmaya farkı hayvândan
- 4135 Girip dest-i cühhâle bu nev-perend
Meded çâk çâk olmaya bend bend
- 4136 Verip dest-i hayyât-ı nâ-kâbile
Nasîb eyleme hilat-i câhile
- 4137 Girîbânına yâ mürekkebe döker
Ya dâmân-ı şîrâzesinden söker
- 4138 Döner eski kirpâsa bu nev libâs
Görenler sanır ya zibil yâ pelâs
- 4139 Bulup İzzetâsâ bir ehl-i kemâl
Ederse bu mahbûbe arz-ı cemâl
- 4140 Olup şâne-zen zülf-i hoş-bûyuna
Hemân urmıya aybını rûyuna
- 4141 Teennî ede hakk u tashîhde
Teemmül kıla dahl ü takbîhde
- 4142 Bulursa eğer aybını gayb ede
Fakat vaz-ı yek noktada reyb ede
- 4143 Girerse eğer câhilin destine
Ne zahmet anın kıl-i işkestine
- 4144 Edip ba'zı tamîr ü termîmi derc
Bu kâşâneyi etmeye herc ü merc
- Hitâm-ı mesnevî bâ-evsâf-ı pâk-i cenâb-ı Mevlevî**
- 4145 Yetip himmet-i hazret-i Mevlevî

- Tamâm oldu manzûme-i mesnevî
- 4146 Nola zikrim olduysa leyl ü nehâr
Hudâvendgâr u Hudâvendgâr
- 4147 Efendim penâhım zahîrimdir ol
Düşersem ne gam dest-gîrimdir ol
- 4148 Himem madenidir kerem kânıdır
Benim varsa nem mahz-ı ihsânıdır
- 4149 Gülistânının berg-i güstâhıyam
O nahl-i kerem ben kuru şâhıyam
- 4150 O mirâta sedd olmayaydı günâh
Olurdum dahi mazhar-ı feyzi âh
- 4151 Kapısında buldu cihân terbiyet
Cihân şöyle tursun segân terbiyet
- 4152 Katı herze-revdir bu kelb-i deri
Arar vâdî-i masıyet serserî
- 4153 Yazıklar yazıklar o bî-çâreye
Uyup gitmede nefsi-i emmâreye
- 4154 Çıkar yol degil gitdiği yol dirîg
Dönüp de düşünmez mi bir yol dirîg
- 4155 Sefid oldu mûy-ı siyâhı sefid
Nolur olsa rûy-ı siyâhı sefid
- 4156 Geçip destine öyle bir mültecâ
Revâ mı anı böyle etmek hebâ
- 4157 Yazık İzzet'e bilmiyor izzetin
Ayağı ile depmede devletin
- 4158 Zamân âher oldu hem âhir zamân
Verir mi bana sûd Mihnet-keşân
- 4159 Bitirdim kelâmı sözüm kalmadı
Recâ-yı merâma yüzüm kalmadı
- 4160 Olup bâb-ı ihsânına rûy-mâl
Edem şu iki beyt ile arz-ı hâl
- 4161 Eyâ mürşid-i müslümân u keşîş
Dem-i vâ-pesînimde olsun yetiş
- 4162 Acıtma beni geçmiş evkâtıma
Nihâyet bula hüsn ile hâtıme

Târîh

- 4163 Evrâk içinde cevher-i bügsiste-târveş
Kalmışdı böyle bir eserim nâ-bedîd-i dehr

- 4164 Tahrîr ü ceme eyledi himmet iki edîb
Her birine denilse sezâdır reşîd-i dehr
- 4165 Ol neyyireyn-i burc-ı cemâl eyleyip beyâz
Manzûmem oldu hak bu ki mihr-i cedîd-i dehr
- 4166 Yazdı bedâheten iki târîh-i cevheri
Lâyık degil mi hâmeye dense ferîd-i dehr
- 4167 Mihnet-keşân-ı İzzet'i cem eyledi Hüsâm
Tahrîr kıldı nüshasın evvel Vahîd-i dehr 1240